



# 古典文獻研究輯刊

七編

潘美月・杜潔祥 主編

第 15 冊

《易程傳》集校

毛 炳 生 集校



#### 國家圖書館出版品預行編目資料

《易程傳》 集校 毛炳生 集校 - 初版 - 台北縣永和市:花木 蘭文化出版社,2008 [民97]

序 2+ 目 2+302 面: 19×26 公分

(古典文獻研究轉刊 七編: 第15 册)

ISBN: 978-986-6657-65-8(精裝)

1. 易經 2. 注釋

121.12

97012683



ISBN: 978-986-6657-65-8

# 古典文獻研究輯刊

七 編 第十五冊

《易程傳》集校

作 者 毛炳生

主 編 潘美月 杜潔祥

總編輯 杜潔祥

企劃出版 北京大學文化資源研究中心

出 版 花木蘭文化出版社

發 行 所 花木蘭文化出版社

發 行 人 高小娟

聯絡地址 台北縣永和市中正路五九五號七樓之三

電話: 02-2923-1455 / 傳真: 02-2923-1452

電子信箱 sut81518@ms59.hinet.net

版 2008年9月 初

價 七編 20 冊 (精装) 新台幣 31,000 元 版權所有・請勿翻印 T

《易程傳》集校

毛炳生 集校

#### 作者簡介

毛炳生,廣東惠陽人,民國四十三年生。台灣師範大學國文系畢業,香港新亞研究所中國文學 組碩士。曾任致理技術學院兼任講師、台北縣教育審議委員會委員,現任台北縣丹鳳國民中學 教師兼補校主任。著作有《曹子建的詩經淵源研究》、《教師會何去何從》等書。

#### 提 要

《易程傳》又稱《程氏易傳》、《伊川易傳》、《周易程氏傳》,北宋河南程頤正叔撰。程子自謂六十歲後始著書,〈傳序〉自稱作於哲宗元符二年,時六十七矣。其後學者請授,謂尚覬有少進,不肯示人,其傳《易》態度謹慎如此。及寢疾,始以授門人張釋、尹焞。未幾釋卒,其書散亡。門人楊時後得其書,謂錯亂重複,幾不可讀,乃始校定。南宋呂祖謙謂其所藏舊本出尹和靖(烽)家,標注皆和靖親筆。並與朱元晦所訂本與一二同志手自參定,其異同兩存之,並刊行於學官。今所傳《覆元至正》本卷一有「晦庵先生校正」字,即呂氏謂朱元晦所訂本耶?或坊間之假借爾?存疑待考。頤長子端中謂《易傳》六卷,《至正》本即六卷也。

惟《至正》本桀誤頗多,又幾經翻印,文字模糊,難以卒讀,校者在點閱之餘,遂立志校正。先取《四庫全書》本參校,再輔以黃忠天《周易程傳註評》、梁書弦《程氏易傳導讀》、蘇俊源《白話易程傳》及王孝魚《二程集》等。黃、蘇之作,以《至正》為底本,餘皆四卷本也。各本皆有可取,其異同並存之,或有拾遺補缺之功焉。

尹焞曰:「先生平生用意,惟在《易傳》,求先生之學,觀此足矣。」欲深究程子易學之功與 理學之要,《易程傳》不得不讀也。本書附錄程子及其書相關資料,俾便讀者查閱。

# 凡例

- 一、本書《易程傳》之點校工作,係以清光緒十年(1884)《古逸叢書》覆元至正 九年(1349)積德書堂刊本爲底本(簡稱「底本」),加上現行新式標點符號 而成。該底本爲臺灣世界書局民國七十五年(1986)十月出版(五版)。
- 二、主參校本為台灣商務印書館《文淵閣四庫全書》之《伊川易傳》;再輔以黃忠 天《周易程傳註評》(2006 三版)與梁書弦《程氏易傳導讀》(簡體字,2003 一版)。(以下簡稱《四庫》本、《註評》本及《導讀》本)
- 三、《註評》本以積德書堂刊本爲底本;參校本爲明福建巡按吉澄校刊本(簡稱《吉澄》本)、明嘉靖間建寧刊本、清康熙五十四年(1715)武英殿原刊本(簡稱《武英殿》本)。《導讀》本以《四庫》本爲底本;參校本爲清康熙二十五年(1686)呂留良刻本《二程全書》之《伊川易傳》(簡稱《呂》本)、《四庫全書》中《周易折中》之《程傳》、清同治五年(1866)李鴻章題跋之《程氏易傳》刻本(簡稱《李》本)、近人王孝魚《二程集》中之《周易程氏傳》(1981中華書局)。由於兩書所參校之典籍來源各異,均極具參考價值,在此敘明,不敢掠前賢校勘成果之美也。又:王孝魚《二程集》及蘇俊源《白話易程傳》(2004台灣多識界圖書文化有限公司),一併列入參校。
- 四、至於標點方面,以現行新式標點符號斷句;惟不用專名號、破折號。爲適應 電腦作業,並符時代趨勢,書名號以《 》表示。如書名與篇名並列者, 中間則以圓點,區隔,如《詩,載驅》是也。
- 五、現存《易程傳》有六卷本與四卷本兩種,其祇解六十四卦與《文言》、《彖》、《象》,而以《序卦》分置於諸卦之首,則皆無別也。其解缺《繫辭》、《說卦》、《雜卦》,或以爲《程傳》「草具未成」(楊時語)故也。前賢以朱熹《易本義》補入,遂有作九卷者,或作十卷者,殊非程氏本意,故一概不取,以復其舊。

- 六、自來學者專家,多反對擅改古書,是爲校書不易之法。校者秉承先賢遺訓,於點校時亦不輕改一字,改必有據,悉於頁下註明。底本頗多俗體字、簡字,如躰(體)、寇(寇)、冠(寇)、兒(稅)等,點校時皆直接更正爲今日通行之字體,不另註明。至於古今字,通假字,同字異體等,非有必要,則不另校出,悉依底本。而底本於爻畫頗多桀誤,校者一一更正,亦不另註明,以免繁瑣之病也。宋諱字亦不另校出。
- 七、爲求閱讀方便,本書於點校時又訂定以下兩點原則:
  - 1. 《傳》文依其長短及內容,作適度之分段;
  - 2. 《傳》文原有之校字,一律移作頁下,凡未註明出處者,皆底本之原校字 也。
- 八、校書在求善本;清人張之洞謂:「爲前輩通人用古刻數本,精校細勘,不譌不缺之本也。」簡言之,無譌文奪句之本,即爲善本。《註評》本與《導讀》本,精於註評與導讀,而略於點校;校者疏才淺學,不揣翦陋,欲戮力於《程傳》精義,而點校乃爲入門之階梯而已,非敢與前賢並肩也。點校書成,如於《程傳》有寸功,亦不及前賢研究成果於萬一。
- 九、本書自斷句、繕打、點校至定稿,皆校者於課餘獨力完成,未假手於人;如 尚有錯漏,不敢卸責,而祈幸博雅君子之賜正也。
- 十、書末附錄相關資料供參,俾便讀者翻閱也。

毛炳生謹識 民國九十七年(2008)二月五日

# 易傳序

易,變易也,隨時變易以從道也。其爲書也,廣大悉備,將以順性命之理, 通幽明之故,盡事物之情,而示開物成務之道也。聖人之憂患後世,可謂至矣。 去古雖遠,遺經尚存;然而,前儒失意以傳言,後學誦言而忘味,自秦而下,蓋 无傳矣!予生千〔註〕〕載之後,悼斯文之湮晦,將俾後人沿〔註 2〕流而求源,此 《傳》所以作也。

《易》有聖人之道四焉:以言者尚其辭,以動者尚其變,以制器者尚其象,以卜筮者尚其占。吉凶消長之理,進退存亡之道,備於辭;推辭考卦,可以知變,象與占在其中矣。君子居,則觀其象而玩其辭;動,則觀其變而玩其占。得於辭,不達其意者有矣;未有不得於辭,而能通其意者也。

至微者,理也;至著者,象也。體用一源,顯微无間,觀會通以行其典禮,則辭无所不備。故善學者,求言必自近;易於近者,非知言者也。予所傳者,辭也;由辭以得(註3)意,則有(註4)乎人焉。有宋元符二年己卯正月庚申,河南程頤正叔序(註5)。

<sup>[</sup>註 1] 一有「餘」字。

<sup>[</sup>註 2] 《二程集》:一作「泝」。

<sup>[</sup>註 3] 《二程集》有「其」字。

<sup>[</sup>註 4] 《二程集》作「在」。並小註:一作「存」。

<sup>[</sup>註 5] 《二程集》:《徐》本「序|上有「謹|字。

	凡 例 易傳序	
	《周易》	上經 卷第一 1
	乾	<del></del>
	坤	<u>= 10</u>
E	屯	<u>=</u> 17
H	蒙	四 21
	需	五 · · · · · · · · · · · · · · · · · · ·
	訟	☆ 29
_	師	七33
次	比	Д
•/	小畜	九·············42
	履	+ 46
	《周易》	上經 卷第二 51
	泰	<del>+51</del>
	否	+= 56
	同人	+三
	大有	十四 63
	謙	十五
	豫	+六······ 71
	隨	十七76
	蠱	十八 79
	《周易》	上經 卷第三 85
	臨	十九
	觀	<u>_</u> +88
	噬嗑	<u>-+92</u>
	賁	<u>_+</u>
	剝	二十三102

二十四 .....

三十二 ······142 三十三 ------146

三十四 -------150

卷第四………………137

復 无妄 大畜

頣 大渦 習坎 離 《周易》

> 咸 恒

遯


大壯

下經

晉	三十五	153
明夷	于大· ·· · · · · · · · · · · · · · · · · ·	10,
家人	三十七 · · · · · · · · · · · · · · · · · · ·	161
睽	三十八	165
蹇	三十九	171
解	四十	175
《周易》		181
損	四十一	181
益	四十二	186
夬	四十三 · · · · · · · · · · · · · · · · · · ·	
姤	四十四	196
萃	四十五 · · · · · · · · · · · · · · · · · · ·	200
升	四十六	
木	四十七	209
井	四十八	214
革	四十九	218
鼎	丘十	223
《周易》	下經 卷第六	
震	丘	
艮	五十二	
漸	五十 ···········	
歸妹	五十四	244
豐	五十五	248
旅	五十六	254
巽		.257
兌	五十八	
渙	五十九	263
節		267
中孚	六十一	
小過	六十 7	
既濟	六十三	
未濟	六十四	281
附錄一	《宋史·程頤傳》···································	285
附錄二	馬端臨《文獻通考・伊川易傳》	287
附錄三		
	《四庫全書・伊川易傳提要》	
四郊工.	丁晏《周易述傳・書後》	293
	〈楊守敬記〉	297
後 記		299

# 《周易》上經 卷第一

程頤傳



謂乾。

乾:元、亨、利、貞「註2。

上古聖人,始畫八卦,三才之道備矣。因而重之,以盡天下之變,故六畫而成卦。 重乾爲乾。乾,天也。天者,天之形體;乾者,天之性情。乾,健也,健而无息之

夫天,專言之,則道也,天且弗違是也。分而言之,則以形體謂之天;以上宰謂之帝;以功用謂之鬼神;以妙用(註3)謂之神;以性情謂之乾。

乾者,萬物之始,故爲天、爲陽、爲父、爲君。

元、亨、利、貞,謂之四德。元者,萬物之始;亨者,萬物之長;利者,萬物之遂; 貞者,萬物之成。唯乾、坤有此四德,在他卦,則隨事而變焉。故元,專爲善大; 利,主於正固;亨、貞之體,各稱其事。四德之義,廣矣!大矣!

乾,竭然反。亨,許庚反。

<sup>[</sup>註 1] 《程傳》從屯卦起,各卦均先列卦名,再引《序卦》,唯乾、坤二卦無卦名。爲求體 例一致,故增補乾、坤卦名。

<sup>(</sup>註 2) 《周易》經文,各家釋義固不盡相同,句讀亦然。本書之經文句讀,悉以《程傳》 釋義爲本。《程傳》根據《彖傳》釋「元亨利貞」爲四德,故斷之爲四,各以頓號區 隔。

<sup>[</sup>註 3] 一无「用」字。凡未註明出處,皆爲底本之原校文。

初九:潛龍,勿用。

下爻爲初。九,陽數之盛,故以名陽爻。

理, 无形也, 故假象以顯義。乾以龍爲象。龍之爲物, 靈變不測, 故以象乾道變化、陽氣消息、聖人進退。

初九在一卦之下,爲始物之端,陽氣方萌。聖人側微,若龍之潛隱,未可自用,當 晦養以俟時。

潛,捷鹽反。

九二:見龍在田,利見大人。

田,地上也。出見於地上,其德已著。以聖人言之,舜之田漁時也。

利見大德之君,以行其道; 君亦利見大德之臣,以共成其功; 天下利見大德之人, 以被其澤。大德之君,九五也。

乾、坤純體,不分剛柔,而以同德相應。

見,賢遍反。利見,如字;下皆同。

九三:君子終日乾乾,夕惕若厲,无咎。

三雖臣(註4)位,已在下體之上,未離於下而尊顯者也。舜之玄德升聞時也。

日夕不**懈**而兢惕,則雖處危地而无咎。在下之人,而君德已著,天下將歸之,其危懼可知。雖言聖人事,苟不設戒,則何以爲教?作《易》之義也。

惕,他歷反。厲,力世反。无,音無。咎,其九反。《易》內同。

九四:或躍在淵,无咎。

淵,龍之所安也。或,疑辭,謂非必也;躍不躍,唯及時以就安耳。聖人之動,无 不時也。舜之歷試,時也。

躍,羊灼反。

九五:飛龍在天,利見大人。

進位乎天位也。聖人既得天位,則利見在下大德之人,與共成天下之事。天下固利 見夫大德之君也。

<sup>[</sup>註 4] 據《導讀》本,《呂》本、《李》本「臣」作「人」。《二程集》亦作「人」。

上九: 亢龍, 有悔。

九五者,位之極中正者,得時之極,過此則亢矣。上九至於亢極,故有悔也。有過 則有悔;唯聖人知進退存亡而无過,則不至於悔也。

**亢,** 苦浪反。

用九:見群龍,无首,吉。

用九者,處乾剛之道,以陽居乾體,純乎剛者也。剛柔相濟爲中,而乃以純剛,是 過乎剛也。

見群龍,謂觀諸陽之義,无爲首則吉也。以剛爲天下先,凶之道也。

彖曰:大哉乾元!萬物資始,乃統天。雲行雨施,品物流形。大明終始, 六位時成。時乘六龍以御天。乾道變化,各正性命,保合大 (註 5)和,乃 利貞。首出庶物,萬國咸寧。

卦下之 [註 6] 辭爲《彖》; 夫子從而釋之, 通謂之《彖》。《彖》者, 言一卦之義; 故 知者觀其《彖辭》, 則思過半矣。

大哉乾元,贊乾元始萬物之道大也。四德之元,猶五常之仁;偏言則一事,專言則 包四者。

萬物資始,乃統天,言「元」也。乾元,統言天之道也。天道始(註7)萬物(註8),物資始於天也。

雲行雨施,品物流形,言「亨」也。天道運行,生育萬物也。

大明天道之終始,則見卦之六位,各以時成。卦之初終,乃天道終始。乘此六爻之時,乃天運也。

以御天,謂以當天運。乾道變化,生育萬物,洪纖高下,各以其類,各正性命也。 天所賦爲命,物所受爲性。

保合大和,乃利貞:保,謂常存;合,謂常和。保合大和,是以「利」且「貞」也。 天地之道,常久而不已者,保合大和也。

<sup>[</sup>註 5] 《四庫》本作「太」,古「大」、「太」二字通用,非有必要,不再校出。

<sup>[</sup>註 6] 一无「之」字。

<sup>[</sup>註 7] 《註評》本作「始生」,未明出處。

<sup>[</sup>註 8] 一更有「萬」字。校者按:即另一版本多一「萬」字,與下句連讀。

天爲萬物之祖, 王爲萬邦之宗。乾道首出庶物而萬彙亨, 君道尊臨天位而四海從; 王者體天之道,則萬國咸寧也。

## 象曰:天行健,君子以自彊不息。

卦下《象》,解一卦之象;爻下《象》,解一爻之象。諸卦皆取象以爲法。

乾道覆育之象至大,非聖人莫能體,欲人皆可取法也,故取其行健而已。至健,固 足以見天道也。君子以自彊不息,法天行之健也。

#### 潛龍勿用,陽在下也。

陽氣在下,君子處微,未可用也。

#### 見龍在田,德施普也。

見於地上,德化及物,其施已普也。

# 終日乾乾,反復道也。

進退動息,必以道也。

復,芳服反。

# 或躍在淵,進无咎也。

量可而進(註9),適其時則无咎也(註10)。

# 飛龍在天,大人造也。

大人之爲,聖人 (註11) 之事也。

造,徂早反。王肅:七到反。

# 亢龍有悔, 盈不可久也。

盈則變,有悔也。

## 用九,天德不可為首也。

用九,天德也。天德陽剛,復用剛而好先,則過矣。

<sup>[</sup>註 9] 一有「也」字。

<sup>[</sup>註10] 一无「也」字。

<sup>[</sup>註11] 一无「人」字。

文言曰:元者,善之長也;亨者,嘉之會也;利者,義之和也;貞者,事之幹也。

它卦,《彖》、《象》而已;獨乾、坤更設《文言》,以發明其[註12]義,推乾之道,施於人事。

元、亨、利、貞,乾之四德。在人,則元者,眾善之首也;亨者,嘉美之會也;利 者,和合於義也;貞者,幹事之用也。

長,上聲。幹,古旦反。

#### 君子體仁,足以長人;

體法於乾之仁,乃爲君長之道,足以長人也。體仁,體元也。比而效 (註 13) 之,謂之體。

#### 嘉會,足以合禮;

得會通 (註 14) 之嘉,乃合於禮也。不合禮則非理,豈得爲嘉?非理,安有亨乎?

# 利物,足以和義;

和於義,乃能利物。豈有不得其宜,而能利物者乎?

## 貞固,足以幹事。

貞(註15)固,所以能幹事也。

君子行此四德者,故曰:「乾:元、亨、利、貞」。

行此四德,乃合於乾也。

初九曰「乾龍,勿用」,何謂也?子曰:「龍德而隱者也。不易乎世,不成乎名,遯世无悶。不見是而无悶,樂則行之,憂則違之,確乎其不可拔,潛龍也。」

自此以下,言乾之用,用九之道也。

初九,陽之微,龍德之潛隱,乃聖賢之在側陋也。守其道,不隨世而變;晦其行,

<sup>[</sup>註12] 一作「文」。

<sup>[</sup>註13] 《註評》本作「效法」,未明出處。

<sup>[</sup>註14] 《註評》本無「通」字。

<sup>[</sup>註15] 一作「正」。

不求知於時。自信自樂,見可而動,知難而避。其守堅不可奪,潛龍之德也。 樂,音洛。確,苦學反。

九二曰「見龍在田,利見大人」,何謂也?子曰:「龍德而正中者也。庸言之信,庸行之謹,閑邪存其誠,善世而不伐,德博而化。《易》曰:『見龍在田,利見大人。』君德也。」

以龍德而處正中者也。在卦之正中,爲得正中之義。

庸信、庸謹,造次必於是也。既處无過之地,則唯在閑邪。邪既閑,則誠存矣。

善世而不伐,不有其善也。德博而化,正己而物正也。皆大人之事,雖非君位,君 之德也。

行,下孟反。邪,以嗟反。

九三曰「君子終日乾乾,夕惕若。厲,无咎」,何謂也?子曰:「君子進德脩業。忠信,所以進德也;脩辭立其誠,所以居業也。知至至之,可與幾也。知終終之,可與存義也。是故居上位而不驕,在下位而不憂;故乾乾因其時而惕,雖危无咎矣。」

E居下之上,而君德已著,將何爲哉?唯進德脩業而已。內積忠信,所以進德也; 擇言篤志,所以居業也。

知至至之,致知也。求知所至,而後 [註 16] 至之。知之在先,故可與幾,所謂「始條理者,知之事也」。

知終終之,力行也。既知所終,則力進而終之。守之在後,故可與存義,所謂「終條理者,聖之事也」。此學之始終也。君子之學如是,故知處上下之道而无驕憂,不懈而知懼,雖在危地,而无咎也。

幾,音機。

九四曰「或躍在淵,无咎」,何謂也?子曰:「上下无常,非為邪也。進退无恆,非離群也。君子進德脩業,欲及時也,故无咎。」

或躍或處,上下无常;或進或退,去就從宜。非爲邪枉,非離群類;進德脩業,欲 及時耳。時行時止,不可恆也,故云「或」。

<sup>(</sup>註16) 一无「後」字。

深淵者,龍之所安也。在淵,謂躍就所安。淵在深而言躍,但取進就所安之義。或, 疑辭;隨時而未可必也。君子之順時,猶影之隨形;可離,非道也。

恆,胡登反。離,力智反。

九五曰「飛龍在天,利見大人」,何謂也?子曰:「同聲相應,同氣相求。 水流濕,火就燥;雲從龍,風從虎,聖人作而萬物覩。本乎天者,親上; 本乎地者,親下,則各從其類也。」

人之與聖人,類也。 丘以龍德升尊位,人之類莫不歸仰,況同德乎?上應於下,下 從於上,同聲相應,同氣相求也。

流濕就燥,從龍從虎,皆以氣類,故聖人作,而萬物皆覩。上既見下,下亦見上。物,人也。占語云:「人物、物論。」謂人也。

《易》中「利見大人」,其言則同,義則有異。如訟之「利見大人」,謂宜見大德中正之人,則其辯明,言在見前。乾之二、五,則聖人既出,上下相見,共成其事。所利者,見大人也,言在見後。本乎天者,如日月星辰;本乎地者,如蟲獸草木。陰陽各從其類,人物莫不然也。

上九曰「亢龍,有悔」,何謂也?子曰:「貴而无位,高而无民,賢人在下位而无輔,是以動而有悔也。」

九居上,而不當尊位,是以无民无輔,動則有悔也。

# 潛龍勿用,下也。

此以下,言乾之時。勿用,以在下,未可用也。

# 見龍在田,時舍也。

隨時而止也。

舍, 去聲。

終日乾乾,行事也。

進徳脩業也。

或躍在淵,自試也。

隨時自用也。

#### 飛龍在天,上治也。

得位而行,上之治也。

治,直吏反。

## 亢龍有悔, 窮之災也。

窮極而災至也。

# 乾元用九,天下治也。

用九之道,天與聖人同;得其用,則天下治也。

#### 潛龍勿用,陽氣潛藏。

此以下言乾之義。方陽微潛藏之時,君子亦當晦隱,未可用也。

# 見龍在田,天下文明。

龍德見於地上,則天下見其文明之化也(註17)。

#### 終日乾乾,與時偕行。

隨時而進也。

## 或躍在淵,乾道乃革。

離下位而升上位,上下革矣。

## 飛龍在天,乃位乎天德。

正位乎上,位當天德(註18)。

## 亢龍有悔(註19),與時偕極。

時既極,則處時者亦極矣。

# 乾元用九,乃見天則。

用九之道,天之則也。天之法則,謂天道也。

或問:「乾之六爻,皆聖人之事乎?」曰:「盡其道者,聖人也;得失則吉凶存焉,

<sup>[</sup>註17] 一作「而化之」。

<sup>[</sup>註18] 一作「德」。校者按:即無「天」字。

<sup>[</sup>註19] 《二程集》作「侮」。應爲誤植。

**豈特乾哉?諸卦皆然也。」** 

乾元者,始而亨者也。

又反復詳說以盡其義。既始則必亨,不亨則息矣。

利貞者,性情也。

乾之性情也。既始而亨,非利貞,其能不息乎?

乾始,能以美利利天下;不言所利,大矣哉!

乾始之道,能使庶類生成,天下蒙其美利。而不言所利者,蓋无所不利,非可指名也;故贊其利之大,曰「大矣哉」。

大哉乾乎!剛、健、中、正、純、粹,精也。六爻發揮旁通,情也。時乘 六龍,以御天也。雲行雨施,天下平也。

大战:贊乾道之大也。

以剛、健、中、正、純、粹六者,形容乾道。精,謂六者之精極,以六爻發揮旁通, 盡其情義。乘六爻之時,以當天運,則天之功用著矣;故見(註20)雲行雨施,陰陽 溥暢。天下和平之道也。

君子以成德為行,日可見之行也。潛之為言也,隱而未見,行而未成,是 以君子弗用也。

德之成,其事可見者,行也。德成而後可施於用。初,方潛隱未見,其行未成。未成,未著也,是以君子弗用也(註21)。

行,下点反。見,腎遍反。

君子學以聚之,問以辯 [註 22 ] 之,寬以居之,仁以行之。《易》曰:「見龍在田,利見大人。」君德也。

聖人在下,雖已顯而未得位,則進德脩業而已。學聚、問辯,進德也;寬居、仁行, 脩業也。

君德已著,利見大人,而進以行之耳。進居其位者,舜、禹也;進行其道者,伊、

<sup>[</sup>註20] 一作「曰」。

<sup>[</sup>註21] 據《導讀》本,《李》本作「勿用也」。

<sup>[</sup>註22] 《四庫》本作「辨」:下同。

傅也。

辯,扶免反。

九三,重剛而不中。上不在天,下不在田,故乾乾。因其時而惕,雖危无 咎矣。

三,重剛,剛之盛也。過中而居下之上,上未至於天,而下已離於田,危懼之地也。因時順處,乾乾兢惕以防危,故雖危而不至於咎。君子順時兢惕,所以能泰也。

重,直龍反。下同。

九四,重剛而不中,上不在天,下不在田,中不在人,故或之。或之者, 疑之也,故无咎。

四,不在天,不在田,而出人之上矣,危地也。疑者,未决之辭,處非可必也。或 進或退,唯所安耳,所以无咎也。

夫大人者,與天地合其德,與日月合其明,與四時合其序,與鬼神合其吉 凶。先天而天弗違,後天而奉天時。天且弗違,而況於人乎?況於鬼神乎? 大人與天地、日月、四時、鬼神合者,合乎道也。天地者,道也。鬼神者,造化之 跡也。聖人先於天而天同之,後於天而能順天者,合於道而已。合於道,則人與鬼 神,豈能違也?

夫,音扶。先,悉焉反。

亢之為言也,知進而不知退,知存而不知亡,知得而不知喪。其唯聖人乎! 知進退存亡,而不失其正者,其唯聖人乎!

極之甚爲亢。至於亢者,不知進退、存亡、得喪之理也。聖人則知而處之,皆不失其正,故不至於亢也。

喪,息浪反。

坤下 坤上 坤

坤:元、亨、利、牝馬之貞。

坤,乾之對也;四德同,而貞體則異。乾以(註 23)剛固爲貞,坤則(註 24)柔順而(註 25)貞。牝馬柔順而健行,故取其象曰「牝馬之貞」。

牝,頻忍反。

#### 君子有攸往。

君子所行,柔順而利且貞,合坤徳也。

攸, 音由。

#### 先迷,後得,主利。

陰,從陽者也,待唱而和。陰而先陽,則爲迷錯;居後,乃得其常也。

上利:利萬物則主於坤;生成,皆地之功也。臣道亦然。君令臣行,勞於事者,臣之職也。

#### 西南得朋,東北喪朋。安貞吉。

西南,陰方。東北,陽方。陰必從陽,離喪其朋類,乃能成化育之功,而有安貞之 吉。得其常則安,安於常則貞,是以吉也。

喪,息浪反。

# 彖曰:至哉坤元!萬物資生,乃順承天。 坤厚載物,德合无疆。

資生之道,可謂大矣。乾既稱「大」,故坤稱「至」。至義差緩,不若大之盛也。聖 人於尊卑之辨,謹嚴如此。

萬物資乾以始,資坤以生,父母之道也。順承天施,以成其功。坤之厚德,持載萬物,合於乾之无疆也。

疆,居良反;下同。

# **含弘光大,品物咸亨。牝馬地類,行地无疆。柔順利貞,君子攸行。** 以含、弘、光、大四者,形容坤道,猶乾之剛、健、中、正、純、粹也。

含,包容也。弘,寬裕也。光,昭明也。大,博厚也。有此四者,故能成承(註26)

<sup>[</sup>註23] 《註評》本作「之」。

<sup>[</sup>註24] 一作「以」。

<sup>[</sup>註25] 一作「爲」

<sup>[</sup>註26] 底本作「故能成(承,一作順)天之功」。疑「承」字誤置於括號之内,據《四庫》

天之功,品物(註27)咸得亨遂。取牝馬爲象者,以其柔順而健行,地之類也。

行地无疆,謂健也。乾健坤順,坤亦健乎?曰:「非健,何以配乾?未有乾行而坤止也。其動也剛,不害其爲柔也。柔順而利貞,乃坤德也,君子之所行也。君子之道, 合坤德也。」

先迷失道,後順得常。西南得朋,乃與類行。東北喪朋,乃終有慶。安貞 之吉,應地无疆。

乾之用,陽之爲也。坤之用,陰之爲也。形而上曰天地之道,形而下曰陰陽之功。 先迷後得以下,言陰道也。先唱則迷失陰道,後和則順而得其常理。

西南,陰方;從其類,得朋也。東北,陽方;離其類,喪朋也。離其類而從陽,則 能成生物之功,終有吉慶也。

與類行者,本也;從於陽者,用也。陰體柔躁,故從於陽,則能安貞而吉,應地道之 之无疆也。陰而不安貞,豈能應地之道?

《彖》有三无疆,蓋不同也:德合无疆,天之不已也;應地无疆,地之无窮也;行地无疆,馬之健行也。

## 象曰:地勢坤,君子以厚德載物。

坤道之大,猶乾也,非聖人孰能體之?地厚而其勢順傾,故取其順厚之象,而云「地勢坤」也。君子觀坤厚之象,以深厚之德,容載庶物。

# 初六:履霜,堅冰至。

陰爻稱六,陰之盛也;八則陽生矣,非純盛也。陰始生於下,至微也。聖人於陰之始生,以其將長,則爲之戒。

陰之始凝而爲霜,履霜,則當知陰漸盛,而至堅冰矣。猶小人始雖甚微,不可使長, 長則至於盛也。

# 象曰:履霜堅冰,陰始凝也;馴致其道,至堅冰也。

陰始凝而爲霜,漸盛則至於堅冰(註28)。小人雖微,長則漸至於盛,故戒於初。馴,

本更正。

<sup>[</sup>註27] 一作「類」

<sup>[</sup>註28] 一有「也」字。

謂智;習而至於盛。習,因循也。

凝,魚冰反。馴,似遵反。

六二: 直、方、大,不習,无不利。

二,陰位、在下,故爲坤之主,統言坤道。

中正在下,地之道也。以直、方、大三者形容其德 (註29) 用,盡地之道矣。由直、方、大,故不習,而无所不利。

不習,謂其自然。在坤道,則莫之爲而爲也;在聖人,則從容中道也。

直、方、大, 孟子所謂「至大至剛以直」也。在坤體, 故以「方」易「剛」, 猶「貞」 加「牝馬」也。言氣, 則先大; 大, 氣之體也。於坤, 則先直方, 由直方而大也。 直、方、大, 足以盡地道, 在人識之耳。

乾坤純體,以位相應。二,坤之主,故不取五應,不以君道處五也。乾則二、五相 應。

象曰:六二之動,直以方也;不習,无不利,地道光也。

承天而動,直以方耳;直方則大矣。直方之義,其大无窮。地道光顯,其功順成, 豈習而後利哉?

六三:含章可貞。或從王事,无成有終。

三,居下之上,得位者也。爲臣之道,當含晦其章美,有善則歸之於君,乃可常而得正。上无忌惡之心,下得柔 (註30) 順之道也。

可貞,謂可貞固守之,又可以常久而无悔咎(註31)也。

或從上之事,不敢當其成功,唯奉事以守其終耳。守職以終其事(註32),臣之道也。

象曰:含章可貞,以時發也。

夫子懼人之守文而不達義也,又從而明之。言爲臣處下之道,不當有其功善,必含 晦其美,乃正而可常;然義所當爲者,則以時而發,不有其功耳。不失其宜,乃以

<sup>(</sup>註29) 《註評》本作「道」。

<sup>[</sup>註30] 一作「恭」。

<sup>[</sup>註31] 一作「吝」。

<sup>[</sup>註32] 一作「者」字。

時也,非含藏終不爲也。含而不爲,不盡忠者也。

#### 或從王事,知光大也。

《象》只舉上句解義,則并及下文,它卦皆然。

或從王事,而能无成有終者,是其知之光大也。唯其知之光大,故能含晦。淺暗之人,有善唯恐人之不知,豈能含章也?

#### 六四:括囊, 无咎、无譽。

四,居近五之位,而无相得之義,乃上下間 [註33] 隔之時,其自處以正,危疑之地也。若晦藏其知,如括結囊口而不露,則可得无咎,不然則有害也。既晦藏,則无譽矣。

括,占活反。譽,音餘;又音預。

#### 象曰:括囊无咎,慎不害也。

能慎如此,則无害也。

# 六五: 黃裳, 元吉。

坤雖臣道,五實君位,故爲之戒云「黃裳,元吉」。

黄,中色。裳,下服。守中而居下,則元占,謂守其分也。

元,大而善也。《爻象》唯言守中居下則元占,不盡發其義也。黃裳既元吉,則居尊 爲天下,大凶可知。後之人未達,則此義晦矣,不得不辯也。

五,尊位也。在它卦,六居五,或爲柔順,或爲文明,或爲暗弱;在坤,則爲居尊位。陰者,臣道也,婦道也。臣居尊位,羿、莽是也,猶可言也。婦居尊位,女媧氏、武氏是也;非常之變[註34],不可言也,故有「黃裳」之戒,而不盡言也。

或疑:在革,湯武之事,猶盡言之,獨於此不言,何也?曰:「廢興,理之常也;以 陰居尊位,非常之變也。」

# 象曰: 黄裳元吉, 文在中也。

黃中之文,在中不過也。內積至美而居下,故爲元吉。

<sup>[</sup>註33] 《四庫》本作「閉」。

<sup>〔</sup>註34〕一作「大」。

上六: 戰龍于野, 其血玄黃。

陰,從陽者也;然盛極則抗而爭。六既極矣,復進不已,則必戰,故云「戰于野」。 野,謂進至於外也。既敵矣,必皆傷,故「其血玄黃」。

象曰:龍戰于野,其道窮也。

陰盛至於窮極,則必爭而傷也。

用六:利永貞。

坤之用六,猶乾之用九,用陰之道也。陰道柔而難常,故用六之道,利在常永貞 固。

象曰:用六永貞,以大終也。

陰既貞固不足,則不能永終;故用六之道,利在盛大於終。能大於終,乃永貞也。

文言曰:坤,至柔而動也剛,至靜而德方。後得主而有常,含萬物而化光。 坤道其順乎!承天而時行。

坤道至柔,而其動則剛;坤體至靜,而其德則方。動剛,故應乾不違;德方,故生物有常。

陰之道,不唱而和,故居後爲得,而上利成萬物。坤之常也,含容萬類,其功化光 大也。主字下脫「利」字。

坤道其順乎,承天而時行:承天之施,行不違時,贊坤道之順也。

積善之家,必有餘慶;積不善之家,必有餘殃。臣弒其君,子弒其父,非一朝一夕之故,其所由來者漸矣,由辯之不早辯也。《易》曰:「履霜,堅冰至。」蓋言順也。

天下之事,未有不由積而成。家之所積者善,則福慶及於子孫;所積不善,則災殃 流於後世。其大至於弑逆之禍,皆因積累而至,非朝夕所能成也。明者則知漸不可 長,小積成大,辯之於早,不使順長,故天下之惡无由而成,乃知霜冰之戒也。霜 而至於 (註 35) 冰,小惡而至於 (註 36) 大,皆事勢之順長也。

殃,於良反。弑,式志反。辯,如字。

<sup>[</sup>註35] 一无「於」字。

<sup>[</sup>註36] 一无「於」字。

直,其正也。方,其義也。君子敬以直內,義以方外,敬義立而德不孤。 「直、方、大,不習,无不利。」則不疑其所行也。

直,言其正也。方,言其義也。君子主敬以直其內,守義以方其外;敬心而 (註 37) 內直,義形而 (註 38) 外方。義形於外,非在外也。

敬義既立,其德盛矣,不期大而大矣,德不孤也。无所用而不周,无所施而不利, 孰爲疑乎?

陰雖有美,含之以從王事,弗敢成也:地道也,妻道也,臣道也。地道无成,而代有終也。

爲下之道,不居其功,含晦其章美,以從 E事,代上以終其事,而不敢有其成功也。 猶地道代天終物,而成功則主於天也。妻道亦然。

天地變化,草木蕃。天地閉,賢人隱。《易》曰:「括囊,无咎、无譽。」 蓋言謹也。

四居上,近君,而无相得之義,故爲隔絕之象。天地交感,則變化萬物,草木蕃盛, 君臣相際而道亨。天地閉隔,則萬物不遂,君臣道絕,賢者隱遯。

四,於閉隔之時,括囊晦藏,則雖无令譽,可得无咎,言當謹自守也。

蕃,伐袁反。

君子黃中通理,正位居體;美在其中,而暢於四支,發於事業,美之至也。 黃中,文居中也。君子文中而達於理,居正位而不失爲下之體。

五,尊位,在坤,則惟 [註 39] 取中正之義。美積於中,而通暢於四體,發見於事業, 德美之至盛也。

暢, 勑亮反。

陰疑於陽必戰,為其嫌於无陽也,故稱「龍」焉。猶未離其類也,故稱「血」 焉。夫玄黃者,天地之雜也;天玄而地黃。

陽大陰小,陰必從陽。陰既盛極,與陽偕矣,是疑於陽也;不相從則必戰。

<sup>[</sup>註37] 一作「則」。

<sup>[</sup>註38] 一作「則」。

<sup>[</sup>註39] 一作「故唯」。

卦雖純陰,恐疑无陽,故稱「龍」,見其與陽戰也。于野,進不已而至於外也。盛極 而進不已,則戰矣。雖盛極,不離陰類也,而與陽爭,其傷可知,故稱「血」。

陰既盛極,至與陽爭;雖陽不能无傷,故其血玄黃。玄黃,天地之色,謂皆傷也。

# 

《序卦》曰 [註 41] :「有天地,然後萬物生焉。盈天地之間者,唯萬物,故受之以屯。屯者,盈也;屯者,物之始生也。」

萬物始生,鬱結末通,故爲盈寒於天地之間;至通暢茂盛,則塞意亡矣。天地生萬物,屯,物之始生,故繼乾、坤之後。

以二象言之,雲雷之興,陰陽始交也。以二體言之,震始交於下,坎始交於中,陰陽相交,乃成雲雷。

陰陽始交,雲雷相應而未成澤,故爲屯。若已成澤,則爲「解」也。又:動於險中, 亦屯之義。

陰陽不交則爲否,始交而未暢則爲屯;在時,則天下屯難,未亨泰之時也。

## 屯:元、亨、利、貞。勿用有攸往,利建侯。

屯有大亨之道,而處之利在貞(註42)固;非貞(註43)固,何以濟屯?方屯之時,未可有所往也。天下之屯,豈獨力所能濟?必廣資輔助,故利建侯也。

屯,張倫反。

## 彖曰:屯,剛柔始交而難生,動乎險中。

以雲雷二象言之,則剛柔始交也。以坎、震二體言之,動乎險中也。剛柔始交,未 能通暢則艱屯,故云「難生」。又:動於險中,爲艱屯之義。

難,乃旦反。下同。

<sup>[</sup>註40] 《程傳》屯卦以下,均列卦名。茲將卦名字體放大,總領一卦;以後各卦亦同,以 求體例一致。

<sup>[</sup>註4]] 一无「日」字。

<sup>[</sup>註42] 一作「正」。

<sup>[</sup>註43] 一作「正」。

# 大亨貞, 雷雨之動滿盈。

所謂「大亨而貞」〔註44〕者,雷雨之動滿盈也。

陰陽始交,則艱屯未能通暢。及其和洽,則成雷雨,滿盈於天地之間,生物乃遂, 屯有大亨之道也。所以能大亨,由夫(註45)貞也;非貞固,安能出屯?人之處屯, 有致大亨之道,亦在夫(註46)貞固也。

## 天造草昧,宜建侯而不寧。

上文(註47) 言(註48) 天地生物之義(註49), 此言時事。

天浩,謂時運也。草,草亂无倫序。昧,冥昧不明。

當此時運,所宜建立輔助,則可以濟屯。雖建侯自輔,又當憂勤兢畏,不遑寧處,聖人之深戒也。

浩, 徂早反

#### 象曰:雲雷,屯;君子以經綸。

坎,不云「雨」而云「雲」者,雲爲雨而未成者也。未能成雨,所以爲屯。君子觀屯之象,經綸天下之事,以濟於屯(註50)難。經緯、綸緝,謂營爲也。

## 初九:磐桓,利居貞,利建侯。

初以陽爻在下,乃剛明之才,當屯難之世,居下位者也,未能便往濟屯,故磐桓也。 方屯之初,不磐桓而遽進,則犯難矣,故宜居正而固其志。

凡人處屯難,則鮮能守正。苟无貞固之守,則將失義,安能濟時之屯乎?居屯之世, 方屯於下,所宜有助,乃居屯、濟屯之道也;故取建侯之義,謂求輔助也。

磐,步于反。

## 象曰:雖磐桓,志行正也。

賢人在下,時苟未利,雖磐桓,未能遂往濟時之屯;然有濟屯之志與濟屯之用,志

<sup>(</sup>註44) 一作「正」。

<sup>[</sup>註45] 一无「夫」字。

<sup>[</sup>註46] 一无「夫」字。

<sup>[</sup>註47] 一有「既|字。

<sup>[</sup>註48] 一有「夫」字。

<sup>[</sup>註49] 一有「是以」字。

<sup>[</sup>註50] 一无「屯」字。

[註51] 行其正也。

## 以貴下賤,大得民也。

九當屯難之時,以陽而來居陰下,爲以貴下賤之象。

方屯之時,陰柔不能自存,有一剛陽之才,眾所歸從也;更能自處卑下,所以大得 民也。

或疑:方屯于下,何有貴乎? 夫 [註 52] 以剛明之才,而下於陰柔,以能濟屯之才,而下於不能,乃以貴下賤也。況陽之於陰,自爲貴乎。

六二:屯如邅如,乘馬班如,匪寇婚媾。女子貞,不字;十年乃字。

[以陰柔居屯之世,雖正[註53]應在上,而逼於初剛,故屯難。

澶,迴。如,辭[計54]也。

乘馬,欲行也。欲從正應,而復班如,不能進也。班,分布之義。下馬爲班,與馬 異處也。

二當屯世,雖不能自濟,而居中得正,有應在上,不失義者也;然逼近於初。陰乃陽所求,柔者剛所陵。柔當屯時,固難自濟,又爲剛陽所逼,故爲難也。設匪逼於 寇難,則往求於婚媾矣。

婚媾,正應也。寇,非理而至者。二守中正,不苟合 (註 55) 於初,所以不字。苟貞 (註 56) 固不易,至于十年,屯極必通,乃獲正應而字育矣。以女子陰柔,苟能守其 志節,久必獲通,況君子守道不回乎?

初爲賢明剛正之人,而爲寇以侵逼於人,何也?曰:「此自據二以柔近剛而爲義,更不計初之德如何也。《易》之取義如此。」

**邅**,張連反。乘,繩證反。又音繩。

象曰:六二之難,乘剛也;十年乃字,反常也。

<sup>[</sup>註51] 《四庫》本作「志在」。

<sup>[</sup>註52] 底本誤作「于」。

<sup>[</sup>註53] 一作「五」。

<sup>[</sup>註54] 一有「助」字。

<sup>[</sup>註55] 底本作「迨」, 費解;今據《四庫》本更正。

<sup>[</sup>註56] 一作「正」。

六二居屯之時,而又乘剛,爲剛陽所逼,是其患難也。至於十年,則難久必過(註57)矣;乃得反其常,與正應合也。上,數之終也。

# 六三:即鹿无虞,惟入于林中。君子幾,不如舍,往吝。

六三以陰 (註 58) 柔居剛,柔既不能安屯,居剛而不中正則妄動,雖貪於所求,既不 足以自濟,又无應援,將安之乎?如即鹿而无虞人也。

入山林者,必有虞人以(註59)導之(註60);无導之者(註61),則惟陷入于林莽中。 君子見事之幾微,不若舍而勿逐,往則徒取窮吝而已。

幾, 音機。舍, 音捨; 又: 式夜反, 止也。

#### 象曰:即鹿无虞,以從禽也;君子舍之,往吝窮也。

事不可而妄動,以從欲也。无虞而即鹿,以貪禽也。當屯之時,不可動而動,猶无虞而即鹿,以有從禽之心也。君子則見幾,而舍之不從;若往,則可吝而困窮(註62)也。

#### 六四:乘馬班如,求婚媾。往吉,无不利。

六四以柔順居近君之位,得於上者也。而其才不能 (註63) 以濟屯,故欲進而復止,乘馬班如也。己既不足以濟時之屯,若能求賢以自輔,則可濟矣。

初,陽剛 [註 64] 之賢,乃是正應己之婚媾也。若求此陽剛 [註 65] 之婚媾,往與共輔陽 [註 66] 剛中正之君,濟時之屯,則吉而无所不利也。居公卿之位,己之才雖不足以濟時之屯,若能求在下之賢,親而用之,何所不濟哉?

## 象曰:求而往,明也。

知己不足,求賢自輔而後往,可謂明矣。居得致之地(註67),己不能而遂已(註68),

<sup>[</sup>註57] 《四庫》本作「通」。

<sup>[</sup>註58] 一无「陰」字。

<sup>[</sup>註59]據《導讀》本,《周易折中》、《呂》本、《李》本無「以」字。

<sup>[</sup>註60] 《四庫》本作「導之者」

<sup>[</sup>註61] 《四庫》本無「无導之者」四字。

<sup>[</sup>註62]一作「窮困」。

<sup>[</sup>註63] 《四庫》本作「足」。

<sup>[</sup>註64]一作「剛陽」。

<sup>[</sup>註65] 一作「剛陽」。

<sup>(</sup>註66) 一无「陽」字。

<sup>〔</sup>註67〕一作「位」。

<sup>[</sup>註68] 《四庫》本無「巳」字。

至暗者也。

## 九五:屯其膏,小貞吉,大貞凶。

五居尊得正,而當屯時,若有剛明之賢爲之輔,則能濟屯矣。以其无臣也,故屯其膏。 人君之尊,雖屯難之世,於其名位,非有損也。唯其施爲有所不行,德澤有所不下, 是屯其膏,人君之屯也。既膏澤有所不下,是威權不在己也。威權去己,而欲驟正 之,求凶之道,魯昭公、高貴鄉公之事(註69)也。故小貞則占也。

小貞,謂(註70)漸正之也。若盤庚、周宣,脩德用賢,復先王之政,諸侯復朝,蓋(註71)以道馴致,爲之不暴也。又非恬然不爲,若唐之僖、昭也。不爲則常屯,以至於亡矣。

#### 象曰:屯其膏,施未光也。

**膏澤不下及**,是其(註72)德施未能光大也;人君之屯也。

施, 式豉反。

# 上六:乘馬班如, 泣血漣如。


六以陰柔居屯之終,在險之極,而无應援,居則不安,動无所之;乘馬欲往,復班如不進,窮厄之甚,至於泣血漣如,屯之極也。若陽剛而有助,則屯既極,可濟矣。 漣,音連。

## 象曰: 泣血漣如,何可長也?

屯難窮極, 莫知所爲, 故至泣血。顚沛如此, 其能長久乎?

夫卦者,事也。爻者,事之時也。分三而又兩之,足以包括眾理;引而伸之,觸類 而長之,天下之能事畢矣。

長,直良反。



<sup>[</sup>註69] 《四庫》本有「是」字。

<sup>[</sup>註70] 《四庫》本作「則」。

<sup>[</sup>註71] 《四庫》本作「謂」。

<sup>[</sup>註72] 《四庫》本作「以」。

《序卦》:「屯者,盈也;屯者,物之始生也。物生必蒙,故受之以蒙。蒙者,蒙也,物之稺也。」

屯者,物之始生。物始生稺小,蒙昧未發,蒙所以次屯也。爲卦艮上坎下。

艮爲山、爲止。坎爲水、爲險。山下有險,遇險而止,莫知所之,蒙之象也。水, 必行之物,始出未有所之,故爲蒙;及其進,則爲「亨」義。

蒙: 亨。**匪我求童蒙,童蒙求我。初筮告,再三瀆,瀆則不告。利貞。** 蒙有開發之理,亨之義也。卦才時中,乃致亨之道。

六五爲蒙之主,而九二發蒙者也。我,謂二也。二非蒙主,五既順巽於二,二乃發蒙者也,故主二而言。

匪我求童蒙,童蒙求我:五居尊位,有柔順之德,而方在童蒙,與二爲正應,而中德又同,能用二之道,以發其蒙也。二(註73)以剛中之德在下,爲君所信嚮,當以道自守,待君至誠求己,而後應之,則能用其道。匪我求於童蒙,乃童蒙來求於我也。

筮,占決也。初筮告,謂至誠一意以求己,則告之。再三則瀆慢矣,故不告也。發蒙之道,利以貞正。又:二雖剛中,然居陰,故宜有戒。

蒙,莫公反。告,古毒反。三,息暫反。瀆,音獨。

彖曰:蒙,山下有險;險而止,蒙。蒙亨,以亨行時中也。匪我求童蒙, 童蒙求我,志應也。

山下有險,內險不可處,外止莫能進,未知所爲,故爲昏蒙之義。

蒙亨,以亨行時中也。蒙之能亨,以亨道行也。所謂「亨道」,時中也。時,謂得君之應;中,謂處得其中。得中則[註74]時也。

匪我求童蒙,童蒙求我,志應也:二以[註75]剛明之賢處於下,五以童蒙居上,非 是二求於五,蓋五之志應於二也。賢者在下,豈可自進以求於君?苟自求之,必无 能信用之理。古之人,所以必待人君致敬盡禮而後往者,非欲自爲尊大,蓋其尊德

<sup>[</sup>註73] 底本作「三」,誤,應爲「二」。三爲陰爻,不得言剛;位於下卦之上,不得言中。「剛中之德」必指九二,故據《四庫》本更正。

<sup>[</sup>註74] 一有「得」字。

<sup>[</sup>註75] 一无「以」字。

樂道;不如是,不足與有爲也。

中,張仲反。

初笨告,以剛中也。再三瀆,瀆則不告,瀆蒙也。

初眾,謂誠一而來,求決其蒙,則當以剛中之道,告而開發之。

再三,煩數也。來筮之意煩數,不能誠一,則瀆慢矣,不當告也。告之必不能信受, 徒爲煩瀆,故曰「瀆蒙」也。求者、告者,皆煩瀆矣。

#### 蒙以養正,聖功也。

卦辭曰「利貞」、《彖》復伸其義,以明不止爲戒於二,實(註76)養蒙之道也。

未發之謂蒙。以純一未發之蒙,而養其正,乃作聖之功也。發而後禁,則扞格而難 勝。

養正於蒙,學之至善也。蒙之六爻,二陽爲治蒙者,四陰皆處蒙者也。

象曰:山下出泉,蒙;君子以果行育德。

山下出泉,出而遇險,未有所之,蒙之象也。若人蒙釋,未知所適也。

君子觀蒙之象,以果行育德:觀其出而未能通行,則以果決其所行;觀其始出而未 有所向,則以養育其明德也。

行,下孟反。

初六:發蒙,利用刑人;用說桎梏,以往吝。

初以陰闇居下,下民之蒙(註77)也。爻言發之之道。

發下民之蒙,當明刑禁以示之,使之知畏,然後從而教導之。自古聖王爲治,設刑 罰以齊其眾,明教化以善其俗。刑罰立而後教化行,雖聖人尚德而不尚刑,未嘗偏 廢也;故爲政之始,立法居先。治蒙之初,威之以刑者,所以說去其昏蒙之桎梏。

桎梏,謂拘束也。不去其昏蒙之桎梏(註78),則善教无由而入。既以刑禁率之,雖 使心未能喻,亦當畏威以從,不敢肆其昏蒙之欲,然後漸能知善道,而革其(註79)

<sup>[</sup>註76] 《註評》本作「實亦」,未明出處。

<sup>[</sup>註77] 一作「象」。

<sup>[</sup>註78] 《四庫》本作「牿」。

<sup>[</sup>註79] 一无「其」字

非心,則可以移風易俗矣。苟專用刑以爲治,則蒙雖畏,而終不能發。苟免而无恥, 治化不可得而成也 (註 80),故以往則可吝。

說,吐活反。桎,音質。梏,占毒反。

#### 象曰:利用刑人,以正法也。

治蒙之始,立其防限,明其罪罰,正其法也。使之由之,漸至於化也。

或疑:發蒙之初,遽用刑人,无乃不教而誅乎?不知立法制刑,乃所以教也;蓋後 之論刑者,不復知教化在其中矣。

#### 九二:包蒙,吉。納婦,吉。子克家。

包,含容也。二居蒙之世,有剛明之才,而與六五之君相應,中德又同,當時之任者也。必廣其含容,哀矜昏愚,則能發天下之蒙,成治蒙之功。其道廣,其施博,如是則吉也。

卦唯二陽爻,上九剛而過,唯九二有剛中之德,而應於五,用於時而獨明者也。苟 恃其明,專於自任,則其德不弘;故雖婦人之柔闇,尚當納其所善,則其明廣矣。

又:以諸爻皆陰,故云「婦」。堯舜之聖,天下所莫及也,尚曰「清問下民」,取人爲善也。二能包納,則克濟其君之事,猶子能治其家也。五既陰柔,故發蒙之功,皆出(註81)於二。

以家言之,五,父也;二,子也。二能主蒙之功,乃人子克治其家也。

# 象曰:子克家,剛柔接也。

子而克治其家者,父之信任專也。二能主蒙之功者,五之信任專也。二與五,剛柔之情相接,故得行其剛中之道,成發蒙之功。苟非上下之情相接,則二雖剛中,安能尸其事乎?

## 六三:勿用取女。見金夫,不有躬,无攸利。

三以陰柔處蒙闇,不中不正,女之妄動者也。正應在上,不能遠從;近見九二,爲 群蒙所歸,得時之盛,故捨其正應而從之,是女之見金夫也。女之從人,當由正禮; 乃見人之多金,說而從之,不能保有其身者也。无所往而利矣。

<sup>[</sup>註80] 《四庫》本作「矣」。

<sup>[</sup>註81] 《四庫》本作「在」。

取,七住反。

象曰:勿用取女,行不順也。

女之如此,其行邪僻不順,不可取也。

六四: 闲, 吝。

四以陰柔而蒙闇,无剛明之親援,无由自發其蒙,困於昏蒙者也,其可吝甚矣。吝,不足也,謂可少也。

象曰:困蒙之吝,獨遠實也。

蒙之時,陽剛爲發蒙者。四,陰柔而最遠於剛,乃愚蒙之人,而不比近賢者,无由 得明矣,故困於蒙。可羞吝者,以其獨遠於賢明之人也。不能親賢以致困,可吝之 甚也。實,謂陽剛也。

遠,于萬反。

六五:童蒙,吉。

五以柔順居君位,下應於二,以柔中之德,任剛明之才,足以治天下之蒙,故吉也。 童,取未發而資於人也。爲人君者,苟能至誠任賢,以成其功,何異乎出於己也?

象曰:童蒙之吉,順以巽也。


舍己從人,順從也。降志下求,卑巽也。能如是,優於天下矣。

上九:擊蒙,不利為寇,利禦寇。

九居蒙之終,是當蒙極之時。人之愚蒙既極,如苗民之不率,爲寇爲亂者,當擊伐之。然九居上,剛極而不中,故戒不利爲寇。治人之蒙,乃禦寇也。肆爲剛暴,乃 爲寇也。若舜之征有苗、周公之誅三監,禦寇也。秦皇、漢武,窮兵誅伐,爲寇也。 擊,經歷反。

象曰:利用禦寇,上下順也。

利用禦寇,上下皆得其順也。上不爲過暴,下得擊去其蒙,禦寇之義也。



《序卦》:「蒙者,蒙也,物之稺也。物稺不可不養也,故受之以需。需者,飲食之道也。」

夫物之幼稺,必待養而成;養物之所需者,飲食也,故曰「需者,飲食之道也」。雲 上於天,有蒸潤之象。飲食所以潤益於物,故需爲飲食之道,所以次蒙也。卦之大 意,須待之義,《序卦》取所須之大者耳。乾健之性,必進者也;乃處坎險之下,險 爲之阻,故須待而後進也。

需,音須。

需:有孚,光亨,貞吉,利涉大川。

需者,須待也。以二體言之,乾之剛健,上進而遇險,未能進也,故爲需待之義。 以卦才言之,五居君位,爲需之主,有剛健中正之德,而誠信充實於中。中實,有 孚也;有孚則光明而能亨通,得貞正〔註82〕而吉也。以此而需,何所不濟?雖險无 難矣,故利涉大川也。

凡貞吉,有既正且吉者,有得正則吉者,當辯也。

彖曰:需,須也。險在前也,剛健而不陷,其義不困窮矣。

需之義,須也;以險在於前,未可遽進,故需待而行也。以乾之剛健,而能需待不輕動,故不陷於險,其義不至於困窮也。剛健之人,其動必躁,乃能需待而動,處之至善者也,故夫子贊之云「其義不困窮」(註83)。

需,有孚,光亨,貞吉:位乎天位,以正中也。

五以剛實居中,爲孚之象;而得其所需,亦爲有孚之義。以乾剛而至誠,故其德光明而能亨通,得貞正而吉也。所以能然者,以居天位而得正中也。居天位,指五;以正中,兼二言,故云「正中」。

孚,徐音敷。又作旉。

利涉大川,往有功也。

既有孚而貞正,雖涉險阻,往則有功也,需道之至善也。以乾剛而能需,何所不利?

象曰:雲上於天,需;君子以飲食宴樂。

<sup>[</sup>註82] 一无「正」字。

<sup>[</sup>註83] 《四庫》本有「矣」字。

雲氣蒸而上升於天,必待陰陽和治,然後成雨。雲方上於天,未成雨也,故爲須待之義。陰陽之氣,交感而未成雨澤,猶君子畜其才德,而未施於用也。君子觀雲上於天,需而爲雨之象,懷其道德,安以待時;飲食以養其氣體,宴樂以和 (註 84) 其心志,所謂「居易以俟命」也。

上,時掌反。宴,鳥練反。樂,音洛。

## 初九:需于郊,利用恆,无咎。

需者,以遇險,故需而後進。初最遠於險,故爲需于郊。郊,曠遠之地也。處於曠遠, 利在安守其常,則无咎也。不能安常,則躁動犯難,豈能 [註 85] 需於遠而无過也?

## 象曰:需于郊,不犯難行也;利用恆,无咎,未失常也。

處曠遠者,不犯冒險難而行也。陽之爲物,剛健上進者也;初能需待於曠遠之地, 不犯險難而進,復宜安處,不失其常,則可以无咎矣。雖不進,而志動者,不能安 其當也。

君子之需時也,安靜自守;志雖有須,而恬然若將終身焉,乃能用常也。

# 九二:需于沙,小有言,終吉。

坎爲水,水近則有沙。二去險漸近,故爲需于沙。漸近於險難,雖未至於患害,已 小有言矣。

凡患難之辭,大小有殊,小者至於有言;言語之傷,至小者也。二以剛陽之才,而 居柔守中,寬裕自處,需之善也。雖去險漸近,而未至於險,故小有言語之傷,而 无大害,終得其吉也。

沙,鄭作沚。

# 象曰:需于沙,衍在中也;雖小有言,以吉終也。

衍,寬綽也。二雖近險,而以寬裕居中,故雖小有言語及之,終得其吉,善處者也。 衍,以善反。

# 九三:需于泥,致寇至。

泥, 逼於水也。既進逼於險,當致寇難之至也。三,剛而不中,又居健體之上,有

<sup>[</sup>註84] 一作「養」。

<sup>[</sup>註85] 《註評》本作「能因」,未明出處。

進動之象,故致寂也。苟非敬慎,則致喪敗矣。

## 象曰:需于泥,災在外也;自我致寂,敬慎不敗也。

三、切逼上體之險難、故云「災在外也」。災、患難之通稱。對眚而言,則分也。

三之致寇,由己進而逼 [註 86] 之,故云「自我」。寇自己致,若能敬慎,量宜而進,則无喪敗也。需之時,須而後進也。其義在相時而動,非戒其不得進也。直使敬慎,毋失其宜耳。

## 六四:需于血,出自穴。

四以陰柔之質處於險,而下當三陽之進,傷於險難者也,故云「需于血」。既傷於險難,則不能安處,必失其居,故云「出自穴」。穴,物之所安也。

順以從時,不競於險難,所以不至於凶也。以柔居陰,非能競者也。若陽居之,則 必凶矣。蓋无中正之徳,徒以剛競於險,適足以致凶耳。

## 象曰:需于血,順以聽也。

四以陰柔居於險難之中,不能固處,故退出自穴。蓋陰柔 (註 87) 不能與時競,不能 處則退,是順從以聽於時,所以不至於凶也。

# 九五:需于酒食,貞吉。

五以陽剛居中得正,位乎天位,克盡其道矣。以此而需,何需不獲?故宴安酒食以 俟之,所需(註88)必得也。既得貞正,而所需必遂,可謂吉矣。

# 象曰:酒食貞吉,以中正也。

需于酒食而貞且吉者,以五得中正而盡其道也。

# 上六:入于穴,有不速之客三人來,敬之終吉。

需以險在前,需時而後進。上六居險之終,終則變矣;在需 [註 89] 之極,久而得矣。 陰止於六,乃安其處,故爲「入于穴」。穴,所安也。安而既止,後者必至。

不速之客三人,謂下之三陽。乾之三陽,非在下之物,需時而進者也。需既極矣,

<sup>[</sup>註86] 《四庫》本作「迫」。

<sup>[</sup>註87] 一作「柔弱」。

<sup>[</sup>註88] 《四庫》本作「須」。

<sup>[</sup>註89] 底本作「須」。卦爲需,應作「需」爲是,據《四庫》本更正。

故皆上進。不速,不促之而自來也。上六既需,得其安處,群剛之來,苟不起忌疾 忿競之心,至誠盡敬以待之,雖甚剛暴,豈有侵陵之理?故終吉也。

或疑:以陰居三陽之上,得爲安乎?曰:「三陽乾體,志在上進。六,陰位,非所止之正,故无爭奪之意,敬之則吉也。」

象曰:不速之客來,敬之終吉;雖不當位,未大失也。

不當位,謂以陰而在上也。爻以六居陰爲所安,《象》復盡其義,明陰宜在下,而居上,爲不當位也。然能敬愼以自處,則陽不能陵,終得其吉;雖不當位,而未至於 大失也。

# 

《序卦》:「飲食必有訟,故受之以訟。」

人之所需者,飲食;既有所須,爭訟所由起也,訟所以次需也。爲卦乾上坎下。以 二象言之,天陽上行,水性就下,其行相違,所以成訟也。以二體言之,上剛下險, 剛險相接,能无訟乎?

又:人,內險阻而外剛強,所以訟也。

# 訟:有孚窒惕,中吉,終凶。

訟之道,必有其孚實;中无其實,乃是誣妄,凶之道也。卦之中實,爲有孚之象。 訟者,與人爭辯,而待決於人,雖有孚,亦須窒塞未通;不窒,則已明无訟矣。事 既未辨,吉凶未可必也,故有畏惕。中吉,得中則吉也。終凶,終極其事則凶也。 窒,張栗反。

# 利見大人,不利涉大川。

訟者,求辯其曲直也,故利見於大人;大人則能以其剛明中正決所訟也。訟非和平 之事,當擇安地而處,不可陷於危險,故不利涉大川也。

# 彖曰:訟,上剛下險;險而健,訟。

訟之爲卦,上剛下險,險而又健也。又爲險健相接,內險外健,皆所以爲訟也。若 健而不險,不生訟也;險而不健,不能訟也。險而又健,是以訟也。

## 訟,有孚窒惕,中吉;剛來而得中也。

訟之道固如是,又據卦才而言。

九二以剛自外來而成訟,則二乃訟之主也。以剛處中,中實之象,故爲有孚。處訟 之時,雖有孚信,亦必艱阻窒塞,而有惕懼,不窒則不成訟矣。又居險陷之中,亦 爲窒塞惕懼之義。

二以剛陽自外來而得中,爲以剛來訟而不過之義,是以吉也。卦有更取成卦之由爲義者,此是也。卦義不取成卦之由,則更不言所變之爻也。據卦辭,二乃善也,而爻中不見其善。蓋卦辭取其有孚得中而言,乃善也;爻則以自下訟上爲義,所取不同也。

## 終凶,訟不可成也。

訟非善事,不得已也,安可終極其事?極意於其事,則凶矣,故曰「不可成也」。成, 謂窮盡其事也。

## 利見大人,尚中正也。

訟者,求辯其是非也。辯之當,乃中正也,故利見大人,以所尚(註90)中正也。聽者(註91) 非其人,則或不得其中正也。中正大人,九五是也。

# 不利涉大川,入于淵也。

與人訟者,必處其身於安平之地,若蹈危險,則陷其身矣,乃入于深淵也。卦中有 中正險陷之象。

# 象曰:天與水違行,訟;君子以作事謀始。

天上水下,相違而行;二體違戾,訟之由也。若上下相順,訟何由興?君子觀象,知人情有爭訟之道,故凡所作事,必謀其始,絕訟端於事之始,則訟无由生矣。謀始之義廣矣,若慎交結、明契券之類是也。

# 初六:不永所事,小有言,終吉。

六以柔弱居下,不能終極其訟者也;故於訟之初,因六之才,爲之戒曰:「若不長永 其事,則雖小有言,終得吉也。」蓋訟非可長之事,以陰柔之才而訟於下,難以吉 矣。以上有應援,而能不永其事,故雖小有言,終得吉也。有言,災之小者也。不

<sup>[</sup>註90] 《四庫》本作「尚者」。

<sup>[</sup>註91] 一有「或」字。

永其事,而不至於凶,乃訟之吉也。

## 象曰: 不永所事, 訟不可長也。

六以柔弱而訟於下,其義固不可長永也。永其訟,則不勝而禍難及矣。

又:於訟之初,即戒訟非可長之事也。

## 雖小有言,其辯明也。

柔弱居下,才不能訟,即[註92]不永所事。既訟矣,必有小災,故小有言也。既不永其事,又上有剛陽之正應,辯理之明,故終得其吉也。不然,其能免乎?在訟之義,同位而相應,相與者也,故初於四爲獲其辯明。同位而不相得,相訟者也,故二與五爲對敵也。

## 九二:不克訟,歸而逋。其邑人三百戶,无眚。

二、丘相應之地,而兩剛不相與,相訟者也。九二自外來,以剛處險,爲訟之上, 乃與五爲敵。丘以中正處君位,其可敵乎?是爲訟而義不克也。若能知其義之不可 敵(註93),歸而逋避,以寡約自處,則得无過眚也。必逋者,避爲敵之地也。

三百戶,邑之至小者;若處強大,是猶競也,能无眚乎?眚,過也,處不當也,與 知惡而爲有分也。

逋,補吳反。眚,生領反。

# 象曰:不克訟,歸逋,竄也。

義既不敵,故不能訟,歸(註94)而逋竄,避去其所也。

# 自下訟上,患至掇也。

自下而訟其上,義乖勢屈,禍患之至,猶拾掇而取之,言易得也。

掇,都活反。

# 六三:食舊德,貞;厲終吉。

三雖居剛而應上,然質本(註95)陰柔,處險而介二剛之間;危懼,非爲訟者也。

<sup>[</sup>註92] 《四庫》本作「雖」。

<sup>[</sup>註93] 《四庫》本作「退」,與下連讀爲「退歸而逋避」。

<sup>[</sup>註94] 《四庫》本無「歸」字。

<sup>[</sup>註95] 底本作「木」, 疑爲形譌, 今據《四庫》本更正。

禄者,稱德而受。食舊德,謂處其素分。貞,謂堅固自守。厲終吉,謂雖處危地, 能知危懼,則終必獲吉也。守素分而无求,則不訟矣。處危,謂在險而承(註96)乘 皆剛,與居訟之時也。

## 或從王事,无成。

柔從剛者也,下從上者也。三不爲訟,而從上九所爲,故曰「或從王事」。无成,謂從上而成,不在己也。訟者,剛健之事;故初則不永,三則從上,皆非能訟者也。二爻皆以陰(註97)柔不終而得吉,四亦以不克而渝得吉。訟以能正爲善也。

## 象曰:食舊德,從上吉也。

守其素分,雖(註98)從上之(註99)所爲,非由己也,故无成而終得其占也。

## 九四:不克訟,復即命;渝安貞,吉。

四以陽剛而居健體,不得中正,本爲訟者也;承五履三而應(註100)初。五,君也,義不克訟。三居下而柔,不與之訟。初正應而順從,非與訟者也。四雖剛健欲訟, 无與對敵,其訟无由而興,故不克訟也。又居柔而(註101)應柔,亦爲能止之義。既 義不克訟,若能克其剛忿欲訟之心,復即就於命,革其心,平其氣,變而爲安貞, 則吉矣。

命,謂正理。失正理爲方命,故以即命爲復也。方,不順也。《書》云:「方命圮族。」 《孟子》云:「方命虐民。」夫剛健而不中正則躁動,故不安;處非中正,故不貞。 不安貞,所以好訟也。若義不克訟而不訟,反就正理;變其不安貞爲安貞,則吉矣。 渝,以朱反。

# 象曰:復即命,渝安貞,不失也。

能如是,則爲无失矣,所以吉也。

# 九五:訟,元吉。

以中正居尊位,治訟者也。治訟得其中正,所以元吉也。元吉,大吉而盡善也。吉

<sup>[</sup>註96] 《四庫》本作「成」。

<sup>[</sup>註97] 一作「處」。

<sup>[</sup>註98] 一无「雖」字。

<sup>[</sup>註99] 一无「之」字。

<sup>[</sup>註100] 一有「於」字。

<sup>[</sup>註101]《四庫》本作「以」。

大而不盡善者有矣。

象曰:訟,元吉,以中正也。

中正之道,何施而不元吉?

上九:或錫之鞶帶,終朝三褫之。

九以陽居上,剛健之極;又處訟之終,極其訟者也。人之肆其剛強,窮極於訟,取 禍喪身,固其理也。設或使之善訟能勝,窮極不已,至於受服命之賞,是亦與人仇 爭所獲,其能安保之乎?故終一朝而三見褫奪也。

**錫**,星歷反。鞶,步于反;王肅作槃。三,息暫反。褫,勑紙反。

象曰:以訟受服,亦不足敬也。

窮極訟事,設使受服命之寵,亦且不足敬,而可賤惡,況又禍患隨至乎?

## 東 東上 師

《序卦》:「訟必有眾起,故受之以師。」

師之興,由有爭也,所以次訟也。爲卦坤上坎下。

以二體言之,地中有水,爲眾聚之象。以二卦之義言之,內險外順,險道而以順行,師之義也。以爻而言(註102),一陽而爲眾陰之主,統眾之象(註103)。比,以一陽爲眾陰(註104) 主而在上,君之象也;師,以一陽爲眾陰(註105) 主而在下,將帥之象也。

# 師:貞。丈人吉,无咎。

師之道,以正為本;興師動眾以毒天下,而不以正,民弗從也,強驅之耳,故師以 貞爲主。其動雖正也,帥之者必丈人,則吉而无咎也。蓋有吉而有咎者,有无咎而 不占者;占且无咎,乃盡善也。

丈人者,尊嚴之稱。帥師總眾,非眾所尊信畏服,則安能得人心之從?故司馬穰苴

<sup>[</sup>註102]「而言」,《四庫》本作「言之」。

<sup>[</sup>註103]《四庫》本有「也」字。

<sup>[</sup>註104]《四庫》本有「之」字。

<sup>[</sup>註105] 《四庫》本有「之」字。

擢自微賤,授之以眾,乃以眾心未服,請莊賈爲將也。所謂「丈人」,不必素居崇貴,但其才謀德業,眾所畏服 (註 106),則是也。如穰苴既誅莊賈,則眾心畏服,乃丈人矣。又如淮陰侯起於微賤,遂爲大將,蓋其謀爲有以使人尊畏也。

象曰:師,眾也。貞,正也。能以眾正,可以王矣。 (1871年)

能使眾人皆正,可以王天下矣。得眾心服從而歸正,王道止於是也。

## 剛中而應,行險而順。

言二也。以剛處中,剛而得中道也。六五之君爲正應,信任之專也。雖行險道,而 以順動,所謂義兵,王者之師也。上順下險,行險而順也。

# 以此毒天下,而民從之,吉,又何咎矣?

師旅之興,不无傷財害人,毒害天下;然而民心從之者,以其義動也。古者東征西怨,民心從也。如是,故吉而无咎。吉,謂必克。无咎,謂合義。又何咎矣,其義故、註 107 无咎也。

象曰:地中有水,師;君子以容民畜眾。

地中有水,水聚於地中,爲眾聚之象,故爲師也。君子觀地中有水之象,以容保其 民,畜聚其眾也。

畜,敕六反。

初六:師出以律;否臧,凶。

初,師之始也,故言出師之義,及行師之道。

在邦國興師(註108)而言,合義理,則是以律法也,謂以禁亂誅暴而動。苟動不以義,則雖善亦凶道也。善,謂克勝。凶,謂殃民害義也。

在行師而言,律,謂號令節制。行師之道,以號令節制為本,所以統制於眾。不以 律,則雖善亦凶;雖使勝捷,猶凶道也。制師无法,幸而不敗且勝者,時有之矣, 聖人之所戒也。

否,音鄙。臧,作郎反。

<sup>[</sup>註106] 一作「嚴畏」。

<sup>[</sup>註107]一作「固」。

<sup>[</sup>註108]一作「動眾」。

#### 象曰:師出以律,失律凶也。

師出當以律,失律則凶矣。雖幸而勝,亦凶道也。

## 九二:在師,中吉、无咎。王三錫命。

師卦唯九二 陽,爲眾陰所歸; 丘居君位,是其正應。二乃師之主,專制其事者也。 居下而專制其事,唯在師則可。自占命將,關外之事,得專制之。在師,專制而得 中道,故占而无咎。蓋恃專,則失爲下之道;不專,則无成功之理,故得中爲占。

凡師之道,威和並至,則吉也。既處之盡其善,則能成功而安天下,故王錫寵命, 至于三也。凡事至于三者,極也。

六五在上,既專倚(註109)任,復厚其寵數。蓋禮不稱,則威不重而下不信也。它卦, 九二爲六五所任者有矣,唯師專上其事,而爲眾陰所歸,故其義最大。

人臣之道,於事无所敢專,唯關外之事,則專制之。雖制之在己,然因師之力而能致者,皆君所與,而職當爲也。世儒有論魯祀周公以天子禮樂,以爲周公能爲人臣不能爲之功,則可用人臣不得用之禮樂,是不知人臣之道也。夫居周公之位,則 (註 110) 爲周公之事。由其位而能爲者,皆所當爲也,周公乃盡其職耳。子道亦然。唯孟子爲知此義,故曰:「事親若曾子者,可也。」未嘗以曾子之孝爲有餘也。蓋子之身所能爲者,皆所當爲也。

# 象曰:在師中吉,承天寵也;王三錫命,懷萬邦也。

在師中吉者,以其承天之寵任也。天,謂王也。人臣非君寵任之,則安得專征之權,而有成功之吉?《象》以「專主其事,故發此義,與前所云世儒之見異矣。 E三錫以恩命,褒其成功,所以(註111)懷萬邦也。

# 六三: 師或輿尸, 凶。

三居下卦之上,居位當任者也,不唯其才陰柔不中正。師旅之事,任當專一。二 [註112] 既以剛中之才,爲上信倚,必專其事,乃有成功。若或更使眾人主之,凶 之道也。輿尸,眾主也,蓋指三也。以三居下之上,故發此義。軍旅之事,任不 專一,覆敗必矣。

<sup>[</sup>註109] 《四庫》本作「意」。

<sup>[</sup>註110] 一有「能」字。

<sup>[</sup>註111] 一有「威」字。

<sup>[</sup>註112] 底本作「三」。「刚中之才」指九二,據《四庫》本更正爲「二」。

象曰:師或輿尸,大无功也。

倚付二,三安能成功?豈唯无功,所(註113)以致凶也。

六四:師左次, 无咎。

師之進,以強勇也。四以柔居陰,非能進而克捷者也。知不能進而退,故左次。左次,退舍也。量宜進退,乃所當也,故无咎。見可而進,知難而退,師之常也。唯取其退之得宜,不論其才之能否也。度不能勝(註114)而完師以退,愈於覆敗遠矣。可進而退,乃爲咎也。《易》之發此義以示後世,其仁深矣。

## 象曰: 左次无咎, 未失常也。

行師之道,因時施宜,乃其常也,故左次,未必(註115)爲失也。如四退次,乃得其宜,是以无咎。

六五:田有禽,利執言,无咎。長子帥師,弟子輿尸,貞凶。

五,君位,興師之主也,故言興師任將之道。

師之興,必以蠻 (註116) 夷猾夏、寇賊奸宄,爲生民之害;不可懷來,然後奉辭以誅之。若禽獸入于田中,侵害稼穡,於義宜獵取,則獵取之。如此而動,乃得无咎。若輕動以毒天下,其咎大矣。

執言,奉辭也,明其罪以(註117) 討之也。若秦皇、漢武,皆窮山林以索禽獸者也, 非田有禽也。任將授師之道,當以長子帥師。二(註118) 在下而爲師之主,長子也。 若以弟子眾主之,則所爲雖正,亦凶也。弟子,凡非長(註119) 者也。自占任將不專, 而致覆敗者,如晉荀林父邲之戰,唐郭子儀相州之敗是也。

長,上聲。

象曰:長子帥師,以中行也;弟子輿師,使不當也。

長子,謂二以中正之德合於上,而受任以行,若復使其餘者眾尸其事,是任使之不

<sup>[</sup>註113] 《四庫》本作「必」。

<sup>[</sup>註114] 一本作「進」。《四庫》本亦作「進」。

<sup>[</sup>註115] 一无「必」字。

<sup>[</sup>註116] 一作「戎」。

<sup>[</sup>註117] 《四庫》本作「而」。

<sup>[</sup>註118] 底本作「三」,據《四庫》本更正爲「二」。

<sup>(</sup>註119) 一有「子」字。

當也,其凶宜矣。

上六:大君有命,開國承家,小人勿用。

上,師之終也,功之成也,大君以爵命賞有功也。開國,封之爲諸侯也。承家,以 爲卿大夫也。承,受也。小人者,雖有功,不可用也,故戒使勿用。

師旅之興,成功非一道,不必皆君子也,故戒以小人有功不可用也,賞之以金帛祿位可也,不可使有國家而爲政也。小人平時易致驕盈,況挾其功乎?漢之英、彭所以亡也。聖人之深廣遠戒也。

此專言師終之義,不取爻義,蓋以其大者。若以爻言,則六以柔居順之極,師既終而在无位之地,善處而无咎者也。

## 象曰:大君有命,以正功也;小人勿用,必亂邦也。

大君持恩賞之柄,以正軍旅之功。師之終也,雖賞其功,小人則不可以有功而任用 之,用之必亂邦。小人恃功而亂邦者,占有之矣。

# #F 坎上 **比**

《序卦》:「眾必有所比,故受之以比。」

比,親輔也(註120)。人之類,必相親輔,然後能安;故既有眾,則必有所比,比所以次師也。爲卦上坎下坤。

以二體言之,水在地上。物之相切比无間,莫如水之在地上,故爲比也。又:眾爻皆陰,獨五以陽剛居君位,眾所親附;而上亦親下,故爲比也。

比:吉。原筮,元、永、貞,无咎。

比, 吉道也。人相親比, 自爲吉道, 故《雜卦》云:「比樂師憂。」人相親比, 必有 其道; 苟非其道, 則有悔咎, 故必推原占決, 其可比者而比之。

筮,謂占決卜度,非謂以蓍龜也。所比得元、永、貞,則无咎。元,謂有君長之道。 永,謂可以常久。貞,謂得正道。上之比下,必有此三者;下之從上,必求此三者, 則无咎也。

<sup>[</sup>註120]一作「比,輔比也」:一作「比,輔也」。

## 不寧方來,後,夫凶。

人之不能自保其安寧,方且來求親比,得所比則能保其安。當其不寧之時,固宜汲 汲以求比;若獨立自恃,求比之志不速而後,則雖夫亦凶矣。夫猶凶,況柔弱者乎? 夫,剛立之稱。《傳》曰:「子南,夫也。」又曰:「是謂我非夫。」

凡生天地之間者,未有不相親比而能自存者也;雖剛強(註121)之至,未有能獨立者也。比之道,由兩志相求;兩志不相求,則睽矣。召懷撫其下,下親輔(註122)於上;親戚、朋友、鄉黨皆然,故當上下合意(註1231以相從。

苟无相求之意,則離而凶矣。大抵人情相求則合,相持則睽。相持,相待莫先也。 人之相親固有道,然而欲比之志,不可緩也。

## 彖曰:比吉也,比輔也,下順從也。

比吉也: 比者, 吉之道也。物相親比, 乃吉道也。

比輔也,釋比之義。比者,相親輔也。

下順從也,解卦所以爲比也。五以陽居尊位,群下順從,以親輔之,所以爲比也。

# 原筮,元、永、貞,无咎,以剛中也。

推原筮 (註 124),決相比之道,得元、永、貞而後可以无咎。所以 (註 125) 元、永、貞,如五是也。以陽剛居中正,盡比道之善者也。以陽剛當尊位,爲君德,元也。居中得正,能永而貞也。卦辭本泛言比道,《彖》言元、永、貞者,九五以剛處中正是也。

# 不寧方來,上下應也。

人之生,不能保其安寧,方且來求附比。民不能自保,故戴君以求寧;君不能獨立,故保民以爲安。不寧而來比者,上下相應也。

以聖人之公言之,固至誠求天下之比,以安民也。以後王之私言之,不求下民之附, 則危亡至矣,故上下之志,必相應也。在卦言之,上下群陰比於丘,丘比其眾,乃 上下應也。

<sup>[</sup>註121] 《四庫》本作「柔」。

<sup>[</sup>註 122] 一作「附」。

<sup>[</sup>註123]《四庫》本作「志」。

<sup>[</sup>註124] 一作「占」。

<sup>[</sup>註125] 《四庫》本作「謂」。

## 後夫凶,其道窮也。

眾必相比,而後能遂其生。天地之間,未有不相親比而能遂者也。若相從之志,不 疾而後,則不能成比,雖夫亦凶矣。无所親比,困屈以致凶,窮之道也。

## 象曰:地上有水,比;先王以建萬國、親諸侯。

夫物相親比而无間者,莫如水在地上,所以爲比也。先上觀比之象,以建萬國、親 諸侯。建立萬國,所以比民也;親撫諸侯,所以比天下也。

## 初六:有孚比之,无咎。

初六,比之始也。相比之道,以誠信爲本;中心不信而親人,人誰與之?故比之始, 必有孚誠,乃无咎也。孚,信之在中也。

## 有孚盈缶,終來有它吉。

誠信充實於內,若物之盈滿於缶中也。缶,質素之器;言若缶之盈實其中,外不加 文飾,則終能來有它吉也。它,非此也,外也。若誠實充於內,物无不信,豈用飾 外以求比乎?誠信中實,雖它外,皆當感而來從。孚信,比之本也。

它, 敕多反。缶, 方有反。

# 象曰:比之初六,有它吉也。

言比之初六者,比之道在乎始也。始能有孚,則終致有它之吉。其始不誠,終焉得 吉?上六之凶,由无首也。

# 六二:比之自內,貞吉。

二與五爲正應,皆得中正,以中正之道相比者也。二處於內;自內,謂由己也。擇 才而用,雖在乎上,而以身許國,必由於己。己以得君道,合而進,乃得正而吉也。 以中正之道應上之求,乃自內也,不自失也。汲汲以求比者,非君子自重之道,乃 自失也。

# 象曰:比之自內,不自失也。

守己中正之道,以待上之求,乃不自失也。《易》之爲戒嚴密,二雖中正,質柔體順, 故有貞吉、自失之戒。

戒之自守,以待上之求,无乃涉後凶乎?曰:「上之脩己,乃求上之道;降志辱身, 非自重之道也。故伊尹、武侯救天下之心非不切,必待禮至,然後出也。」

# 六三:比之匪人。

三不中正,而所比皆不中正。四,陰柔而不中; ,有 (註 126) 應而比初,皆不中正, 匪人也。比於匪人,其失可知,悔吝 (註 127) 不假言也,故可傷。 之中正,而謂之 匪人,隨時取義,各不同也。

匪,非鬼反。

## 象曰:比之匪人,不亦傷乎!

人之相比,求安吉也。乃比於匪人,必將 (註 128) 反得悔吝 (註 129),其亦可傷矣。 深戒失所比也。

## 六四:外比之,貞吉。

四與初不相應,而五比之;外比於五,乃得貞正而吉也。君臣相比,正也。相比相與,宜也。五,剛陽中正,賢也;居尊位,在上也。親賢從上,比之正(註130)也,故爲貞吉。以六居四,亦爲得正之義。

又:陰柔不中之人,能比於剛明中正之賢,乃得正而吉也。又:比賢從上,必以正 道則吉也。數說相須,其義始備。

# 象曰:外比於賢,以從上也。

外比,謂從五也。五,剛明中正之賢,又居君位,四比之,是比賢;且從上,所以 占也。

# 九五:顯比,王用三驅,失前禽,邑人不誡,吉。

五居君位,處中得正,盡比道之善者也。人君比天下之道,當顯明其比道而已。如誠意以待物,恕己以及人;發政施仁,使天下蒙其惠澤,是人君親比天下之道也。如是,天下孰不親比於上?若乃暴其小仁,違道于譽,欲以求下之比,其道亦已(註131)狹矣,其能得天下之比乎?故聖人以九五盡比道之正,取三驅爲喻,曰「王用三驅,失前禽,邑人不誠,占」。

<sup>[</sup>註126] 《四庫》本作「存」。

<sup>[</sup>註127]一作「咎」。

<sup>(</sup>註128) 一无「必將」字。

<sup>[</sup>註 129] 一作「咎」。

<sup>[</sup>註130]《註評》本作「正道」,未明出處

<sup>[</sup>註131]《四庫》本無「已」字。

先王以四時之畋不可廢也,故推其仁心,爲三騙之禮。乃禮,所謂天子不合圍也。 成湯祝網,是其義也。天子之畋,圍合其三面,前開一路,使之可去,不忍盡物, 好生之仁也。止取其不用命者,不出而反入者也。禽獸前去者皆免矣,故曰「前 失禽」也。

王者顯明其比道,天下自然來比。來者撫之,固不煦煦(註132)然求比於物,若田之 三驅,禽之去者,從而不追,來者則取之也。此王道之大,所以其民皡皡,而莫知 爲之者也。

邑人不誠占,言其至公不私,无遠邇親踈之別也。邑者,居邑;《易》中所言邑皆同。 王者所都,諸侯國中也。誠,期約也。待物之一,不期誠於居邑,如是則占也。

聖人以大公无私治天下,於顯比見之矣。非唯人君比天下之道如此,大率人之相比 莫不然。以臣於君言之,竭其忠誠,致其才力,乃顯其比 (註 133) 君之道也。用之與 否,在君而已;不可阿諛逢迎,求其比己也。在朋友亦然。脩身誠意以待之,親己 與否,在人而已;不可巧言令色,曲從苟合,以求人之比己也。於鄉黨、親戚,於 眾人,莫不皆然,三驅失前禽之義也。

驅,匡愚反。鄭作敺。

象曰:顯比之吉,位正中也。

顯比所以吉者,以其所居之位得正中也。處正中之地,乃由正中之道也。比以不偏 爲善,故云「正中」。

凡言正中者,其處正得中也,比與隨是也。言中正者,得中與正也,訟與需是也。

# 舍逆取順,失前禽也。

禮取不用命者,乃是舍 [註 134] 順取逆也;順命而去者皆免矣。比以向背而言,謂去者爲逆,來者爲順也,故所失者,前去之禽也。言來者撫之,去者不追也。

舍,音捨。

# 邑人不誠,上使中也。

不期誠於親近,上之使下,中平不偏,遠近如一也。

<sup>〔</sup>註132〕一作「呴呴」。

<sup>[</sup>註133] 一作「比其」。

<sup>(</sup>註134)《四庫》本無「舍」字。

上六:比之无首,凶。

六居上,比之終也。首,謂始也。凡比之道,其始善,則其終善矣。有其始而无其 終者,或有矣;未有无其始而有終者也。故比之无首,至終則凶也。此據比終而言。 然上六陰柔不中,處險之極,固非克終者也。始比不以道,隨於終者,天下多矣。

## 象曰:比之无首,无所終也。

比既无首,何所終乎?相比有首,猶或終違;始不以道,終復何保?故曰「无所終也」。

# 製工 数下 異上 **小畜**

《序卦》:「比必有所畜,故受之以小畜。」

物相比附則爲聚;聚,畜也。又:相親比,則志相畜,小畜所以次比也。畜,止也, 止則聚矣。爲卦巽上乾下。

乾,在上之物,乃居巽下。夫畜止剛健,莫如巽順,爲巽所畜,故爲畜也。然巽,陰也,其體巽 [註 135] 順,唯能以巽順柔其剛健,非能力止之也。畜道之小者也。

又:四以一陰得位,爲五陽所說,得位得柔,巽之道也;能畜群陽之志,是以爲畜也。小畜,謂以小畜大。所畜聚者小、所畜之事小,以陰故也。

《彖》專以六四畜諸陽,爲成卦之義,不言二體,蓋舉其重者。

# 小畜:亨。密雲不雨,自我西郊。

雲,陰陽之氣。二氣交而和,則相畜固而成雨。陽唱而陰和;順也,故和。若陰先陽唱,不順也,故不和;不和則不能成雨。雲之畜聚雖密,而不 [註 136] 成雨者,自西郊故也。東北,陽方。西南,陰方。自陰唱,故不和,而不能成雨。

以人觀之,雲氣之興,皆自四遠,故云「郊」。據四而言,故云「自我」。畜陽者四,畜之主也。

畜, 敕六反。

<sup>[</sup>註135]《四庫》本作「柔」。

<sup>[</sup>註136] 一有「能」字。

## 彖曰:小畜,柔得位,而上下應之,曰小畜。

言成卦之義也。

以陰居四,又處上位,柔得位也。上下五陽皆應之,爲所畜也。以一陰而畜五陽,能係而不能固,是以爲小畜也。《彖》解成卦之義,而加「曰」字者,皆重卦名,文勢當然。單名卦,唯革有「曰」字,亦文勢然也。

## 健而巽,剛中而志行,乃亨。

以卦才言也,內健而外異,健而能巽也。二、五居中,剛中也。陽性上進,下復乾體, 志在於行也。剛居中,爲剛而得中,又爲中剛。言畜陽,則以柔巽;言能亨,則由剛中。

以成卦之義言,則爲陰畜陽;以卦才言,則陽爲剛中。才如是,故畜雖小而能亨也。

## 密雲不雨,尚往也。自我西郊,施未行也。

畜道不能成大,如密雲而不成雨。陰陽交而和,則相固而成雨;二氣不和,陽尙往 而上,故不成雨。蓋自我陰方之氣先唱,故不和而不能成雨,其功施未行也。小畜 之不能成大,猶西郊之雲不能成雨也。

施,始鼓反。

# 象曰:風行天上,小畜;君子以懿文德。

乾之剛健,而爲巽所畜。夫剛健之性,唯柔順爲能畜止之。雖可以畜止之,然非能 固制其剛健也,但柔順以擾係之耳,故爲小畜也。

君子觀小畜之義,以懿美其文德。畜聚,爲蘊畜之義。君子所蘊畜者,大則道德 經綸之業,小則文章才藝。君子觀小畜之象,以懿美其文德。文德,方之道,義 爲小也。

# 初九:復自道,何其咎?吉。

初九,陽爻而乾體。陽,在上之物,又剛健之才,足以上進,而復與在上同志。其 進復於上,乃其道也,故云「復自道」。復既自道,何過咎之有?无咎而又有吉也。

諸爻言无咎者,如是則无咎矣,故云:「无咎者,善補過也。」雖使爻義本善,亦不 害於「不如是則有咎」之義。初九乃由其道而行,无有過咎,故云「何其咎」;无咎 之甚明也。

## 象曰:復自道,其義吉也。

剛陽之才,由其道而復,其義吉也。初與四爲正應,在畜時,乃相畜者也。

## 九二: 牽復, 吉。

二以陽居下體之中, 丘以陽居上體之中, 皆以陽剛居中, 爲陰所畜, 俱欲上復。五雖在四上, 而爲其所畜則同, 是同志者也。夫同患相憂, 二、五同志, 故相牽連而復。二陽並進, 而 (註 137) 陰不能勝,則 (註 138) 遂其復矣, 故吉也。

曰「遂其復」,則離畜矣乎?曰:「凡爻之辭,皆謂「如是則可以如是」;若已然,則 時已變矣,尚何教誡乎?」

五爲異體,異畜於乾,而反與二相牽,何也?曰:「舉二體而言,則異畜乎乾;全卦而言,則一陰畜五陽也。在《易》,隨時取義,皆如是也。」

## 象曰: 牽復在中, 亦不自失也。

二居中,得中[註139]者也;剛柔進退,不失乎中道也。陽之復,其勢必強。二以處中,故雖強於進,亦不至於過剛;過剛乃自失也。爻止言牽復而吉之義,《象》復發明其在中之美。

# 九三:輿說輻,夫妻反目。

三以陽爻居不得中,而密比於四,陰陽之情相求也。

又: 暱比而不中,爲陰畜制者也,故不能前進,猶車輿說去輪輻,言不能行也。

夫妻反目:陰制於陽者也;今反制陽,如夫妻之反目也。反目,謂怒目相視,不順 其夫,而反制之也。婦人爲夫寵惑,既而遂反制其夫。未有夫不失道,而妻能制之 者也;故說輻、反目,三自爲之(註140)也。

輿,音餘。輻。音福。一本亦作輹。

# 象曰:夫妻反目,不能正室也。

夫妻反目,蓋由不能正其室家也。三自處不以道,故四得制之,不使進,猶夫不能 正其室家,故致反目也。

<sup>[</sup>註137]《四庫》本作「則」。

<sup>[</sup>註 [38] 《四庫》本作「得」。

<sup>[</sup>註139] 《四庫》本作「正」。

<sup>[</sup>註140]《四庫》本無「之」字。

## 六四:有孚,血去惕出,无咎。

四於畜時,處近君之位,畜君者也。若內有孚誠,則五志信之,從其畜也。卦獨一陰,畜眾陽者也。諸陽之志係于(註141)四,四苟欲以力畜之,則一柔敵眾剛,必見傷害。唯盡其孚誠以應之,則可以感之矣;故其傷害遠見(註1421),其危懼免也。如此,則可以无咎;不然,則不免乎害矣。此以柔畜剛之道也。以人君之威嚴,而微細之臣,有能畜止其欲者,蓋有孚信以感之也。

血, 馬作恤。去, 起呂反。

# 象曰:有孚惕出,上合志也。

四既有孚,則五信任之,與之合志,所以得惕出而无咎也。惕出,則血去可知,舉 其輕者也。 丘既合志,眾陽皆從之矣。

# 九五:有孚攣如,富以其鄰。

小畜,眾陽爲陰所畜之時也。五以中正居尊位,而有孚信,則其類皆應之矣;故曰「攣如」,謂牽攣(註 143)相從也。五必援挽,與之相濟,是富以其鄰也。五以居尊位之勢,如富者推其財力,與鄰比共之也。

君子爲小人所困,正人爲群邪所厄,則在下者,必攀挽於上,期於同進;在上者,必援引於下,與之戮力,非獨推己力以及人也,固資在下之助,以成其力耳。

攣,力專反。

# 象曰:有孚攣如,不獨富也。

有孚(註 144) 彎如,蓋其鄰類皆牽彎而(註 145) 從之,與眾同欲,不獨有其富也。君子之處艱(註 146) 厄,唯其至誠,故得眾力之助,而能濟其眾也。

# 上九:既雨既處,尚德載,婦貞厲。

九以巽順之極,居卦之上,處畜之終,從畜而止者也;爲四所止也。

<sup>〔</sup>註141〕《四庫》本作「乎」。

<sup>[</sup>註142]《四庫》本無「見」字。

<sup>[</sup>註143]《四庫》本作「連」。

<sup>[</sup>註144] 一有「而」字。

<sup>[</sup>註145] 一无「而」字。

<sup>[</sup>註146]《四庫》本作「難」。

既雨,和也。既處,止也。陰之畜陽,不和則不能止;既和而止,畜之道成矣(註147)。 大畜,畜之大,故極而散。小畜,畜之小,故極而成。

尚德載:四用柔巽之德,積滿而至於成也。陰柔之畜剛,非一朝一夕能成,由積累 而至,可不戒乎?載,積滿也。詩云:「厥聲載路。」

婦貞厲:婦,謂陰。以陰而畜陽,以柔而制剛,婦若貞固守此,危厲之道也,安有婦制其夫?臣制其君,而能安者乎?

## 月幾望,君子征,凶。

月望,則與日敵矣。幾望,言其盛將敵矣[註148]。

陰已能畜陽,而云「幾望」,何也?此以柔巽畜其志也,非力能制也。然,不已則將盛於陽而凶矣。於幾望而爲之戒曰:「婦將敵矣,君子動則凶也。」君子,謂陽。征,動也。幾望,將盈之時。若已望,則陽已消矣,尚何戒乎?

## 象曰:既雨既處,德積載也;君子征凶,有所疑也。

既雨既處,言畜道積滿而成也。陰將 [註 149] 盛 [註 150] 極,君子動則有凶也。陰敵陽則必消陽,小人抗君子則必害君子,安得不疑慮乎?若前知疑慮而警懼,求所以制之,則不至於凶矣。

# 党下 乾上 履

《序卦》:「物畜然後有禮,故受之以履。」

夫物之聚,則有大小之別、高下之等、美惡之分,是物畜然後有禮,履所以繼畜也。 履,禮也;禮,人之所履也。爲卦天上澤下。天而在上,澤而處下;上下之分,尊 卑之義,理之當也,禮之本也,常履之道也,故爲履。

履,踐也,藉也。履物爲踐,履於物爲藉;以柔藉剛,故爲履也。不曰「剛履柔」, 而曰「柔履剛」者,剛乘柔,常理不足道,故《易》中唯言柔乘剛,不言剛乘柔也。 言履藉於剛,乃見卑順說應之義。

<sup>[</sup>註147]一作「畜道之成也」。

<sup>[</sup>註148] 《四庫》本作「也」。

<sup>[</sup>註149] 一作「既」。

<sup>[</sup>註150] 一有「則」字。

## 履虎尾,不咥人,亨。

履,人所履之道也。天在上而澤處下,以柔履藉於剛,上下各得其義,事之至順, 理之至當也。人之履行如此,雖履至危之地,亦无所害;故履虎尾而不見咥嚙,所 以能亨也。

履,利耻反。咥,直結反。

## 彖曰:履,柔履剛也。說而應乎乾,是以履虎尾,不咥人,亨。

兌以陰柔履藉乾之陽剛,柔履剛也。兌以說順應乎乾剛而履藉之,下順乎上,陰承 乎陽,天下之正(註151)理也。所履如此,至順至當,雖履虎尾,亦不見傷害。以此 履行,其亨可知。

說,音悅;下同。

## 剛中正,履帝位而不疚,光明也。

九五以陽剛(註152)中正尊履帝位,苟无疾病,得履道之至善,光明者也。疾,謂疵病,夬(註153)履是也。光明,德盛而輝光也。

疚,久又反。

# 象曰:上天下澤,履;君子以辯上下,定民志。

天在上,澤居下,上(註154)下之正理也。人之所履當如是,故取其象而爲履。

君子觀履之象,以辨別上下之分,以定其民志。夫上下之分明,而(註155)後民志有定。民志定,然後可以言治;民志不定,天下不可得而治也。

占之時,公卿大夫而下,位各稱其德,終身居之,得其分也。位未稱德,則君舉而進之。上修其學,學至而君求之,皆非有預於己也。農工商賈勤其事,而所享有限,故皆有定志,而天下之心可一。

後世自庶士至于公卿,日志于尊榮;農工商賈,日志于富侈。億兆之心,交騖於利, 天下紛然,如之何其可一也?欲其不亂,難矣。此由上下无定志也。

<sup>[</sup>註151] 《四庫》本作「至」。

<sup>[</sup>註152] 《四庫》本作「光」。

<sup>[</sup>註 153] 底本作「央」,據《四庫》本更正。夬履,指九五爻辭「夬履貞厲」也。

<sup>[</sup>註154] 一作「天」。

<sup>[</sup>註155]《四庫》本作「然」。

君子觀履之象,而分辯上下,使各當其分,以定民之心志也。

## 初九:素履,往,无咎。

履不處者,行之義。初處至下,素在下者也;而陽剛之才,可以上進,若安其卑下 之素而往,則无咎矣。

夫人不能自安於貧賤之素,則其進也,乃貪躁而動,求去乎貧賤耳,非欲有爲也。 既得其進,驕溢必矣,故往則有咎。賢者則安履其素,其處也樂;其進也,將有爲 也。故得其進,則有爲而无不善,乃守其素履者也。

## 象曰:素履之往,獨行願也。

安履其素而往者,非苟利也,獨行其志願耳。獨,專也。若欲貴之心與行道之心, 交戰下中,豈能安履其素也?

## 九二:履道坦坦,幽人貞吉。

九二居柔,寬裕得中,其所履坦坦然,平易之道也。雖所履得坦易之道,亦必幽靜安恬之人處之,則能貞固而吉也。九二陽志上進,故有幽人之戒。

坦,吐旦反。

# 象曰: 幽人貞吉, 中不自亂也。

履道在於安靜。其中恬正,則所履安裕;中若躁動,豈能安其所履?故必幽人,則 能堅固而吉。蓋其中心安靜,不以利欲自亂也。

# 六三:眇能視,跛能履。履虎尾,咥人,凶。武人為于大君。

三以陰居陽,志欲剛,而體本陰柔,安能堅其所履?故如盲眇之視,其見不明;跛躃之履,其行不遠。才既不足,而又處不得中,履非其正,以柔而務(註 156)剛。其履如此,是履於危地,故曰「履虎尾」。以不善履,履危地,必及禍患,故曰「咥人凶」。

武人爲于大君:如武暴之人,而居人上,肆其躁率而已,非能順履而遠到也,不中 正而志剛,乃爲群陽所(註157)與,是以剛躁蹈危而得凶也。

眇,妙小反。跛,汲我反。

<sup>(</sup>註156) 一作「勝」。

<sup>[</sup>註157] 一有「不」字。

象曰:眇能視,不足以有明也;跛能履,不足以與行也。

陰柔之人,其才不足,視不能明,行不能遠;而乃務剛,所履如此,其能免於害乎?

## 咥人之凶,位不當也。武人為于大君,志剛也。

以柔居三,履非其正,所以致禍害,被咥而凶也。以武人爲喻者,以其處陽,才弱而志剛者(註158)也。志剛則妄動,所履不由其道,如武人而爲大君也。

## 九四:履虎尾, 愬愬, 終吉。

九四陽剛而乾體,雖居四,剛勝者也。在近君多懼之地,无相得之義;五復剛決之過,故爲履虎尾。愬愬,畏[註159]懼之貌。若能畏懼,則當終吉。蓋九雖剛而志柔,四雖近而不處,故能兢[註160][慎畏懼,則終免於危而獲吉也。

愬,山革反。

# 象曰:愬愬終吉,志行也。

能愬愬畏懼,則終得其吉者,志在於行而不處也;去危則獲吉矣。陽剛,能行者也; 居柔,以順自處者也。

# 九五:夬履,貞厲。

央,剛決也。五以陽剛乾體,居至尊之位,任其剛決而行者也。如此,則雖得正, 猶危厲也。

古之聖人,居天下之尊,明足以照,剛足以決,勢足以專;然而未嘗不盡天下之議, 雖蒭蕘之微必取,乃其所以爲聖也,履帝位而光明者也。

若自任剛明,決行不顧,雖使得正,亦危道也,可固守乎?有剛明之才,苟專自任, 猶爲危道,況剛明不足者乎?《易》中云「貞厲」,義各不同,隨卦可見也(註161)。

# 象曰:夬履貞厲,位正當也。

戒夬履者,以其正當尊位也。居至尊之位,據能專之勢,而自任剛決,不復畏慎 [註162],雖使得正,亦危道也。

<sup>[</sup>註158]《四庫》本無「者」字。

<sup>[</sup>註159] 《四庫》本作「長」。

<sup>[</sup>註160] 底本作「競」,據《四庫》本更正。

<sup>[</sup>註 [61] 《四庫》本無「也」字。

<sup>〔</sup>註162〕《四庫》本作「懼」。

## 上九:視履考祥,其旋元吉。

上處履之終,於其終,視其所履行,以考其善惡禍福。若其旋,則善且吉也。旋,謂周旋完備,无不至也。

人之所履,考視其終。若終始周完无疚,善之至也,是以元吉。人之吉凶,係其所 履善惡之多寡、吉凶之大小也。

祥,本作詳。

## 象曰:元吉在上,大有慶也。

上,履之終也。人之所履,善而至吉;其終周旋无虧,乃大有福慶之人也。人之行, 貴乎有終。

# 《周易》上經 卷第一終 [註 163]

<sup>[</sup>註163] 底本作「晦庵先生校正《伊川易傳》上經卷終」。

# 《周易》上經 卷第二

程頤傳

# 乾下 坤上 泰

《序卦》:「履而泰,然後安,故受之以泰。」

履得其所則舒泰,泰則安矣,泰所以次履也。為卦坤陰在上,乾陽居下。天地陰陽 之氣,相交而和,則萬物生成,故為通泰。

# 泰:小往大來,吉亨。

小,謂陰。大,謂陽。往,往之 [註 ]] 於外也。來,來居於內也。陽氣下降,陰氣 上交也。陰陽和暢,則萬物生遂,天地之泰也。

以人事言之,大則君上,小則臣下;君推誠以任下,臣盡誠以事君,上下之志通,朝廷之泰也。陽爲君子,陰爲小人;君子來處於內,小人往處於外,是君子得位,小人在下,天下之泰也。

泰之道,吉而且亨也。不云「元占」、「元亨」者,時有污隆,治有小大,雖泰,豈一概哉?言「吉亨」則可包也(註2)。

彖曰:泰,小往大來,吉亨;則是天地交而萬物通也,上下交而其志同也。 小往大來,陰往而陽來也;則是天地陰陽之氣相交,而萬物得遂其通泰也。在人, 則上下之情交通,而其忘意同也。

內陽而外陰,內健而外順;內君子而外小人,君子道長,小人道消也。

<sup>[</sup>註1] 一作「居」。

<sup>[</sup>註 2] 《四庫》本作「矣」。

陽來居內,陰往居外,陽進而陰退也。乾健在內,坤順在外,爲內健而外順,君子 之道也。

君子在内,小人在外,是君子道長,小人道消,所以爲泰也。既取陰陽交和,又取 君子道長。陰陽交和,乃君子之道長也。

長, 上聲。

# 象曰:天地交泰,后以財成天地之道,輔相天地之宜,以左右民。

天地交而陰陽和,則萬物茂遂,所以泰也。人君當體天地通泰之象,而以財成天地 之道,輔相天地之宜,以左右生民也。財成,謂體天地交泰之道,而財制成其施爲 之方也。

輔相天地之宜:天地通泰,則萬物茂遂,人君體之而爲法制,使民用天時、因地利,輔助化育之功,成其豐美之利也。如春氣發生萬物,則爲播殖(註3)之法;秋氣成實萬物,則爲收斂之法。乃輔相天地之宜,以左右輔助於民也。

民之生,必賴君上爲之法制,以教率輔翼之,乃得遂其生養,是左右之也。 左,音佐。右,音佑。

# 初九:拔茅茹,以其彙征,吉。

初以陽爻居下,是有剛明之才而在下者也。時之否,則君子退而窮處;時既 [註 4] 泰,則志在上進也。

君子之進,必與其朋類相牽援,如茅之根然;拔其一則,牽連而起矣。茹,根之相 牽連者,故以爲象。

彙,類也。賢者以其類進,同志以行其道,是以吉也。君子之進,必以其類,不唯志 在相先,樂於與善,實乃相賴以濟。故君子、小人,未有能獨立不賴朋類之助者也。

自占君子得位,則天下之賢萃於朝廷,同志協力,以成天下之泰。小人在位,則不 肖者並進,然後其黨勝,而天下否矣。蓋各從其類也。

拔,蒲八反。茹,汝據反。彙,音胃。

象曰:拔茅征吉,志在外也。

<sup>[</sup>註 3] 《四庫》本作「植」。

<sup>[</sup>註 4] 一作「將」。

時將泰,則群賢皆欲上進;三陽之志欲進,同也,故取茅茹彙征之象。志在外,上 進也。

九二:包荒,用馮河,不遐遺,朋亡;得尚于中行。

二以陽剛得中,上應於五;五以柔順得中,下應於二。君臣同德,是以剛中之才, 爲上所專任;故二雖居臣位,主治泰者也;所謂上下交,而其志同也。故治泰之道, 主二而言。

包荒、用馮河、不遐遺、朋亡四者,處泰之道也。人情安肆,則政舒緩而法度廢弛, 庶事无節。治之之道,必有包含荒穢之量,則其施爲寬裕詳密,弊革事理,而人安 之。若无含弘之度,有忿疾之心,則无深遠之慮;有暴擾之患,深弊未去,而近患 已生矣。故在「包荒」也。

用馮河:泰寧之世,人情習於久安,安於守常,惰於因循,憚於更變,非有馮河之勇,不能有爲於斯時也。馮河,謂其剛果,足〔註5〕以濟深越險也。自占泰治之世,必漸至於衰替,蓋由狃習安逸,因循而然。自非剛斷之君,英烈之輔,不能挺持〔註6〕奮發,以革其弊也。故曰「用馮河」。

或疑:上云「包荒」,則是包含寬容;此云「用馮河」,則是奮發改革,似相反也。 不知以含容(註7)之量,施剛果之用,乃聖賢之爲也。

不遐遺:泰寧之時,人心狃於泰,則苟安逸而已,烏 (註 8) 能復深思遠慮,及於遐遠之事哉?治夫泰者,當周及庶事,雖遐遠不可遺。若事之微隱,賢才之在僻 (註 9) 陋,皆遐遠者也,時泰則固遺之矣。

朋亡:夫時之既泰,則人習於安;其情肆而失節,將約而正之,非絕去其朋與之私,則不能也。故云「朋亡」。

自占立法制事,牽於人情,卒不能行者多矣。若夫禁奢侈,則害於近戚;限田產, 則妨於貴家。如此之類,既不能(註10)斷以太公而必行,則是(註11)牽於朋比也。

<sup>(</sup>註 5) 一作「可」。

<sup>[</sup>註 6] 《四庫》本作「特」。

<sup>[</sup>註7] 一作「弘」。

<sup>[</sup>註 8] 《四庫》本作「惡」。

<sup>[</sup>註 9] 一作「側」。

<sup>[</sup>註10] 一无「既不能」字。

<sup>[</sup>註]]] 一有「不」字。

治泰不能朋亡,則爲之難矣。

治泰之道,有此四者,則能合於九二之德,故曰「得尚于中行」,言能配合中行之義也。尚,配也。

包,必交反。荒,本作巟,音同。馮,音憑。

## 象曰:包荒,得尚于中行,以光大也。

《象》舉「包荒」一句,而通解四者之義。言如此,則能配合中行之德,而其道光 明顯大也。

# 九三: 无平不陂, 无往不復, 艱貞无咎。勿恤其孚, 于食有福。

三居泰之中,在諸陽之上,泰之盛也。物理如循環,在下者必升,居上者必降,泰 久而必否;故於泰之盛,與陽之將進,而爲之戒曰:「无常安平而不險陂者,謂无常 泰也。无常往而不返者,謂陰當復也。」平者陂,往者復,則爲否矣。當知天理之 必然。

方泰之時,不敢安逸,常艱危其思慮,正固其施爲,如是則可以无咎。處泰之道, 既能艱貞,則可常保其泰,不勞憂恤,得其所求也。

不失所期爲字;如是,則於其祿食有福益也。祿食,謂福祉。善處泰者,其福可長也。蓋德善日積,則福祿日臻。德踰於祿,則雖盛而非滿。自古隆盛,未有不失道而喪敗者也。

# 象曰:无往不復,天地際也。

无往不復,言天地之交際也。陽降于下,必復于上;陰升于上,必復于下。屈伸、往來之常理也(註12)。因天地交際之道,明否泰不常之理,以爲戒也。

# 六四:翩翩,不富以其鄰,不戒以孚。

六四處泰之過中,以陰在上,志在下復;上二陰,亦志在趨下。翩翩,疾飛之貌。四,翩翩就下,與其鄰同也。鄰,其類也,謂五與上。

夫人富而其類從者,爲利也。不富而從者(註13),其志同也。三陰皆在下之物,居上乃失其實,其志皆欲下行,故不富而相從,不待告戒(註14),而誠意相合也。

<sup>[</sup>註12] 一作「理之常也」。

<sup>[</sup>註13] 一无「者」字。

<sup>[</sup>註14] 《四庫》本作「戒告」。

夫陰陽之升降,乃時運之否泰,或交或散,理之常也。泰既過中,則將變矣。聖人 於三,尚云「艱貞則有福」。蓋三爲將中,知戒則可保。四已過中矣,理必變也,故 專言始終反復之道。五,泰之主,則復言處泰之義。

## 象曰:翩翩不富,皆失實也;不戒以孚,中心願也。

翩翩下往之疾,不待富而鄰從者,以三陰在上,皆失其實故也。陰本在下之物,今 乃居上,是失實也。不待告戒,而誠意相與者,蓋其中心所願故也。理當然者,天 也;眾所同者,時也。

## 六五:帝乙歸妹以祉,元吉。

史謂湯爲天乙,厥後有帝祖乙,亦賢王也。後又有帝乙,《多上》曰:「自成湯至于帝乙,罔不明德恤祀。」稱帝乙者,未知誰是。

以爻義觀之,帝乙,制王姬下嫁之禮法者也。自占帝女雖皆下嫁,至帝乙然後制爲 (註15) 禮法,使降其尊貴,以順從其夫也。

六五以陰柔居君位,下應於九二剛明之賢。五能倚任其賢 (註 16) 而順從之,如帝乙之歸妹然。降其尊而順從於陽,則以之受祉,且元吉也。元吉,太吉而盡善者也,謂成治泰之功也。

# 象曰:以祉元吉,中以行願也。

所以能獲祉福且元吉者,由其以中道合而行其志願也。有中德,所以能任剛中之賢; 所聽從者,皆其志願也。非其(註17)所欲,能從之乎?

上六:城復于隍,勿用師。自邑告命,貞吝。

掘隍土,積累以成城;如治道,積累以成泰。及泰之終,將反于否,如城土頹圮, 復反于隍也。上,泰之終,六以小人處之,行將否矣。

勿用師: 君之所以能用其眾者,上下之情通而心從也。今泰之將終,失泰之道,上下之情不通矣。民心離散,不從其上,豈可用也?用之則亂。眾既不可用,方自其 親近而告命之,雖使所告命者得其正,亦可羞吝。

邑所居,謂親近;大率告命必自近始。凡「貞凶」、「貞吝」有二義:有貞固守此則

<sup>[</sup>註15] 一作「其」。


<sup>[</sup>註16] 《四庫》本有「臣」字。

<sup>(</sup>註17) 《註評》本無「其」字,未明所據。

凶吝者;有雖得正,亦凶吝者。此不云「貞凶」,而云「貞吝」者(註 181 ,將否而方告命,爲可羞吝。否,不由於告命也。

象曰:城復于隍,其命亂也。

城復干隍矣,雖其命之,亂不可止也。



《序卦》:「泰者,通也。物不可以終通,故受之以否。」

夫物理往來,通泰之極則必否,否所以次泰也。爲卦天上地下。天地相交,陰陽和 暢,則爲泰。天處上,地處下,是天地隔絕,不相交通,所以爲否也。

## 否之匪人。

天地交,而萬物生於中,然後三才備。人爲最靈,故爲萬物之首。凡生天地之中者,皆人道也。天地不交,則不生萬物,是无人道,故曰「匪人」,謂非人道也。消長闔闢,相因而不息。泰極則復,否終則傾。无常而不變之理,人道豈能无也?既否則泰矣。

# 不利君子貞,大往小來。

夫上下交通,剛柔和會 (註 19) ,君子之道也。否則反是,故不利君子貞。君子正道 否塞不行也。

大往小來,陽往而陰來也。小人道長,君子道消之象,故爲否也。

彖曰:否之匪人,不利君子貞,大往小來;則是天地不交,而萬物不通也。 上下不交,而天下无邦也。內陰而外陽,內柔而外剛,內小人而外君子。 小人道長,君子道消也。

夫天地之氣不交,則萬物无生成之理;上下之義不交,則天下无邦國之道。建邦國, 所以爲治也。上施政以治民,民戴君而從命;上下相交,所以治安也。今上下不交, 是天下无邦國之道也。

陰柔在內,陽剛在外。君子往居於外,小人來處於內;小人道長,君子道消之時也。

<sup>[</sup>註18] 一无「者」字。

<sup>(</sup>註19) 《四庫》 本作「合」。

## 象曰:天地不交,否;君子以儉德辟難,不可榮以祿。

天地不相交通,故爲否。否塞之時,君子道消,當觀否塞之象,而以儉損之(註20) 德,避免禍難,不可榮居祿位也。否者,小人得志之時,君子居顯榮之地,禍患必 及其身,故官晦處窮約也。

## 初六:拔茅茹,以其彙貞,吉亨。

泰與否皆取茅爲象者,以群陽群陰同在下,有牽連之象也。

泰之時,則以同征爲吉;否之時,則以同貞爲亨。始以內小人、外君子爲否之義, 復以初六否而在下,爲君子之道。《易》隨時取義,變動无常。

否之時,在下者君子也。否之三陰,上皆有應。在否隔之時,隔絕不相通,故无應義。初六能與其類貞固其節,則處否之吉,而其道之亨也。當否而能進者,小人也; 君子則伸道免禍而已。君子進退,未嘗不與其類同也。

## 象曰:拔茅貞吉,志在君也。

爻以六自守於下,明君子處下(註21)之道;《象》復推明以盡(註22)君子之心。

君子固守其節以處下者,非樂於不進,獨善也。以其道方否,不可進,故安之耳, 心固未嘗不在天下也。其志常在,得君而進,以康濟天下,故曰「志在君也」。

# 六二:包承,小人吉,大人否亨。

六二,其質則陰柔,其居則中正。以陰柔小人而言,則方否於下,志所包畜者,在 承順乎上,以求濟其否;爲身之利,小人之吉也。大人當否,則以道自處,豈肯枉 己屈道,承順於上?唯自守其否而已。身之否,乃其道之亨也。

或曰:「上下不交,何所承乎?」曰:「正則否矣;小人順上之心,未嘗无也。」

# 象曰:大人否亨,不亂群也。

大人於否之時,守其正節,不雜亂於小人之群類,身雖否,而道之亨也,故曰「否亨」。

不以道而身亨,乃道之否也。不云「君子」而云「大人」,能如是,則[註 23]其道

<sup>[</sup>註20] 《四庫》本作「其」。

<sup>[</sup>註21] 一作「否」。

<sup>[</sup>註22] 《四庫》本作「象」。

<sup>[</sup>註23] 一无「則」字。

大也 (註24)。

## 六三:包羞。

三以陰柔不中不正而居否,又切近於上,非能守道安命;窮斯濫矣,極小人之情狀 者也。其所包畜謀慮,邪濫无所不至,可羞恥也。

## 象曰:包羞,位不當也。

陰柔居否,而不中不正,所爲可羞者,處不當故也。處不當位,所爲不以道也。

## 九四:有命无咎,疇離祉。

四以陽剛健體,居近君之位,是有 [註 25] 濟否之才,而得高位者也,足以輔上濟否。 然當君道方否之時,處逼近之地,所惡在居功取忌而已。若能使動必出於君命,威 柄一歸於上,則无咎,而其志行矣。能使事皆出於君命,則可以濟時之否,其疇類 皆附離其福祉。離,麗也。

君子道行,則與其類同進,以濟天下之否,疇離祉也。小人之進,亦以其類同也。

# 象曰:有命无咎,志行也。

有君命則得无咎,乃可以濟否,其志得行也。

# 九五:休否,大人吉。其亡其亡,繫于苞桑。

五以陽剛中正之德居尊 [註 26] 位,故能休息天下之否,大人之吉也。夫 [註 27] 人當位,能以其道休息天下之否,以循 [註 28] 致於泰,猶未離於否也,故有「其亡」之戒。

否既休息,漸將反〔註 29〕泰,不可便爲安肆;當深慮遠戒,常虞否之復來。曰:「其亡矣!其亡矣!」其係于包桑,謂爲安固之道,如維係于苞桑也。桑之爲物,其根深固。苞,謂叢生者,其固尤甚,聖人之戒深矣。漢王允、唐李德裕,不知此戒,所以致禍敗也。《繫辭》曰:「危者,安其位者也;亡者,保其存者也;亂者,有其治者也。是故君子安而不忘危,存而不忘亡,治而不忘亂,是以身安而國家可保也。」

<sup>[</sup>註24] 《四庫》本作「矣」。

<sup>[</sup>註25] 《四庫》本作「以」。

<sup>[</sup>註26] 一作「君」。

<sup>[</sup>註27] 《四庫》本作「大」。

<sup>[</sup>註28] 《四庫》本作「馴」。

<sup>[</sup>註29] 一作「及」。

象曰:大人之吉,位正當也。

有大人之德,而得至尊之正位,故能休 (註30) 天下之否,是以吉也。无其位,則雖 有其道,將何爲乎?故聖人之位,謂之大寶。

上九: 傾否, 先否後喜。

上九,否之終也。物理極而必反,故泰極則否,否極則泰。上九否既極矣,故否道傾覆而變也。先極,否也;後傾,喜也。否傾則泰矣,後喜也。

## 象曰:否終則傾,何可長也?

否終則必傾,豈有長否之理?極而必反,理之常也。然反危爲安,易亂爲治,必有剛陽之才而後能也。故否之上九則能傾否,屯之上六則不能變屯也。

# 離下 乾上 同人

《序卦》:「物不可以終否,故受之以同人。」

夫天地不交則爲否,上下相同則爲同人,與否義相反,故相次。又:世之方否,必 與人同力(註31)乃能濟,同人所以次否也。爲卦乾上離下。

以二象言之,天在上者也,火之性炎上,與天同也,故爲同人。以二體言之,五居 正位,爲乾之主,二爲離之主,二爻以中正相應,上下相同,同人之義也。

又:卦唯一陰,眾陽所欲同,亦同人之義也。它卦固有一陰者,在同人之時,而二 五相應,天火相同,故其義大。

同人:于野,亨;利涉大川,利君子貞。

野,謂曠野,取遠與外之義。

夫同人者,以天下大同之道,則聖賢大公之心也。常人之同者,以其私意所合,乃 暱比之情耳;故必于野,謂不以暱近情之所私,而于郊野曠遠之地。既不係所私, 乃至公大同之道,无遠不同也,其亨可知。能 (註 32) 與天下大同,是天下皆同之也。 天下皆同,何險阻之不可濟?何艱危之不可亨?故利涉大川,利君子貞。

<sup>[</sup>註30] 一有「息」字。

<sup>[</sup>註31] 一作「欲」。

<sup>[</sup>註32] 一作「既」。

上言于野,止謂不在暱比,此復言宜以君子正道。君子之貞,謂天下至公大同之道。故雖居千里之遠,生千歲之後,若合符節。推而行之,四海之廣,兆民之眾,莫不同(註33)。小人則唯用其私意,所比者,雖非亦同;所惡者,雖是亦異。故其所同者,則爲阿黨,蓋其心不正也。故同人之道,利在君子之貞正。

彖曰:同人,柔得位得中而應乎乾,曰同人。 言成卦之義。

条得位,謂二以陰居陰,得其正位也。五,中正,而二以中正應之,得中而應乎乾也。五,剛健中正,而二以柔順中正應之,各得其正,其德同也,故爲同人。五,乾之上,故云「應乎乾」。《象》取天火之象,而《彖》專以二言。

#### 同人曰。

此三字羨文。

同人于野,亨。利涉大川,乾行也。

至誠无私,可以蹈(註34)險難者,乾之行也。无私,天德也。

文明以健,中正而應,君子正也。

又以二體言其義。有文明之徳而剛健,以中正之道相應,乃君子之正道也。

# 唯君子為能通天下之志。

天下之志萬殊,理則一也。君子明理,故能通天下之志。

聖人視億兆之心,猶一心者,通於理而已。文明則能燭理,故能明大同之義;剛健 則能克己,故能盡大同之道。然後能中正,合乎乾行也。

象曰:天與火,同人;君子以類族辨物。

不云「火在天下,天下有火」,而云「天與火」者,天在上,火性炎上,火與天同, 故爲同人之義。

君子觀同人之象,而以類族辨物,各以其類族辨物之同異也。若君子、小人之黨, 善惡、是非之理,物情之離合,事理之異同。凡同異[註35]者,君子能辨明之,故

<sup>[</sup>註33] 一作「合」。

<sup>[</sup>註34] 底本作「陷」。「利涉大川」之「涉」爲「蹈」義,據《四庫》本、《註評》本更正。 [註35] 《四庫》本作「異同」。

#### 處物不失其方也。

## 初九:同人于門, 无咎。

九居同人之初,而无 (註 36) 係應,是无所 (註 37) 偏私,同人之公者也,故爲出門同人。出門,謂在外;在外則无私昵之偏,其同溥 (註 38) 而公;如此,則无過咎也。

## 象曰:出門同人,又誰咎也。

出門同人於外,是其所同者廣,无所偏私。人之同也,有厚薄親踈之異,過咎所由 生也。既无所偏黨,誰其咎之?

## 六二:同人干宗, 吝。

二與五爲正應,故曰「同人于宗」。宗,謂宗黨也。同於所系應,是有所偏與,在同人之道爲私。狹矣,故可吝。

二若陽爻,則爲剛中之德,乃以中道相同,不爲私也。

## 象曰:同人于宗,吝道也。

諸卦以中正相應爲善,而在同人則爲可吝,故五不取君義。蓋私比,非人君之道; 相同以私,爲可吝也。

# 九三:伏戎于莽,升其高陵,三歲不興。

三以陽居剛而不得中,是剛暴之人也。在同人之時,志在於同,卦唯<sub>[註39]</sub>一陰,諸陽之志,皆欲同之,三又與之比。然二以中正之道,與五相應;三以剛強居二、五之間,欲奪而同之。然理不直,義不勝,故不敢顯發,伏藏兵戎于林莽之中。懷惡而內負不直,故又畏懼,時升高陵以顧望。如此至於三歲之久,終不敢興。此爻深見小人之情狀,然不曰「凶」者,既不敢發,故未至凶也。

莽,莫蕩反。

# 象曰:伏戎于莽,敵剛也;三歲不興,安行也?

所敵者五,既剛且正,其可奪乎?故畏憚伏藏也。至於三歲不興矣,終安能行乎?

<sup>[</sup>註36] 《二程集》小注:一有「所」字。

<sup>[</sup>註37] 《四庫》本無「所」字。

<sup>[</sup>註38] 《四庫》本作「博」。

<sup>[</sup>註39] 一有「二」字。

#### 九四:乘其墉,弗克攻,吉。

四剛而不中正,其志欲同二,亦與五爲仇者也。

墉垣,所以限隔也。四切近於五,如隔墉耳。乘其墉,欲攻之,知義不直而不克也。 苟能自知義之不直而不攻,則爲吉也。若肆其邪欲,不能反思義理,妄行攻奪,則 其凶大矣。

三以剛居剛,故終其強而不能反。四以剛居柔,故有困而能反之義。能反則吉矣。 畏義而能改,其吉官矣。

塘, 音容。

## 象曰:乘其墉,義弗克也;其吉,則困而反則也。

所以乘其墉而弗克攻之者,以其義之弗 [註40] 克也。以邪攻正,義不勝也。其所以 得吉者,由其義不勝,困窮而反於法則也。

二者,眾陽所同欲也。獨三、四有爭奪之義者,二爻居二、五之間也。初終遠,故 取義別。

## 九五:同人,先號咷而後笑。大師克,相遇。

九五同於二,而爲三、四二陽所隔。五自以義直理勝,故不勝憤抑,至於號咷。然 邪不勝正,雖爲所隔,終必得合,故後笑也。

大師克,相遇: 五與二正應,而二陽非理隔奪,必用大師克勝之,乃得相遇也。*云* 「大師」、云「克」者,見二陽之強也。

九 丘 君位,而 爻 不取 人 君 同 人 之 義 者, 蓋 五 專 以 私 暱 應 於 二, 而 失 其 中 正 之 德。 人 君 當 與 天 下 大 同, 而 獨 私 一 人, 非 君 道 也。

又:先隔則號咷,後遇則笑(註41),是私暱之情,非大同之體也。二之在下,尙以同于宗爲吝,況人君乎? 丘既於君道无取,故更不言君道,而明二人同心,不可間隔之義。《繫辭》云:「君子之道,或出或處,或默或語。二人同心,其利斷金。」中誠所(註42)同,出處語默无不同,天下莫能間也。

同者,一也。一不可分,分乃二也。一可以通金石、冒水火,无所不能入。故云「其

<sup>[</sup>註40] 一作「不」。

<sup>[</sup>註41] 一有「正」字。

<sup>[</sup>註42] 《四庫》本作「相」。

利斷金」。其理至微,故聖人贊之曰:「同心之言,其臭如蘭。」謂其言意味深長也。 號,呼報反。咷,道刀反。

象曰:同人之先,以中直也;大師相遇,言相克也。

先所以號咷者,以中誠理直,故不勝其忿切而然也。雖其敵剛強,至用大師,然義 直理勝,終能克之,故言能相克也。相克,謂能勝,見二陽之強也。

上九:同人于郊,无悔。

郊,在外而遠之地。求同者必相親相與,上九居外而无應,終无與同者也。始,有 同則至;終,或有睽悔。處遠而无與,故雖无同,亦无悔。雖欲同之志不遂,而其 終无所悔也。

象曰:同人于郊,志未得也。

居遠莫同,故終无所悔。然而在同人之道,求同之志不得(註43)遂,雖无悔,非善處也。

### 乾下 離上 大有

《序卦》:「與人同者,物必歸焉,故受之以大有。」

夫與人同者,物之所歸也,大有所以次同人也。爲卦火在天上。火之處高,其明及遠,萬物之眾,无不照見,爲大有之象。

又: ·柔居尊,眾陽並應;居尊執柔,物之所歸也。上下應之,爲大有之義。大有, 盛大豐有也。

## 大有: 元亨。

卦之才可以元亨也。凡卦德,有卦名自有其義者,如「比:吉。」「謙:亨。」是也。 有因其卦義,便爲訓戒者,如「師:貞丈人,吉。」「同人:于野,亨。」是也。有 以其卦才而言者,「大有:元亨。」是也。由剛健文明,應天時行,故能元亨也。

**彖曰:大有,柔得尊位,大中而上下應之,曰大有。** 言卦之所以爲大有也。

<sup>[</sup>註43] 據《導讀》本,《呂》本、《周易折中》無「得」字。

五以陰居君位,柔得尊位也;處中,得大中之道也。爲諸陽所宗,上下應之也。夫居尊執柔,固眾之所歸也;而又有虛中文明大中(註44)之德,故上下同志應之,所以爲大有也。

#### 其德剛健而文明,應乎天而時行,是以元亨。

卦之德,內剛健而外文明。六五之君,應於乾之九二。五之(註45)性,柔順而明, 能順應乎二。二,乾之主也,是應乎乾也;順應乾行,順乎天時也,故曰「應乎天 而時行」。其德如此,是以元亨也。

王弼云:「不大通,何由得大有乎?大有則必元亨矣。」此不識卦義「離乾成大有」 之義。非大有之義便有元亨,由其才故得元亨。大有而不善者,與不能亨者,有矣。 諸卦具元、亨、利、貞,則《彖》皆釋爲「大亨」,恐疑與乾、坤同也。不兼利貞, 則釋爲「元亨」,盡元義也。元,有大善之義。有元亨者四卦:大有、蠱、升、鼎也。 唯升之《彖》,誤隨它卦作「大亨」。

曰:「諸卦之元,與乾不同,何也?」曰:「元之在乾,爲原始之義,爲首出庶物之 義,它卦則不能有此義,爲善、爲大而已。」

曰:「元之爲大可矣,爲善何也?」曰:「元者,物之先也。物之先,豈有不善者乎? 事成而後有敗,敗非先成者也。興而後有衰,衰固後於興也。得而後有失,非得則何以有(註46)失也?至於善惡、治亂、是非,天下之事,莫不皆然。必善爲先,故《文言》曰:『元者,善之長也。』」

## 象曰:火在天上,大有;君子以遏惡揚善,順天休命。

火高在天上,照見萬物之眾多,故爲大有。大有,繁庶之義。君子觀大有之象,以 遏絕眾惡,揚明善類,以奉順天休美之命。萬物眾多,則有善惡之殊。君子享(註47) 大有之盛,當代天正,治養庶類。治眾之道,在遏惡揚善而已。惡懲善勸,所以順 天命而安群生也。

遏,於葛反。

初九:无交害, 匪咎; 艱則无咎。

<sup>[</sup>註44] 一无「大中」字。

<sup>[</sup>註45] 一有「體」字。

<sup>[</sup>註46] 一作「爲」。

<sup>[</sup>註47] 《四庫》本作「亨」。

九居大有之初,未至於盛,處卑无應與,未有驕盈之失;故无交害,未涉於害也。 大凡富有,鮮不有害;以子貢之賢,未能盡免,況其下者乎?

匪咎, 艱則无咎, 言富有本匪有咎也, 人因富有, 自爲咎耳。若能享富有而知難處, 則自无咎也。處富有而不能思艱兢畏, 則驕侈之心生矣, 所以有咎也。

#### 象曰:大有初九,无交害也。

在大有之初,克念艱難,則驕溢之心无由生矣,所以不交涉於害也。

#### 九二:大車以載,有攸往,无咎。

九以陽剛居二,爲六五之君所倚任。剛健則才勝,居柔則謙順,得中則无過。其才如此,所以能勝大有之任,如大車之材強壯,能勝載重物也。可以任重行遠,故有攸往而无咎也。大有豐盛之時,有而未極,故以二之才,可往而无咎。至於盛極,則不可以往矣。

#### 象曰:大車以載,積中不敗也。

壯大之車,重積載於其中,而不損敗,猶九二材力之強,能勝大有之任也。

## 九三:公用亨于天子,小人弗克。

三居下體之上,在下而居人上,諸侯、人君之象也。公侯上承天子,天子居天下之尊,率土之濱,莫非王臣,在下者,何敢專其有?凡土地之富,人民之眾,皆王者之有也,此理之正也。故三當大有之時,居諸侯之位,有其富盛,必用亨(註48)通 乎天子,謂以其有爲天子之有也,乃人臣之常義也。若小人處之,則專其富有以爲私,不知公以奉上之道,故曰「小人弗克」也。

## 象曰:公用亨于天子,小人害也。

公當用(註49) 亨子天子;若小人處之,則爲害也。

自古諸侯能守臣節,忠順奉上者,則蕃養其眾,以爲王之屛翰;豐殖其財,以待上 之徵賦。若小人處之,則不知爲臣奉上之道,以其有(註50)爲己之私。民眾財豐, 則反擅其富強,益爲不順,是小人大有,則爲害。

又:大有,爲小人之害也。

<sup>[</sup>註48] 《四庫》本作「享」。

<sup>[</sup>註49] 一无「用|字。

<sup>[</sup>註50] 《四庫》本無「有」字。

#### 九四:匪其彭, 无咎。

九四居大有之時,已過中矣,是大有之盛者也。過盛則凶,咎所由生也。故處之之道,匪其彭,則得无咎。謂能謙損,不處其大盛,故 (註51)得无咎也。四,近君之高位,苟處太盛,則致凶咎。

彭,盛多之貌。《詩·載驅》云:「汶水湯湯,行人彭彭。」行人盛多之狀。《雅·大明》云:「駟騵彭彭。」言武王戎馬之盛也。

彭, 步郎反。

## 象曰:匪其彭,无咎,明辯晳也。

能不處其盛而得无咎者,蓋有明辯之智也。晳,明智也。賢智之人,明辯物理,當 其方盛,則知咎之將至,故能損抑,不敢至於滿極也。

#### 六五: 厥孚交如, 威如, 吉。

六五當大有之時,居君位,虛中,爲孚信之象。人君執柔守中,而以孚信接於下, 則下亦盡其信誠以事於上,上下孚信相交也。

以柔居尊位,當大有之時,人心易安[註52],若專尙柔順,則陵慢生矣,故必威如則吉。威如,有威嚴之謂也。既以柔和孚信接於下,眾志說從;又有威嚴使之有畏,善處有者也,吉可知矣。

## 象曰:厥孚交如,信以發志也;威如之吉,易而无備也。

下之志,從乎上者也。上以孚信接於下,則下亦以誠信事其上,故「厥孚交如」。 由上有孚信,以發其下孚信之志,下之從上,猶響之應聲也(註 53)。威如之所以 占者,謂若无威嚴,則下易慢而无戒備也,謂无恭畏備上之道。備,謂備上之求 責也。

## 上九:自天祐之,吉无不利。

上九在卦之終,居无位之地,是大有之極,而不居其有者也。處離之上,明之極也。 唯至明,所以不居其有,不至於過極也。有極而不處,則无盈滿之災,能順乎理者也。 五之至信,而履其上,爲蹈履誠信之義。五有文明之德,上能降志以應之,爲尚賢

<sup>[</sup>註51] 《四庫》本作「則」

<sup>[</sup>註52] 《四庫》本作「安易」。

<sup>[</sup>註53] 一有「威如之吉,易而无備也」九字。

崇善之義。其處如此,合道之至也,自當亨(註54)其福慶,自天祐之。行順乎天而 獲天祐,故所往皆吉,无所不利也。

#### 象曰:大有上吉,自天祐也。

大有之上,有極當變。由其所爲順天合道,故天祐助之,所以吉也。

君子滿而不溢,乃天祐也。《繫辭》復申之云:「天之所助者,順也;人之所助者, 信也。履信思乎順,又以尚賢也;是以自天祐之,吉无不利也。」

履信,謂履五。五虛中,信也。思順,謂謙退不居。尚賢,謂志從於五。大有之世, 不可以盈豐;而復處盈焉,非所宜也。六爻之中,皆樂據權位,唯初、上不處其位, 故初九无咎,上九无不利。上九在上,履信思順,故在上而得吉,蓋自天祐也。

## 艮下 排上 謙

《序卦》:「有大者,不可以盈,故受之以謙。」

其有既大,不可至於盈滿,必在謙損,故大有之後,受之以謙也。爲卦坤上艮下, 地中有山也。地體卑下,山高大之物,而居地之下,謙之象也。以崇高之德,而處 卑之下,謙之義也。

## 謙:亨,君子有終。

謙,有亨之道也。有其德而不居,謂之謙。人以謙巽自處,何往而不亨乎?

君子有終:君子志存乎謙巽。達理,故樂天而不競;內充,故退讓而不矜。安履 乎謙,終身不易。自卑,而人益尊之;自晦,而德益光顯,此所謂「君子有終」 也。在小人,則有欲必競,有德必伐;雖使勉慕於謙,亦不能安行而固守,不能 有終也。

## 彖曰:謙亨,天道下濟而光明,地道卑而上行。

濟,當爲際。此明謙而能亨之義。

天之道,以其氣下際,故能化育萬物,其道光明。下際,謂下交也。地之道,以其 處卑,所以其氣上行,交於天,皆以卑降而亨也。

<sup>[</sup>註54] 《四庫》本作「享」。

#### 天道虧盈而益謙。

以天行而言,盈者則虧,謙者則益,日月陰陽是也。

#### 地道變盈而流謙。

以地勢而言,盈滿者,傾變而反陷;卑下者,流注而益增也。

#### 鬼神害盈而福謙。

鬼神,謂造化之跡。盈滿者,禍害之;謙損者,福祐之。凡過而損,不足而益者,皆是也。

#### 人道惡盈而好謙。

人情疾惡於盈滿,而好與於謙巽也。謙者,人之至德,故聖人詳言,所以戒盈而勸 謙也。

#### 謙尊而光,卑而不可踰,君子之終也。

謙爲卑巽也,而其道尊大而光顯。自處雖卑屈,而其德實高,不可加尚,是不可踰 也。君子至誠於謙,恆而不變,有終也,故尊光。

## 象曰:地中有山,謙;君子以裒多益寡,稱物平施。

地體卑下,山之高大而在地中,外卑下而內蘊高大之象,故為謙也。不云「山在地中」,而曰「地中有山」,言卑下之中,蘊其崇高也。若言崇高蘊於卑下之中,則文理不順。諸《象》皆然,觀文可見。

君子以裒多益寡,稱物平施: 君子觀謙之象,山而在地下,是高者下之,卑者上之; 見抑高舉下,損過益不及之義。以施於事,則裒取多者,增益寡者。稱物之多寡, 以均其施與,使得其平也。

裒,蒲侯反。

## 初六:謙謙君子,用涉大川,吉。

初六以柔順處謙,又居一卦之下,爲自處卑下之至,謙而又謙也,故曰「謙謙」。能如是者,君子也。自處至謙,眾所共與也。雖用涉險難,亦无患害,況居平易乎!何所不吉也?

初處謙,而以柔居下,得无過於謙乎?曰:「柔居下,乃其常也;但見其謙之至,故 爲謙謙,未見其失也。」 象曰:謙謙君子,卑以自牧也。

謙謙,謙之至也,謂君子以謙卑之道自牧也。自牧,自處也。《詩》云:「自牧歸 黃。」

#### 六二:鳴謙,貞吉。

二以柔順居中,是為謙德積於中。謙德充積於中,故發於外,見於聲音顏色,故曰「鳴謙」。居中得正,有中正之德也,故云「貞吉」。凡貞吉,有爲貞且吉者,有爲得貞(註55)則吉者;六二之貞吉,所自有也。

#### 象曰:鳴謙貞吉,中心得也。

二之謙德,由至誠積於中,所以發於聲音,中心所自得也,非勉 [註 56] 爲之也。

## 九三:勞謙,君子有終,吉。

三以陽剛之德而居下體,爲眾陰所宗,履得其(註57)位,爲下之上,是上爲君所任, 下爲眾所從,有功勞而持謙德者也,故曰「勞謙」。古之人有當之者,周公是也。身 當天下之大任,上奉幼弱之主,謙恭自牧,夔夔如畏然,可謂有勞而能謙矣。既能 勞謙,又須君子行之有終,則吉。

夫樂高喜勝,人之常情。平時能謙,固已鮮矣,況有功勞可尊乎?雖使知謙之善, 勉而爲之,若矜負之心不忘,則不能常久,欲其有終,不可得也。唯君子安履謙順, 乃其常行,故久而不變,乃所謂「有終」,有終則占也。九三以剛居正,能終者也。 此爻之德最盛,故《象辭》特重。

## 象曰:勞謙君子,萬民服也。

能勞謙之君子,萬民所尊服也。《繫辭》云:「勞而不伐,有功而不德,厚之至也, 語以其功下人者也。德言盛,禮言恭;謙也者,致恭以存其位者也。」

有勞而不自矜伐,有功而不自以爲德,是其德弘厚之至也。言以其功勞而自謙,以 下於人也。

德言盛,禮言恭:以其德言之,則至盛;以其自處之禮言之,則至恭,此所謂謙也。 夫謙也者,謂致恭以存其位者也。存,守也。致其恭異以守其位,故高而不危,滿

<sup>[</sup>註55] 一有「正」字。

<sup>[</sup>註56] 一有「強」字。

<sup>[</sup>註57] 一作「正」。

而不溢,是以能終吉也。

夫君子履謙,乃其常行,非爲保其位而爲之也。而言存其位者,蓋能致恭,所以能存其位。言謙之道如此。如言爲善有令名,君子豈爲令名而爲善也哉?亦言有(註58)令名者,爲善之故(註59)也。

#### 六四: 无不利, 捣謙。

四居上體,切近君位。六五之君,又以謙柔自處;九三又有大功德,爲上所任,眾所宗。而己居其上,當恭畏以奉謙德之君,卑巽以讓勞謙之臣。動作施爲,无所不利於撝謙也。

撝,施布之象,如人手之撝也。動息進退,必施其謙。蓋居多懼之地,又在賢臣之 上故也。

撝,毀皮反。

#### 象曰: 无不利, 捣謙, 不違則也。

凡人之謙,有所宜施,不可過其宜也,如六五或用侵伐是也。唯四以處近君之地,據勞臣之上,故凡所動作,靡不利於施謙。如是,然後中於法則,故曰「不違則也」, 謂得其官也。

## 六五:不富以其鄰;利用侵伐,无不利。

富者,眾之所歸;唯財爲能聚人。

五以君位之尊,而執謙順以接於下,眾所歸也,故不以 (註 60) 富,而能有其鄰也。 鄰,近也。不富而得人之親也,爲人君而持謙順,天下所歸心也。

然君道不可專尚謙柔,必須威武相濟,然後能懷服天下,故利用行侵伐也。威德並著,然後盡君道之宜,而无所不利也。蓋五之謙柔,當防於過,故發此義。

## 象曰:利用侵伐,征不服也。

征其文德謙巽所不能服者也。文德所不能服,而不用威武,何以平治天下?非人君 之中道,謙之過也。

<sup>[</sup>註58] 《四庫》本作「其」。

<sup>[</sup>註59] 一作「效」

<sup>[</sup>註60] 《四庫》本無「以」字。

## 上六:鳴謙,利用行師,征邑國。

六以柔處柔順之極,又處謙之極,極乎謙者也。以極謙而反居高,未得遂其謙之志, 故至發於聲音。又:柔處謙之極,亦必見於聲色,故曰「鳴謙」。

雖居无位之地,非任天下之事;然人之行己,必須剛柔相濟。上,謙之極也,至於 太甚,則反爲過矣,故利在以剛武自治。

邑國,己之私有。行師,謂用剛武。征邑國,謂自治其私。

#### 象曰:鳴謙,志未得也。可用行師,征邑國也。

謙極而居上,欲謙之志未得,故不勝其切,至於鳴也。雖不當位,謙既過極,宜以 剛武自治其私,故云「利用行師,征邑國」也。

### 

《序卦》:「有大而能謙必豫,故受之以豫。」承二卦之義而爲次也。

有既大而能謙,則有豫樂也。豫者,安和說樂之義。爲卦震上坤下,順動之象。動 而和順,是以豫也。

九四爲動之主, 上下群陰所共應也; 坤又承之以順, 是以動而上下順應, 故爲和豫 之義。

以二象言之,雷出於地上,陽始潛閉(註61)於地中;及其動而出地,奮發其聲,通 暢和豫,故爲豫也。

## 豫:利建侯行師。

豫,順而動也。豫之義,所利在於建侯行師。

夫建侯樹屛,所以共安天下。諸侯和順,則萬 (註 62) 民說服;兵師之興,眾心和說, 則順從而有功。故說豫之道,利於建侯行師也。

又:上動而下順,諸侯從王,師眾順令之象。君萬邦,聚大眾,非和說不能使之服 從也。

<sup>[</sup>註61] 一作「閉潛」。

<sup>[</sup>註62] 一作「兆」。

彖曰:豫,剛應而志行,順以動,豫。

剛應,謂四爲群陰所應,剛得眾應也。志行,謂陽志上行,動而上下順從,其志得 行也。

順以動,豫:震動而坤順,爲動而順理,順理而動。又爲動而眾順,所以豫也。

#### 豫順以動,故天地如之,而況建侯行師乎?

以豫順而動,則天地如之而弗違,況建侯行師,豈有不順乎?天地之道,萬物之理,唯至順而已。大人所以先天後天而不違者,亦順乎理而已。

天地以順動,故日月不過,而四時不忒;聖人以順動,則刑罰清而民服。 復詳言順動之道。

天地之運,以其順動,所以日月之度不過差,四時之行不愆忒。聖人以順動,故經 正而民興於善,刑罰清簡,而萬民服也。

## 豫之時義大矣哉!

既言豫順之道矣,然其旨味淵永,言盡而意有餘也;故復贊之云「豫之時義大矣哉」, 欲人研味其理,優柔涵泳而識之也。

時義,謂豫之時義。諸卦之時與義用「大」者,皆贊其「大矣哉」,豫以下十一卦是也。豫、遯、姤、旅,言時義;坎、睽、蹇,言時用;頤、大過、解、革,言時, 各以其大者也。

象曰:雷出地奮,豫。先王以作樂崇德,殷薦之上帝,以配祖考。

雷者,陽氣憤發,陰氣相薄而成聲也。陽始潛閉地中,及其動,則出地奮震也。始 閉鬱,及奮發,則通暢和豫,故爲豫也。

坤順震發,和順積中而發於聲,樂之象也。先王觀雷出地而奮,和暢發於聲之象, 作聲樂以褒崇功德,其殷盛至於薦之上帝,推配之以祖考。殷,盛也。禮有殷奠, 謂盛也。薦上帝、配祖考,盛之至也。

## 初六:鳴豫,凶。

初六以陰柔居下;四,豫之主也,而應之,是不中正之小人,處豫而爲上所寵,其 志意滿極,不勝其豫,至發於聲音,輕淺如是,必至於凶也。鳴,發於聲也。

#### 象曰:初六鳴豫,志窮凶也。

云「初六」,謂其以陰柔(註 63)處下,而志意窮極,不勝其豫,至於鳴也;必驕肆而致(註 64)以矣。

#### 六二:介于石,不終日,貞吉。

逸豫之道,放則失正;故豫之諸爻,多不得正,不 (註 65) 與時合也。唯六 二 一爻, 處中正,又无應,爲自守之象。當豫之時,獨能以中正自守,可謂特立之操,是其 節介如石之堅也。介于石,其介如石也。

人之於豫樂,心說之,故遲遲,遂至於耽戀,不能已也。二以中正自守,其介如石, 其去之速,不俟終日,故貞正而占也。

處豫不可安且久也,久則溺矣;如二,可謂見幾而作者也。夫子因二之見幾,而極言知幾之道,曰:「知幾,其神乎! 君子上交不諂,下交不瀆,其知幾乎!幾者,動之微,吉之先見者也。君子見幾而作,不俟終日。《易》曰:『介于石,不終日,貞吉。』介如石焉,寧用終日,斷可識矣。君子知微知彰,知柔知剛,萬夫之望。」

夫見事之幾微者,其神妙矣乎! 君子上交不至於諂,下交不至於瀆者,蓋知幾也; 不知幾,則至於過而不已。交於上以恭巽,故過則爲諂;交於下以和易,故過則爲 瀆。君子見於幾微,故不至於過也。

所謂幾者,始動之微也。吉凶之端,可先見而未著者也;獨言吉者,見之於先,豈 復至有凶也?君子明哲,見事之幾微,故能其介如石。其守既堅,則不惑而明;見 幾而動,豈俟終日也。

斷,別也,其判別可見矣。微與彰,柔與剛,相對者也;君子見微則知彰矣,見柔 則知剛矣。知幾如是,眾所仰也,故贊之曰「萬夫之望」。

## 象曰:不終日,貞吉,以中正也。

能不終日而貞且吉者,以有中正之德也。中正,故其守堅,而能辯之早,去之速。 爻言六二處豫之道,爲教之意深矣。

六三: 盱豫, 悔。遲, 有悔。

<sup>(</sup>註63) 一无「柔」字。

<sup>[</sup>註64] 一作「至」。

<sup>(</sup>註65) 《四庫》本作「才」。

六三陰而居陽,不中不正之人也。以不中正而處豫,動皆有悔。

盱,上視也。上 (註 66) 瞻望於四,則以不中正不爲四所取,故有悔也。四,豫之主, 與之切近,荀遲遲而不前,則見棄絕,亦有悔也。

蓋處身不正,進退皆有悔吝,當如之何?在正身而已。君子處己有道,以禮制心,雖處豫時,不失中正,故无悔也。

肝,匈(註67)于反。

象曰: 盱豫有悔, 位不當也。

自處不當,失中正也,是以進退有悔。

九四:由豫,大有得,勿疑,朋盍簪。

豫之所以爲豫者,由(註68)九四也,爲動之主;動而眾陰說順,爲豫之義。四,大臣之位,六五之君順從之,以陽剛而任上之事,豫之所由也,故云「由豫」。

大有得,言得大行其志,以致天下之豫也。

勿疑,朋盍簪:四居大臣之位,承柔弱之君,而當天下之任,危疑之地也。獨當上之倚任,而下无同德之助,所以疑也。唯當盡其至誠,勿有疑慮,則 (註69) 朋類自當合 (註70) 聚。夫欲上下之信,唯至誠而已;苟盡其至誠,則何患乎其 註71 无助也。簪,聚也。簪之名簪,取聚髮也。

或曰:「卦唯一陽,安得同德之助?」曰:「居上位而至誠求助,理必得之。姤之九 五曰:『有隕自天。』是也。四以陽剛迫(註 72)近君位,而專主乎豫,聖人宜爲之 戒,而不然者,豫,和順之道也,由和順之道,不失爲臣之正也。如此而專上於豫, 乃是任天下之事,而致時於豫者也,故唯戒以至誠勿疑。」

盍,胡臘反。簪,測林反。

## 象曰:由豫,大有得,志大行也。

<sup>[</sup>註66]《註評》本作「往上」。

<sup>[</sup>註67] 底本「匈」作「切」,據《註評》本更正。

<sup>[</sup>註68] 一无「由|字。

<sup>[</sup>註69] 一有「其」字。

<sup>[</sup>註70] 《四庫》本作「盍」。

<sup>[</sup>註71] 一无「乎」字:一无「其」字。

<sup>[</sup>註72] 一作「逼」。

由己而致天下於樂豫,故爲「大有得」,謂其志得大行也。

#### 六五: 貞疾, 恒不死。

六五以陰(註73)柔居君位,當豫之時,沈溺於豫,不能自立者也。權之所主,眾之所歸,皆在於四。四之陽剛得眾,非耽惑柔弱之君所能制也;乃柔弱不能自立之君,受制於專權之臣也。居得君位,貞也;受制於下,有疾苦也。六居尊位,權雖失而位未亡也,故云「貞疾,恒不死」,言貞而有疾,常疾而不死,如漢、魏末世之君也。

人君致危亡之道非一,而以豫爲多。在四不言失正,而於五乃見其強逼者,四本无失,故於四言大臣任天下之事之義;於五則言柔弱居尊,不能自立,威權去己之義。 各據爻以取義,故不同也。若五不失君道,而四主於豫,乃是任得其人,安享其功,如太甲、成王也。

蒙亦以 (註 74) 陰居尊位,二以陽爲蒙之 上,然彼吉而此疾者,時不同也。 童蒙而資 之於人,宜也;耽豫而失之於人,危亡之道也。故蒙相應,則倚任者也;豫相逼, 則失權者也。

又:上下之心專歸於四也。

象曰:六五貞疾,乘剛也;恒不死,中未亡也。

貞而疾,由乘剛,爲剛所逼也。恒不死,中之尊位未亡也。

上六:冥豫成。有渝,无咎。

上六陰柔,非有中正之德,以陰居上,不正也。而當豫極之時,以君子居斯時,亦當戒懼,況陰柔乎?乃耽肆於豫,昏迷不知反者也。在豫之終,故爲昏冥已成也。若能有渝變,則可以无咎矣。在豫之終,有變之義。人之失,苟能自變,皆可以无咎;故冥(註75)雖已成,能變則善也。聖人發此義,所以勸遷善也;故更不言冥之凶,專言渝之无咎。

渝,容朱反。

象曰:冥豫在上,何可長也?

昏冥於豫,至於終極,災咎行及矣,其可長然乎?當速渝也。

<sup>[</sup>註73] 一无「陰」字。

<sup>(</sup>註74) 一无「以」字。

<sup>[</sup>註75] 《四庫》本作「冥豫」。

#### 

《序卦》:「豫必有隋,故受之以隋。」

夫說豫之道,物所隨也,隨所以次豫也。爲卦兌上震下。兌爲說,震爲動;說而動,動而說,皆隨之義。女,隨人者也,以少女從長男,隨之義也。

又:震爲雷,兌爲澤;雷震於澤中,澤隨而動,隨之象也。

又:以卦變言之,乾之上,來居坤之下;坤之初,往居乾之上,陽來下於陰也。以 陽下陰,陰必說隨,爲隨之義。

凡成卦,既取二體之義,又有取爻義者;復有更取卦變之義者,如隨之取義,尤爲 詳備。

#### 隨:元亨,利貞,无咎。

隨之道,可以致大亨也。君子之道,爲眾所隨,與己隨於人,及臨事擇所隨,皆隨也。隨得其道,則可以致大亨也。凡人君之徙(註76)善,臣下之奉命,學者之徙義,臨事而從長,皆隨也。

隨之道,利在於貞正。隨得其正,然後能大亨而无咎;失其正,則有咎矣,豈能亨 乎?

## 彖曰:隨,剛來而下柔,動而說,隨。大亨貞,无咎,而天下隨時。

卦所以爲隨,以剛來而下柔,動而說也。謂乾之上九,來居坤之下;坤之初六,往 居乾之上。以陽剛來下於陰柔,是以上下下,以貴下賤。能如是,物之所說隨也。

又:下動而上說,動而可說也,所以隨也;如是則可 [註 77] 大亨而得正。能大亨而得正,則爲无咎;不能亨,不得正,則非可隨之道,豈能使天下隨之乎?天下所隨者,時也,故云「天下隨時」。

下,遐嫁反。說,音悅。下同。

## 隨時之義大矣哉!

君子之道,隨時而動,從宜適變,不可爲典要,非造道之深,知幾能權者,不能與

<sup>[</sup>註76] 《四庫》本作「從」。

<sup>[</sup>註77] 一有「以」字。

於此也,故贊之曰「隨時之義大矣哉」。凡贊之者,欲人知其義之大,玩而識之也。 此贊隨時之義大,與豫等諸卦不同。諸卦時與義是兩事(註78)。

#### 象曰:澤中有雷,隨;君子以嚮晦入宴息。

雷震於澤中,澤隨震而動,爲隨之象。君子觀象,以隨時而動。隨時之宜,萬事皆然,取其最明且近者言之。

君子以嚮晦入宴息: 君子 畫則自強不息,及嚮昏晦,則入居於內,宴息以安其身。 起居隨時,適其官也。禮,君子書不居內,夜不居外,隨時之道也。

嚮,音向。宴,鳥練反。

### 初九:官有渝,貞吉。出門,交有功。

九,居隨時而震體,且動之上,有所隨者也。官,主守也。既有所隨,是其所主守有變易也,故曰「官有渝,貞占」,所隨得正則吉也。有渝而不得正,乃過動也。

出門,交有功:人心所從,多所親愛者也。常人之情,愛之則見其是,惡之則見其 非。故妻孥之言,雖失而多從;所憎之言,雖善爲惡也。苟以親愛而隨之,則是私 情所與,豈合正理?故出門而交,則有功也。出門,謂非私暱。交不以私,故其隨 當而有功。

## 象曰:官有渝,從正吉也。

既有隨而變,必所從得正則吉也;所從不正,則有悔吝。

## 出門,交有功,不失也。

出門而交,非牽於私,其交必正矣;正則无失而有功。

## 六二: 係小子, 失丈夫。

二應五而比初,隨先於近柔,不能固守,故爲之戒云:「若係小子,則失丈夫也。」 初陽在下,小子也。五正應在(註79)上,丈夫也。二若志係於初,則失九五之正應, 是失丈夫也(註80)。係小子而失丈夫,捨正應而從不正,其咎大矣。二有中正之德, 非必至如是也。在隨之時,當爲之戒也。

<sup>[</sup>註78] 一作「與豫卦以下諸卦不同,時義是兩事」;一作「與豫等諸卦不同,時與義是兩事」。 [註79] 一作「居」。

<sup>[</sup>註80] 一无「也」字。

#### 象曰:係小子,弗兼與也。

人之所隨,得正則遠邪,從非則失是,无兩從之理。二苟係初,則失五矣,弗能兼 與也;所以戒人從正,當專一也。

#### 六三:係丈夫,失小子。隨有求得,利居貞。

丈夫,九四也。小子,初也。陽之在上者,丈夫也。居下者,小子也。三雖與初同體,而切近於四,故係於四也。大抵陰柔不能自立,常親係於所近者。上係於四,故下失於初;舍初從上,得隨之宜也。上隨則善也,如昏之隨明,事之從善,上隨也。背是從非,舍明逐暗,下隨也。四亦无應,无隨之者也。近得三之隨,必與之親善。故三之隨四,有求必得也。人之隨於上,而上與之,是得所求也。又:凡所求者,可得也。

雖然,固不可非理枉道以隨於上。苟取愛說以遂所求,如此乃小人邪諂趨利之爲也。故云「利居貞」。自處於正,則所謂有求而必(註81)得者,乃正事,君子之隨也。

#### 象曰:係丈夫,志舍下也。

既隨於上,則是其志舍下而不從也。舍下而從上,舍卑而從高也,於隨爲善矣。 舍,音捨。

## 九四:隨有獲, 貞凶。有孚, 在道以明, 何咎?

九四以陽剛之才,處臣位之極,若於隨有獲,則雖正亦凶。有獲,謂得天下之心隨於 己。爲臣之道,當使恩威一出於上,眾心皆隨於君;若人心從己,危疑之道也,故凶。

居此地者奈何?唯孚誠積於中,動爲合於道;以明哲處之,則又何咎?占之人有行之者,伊尹、周公、孔明是也,皆德及於(註82)民,而民隨之。其得民之隨,所以成其君之功,致其國之安。

其至誠存乎中,是有孚也。其所施爲,无不中道,在道也。唯其明哲,故能如是以明也,復何過咎之有?是以下信而上不疑,位極而无逼上之嫌,勢重而无專強(註83)之過,非聖人大賢則不能也。其次,如唐之郭子儀,威震主而主不疑,亦由中有誠孚,而處无甚失也。非明哲,能如是乎?

隕,羽敏反。

<sup>[</sup>註81] 一无「必」字

<sup>[</sup>註82] 一无「於」字

<sup>〔</sup>註83〕一作「權」。

象曰:隋有獲,其義凶也;有孚在道,明功也。

居近君之位而有獲,其義固凶;能有孚而在道,則无咎,蓋明哲之功也。

九五: 孚于嘉, 吉。

九五居尊,得正而中實,是其中誠在於隨善,其吉可知。嘉,善也。自人君至于庶人,隨道之吉,唯在隨善而已。下應二之正中,爲隨善之義。

象曰: 孚于嘉吉, 位正中也。

處正中之位,由正中之道。孚誠所隨者,正中也,所謂嘉也,其吉可知。所孚之嘉,謂六二也。隨以得中爲善。隨之所防者,過也;蓋心所說隨,則不知其過矣。

上六:拘係之,乃從維之。王用亨于西山。

上六以柔順而居隨之極,極乎隨者也。拘係之,謂隨之極,如拘持縻係之。乃從維之,又從(註 84)而維係之也。謂隨之固結如此。

下用亨於西山,隨之極如是。昔者,大王用此道,亨王業于西山。大王避狄之難,去豳來岐,豳人老稚扶攜以隨之,如歸市。蓋其人心之隨,固結如此。用此,故能 亨盛其王業於西山。西山,岐山也。周之王業,蓋興於此。

上居隨極,固爲太過;然在得民 [註 85] 之隨,與隨善之固,如此乃爲善也;施於它則過矣。

拘,句于反。縻,忙皮反。難,去聲。豳,音彬。岐,音祁。稚,音治。

象曰:拘係之,上窮也。

隨之固,如拘係(註86)維持(註87),隨道之窮極也。

## 異ト豊

《序卦》:「以喜隨人者,必有事,故受之以蠱。」

承二卦之義以爲次也。夫喜說以隨於人者,必有事也;无事,則何喜何隨?蠱所以

<sup>[</sup>註84] 底本作「後」,據《四庫》本更正。

<sup>[</sup>註85] 一有「心」字。

<sup>[</sup>註86] 一无「係」字。

<sup>[</sup>註87] 一无「持」字。

次隨也。

蟲,事也。蟲非訓事,蠱乃有事也。為卦山下有風。風在山下,遇山而回則物亂, 是爲蠱象。

蠱之義,壞亂也。在文爲蟲皿;皿之有蟲,蠱壞之義。《左氏傳》云:「風落山,女惑男。」以長女下於少男,亂其情也。風遇山而回,物皆撓亂,是爲有事之象,故云「蠱者,事也」。既蠱而治之,亦事也。以卦之象言之,所以成蠱也;以卦之才言之,所以治蠱也。

蠱,音古。撓,女巧反。

#### 蠱:元亨,利涉大川。

既蠱,則有復治之理。自古治必因亂,亂則開治,理自然也。如卦之才以治蠱,則 能致元亨也。蠱之大者,濟時之艱難險阻也,故(註88)利涉大川。

#### 先甲三日,後甲三日。

甲,數之首、事之始也,如 (註89) 辰之甲乙。甲第、甲令,皆謂首也,事之端也。 治蠱之道,當思慮其先後三日。蓋推原先後,爲救弊可久之道。先甲,謂先於此, 究其所以然也。後甲,謂後於此,慮其將然也。

一日、二日,至於三日,言慮之深、推之遠也。究其所以然,則知救之之道;慮其 將然,則知備 (註90) 之之方。善救,則前弊可革;善備,則後利可久,此占之聖王, 所以新天下而垂後世也。後之治蠱者,不明聖人先甲後甲之誠,慮淺而事近,故勞 於救亂 (註91),而亂不革;功未及成,而弊已生矣。

甲者,事之首。庚者,變更之首。制作政教之類,則云「甲」,舉其首也。發號施令之事,則云「庚」。庚,猶更也,有所更變也。

彖曰:蠱,剛上而柔下,巽而止,蠱。

以卦變及二體之義而言。

剛上而柔下,謂乾之初九,上而爲上九;坤之上六,下而爲初六也。陽剛,尊而在

<sup>(</sup>註88) 《四庫》本有「曰」字。

<sup>[</sup>註89] 底本作「加」, 費解。《四庫》本作「如」, 義較長,據《四庫》本更正。

<sup>[</sup>註90] 《註評》本作「防備」,未明所據。

<sup>[</sup>註91] 《四庫》本作「世」。

上者也,今往居於上;陰柔,卑而在下者也,今來居於下。男雖少而居上,女雖長 而在下,尊卑得正,上下順理,治蠱之道也。由剛之上,柔之下,變而爲艮巽。艮, 止也。巽,順也。(註92)以巽順之道治蠱,是以元亨也。

#### 蠱,元亨,而天下治也。

治蠱之道,如卦之才,則元亨而天下治矣。夫治亂者,苟能使尊卑上下之義正,在 下者巽順,在上者能止齊安定之,事皆止於順,則何蠱之不治也?其道大善而亨也; 如此,則天下治矣。

#### 利涉大川,往有事也。

方天下壞亂之際,宣涉艱險,以往而濟之,是往有所事也。

#### 先甲三日,後甲三日,終則有始,天行也。

夫有始則必有終,既終則必有始,天之道也。聖人知終始之道,故能原始而究其所 以然,要終而備其將然。先甲、後甲而爲之慮,所以能治蟲,而致元亨也。

#### 象曰:山下有風,蠱;君子以振民育德。

山下有風,風遇山而回,則物皆散亂,故爲有事之象。君子觀有事之象,以振濟 於民,養育其德也。在己則養德,於天下則濟民;君子之所事,无大於此二者。

## 初六:幹父之蠱,有子,考无咎;厲,終吉。

初六雖居最下,成卦由之,有主之義。居內在下而爲主,子幹父蠱也。子幹父蠱之道, 能堪其事,則爲有子,而其考得无咎;不然,則爲父之累,故必惕厲,則得終吉也。

處卑而尸尊事,自當兢畏。以六之才,雖能異順,體乃陰柔,在下无應而主幹,非 有能濟之義。若以不克幹而(註93)言,則其義甚小,故專言爲子幹蠱之道,必克濟, 則不累其父;能厲,則可以終占。乃備見爲子幹蠱之大法也。

## 象曰: 幹父之蠱, 意承考也。

子幹父蠱之道,意在承當於父之事也。故祇敬其事,以置父於无咎之地;常懷惕厲, 則終得其占也。盡誠於父事,吉之道也。

## 九二:幹母之蠱,不可貞。

<sup>[</sup>註92] 《四庫》本有「下巽而上止,止於巽順也」二句。

<sup>[</sup>註93] 一无「而」字。

九 二以 [註 94] 剛陽 [註 95] 爲六五所應,是以剛陽 [註 96] 之才在下,而幹夫在上陰柔之事也,故取子幹母蠱爲義。以剛陽之臣,輔柔弱之君,義亦相近。

二,異體而處柔,順義爲多,幹母之蠱之道也。夫子之於母,當以柔異輔導之,使得於義(註97),不順而致敗蠱,則子之罪也。從容將順,豈无道乎?

以婦人言之,則陰柔可知。若伸己剛陽之道,遽然矯拂,則傷恩,所害大矣,亦安能 入乎?在乎屈己下意,巽順將承,使之身正事治而已。故曰「不可貞」,謂不可貞固, 盡其剛直之道,如是乃中道也,又安能使之爲甚高之事乎?若於柔弱之君,盡誠竭忠, 致之於中道則可矣,又安能使之大有爲乎?且以周公之聖輔成王,成王非甚柔弱也, 然能使之爲成王而已,守成不失道則可矣,固不能使之爲羲、黃、堯、舜之事也。

二,異體而得中,是能異順而得中道,合「不可貞」之義,得幹母蠱之道也。

#### 象曰: 幹母之蠱, 得中道也。

二得中道而不過剛,幹母蠱之善者也。

#### 九三:幹父之蠱,小有悔,无大咎。

三以剛陽之才,居下之上,上幹者也,子幹父之蠱也。以陽處剛而不中,剛之過也; 然而,在異體,雖剛過,而不爲无順。順,事親之本也;又居得正,故无大過。以 剛陽之才,克幹其事,雖以剛過,而有小小之悔,終无大過咎也。然有小悔,已非 善事親也。

## 象曰:幹父之蠱,終无咎也。

以三之才,幹父之蠱,雖小有悔,終无大咎也。蓋剛斷能幹,不失正而有順,所以 終无咎也。

## 六四:裕父之蠱,往見吝。

四以陰居陰,柔順之才也。所處得正,故爲寬裕以處其父事者也。夫柔順之才而處正,僅能循常自守而已;若往幹過常之事,則不勝而見吝也。以陰柔而无應助,往安能濟?

<sup>[</sup>註94] 《四庫》本無「以」字。

<sup>[</sup>註95] 《四庫》本作「陽剛」。

<sup>[</sup>註96] 《四庫》本作「陽剛」。

<sup>[</sup>註97] 一有「母」字。

裕,羊戍反。

### 象曰: 裕父之蠱, 往未得也。

以四之才,守常居寬豫之時則可矣;欲有所往,則未得也。加其所任 [註 98],則不勝矣。

## 六五: 幹父之蠱, 用譽。

五居尊位,以陰柔之質,當大(註99)君之幹,而下應於九二,是能任剛陽之臣也。 雖能下應剛陽之賢而倚任之,然已實陰柔,故(註100)不能爲創始開基之事,承其舊 業則可矣,故爲幹父之蠱。

夫創業垂統之事,非剛明之才則不能。繼世之君,雖柔弱之資,苟能 [註 101] 任剛賢,則可以爲善繼,而成令譽也。太甲、成王,皆以臣而用譽者也。

#### 象曰:幹父用譽,承以德也。

幹父之蠱,而用有令譽者,以其在下之賢,承輔之以剛中之德也。

## 上九:不事王侯,高尚其事。

上九居蠱之終,无係應 (註 102) 於下,處事之外,无所事之地也。以剛明之才无應援,而處无事之地,是賢人君子不偶於時,而高潔自守,不累於世務者也,故云「不事王侯,高尚其事」。古之人有行之者,伊尹、太公望之始,曾子、子思之徒是也。

不屈道以徇時,既不得施設於天下,則自善其身,尊高敦尚其事,守其志節而已。 七之自高尚,亦(註103) 非一道:有懷抱道德不偶於時,而高潔自守者;有知止足之 道,退而自保者;有量能度分,安於不求知(註104)者;有清介自守,不屑天下之事, 獨潔其身者。所處雖有得失小大之殊,皆自(註105)高尚其事者也。《象》所謂「志 可則」者,進退合道者也。

<sup>[</sup>註98] 《二程集》:一作「往」。另註:《徐》本此句作「如有所往」

<sup>[</sup>註99] 《四庫》本作「人」。

<sup>[</sup>註100]一作「固」。

<sup>[</sup>註101] 一有「信」字。

<sup>[</sup>註102] 一无「應」字。

<sup>[</sup>註103] 一无「亦」字。

<sup>[</sup>註104] 一无「知」字。

<sup>(</sup>註105)底本作「目」。上云「士之自高尚」,故下文宜作「自」,今據《四庫》本更正。

象曰:不事王侯,志可則也。


如上九之處事外,不累於世(註106)務,不臣事於王侯,蓋進退以道,用捨隨時,非 賢者能之乎?其所存之志,可爲法則也。

《周易》上經 卷第二

<sup>[</sup>註106] 底本作「出」,費解,故據《四庫》本,《註評》本更正。

## 《周易》上經 卷第三

程頤傳



《序卦》:「有事而後可大,故受之以臨。」

臨者,大也。蠱者,事也。有事則可大矣,故受之以臨也。韓康伯云:「可大之業,由事而生。」二陽方長而盛大,故爲臨也。爲卦澤上有地。澤上之地,岸也;與水相際,臨近乎水,故爲臨。

天下之物,密近 (註1) 相臨者,莫若地與水;故地上有水則爲比,澤上有地則爲臨也。 臨者,臨民、臨事,凡所臨皆是。在卦,取自上臨下,臨民爲義。

## 臨:元亨,利貞。

以卦才言也。臨之道,如卦之才,則大亨而正也。

## 至于八月,有凶。

二陽方長於下,陽道嚮盛之時,聖人豫爲之戒曰:「陽雖方長,至於八月,則其道消矣,是有凶也。」

大率聖人爲戒,必於方盛之時。方盛而慮衰,則可以防其滿極,而圖其永久;若既 衰而後戒,亦无及矣。自古天下安治,未有久而不亂者,蓋不能戒於盛也。方其盛 而不知戒,故狃安富則(註2)驕侈生,樂舒肆則綱紀壞,忘禍亂則釁孽萌。是以浸

<sup>[</sup>註]]一作「邇」。

<sup>[</sup>註 2] 《四庫》本作「而」。

淫,不知亂之至也。

彖曰:臨,剛浸而長,說而順;剛中而應,大亨以正,天之道也。

浸,漸也,二陽長於下而漸進也。下兌上坤,和說而順也。剛得中道而有應助,是 以能大亨而得正,合天之道。

剛正而和順,天之道也。化育之功所以不息者,剛正和順而已。以此臨人、臨事、 臨天下,莫不大亨而得正也。兌爲說,說乃和也。夬,《彖》云:「决而和。」

#### 至于八月有凶,消不久也。

臨, 二陽生,陽方漸盛之時,故聖人爲之戒云:「陽雖方長,然至于八月,則消而凶矣。」八月,謂陽生之八月。陽始生於復,自復至**遯**,凡八月,自建子至建未也。 二陰長而陽消矣,故云「消不久也」。

在陰陽之氣言之,則消長如循環,不可易也。以人事言之,則陽爲君子,陰爲小人。 方君子道長之時,聖人爲之誠,使知極則有凶之理,而虞備之常,不至於滿極,則 无凶也。

## 象曰:澤上有地,臨;君子以教思无窮,容保民无疆。

澤之上有地,澤岸也,水之際也。物之相臨與含容,无若水之在地,故澤上有地爲 臨也。

君子觀親臨之象,則教思无窮。親臨於民,則有 [註 3] 教導之意思也。无窮,至誠 无歝也。觀含容之象,則有容保民之心。无疆,廣大无疆限也。含容,有廣大之意, 故爲无窮、无疆之義。

## 初九:咸臨,貞吉。

咸,感也。陽長之時,感動於陰;四應於初,感之者也,比它卦相應尤重。

四,近君之位。初得正位,與四感應,是以正道爲當位所信任,得行其志。獲乎上 而得行其正道,是以占也。它卦,初、上爻不言得位、失位,蓋初、終之義爲重也。 臨,則以初得位居正爲重。

凡言「貞吉」,有既正且吉者;有得正則吉者;有貞固守之則吉者,各隨其事 [註4]

<sup>[</sup>註 3] 一无「有」字。

<sup>[</sup>註 4] 一作「時」。

也。

象曰:咸臨貞吉,志行正也。

所謂「貞吉」、九之志在於行正也。以九居陽、又應四之正、其志正也。

九二:咸臨,吉,无不利。

二方陽長而漸盛,感 (註 5) 動於六五中順之君,其交之親,故見信任,得行其志,所臨占而无不利也。吉者,已然如是,故占也。无不利者,將然;於所施爲,无所不利也。

象曰:咸臨,吉,无不利,未順命也。

未者,非遽之辭。《孟子》:「或問:『勸齊伐燕,有諸?』曰:『未也。』」又云:「仲 子所食之粟,伯夷之所樹數?抑亦盜蹠(註6)之所樹數?是未可知也。」《史記》:「侯 嬴曰:『人固未易知。』」古人用字之意皆如此。

今人大率用對「已」字,故意似異,然實不殊也。九二與丘感應以臨下。蓋以剛德之長,而又得中,至誠相感,非由順上之命也,是以吉而无不利。丘順體,而二說體,又陰陽相應,故《象》特明其非由說順也。

六三:甘臨,无攸利;既憂之,无咎。

三居下之上, 臨人者也, 陰柔而說體, 又處不中正, 以甘說臨人者也。在上而 (註7) 以甘說臨下, 失德之甚, 无所利也。

兌性既說,又乘二陽之上,陽方長而上進,故不安而益甘,既知危懼而憂之,若能 持謙守正,至誠以自處,則无咎也。邪說由己,能憂而改之,復何咎乎?

象曰:甘臨,位不當也;既憂之,咎不長也。

陰柔之人,處不中正,而居下之上,復乘二陽,是處不當位也。既能知懼而憂之, 則必強勉自改,故其過咎不長也。

六四:至臨, 无咎。

四居上之下,與下體相比,是切臨於下,臨之至也。臨道尚近,故以比爲至。四居

<sup>[</sup>註 5] 一作「咸」。

<sup>[</sup>註 6] 《四庫》本作「盗跖」。

<sup>[</sup>註 7] 一无「而」字。

正位,而下應於剛陽之初,處近君之位,守正而任賢,以親臨於下,是以无咎,所 處當也。

#### 象曰:至臨无咎,位當也。

居近君之位,爲得其任;以陰處四,爲得其正;與初相應,爲下賢。所以无咎,蓋 由位之當也。

#### 六五:知臨,大君之宜,吉。

五以柔中順體,居尊位,而下應於二剛中之臣,是能倚任於二,不勞而治,以知臨 下者也。

夫以一人之身,臨乎天下之廣,若區區自任,豈能周於萬事?故自任其知者,適足 爲不知。唯能取天下之善,任天下之聰明,則无所不周。是不自任其知,則其知大 矣。五順應於九二剛中之賢,任之以臨下,乃己以明知臨天下,大君之所宜也,其 吉可知。

#### 象曰:大君之宜,行中之謂也。

君臣道合,蓋以氣類相求。五有中德,故能倚任剛中之賢,得 (註 8) 大君之宜,成 知臨之功;蓋由行其中德也。人君之於賢才,非道同德合,豈能用也?


## 上六:敦臨,吉,无咎。

上六,坤之極,順之至也;而居臨之終,敦厚於臨也。與初、二雖非正應,然大率 陰求於陽,又其至順,故志在從乎二陽。尊而應卑,高而從下;尊賢取善,敦厚之 至也,故曰「敦臨」。

所以吉而无咎:陰柔在上,非能臨者,宜有咎也;以其敦厚於順剛,是以吉而无咎。 六居臨之終,而不取極義;臨无過極,故止爲厚義。上,无位之地,止以在上言。

## 象曰:敦臨之吉,志在內也。

志在內,應乎初與二也。志順剛陽而敦篤,其吉可知[註9]。



<sup>[</sup>註 8] 《四庫》本作「成」。

<sup>[</sup>註 9] 《四庫》本有「也」字。

《序卦》:「臨者,大也。物大然後可觀,故受之以觀。」觀所以次臨也。

凡觀視於物,則爲觀(平聲);爲觀於下,則爲觀(去聲)(註 10)。如樓觀謂之觀者,爲觀於下也。人君上觀天道,下觀民俗,則爲觀;修德行政,爲民瞻仰,則爲觀。

風行地上,編觸萬類,周觀之象也。二陽在上,四陰在下;陽剛居尊,爲群下所觀,仰觀之義也。在諸爻,則唯取觀見,隨時爲義也。

#### 觀:盥而不薦,有孚顒若。

予聞之胡翼(註 11) 之先生曰:「君子居上,爲天下之(註 12) 表儀,必極其莊敬,則下觀仰而化也。故爲天下之觀,當如宗廟之祭。始盥之時,不可如既薦之後;則下民盡其至誠,顒然瞻仰之矣。」

盥,謂祭祀之始,盥手酌鬱鬯於地,求神之時也。薦,謂獻腥、獻熟之時也。盥者,事之始,人心方盡其精誠,嚴肅之至也。至既薦之後,禮數繁縟,則人心散,而精一不若始盥之時矣。居上者,正其表儀,以爲下民之觀,當[註[3]莊嚴[註[4]如始 盥之初,勿使誠意少散,如既薦之後;則天下之人,莫不盡其孚誠,顒然瞻仰之矣。 題,仰望也。

## 彖曰:大觀在上,順而巽,中正以觀天下。

五居尊位,以剛陽中正之德,爲下所觀,其德甚大,故曰「大觀在上」。下坤而上巽, 是能順而巽也。五居中正,以巽順中正之德,爲觀於天下也。

## 觀,盥而不薦,有孚顒若,下觀而化也。

爲觀之道,嚴敬如始盥之時,則下民至誠瞻仰 (註 15) 而從化也。不薦,謂不使誠意 少散也。

## 觀天之神道,而四時不忒;聖人以神道設教,而天下服矣。

天道至神,故曰「神道」。觀天之運行,四時无有差忒,則見其神妙。聖人見天道之

<sup>[</sup>註10] 《四庫》本無「平聲」、「去聲」等字。

<sup>[</sup>註11] 底本作「益」。《四庫》本作「翼」。按:胡瑗,字翼之,作「翼」爲是。

<sup>[</sup>註12] 一无「之」字。

<sup>[</sup>註13] 一作「常」。

<sup>[</sup>註14] 一作「敬」。

<sup>[</sup>註15] 一作「仰觀」。

神, 體神道以設教, 故天下莫不服也。

夫天道至神,故運行四時,化育萬物,无有差忒。至神之道,莫可名言,唯聖人默契,體其妙用,設爲政教。故天下之人,涵泳其德,而不知其功;鼓舞其化,而莫測其用,自然仰觀而戴服,故曰「以神道設教,而天下服矣」。

#### 象曰:風行地上,觀;先王以省方觀民設教。

風行地上,周及庶物,爲由歷周覽之象。故先王體之,爲省方之禮,以觀民俗,而 設政教也。

天子巡省四方,觀視民俗,設爲政教,如奢則約之以儉,儉則示之以禮是也。省方, 觀民也。設教,爲民觀也。

#### 初六:童觀,小人无咎,君子吝。

六以陰柔之質,居遠於陽,是以 (註16) 觀見者淺近,如童稚然,故曰「童觀」。

陽剛中正在上,聖賢之君也。近之,則見其道德之盛,所觀深遠。初乃遠之,所見不明,如童蒙之觀也。小人,下民也;所見昏淺,不能識君子之道,乃常分也。不足,謂之過咎;若君子而如是,則可鄙吝也。

## 象曰:初六童觀,小人道也。

所觀不明,如童稚,乃小人之分,故曰「小人道也」。

## 六二: 闚觀, 利女貞。

二應於五,觀於五也。五,剛陽中正之道,非二陰暗柔弱所能觀見也,故但如闚覘之觀耳。闚覘之觀,雖少見而不能甚 [註 17] 明也。二既不能明見剛陽中正之道,則利如女子之貞,雖見之不能甚明,而能順從者,女子之道也,在女子爲貞也。 1既不能明見九五之道,能如女子之順從,則不失中正,乃爲利也。

## 象曰: 闚觀女貞, 亦可醜也。

君子不能觀見剛陽中正之大道,而僅 (註 18) 闚覘其彷彿,雖能順從,乃同女子之貞,亦可羞醜也。

<sup>[</sup>註16] 一作「其」。

<sup>[</sup>註17] 一作「盡」。

<sup>[</sup>註18] 一有「能」字。

#### 六三:觀我生,進退。

三居非其位,處順之極,能順時以進退者也。若居當其位,則无進退之義也。

觀我生:我之所生,謂動作施爲出於己者。觀其所生,而隨宜進退,所以處雖非正,而未至失道也。隨時進退,求不失道,故无悔咎[註19],以能順也。

#### 象曰:觀我生進退,未失道也。

觀己之生,而進退以順乎宜,故未至於失道也。

#### 六四: 觀國之光, 利用賓干王。

觀,莫明於近。五以剛陽中正居尊位,聖賢之君也;四切近之,觀見其道,故云「觀國之光」,觀見國之盛德光輝也。不指君之身而云「國」者,在人君而言,豈止觀其行一身乎?當觀天下之政化,則人君之道德可見矣。四雖陰柔,而巽體居正,切近於五,觀見而能順從者也。

利用賓于王: 夫聖明在上,則懷抱才德之人,皆願進於朝廷輔戴之,以康濟天下。 四既觀見人君之德,國家之治,光華盛美,所宜賓于王朝,效其智力,上輔於君, 以施澤天下,故云「利用賓于王」也。占者,有賢德之人,則人君賓禮之,故士之 仕進於王朝,則謂之「賓」。

## 象曰:觀國之光,尚賓也。

君子懷負才業,志在乎兼善天下;然有卷懷自守者,蓋時无明君,莫能用其道,不得已也,豈君子之志哉?故孟子曰:「中天下而立,定四海之民,君子樂之。」既觀見國之盛德光華,古人所謂「非常之遇」也(註20);所以志願登進王朝,以行其道,故云「觀國之光,尚賓也」。尚,謂志尚,其志意願慕賓于王朝也。

## 九五:觀我生,君子无咎。

九五居人君之位,時之治亂,俗之美惡,繫乎己而已。觀己之生,若天下之俗,皆 君子矣,則是己之所爲政化善也,乃无咎矣。若天下之俗,未合君子之道,則是己 之所爲政治未善,不 (註21) 能免於咎也。

## 象曰:觀我生,觀民也。

<sup>[</sup>註19] 一作「吝」。

<sup>[</sup>註20] 一无「也」字。

<sup>[</sup>註21] 一作「未」。

我生,出於己者。人君欲觀己之施爲善否,當觀於民;民俗善,則政化善也。王弼 云:「觀民以察己之道。」是也。

#### 上九:觀其生,君子无咎。

上九以剛陽 (註 22) 之德處於上,爲下之所觀,而不當位,是賢人君子不在於位,而 道德爲天下所觀仰者也。觀其生,觀其所生也;謂出於己者,德業行義也。既爲天 下所觀仰,故自觀其所生,若皆君子矣,則无過咎也;苟未君子,則何以使人觀仰 矜式?是其咎也。

#### 象曰:觀其生,志未平也。

雖不在位,然以人觀其德,用爲儀法,故當自慎省。觀其所生,常不失於君子,則 人不失所望而化之矣。不可以不在於位故,安然放意,无所事也。是其志意未得安 也,故云「志未平也」。平,謂安寧也。

# 震下 離上 噬嗑

《序卦》:「可觀而後有所合,故受之以噬嗑。嗑者,合也。」既有可觀,然後有來 合之者也。噬嗑所以次觀也。

噬,齧也。嗑,合也。口中有物間之,齧而後合之也。卦,上下二剛爻而中柔,外剛中虛,人頤口之象也。中虛之中,又一剛爻,爲頤中有物之象。口中有物,則隔其上下,不得嗑;必齧之,則得嗑,故爲噬嗑。

聖人以卦之象,推之於天下之事。在口,則爲有物隔而不得合;在天下,則爲有強梗或讒邪間隔於其間,故天下之事不得合也(註23)。當用刑法(註24),小則懲誡, 大則誅戮,以除去之,然後天下之治得成矣。

凡天下至於一國,一家至於萬事,所以不和合者,皆由有間也,无間則合矣。以至 天地之生,萬物之成,皆合而後能遂。凡未合者,皆有間也。若君臣、父子、親戚、 朋友之間,有離貳怨隙者,蓋讒邪間於其間也,除去之,則和合矣。故間隔者,天 下之大害也。聖人觀噬嗑(註25)之象,推之於天下萬事,皆使去其間隔而合之,則

<sup>[</sup>註22] 《四庫》本作「陽剛」。

<sup>[</sup>註23] 一无「也」字。

<sup>[</sup>註24] 《四庫》本作「罰」。

<sup>[</sup>註25] 一作「齧合」。

无不和且治(註26)矣。

噬嗑者,治天下之大用也。去天下之間,在任刑罰,故卦取用刑爲義。在二體,明 照而威震,乃用刑之象也。

#### **喷嗑**:亨,利用獄。

噬嗑亨,卦自有亨義也。天下之事,所以不得亨者,以有間也;噬而嗑之,則亨通 矣。

利用獄: 噬而嗑之之道, 宜用刑獄也。天下之間, 非刑獄何以 [註 27] 去之? 不云「利用刑」, 而云「利用 [註 28] 獄」者, 卦有明照之象, 利於察獄也。獄者, 所以究察情偽; 得其情, 則知爲間之道, 然後可以設防與致刑也。

**噬**,市制反。嗑,胡獵反。

## 彖曰: 頤中有物,曰噬嗑。噬嗑而亨。

頤中有物,故爲噬嗑。有物間於頤中則爲害,噬而嗑之,則其害亡,乃亨通也,故 云「噬嗑而亨」。

頤,以之反。

## 剛柔分,動而明,雷電合而章。

以卦才言也。

剛爻與柔爻相間,剛柔分而不相雜,爲明辨之象。明辨,察獄之本也。

動而明:下震上離,其動而明也。

雷電合而章:雷震而電耀,相須並見,合而章也。照與威並行,用獄之道也。能照, 則无所隱情;有威,則莫敢不畏。上既以二象言其動而明,故復言威照並用之意。

## 柔得中而上行,雖不當位,利用獄也。

六五以柔居中,爲用柔得中之義。上行,謂居尊位。雖不當位,謂以柔居五爲不當, 而利於用獄者。治獄之道,全剛,則傷於嚴暴;過柔,則失於寬縱。五爲用獄之主, 以柔處剛而得中,得用獄之宜也。

<sup>[</sup>註26] 一作「洽」。

<sup>[</sup>註27] 一作「不可以」。

<sup>[</sup>註28] 一无「利用」字。

以柔居剛,爲利用獄;以剛居柔,爲利否?曰:「剛柔,質也。居,用也。用柔,非 治獄之宜也。」

上,時掌反。

象曰:雷電, 噬嗑; 先王以明罰敕法。

《象》無倒置者,疑此文互也。雷電,相須並見之物,亦有嗑象。電明而雷威,先 王觀電雷 [註 29] 之象,法其明與威,以明其刑罰,飭其法令。法者,明事理而爲之 防者也。

敕:恥力反。

初九: 屨校滅趾, 无咎。

九居初,最在 (註30) 下,无位者也;下民之象,爲受刑之人。當用刑之始,罪小而 刑輕。校,木械也。其過小,故屨之於足,以滅傷其趾。人有小過,校而滅其趾, 則當懲懼,不敢進於惡矣,故得无咎。《繫辭》云:「小懲而大誡,此小人之福也。」 言懲之於小與初,故 (註31) 得无咎也。

初與上无位,爲受刑之人,餘四爻皆爲用刑之人。初居最下,无位者也。上,處尊位之上,過於尊位,亦无位者也。王弼以爲无陰陽之位。陰陽繫於奇耦,豈容无也?然諸卦初、上,不言當位不當位者(註32),蓋初終之義爲大。臨之初九,則以位爲正;若需上六,云「不當位」;乾上九云「无位」,爵位之位,非陰陽之位也。

屨,紀具反。校,爻教反。

象曰:屨校滅趾,不行也。

**屦校而滅傷其趾,則知懲誡,而不敢長其惡,故云「不行也」。古人制刑,有小罪則校其趾,蓋取禁止其行,使不進於惡也。** 

六二:噬膚滅鼻,无咎。

二,應五之位,用刑者也。四爻皆取噬爲義。二居中得正,是用刑得其中正也。用刑得其中正,則罪惡者易服,故取噬膚爲象。噬齧人之肌膚,爲易入也。

<sup>[</sup>註29] 《四庫》本作「雷電」。

<sup>[</sup>註30] 《四庫》本無「在」字。

<sup>[</sup>註31] 一有「後」字。

<sup>[</sup>註32] 一作「不言位當不當者」。

滅,沒也,深入至沒其鼻也。二以中正之道,其刑易服;然乘初剛,是用刑於剛強之人。刑剛強之人,必須深痛,故至滅鼻而无咎也。中正之道,易以服人,與嚴刑以待剛強,義不相妨。

膚, 方于反。

#### 象曰:噬膚滅鼻,乘剛也。

深至滅鼻者,乘剛故也。乘剛,乃用刑於剛強之人,不得不深嚴也。深嚴則得宜, 乃所謂中也。

#### 六三: 噬腊肉, 遇毒。小吝, 无咎。

三,居下之上,用刑者也。六居三,處不當位。自處不得其當,而刑於人,則人不服,而怨懟悖犯之,如噬齧乾腊堅韌之物,而遇毒惡之味,反傷於口也。

用刑而人不服,反致怨傷,是可鄙吝也。然當噬嗑之時,大要噬間而嗑之,雖其身處位不當,而強梗難服,至於遇毒。然用刑非爲不當也,故雖可吝,而 [註 33] 亦小 噬而嗑之,非有咎也。

## 象曰:遇毒,位不當也。

六三(註34)以陰居陽,處位不當。自處不當,故所刑者難服,而反毒之也。

## 九四:噬乾胏,得金矢。利艱貞,吉。

九四居近君之位,當噬嗑之任者也。四已過中,是其間愈大,而用刑愈深也,故云 「噬乾胏」。

肺,內之有聯(註35)骨者。乾內而兼骨,至堅難噬者也。噬至堅而得金矢。金取剛, 矢取直。九四陽德剛直,爲得剛直之道。雖用剛直之道,利取(註36)克艱其事,而 貞固其守,則吉也。

九 (註 37) 四剛而明體,陽而居柔。剛明則傷於果,故戒以知難;居柔則守不固,故戒以堅貞。剛而不貞者有矣,凡失剛者,皆不貞也。在噬嗑,四爲最善。

<sup>[</sup>註33] 一无「而」字。

<sup>[</sup>註34] 一无「三」字。

<sup>[</sup>註35] 一无「聯」字。

<sup>[</sup>註36] 《四庫》本作「在」。

<sup>[</sup>註37] 一无「九」字。

乾,音干。胏,緇美反。

象曰: 利艱貞吉, 未光也。

凡言「未光」,其道未光大也。戒於(註38)利艱貞,蓋其所不足也;不得中正故也。

六五: 噬乾肉,得黃金。貞厲, 无咎。

五,在卦愈上,而爲噬乾肉,反易於四之乾胏者,五居尊位,乘在上之勢,以刑於下,其勢易也。在卦將極矣,其爲間甚大,非易嗑也,故爲噬乾內也。

得黃金:黃,中色。金,剛物。五居中,爲得中道。處剛,而四輔以剛,得黃金也。 五 足應,而四居大臣之位,得其助也。

貞厲,无咎:六五雖處中剛,然實柔體,故戒以必正固,而懷危厲,則得无咎也。 以柔居尊,而當噬嗑(註39)之時,豈可不貞固而懷危懼哉(註40)?

象曰: 貞厲无咎, 得當也。

所以能无咎者,以所爲得其當也。所謂「當」,居中用剛,而能守正慮危也。

上九:何校滅耳,凶。

上,過乎尊位,无位者也,故爲受刑者。居卦之終,是其間大 [註41], 噬之極也。《繫辭》所謂「惡積而不可揜,罪大而不可解」者也。故何校而滅其耳,凶可知矣。何,負也,謂在頸也。

何,何可反。揜,音掩。

象曰:何校滅耳,聰不明也。

人之聾暗不悟,積其罪惡,以至於極。古人制法,罪之大者,何之以校,爲其无所聞知,積成其惡,故以校而滅傷(註42)其耳,誠聰之不明也。

# 離下 良上 賞

<sup>[</sup>註38] 一作「以」字。

<sup>(</sup>註39)一作「堅」。

<sup>[</sup>註40]一作「忘危懼也」。

<sup>[</sup>註41] 底本作「太」,據《四庫》本更正。

<sup>[</sup>註42] 一无「傷」字。

《序卦》:「嗑者,合也。物不可以苟合而已,故受之以賁。賁者,飾也。」

物之合,則必有文,文乃飾也。如人之合聚,則有威儀上下;物之合聚,則有次序 行列。合則必有文也,賁所以次噬嗑也。爲卦山下有火。

山者,草木百物 (註43) 所聚也。下有火,則照見其上,草木品彙皆被其光彩,有實飾之象,故爲賣也。

#### 賁:亨。小利有攸往。

物有飾而後能亨,故曰:「无本不立,无文不行。」有實而加飾,則可以亨矣。文飾之道,可增其光彩,故能小利於進也。

賁,彼僞反。

彖曰: 賁亨, 柔來而文剛, 故亨。分剛上而文柔, 故小利有攸往。天文也, 文明以止, 人文也。

卦爲賁飾之象,以上下二體剛柔相交 (註 44) 爲文飾也。下體本乾,柔來文其中而爲離;上體本坤,剛往文其上而爲艮,乃爲山下有火,止於文明而成賁也。天下之事,无飾不行,故賁則能亨也。

柔來而文剛,故亨:柔來文於剛,而成文明之象;文明,所以爲賁也。賁之道能致亨,實由飾而能亨也。

分剛上而文柔,故小利有攸往:分乾之中爻,往文於艮之上也。事由飾而加盛,由 飾而能行,故小利有攸往。夫往而能利者,以有本也。賁飾之道,非能增其實也, 但加之文彩耳。事由文而顯盛,故爲小利有攸往。

亨者,亨通也。往者,加進也。二卦之變,共成賁義,而《彖》分言(註45)上下,各主一事者,蓋離明足以致亨,文柔又能小進也。

天文也,文明以止,人文也:此承上文,言陰陽剛柔相文者,天之文也;止於文明者,人之文也。止,謂處於文明也。質必有文,自然之理。理必有對待,生生之本也。有上則有下,有此則(註46)有彼,有質則有文。一不獨立,二則爲文,非知道者,孰能識之?天文,天之理也;人文,人之道也。

<sup>[</sup>註43] 《四庫》本有「之」字。

<sup>[</sup>註44] 一作「交相」。

<sup>[</sup>註45] 一无「言」字。

<sup>[</sup>註46] 一作「必」。

#### 觀乎天文,以察時變。

天文,謂日月星辰之錯列,寒暑陰陽之代變。觀其運行,以察四時之遷改也。

#### 觀乎人文,以化成天下。

人文,人理之倫序。觀人文以教化天下,天(註47)下(註48)成其禮俗,乃聖人用賁 之道也。賁之象,取山下有火;又取卦變,柔來文剛,剛上文柔。

凡卦,有以二體之義及二象而 [註 49] 成者,如屯取「動乎險中」與「雲雷」, 訟取「上剛下險」與「天水違行」是也。

有取一爻者,成卦之由也:「柔得位,而上下應之,曰小畜」;「柔得尊位,大中,而上下應之,曰大有」是也。

有取二體,又取消長之義者(註50):「雷在地中,復」;「山附於地,剝」是也。

有取二象,兼取二爻交變爲義者:「風雷,益」,兼取「損上益下」;「山下有澤,損」, 兼取「損下益上」是也。

有既以二象成卦,復取爻之義者:夬之「剛決柔」,姤之「柔遇剛」是也。

有以用成卦者:「巽乎水而上水,井」;「木上有火,鼎」是也。鼎又以卦形爲象。

有以形爲象者:「山下有雷,頤」;「頤中有物,曰噬嗑」是也。此成卦之義也。

如「剛上柔下」,「損上益下」,謂剛居上,柔在下;損於上,益於下,據成卦而言, 非謂就卦中升降也。如訟、无妄云「剛來」,豈自上體而來也?凡以柔居五者,皆云 「柔進而上行」,「柔居下者也,乃居尊位,是進而上也」,非謂自下體而上也。

卦之變,皆自乾坤。先儒不達,故謂賁本是泰卦,豈有乾坤重而爲泰,又由泰而變之理?下離,本乾中爻變而成離;上艮,本坤上爻變而成艮。離在內,故云「柔來」; 艮在上,故云「剛上」,非自下體而上也。乾坤變而爲六子,八卦重而爲六十四,皆由乾坤而(註51)變也。

象曰:山下有火,賁;君子以明庶政,无敢折獄。

<sup>[</sup>註47] 一无「天」字。

<sup>[</sup>註48] 一无「下|字。

<sup>(</sup>註49) 一无「而」字。

<sup>[</sup>註50] 底本作「也」,《四庫》本作「者」,《註評》本據《吉澄》本亦作「者」字。

<sup>[</sup>註51] 《四庫》本作「之」。

山者,草木百物之(註52)所聚生也,火在其(註53)下而上照,庶類皆被其光明,爲 育飾之象也。

君子觀山下有火明照之象,以脩明其庶政,成文明之治,而无果敢於折獄也。折獄者,人君之所致愼也,豈可恃其 [註 54] 明而輕自用乎?乃聖人之用心也,爲戒深矣。

《象》之所取,唯以山下有火,明照庶物,以用明爲戒,而賁亦自有无敢折獄之義。 折獄者,專用情實,有文飾則沒其情矣,故无敢用文以折獄也。

折, 之舌反。

#### 初九: 賁其趾, 舍車而徒。

初九以剛陽居明體而處下, 君子有剛明之德而在下者也。君子在无位之地, 无所施於 天下, 唯自賁飾其所行而已。趾, 取在下而所以行也。君子脩飾之道, 正其所行, 守 節處義, 其行不苟。義或不當, 則舍車輿而寧徒行。眾人之所羞, 而君子以爲賁也。

舍車而徒之義,兼於比應取之。初比二而應四,應四,正也;與二,非正也。九之剛明守義,不近與於二,而遠應於四,舍易而從難,如舍車而徒行也。守節義,君子之賁也。是故君子所賁,世俗所羞;世俗所貴(註55),君子所賤。以車徒爲言者,因趾與行爲義也。

舍, 音捨。

## 象曰:舍車而徒,義弗乘也。

舍車而徒行者,於義不可以乘也。初應四,正也;從二,非正也。近舍二之易,而 從四之難,舍車而徒行也。君子之賁,守其義而已。

## 六二: 賁其須。

卦之爲賁,雖由兩爻之變,而文明之義爲重。二實賁之主也,故主言賁之道。

飾於物者,不能大變其質也,因其質而加飾耳,故取須義。須,隨頤而動者也;動止唯繫於(註 56)所附,猶善惡不由於賁也。二之文明,唯爲賁飾,善惡則繫其質也。

<sup>[</sup>註52] 一无「之」字。

<sup>[</sup>註53] 一无「其」字。

<sup>[</sup>註54] 一无「其」字。

<sup>[</sup>註55] 一作「賁」。

<sup>[</sup>註56] 一无「於」字。

#### 象曰: 賁其須, 與上興也。

以須爲象者,謂其與上同興也。隨上而動,動止唯繫所附也;猶加飾於物,因其質 而責之,善惡在其質也。

#### 九三: 賁如濡如,永貞吉。

三處文明之極,與二、四二陰間處相質,賁之盛者也,故云「賁如」。如,辭助也。 賁飾之盛,光彩潤澤,故云「濡如」。光彩之盛,則有潤澤。《詩》云:「麀 tāt 571 鹿濯濯。」

永貞吉:三與二、四非正應,相比而成相賁,故戒以常永貞正。賁者,飾也。賁 (註 58) 飾之事,難乎常也,故永貞則吉。三與四相賁,又下比於二。二柔文一剛,上下交賁,爲賁之盛也。

濡,如臾反。

#### 象曰:永貞之吉,終莫之陵也。

飾而不常,且非正(註59),人所陵侮也,故戒能永正則吉也。其賁既常而正,誰能 陵之乎?

## 六四:賁如皤如,白馬翰如,匪寇婚媾。

四與初爲正應,相賁者也,本當「賁如」,而爲三所隔,故不獲相賁而「皤如」。

皤,白也,未獲賁也。馬,在下而動者也,未獲相賁,故云「白馬」。其從正應之志如飛,故云「翰如」。

匪爲九三之寇讎所隔,則婚媾遂其相親矣。己之所乘,與動於下者,馬之象也。初、 四正應,終必獲親,第始爲其間隔耳。

皤,白波反;陸音煩。翰,戶旦反。媾,古豆反。

## 象曰:六四當位,疑也;匪寇婚媾,終无尤也。

四與初相遠,而三介於其間,是所當之位爲(註60)可疑也。雖爲三寇讎所隔,未得

<sup>[</sup>註 57] 底本作「鹿鹿」。考《詩經·大雅·靈臺》作「麀鹿」·《四庫》本亦作「麀鹿」·從 《四庫》本更正。

<sup>[</sup>註58] 一作「脩」。

<sup>[</sup>註59] 一有「則」字。

<sup>[</sup>註60] 一无「爲」字。

親其 [註61] 婚媾,然其正應,理直義勝,終必得合,故云「終无尤也」。尤,怨也。 終得相責,故无怨尤也。

#### 六五: 賁于丘園, 束帛戔戔。吝, 終吉。

六五以陰柔之質,密比於上九剛陽之賢,陰比於陽,復无所係應,從之者也,受賁 於上九也。自占設險守國,故城壘多依丘坂。丘,謂在外而近且高者。園圃之地, 最近城邑,亦在外而近者。丘園,謂在外而近者,指上九也。六五雖居君位,而陰 柔之才,不足自守,與上之剛陽相比,而志從焉。獲賁於外比之賢,賁於丘園也。

若能受賁於上九,受 (註 62) 其裁制,如束帛而 (註 63) 戔戔,則雖其柔弱不能自爲,爲可吝少;然能從於人,成賁之功,終獲其占也。

養養,翦裁紛(註64) 製之狀。帛末用則束之,故謂之束帛。及其制爲衣服,必裁翦(註65) 分裂,養養然。束帛,喻六五本質。養養,謂受人裁(註66) 製而成用也。

其資於人,與蒙同;而蒙不言吝者,蓋童蒙而賴於人,乃其宜也。非童幼而資賁於 人,爲可吝耳;然享其功,終爲吉也。

戔,在干反。

象曰:六五之吉,有喜也。

能從人以成賁之功,享其吉美,是有喜也。

上九:白賁,无咎。

上九, 賁之極也。賁飾之極, 則失於華僞; 唯能質白其賁, 則无過飾 (註 67) 之咎。白,素也。尚質素, 則不失其本眞。所謂「尚質素」者, 非无飾也, 不使華沒實耳。

## 象曰:白賁无咎,上得志也。

白賁无咎,以其在上而得志也。上九爲得志者,在上而文柔,成賁之功。六五之君, 又受其賁,故雖居无位之地,而實尸賁之功,爲得志也。與它卦居極者異矣。

<sup>[</sup>註61] 《四庫》本作「於」。

<sup>[</sup>註62] 一作「隨」。

<sup>[</sup>註63] 一无「而」字。

<sup>[</sup>註64] 《四庫》本作「分」。

<sup>[</sup>註65] 《四庫》本作「剪裁」。

<sup>[</sup>註66] 《四庫》本作「剪」。

<sup>[</sup>註67] 《四庫》本作「失」。

既在上而得志,處賁之極,將有華僞失實之咎,故戒以質素則无咎,飾不可過也。

#### #F 艮上 **剝**

《序卦》:「賁者,飾也。致飾,然後亨則盡矣,故受之以剝。」

夫物至於文飾,亨之極也;極則必反,故賁終則剝也。卦,丘陰而一陽。陰始自下生,漸長至於盛極;群陰消剝於陽,故爲剝也。

以二體言之,山附於地,山高起地上,而反附著於地,頹剝之象也。

剝,邦角反。

#### 剝:不利有攸往。

剝者,群陰長盛,消剝於 [註 68] 陽之時。眾小人剝喪於 [註 69] 君子,故君子不利有所往。唯當異言晦迹,隨時消息,以免小人之害也。

彖曰:剝,剝也,柔變剛也。不利有攸往,小人長也。

剝,剝也,謂剝落也。

柔變剛也,柔長而剛剝 [註70] 也。夏至, 陰生而漸長。 陰長則一陽消,至於 [註71] 建戌,則極而成剝,是陰柔變剛陽也。陰,小人之道,方長盛而剝消於 [註72] 陽,故君子不利有所往也。

順而止之,觀象也。君子尚消息盈虛,天行也。

君子當剝之時,知不可有所往,順時而止,乃能觀剝之象也。卦有順止之象,乃處 剝之道,君子當觀而體之。

君子尚消息盈虚,天行也:君子存心消息盈虚之理,而能順之,乃合乎天行也。理 有消衰,有息長,有盈滿,有虛損;順之則吉,逆之則凶。君子隨時敦尚,所以事 天也。

<sup>[</sup>註68] 一作「一」。

<sup>[</sup>註69] 一无「於」字。

<sup>[</sup>註70] 《四庫》本作「變」。

<sup>[</sup>註7]] 一无「於」字。

<sup>〔</sup>註72〕一作「剛」。

#### 象曰:山附於地,剝;上以厚下安宅。

艮重於坤,山附於地也。山高起於地,而反附著於地,圮剝之象也。

上,謂人君與居人上者,觀剝之象,而厚固其下,以安其居也。下者,上之本,未有基本固而能剝者也;故上(註73)之剝必自下,下剝則上危矣。爲人上者,知理之如是,則安養人民,以厚其本,乃所以安其居也。《書》曰:「民惟邦本,本固邦寧。」

#### 初六:剝牀以足,蔑貞,凶。

陰之剝陽,自下而上。以牀爲象者,取身之所處也。自下而剝,漸至於身也。

剝牀以足,剝牀之足也。剝始自下,故爲剝足。陰自下進,漸消蔑於 [註 74] 貞正, 凶之道也。

度,无也,謂消亡於正道也 [註 75]。陰剝陽,柔變剛,是邪侵正,小人消君子,其 凶可知。

#### 象曰:剝牀以足,以滅下也。

取牀足爲象者,以陰消(註76)沒陽於下(註77)。滅,沒也。侵滅正道,自下而上也。

## 六二: 剝牀以辨, 蔑貞, 凶。

辨,分隔上下者,床之幹也。陰漸進而上,剝至於辨,愈蔑於正也,凶益甚矣。

## 象曰:剝牀以辨,未有與也。

陰之侵剝於(註78)陽,得以益盛;至於剝辨者,以陽未有應與故也。小人侵剝君子, 若君子有與,則可以勝小人,不能爲害矣;唯其无與,所以被蔑而凶。當消剝之時, 而无徒與,豈能自存也?言「未有與」,剝之未盛;有與,猶可勝也。示人之意深矣。

## 六三:剝之,无咎。

眾陰剝陽之時,而三獨居剛應剛,與上下之陰異矣。志從於正,在剝之時,爲无咎 者也。

<sup>[</sup>註73] 一作「山」。

<sup>[</sup>註74] 一无「於」字。

<sup>[</sup>註75] 一作「消亡正道也」,一作「消亡於正也」。

<sup>[</sup>註76] 《四庫》本作「侵」。

<sup>[</sup>註77] 《四庫》本有「也」字。

<sup>[</sup>註78] 一作「剛」。

三之爲,可謂善矣;不言占,何也?曰:「方群陰剝陽,眾小人害君子,三雖從正, 其勢孤弱,所應在无位之地。於斯時也,難乎免矣,安得吉也?其義爲无咎耳,言 其无咎,所以勸也。」

#### 象曰: 剝之无咎, 失上下也。

三居剝而无咎者,其所處與上下諸陰不同,是與其同類相失,於處剝之道爲无咎, 如東漢之呂強是也。

#### 六四: 剝牀以膚, 凶。

始剝於牀足,漸至於膚。膚,身之外也,將滅其身矣,其凶可知。陰長已盛,陽剝 已甚,貞道已消,故更不言蔑貞,直言凶也。

#### 象曰: 剝牀以膚, 切近災也。

五爲君位,剝已及四,在人,則剝其膚矣。剝及其膚,身垂於亡矣,切近於災禍也。

#### 六五:貫魚,以宮人寵,无不利。

剝及君位,剝之極也,其凶可知;故更不言剝,而別設義,以開小人遷善之門。

五,群陰之主也。魚,陰物,故以爲象。五能使群陰順序,如貫魚然,反獲寵愛於在上之陽,如宮人,則无所不利也。宮人,宮中之人,妻妾、侍使也。以陰言,且取獲寵(註79)愛之義。以一陽在上,眾陰有順從之道,故發此義。

## 象曰:以宮人寵,終无尤也。

群陰消(註80)剝於(註81)陽,以至於極,六五若能長率群陰,駢首順序,反獲寵愛於陽,則終无過尤也。於剝之將終,復發此義,聖人勸遷善之意,深切之至也。

## 上九:碩果不食,君子得輿,小人剝廬。

諸陽消剝已盡,獨有上九一爻尚存,如碩大之果不見食,將有 (註 82) 復生之理。上九亦 (註 83) 變,則純陰矣。然陽无可盡之理,變於上,則生於下,无間可容息也。 聖人發明此理,以見陽與君子之道,不可亡也。

<sup>[</sup>註79] 一作「親」。

<sup>[</sup>註80] 一无「消」字。

<sup>[</sup>註81] 一无「於」字。

<sup>[</sup>註82] 《四庫》本作「見」字。

<sup>[</sup>註83]一作「一」,一作「已」。

或曰:「剝盡則爲純坤,豈復有陽乎?」曰:「以卦配月,則坤當十月。以氣消息言,則陽剝(註84)爲坤。陽(註85)來爲復(註86),陽未嘗盡也。剝盡於上,則復生於下矣。故十月謂之陽月,恐疑其无陽也。陰亦然,聖人不言耳。陰道盛極之時,其亂可知。亂極則自當思治,故眾心願載於君子,君子得輿也。《詩·匪風·下泉》,所以居變風之終也。理既如是,在卦亦眾陰宗陽,爲共載之象。」

小人剝廬:若小人,則當剝之極,剝其廬矣,无所容其身也。更不論爻之陰陽,但 言小人處剝極,則及其廬矣。廬,取在上之象。

或曰:「陰陽之消(註 87),必待盡而後復生於下,此在上便有復生之義,何也?夬之上六,何以言『終有凶』?」曰:「上九居剝之極,止(註 88)有一陽。陽无可盡之理,故明其有復生之義,見君子之道,不可亡也。夬者,陽消陰;陰,小人之道也,故但言其消亡耳,何用更言卻有復生之理乎?」

#### 象曰:君子得輿,民所載也;小人剝廬,終不可用也。

正道消剝既極,則人復思治,故陽剛君子,爲民所承載也。若小人處剝之極,則小人之窮耳,終不可用也。非謂九爲小人,但言剝極之時,小人如是也。

# 震下 旗上 復

《序卦》:「物不可以終盡,剝,窮上反下,故受之以復。」

物无剝盡之理,故剝極則復來(註89)。陰極則陽生,陽剝極於上,而復生於下,窮上而反下也,復所以次剝也。爲卦,一陽生(註90)五陰之下,陰極而陽復也。歲十月,陰盛既極,冬至,則一陽復生於地中,故爲復也。

陽,君子之道。陽消極而復反,君子之道消極而復長也,故爲反善之義。 復,音服。

<sup>[</sup>註84] 一有「盡」字。

<sup>[</sup>註85] 一有「復」字。

<sup>[</sup>註86] 一有「然」字。

<sup>[</sup>註87] 一作「交」。

<sup>[</sup>註88] 《四庫》本作「上」。

<sup>[</sup>註89] 一无「來」字。

<sup>[</sup>註90] 《四庫》本有「於」字。

#### 復:亨。出入无疾,朋來无咎。

復亨,既復則亨也。陽氣復生於下,漸亨盛而生育萬物。君子之道既復,則漸以亨通,澤於天下,故復則有亨盛之理也。

出入无疾:出入,謂生長。復生於內,人也;長進於外,出也。先云「出」,語順耳。陽生非自外也,來於內,故謂之入。物之始生,其氣至微,故多屯艱。陽之始生, 其氣至微,故多催折。春陽之發,爲陰寒所折,觀草木於朝暮,則可見矣。

出入无疾,謂微陽生長,无害之者也。既无害之,而其類漸進而來,則將亨盛,故 无咎也。所謂「咎」,在氣則爲差忒;在君子 (註 91) 則爲抑塞,不得盡其理。陽之 當復,雖使有疾之,固不能止其復也,但爲阻礙耳;而卦之才,有无疾之義,乃復 道之善也。

一陽始生至微,固未能勝群陰,而發生萬物,必待諸陽之來,然後能成生物之功, 而无差忒,以朋來而无咎也。三陽,子、丑、寅之氣,生成萬物,眾陽之功也。若 君子之道,既消而復,豈能便勝於小人?必待其朋類漸盛,則能協力以勝之也。

## **反復其道**,七日來復,利有攸往。

謂消長之道,反復迭至。陽之消,至七日而來復。姤,陽之始消也,七變而成復,故云「七日」,謂七更也。臨云「八月有凶」,謂陽長至於陰長,歷八月也。陽進則 陰退,君子道長,則小人道消,故利有攸往也。

## 彖曰:復亨剛反,動而以順行;是以出入无疾,朋來无咎。

復亨,謂剛反而亨也。陽剛消極而來反;既來反,則漸長盛而亨通矣。動而以順行, 是以出入无疾,朋來无咎,以卦才言其所以然也。下動而上順,是動而以順行也。 陽剛反而順動,是以得出入无疾,朋來而无咎也。朋之來,亦順動也。

反復其道,七日來復,天行也。利有攸往,剛長也。復,其見天地之心乎! 其道反復往來,迭消迭息(註92),七日而來復者,天(註93)之運行如是也。消長相因,天之理也。陽剛君子之道長,故利有攸往。一陽復於下,乃天地生物之心也。先儒皆以靜爲見天地之心,蓋不知動之端,乃天地之心也。非知道者,孰能識之?

<sup>[</sup>註91] 一有「之道」字。

<sup>[</sup>註92] 一有「也」字。

<sup>[</sup>註93] 《四庫》本有「地」字。

象曰:雷在地中,復;先王以至日閉關,商旅不行,后不省方。

雷者,陰陽相薄而成聲。當陽之微,未能發也。雷在地中,陽始復之時也。陽始生於下而甚微,安靜 [註 94] 而後能長。先王順天道,當至日陽之始生,安靜以養之,故閉關,使商旅不得行,人君不省視四方。觀復之象,而順天道也。在一人之身亦然,當安靜以養其陽也。

#### 初九:不遠復,无祇悔,元吉。

復者,陽反來復也。陽,君子之道,故復爲反善之義。初剛陽來復,處卦之初,復 之最先者也,是不遠而復也。失而後有復;不失,則何復之有?唯失之不遠而復, 則不至於悔,大善而吉也。

祇,宜音柢 [註95],抵也。《玉篇》云:「適也。」義亦同。无祗悔,不至於悔也。坎卦曰:「祗既平,无咎。」謂至既平也。顏子无形顯之過,夫子謂其「庶幾」,乃无祗悔也。過既未形而改,何悔之有?既未能不勉而中,所欲不踰矩,是有過也。然其明而剛,故一有不善,未嘗不知;既知,未嘗不遽改,故不至於悔,乃不遠復也。

祇,陸德明音支。《玉篇》、《丘經文字》、《羣經音辨》並見衣部。

## 象曰:不遠之復,以脩身也。

不遠而復者,君子所以脩其身之道也。學問(註96)之道无它也,唯其知不善,則速改以從善而已。

## 六二:休復,吉。

二雖陰爻,處中正而切比於初,志從於陽,能下仁也,復之休美者也。復者,復於 禮也;復禮則爲仁。初陽復,復於仁也。二比而下之,所以美而吉也。

## 象曰:休復之吉,以下仁也。

爲復之休美而吉者,以其能下仁也。仁者,天下之公,善之本也。初復於仁,二能 親而下之,是以吉也。

## 六三:頻復,厲,无咎。

<sup>[</sup>註94] 一作「順」。

<sup>[</sup>註95] 底本作「祗」,疑誤刻。按習坎卦九五《程傳》:「祇,宜音祗,抵也。」釋音義皆同,故知此處乃誤刻。《二程集》亦作「宜音柢」,故更正之。

<sup>[</sup>註96] 一无「問」字。

三以陰躁,處動之極,復之頻(註97)數而不能固者也。復貴安固,頻復頻失,不安 於復也。復善而屢失,危之道也。聖人開遷善之道,與其復而危其屢失,故云「厲 无咎」,不可以頻失而戒其復也。頻失則爲危,屢復何咎?過在失而不在復也。

#### 象曰:頻復之厲,義无咎也。

頻復頻失,雖爲危厲,然復善之義,則无咎也。

#### 六四:中行獨復。

此爻之義,最宜詳玩。

四行眾 (註 98) 陰之中,而獨能復,自處於正,下應於陽剛,其志可謂善矣。不言吉 (註 99) 凶者,蓋四以柔居群陰之間,初方甚微,不足以相援,无可濟之理,故聖人 但稱其能獨復,而不欲言其獨從道 (註 100) 必凶也。曰:「然則不云 (註 101) 『无咎』,何也?」曰:「以陰居陰,柔弱之甚,雖有從陽之志,終不克濟,非无咎也。」

#### 象曰:中行獨復,以從道也。

稱其獨復者,以其從陽剛君子之善道也。

## 六五:敦復,无悔。

六五以中順之德處君位,能敦篤於復善者也,故无悔。雖本善,戒亦在其中矣。陽 復方微之時,以柔居尊,下復无助,未能致亨吉也,能无悔而已。

## 象曰:敦復无悔,中以自考也。

以中道自成也。五以陰居尊,處中而體順,能敦篤其志,以中道自成,則可以无悔 也。自成,謂成其中順之德。

上六:迷復,凶,有災眚。用行師,終有大敗;以其國君,凶。至于十年, 不克征。

以陰柔居復之終,終迷不復者也。迷而不復,其凶可知。

<sup>[</sup>註 97] 底本作「類」,《四庫》本、《註評》本據《吉澄》本則作「頻」。本句後有「頻復頻失」語,故知「類」爲形譌,作「頻」爲是。

<sup>[</sup>註98] 《四庫》本作「群」。

<sup>[</sup>註99] 底本作「言」, 費解,應爲形譌。《四庫》本、《註評》本作「吉」,今從之。

<sup>[</sup>註100] 《四庫》本有「而」字。

<sup>[</sup>註101] 《四庫》本作「言」。

有災眚:災,天災,自外來。眚,己過,由自作。既迷不復善,在己則動皆過失, 災禍亦自外而至,蓋所招也。迷道不復,无施而可,用以行師,則終有大敗;以之 爲國,則君之凶也。

十年者,數之終。至於十年不克征,謂終不能行。既迷於道,何時而可行也? 皆,所景反。

#### 象曰:迷復之凶,反君道也。

復則合道,既迷於復,與道相反也,其凶可知。以其國,君凶,謂其反君道也。人 君居上而治眾,當從天下之善;乃迷於復,反君之道也。非止人君,凡人迷於復者, 皆反道而凶也。

# 

《序卦》:「復則不妄矣,故受之以无妄。」

復者,反於道也。既復於道,則合(註102)正理而无妄,故復之後,受之以无妄也。 爲卦乾上震下。

震,動也。動以天,爲无妄;動以人欲,則妄矣。无妄之義大矣哉!

## 无妄:元亨,利貞。其匪正有眚,不利有攸往。

无妄,言 (註 103) 至誠也。至誠者 (註 104) ,天之道也。天之化育萬物,生生不窮,各正其性命,乃无妄也。人能合无妄之道,則所謂「與天地合其德」也。无妄有大亨之理,君子行无妄之道,則可以致大亨矣。无妄,天之道也,卦言人由无妄之道也(註 105)。

利貞:法无妄之道,利在貞正;失貞正,則妄也。雖无邪心,苟不合正理,則妄也, 乃邪心也,故有(註106)匪正則爲過眚。既已无妄,不宜有往,往則妄也。

## 彖曰:无妄,剛自外來,而為主於內。

<sup>[</sup>註102] 一无「合」字。

<sup>(</sup>註103) 《四庫》本作「者」字:其斷句爲:「无妄者,至誠也。」

<sup>[</sup>註[04]一无「者」字。

<sup>(</sup>註105) 一无「也」字。

<sup>[</sup>註106] 一作「其」。

謂初九也。坤初爻變而爲震,剛自外而來也。震以初爻爲主,成卦之由,故初爲无 妄之主。

動以天,爲无妄;動而以天,動爲主也。以剛變柔,爲以正去妄之象。又:剛正爲 上於內,无妄之義也。九居初,正也。

## 動而健,剛中而應,大亨以正,天之命也。

下動而上健,是其動剛健也。剛健,无妄之體也。

剛中而應: 五以剛居中正, 二復以中正相應, 是順理而不妄也; 故其道大亨通而貞正, 乃天之命也。天命,謂天道也,所謂无妄也。

#### 其匪正有眚,不利有攸往。无妄之往,何之矣?天命不祐,行矣哉?

所謂「无妄」,正而已。小失於正,則爲有過,乃妄也。所謂「匪正」,蓋由有往;若无妄而不往,何由有匪正乎?无妄者,理之正也。更有往,將何之矣?乃入於妄也。往則悖於天理,天道所不祐,可行乎哉?

## 象曰:天下雷行,物與无妄;先王以茂對時,育萬物。

雷行於天下,陰陽交和,相薄而成聲,於是驚蟄藏,振萌芽,發生(註107)萬物;其 所賦與,洪纖高下,各正其性命,无有差妄(註108):物與无妄也。

先王觀天下雷行,發生賦與之象,而以茂對天時,養育萬物,使各得其宜,如天與 之无妄也。茂,盛也。茂(註109)對之爲言,猶盛行永言之比。

對時,謂順合天時。天道生萬物,各正(註110)其性命而不妄。王者體天之道,養育人民,以至昆蟲草木,使各得其宜,乃對時育物之道也。

## 初九: 无妄, 往吉。

九以剛陽(註111)為主於內,无妄之象。以剛實(註112)變柔而居內,中誠不妄者也。以无妄而往,何所不吉?卦辭言不利有攸往,謂既无妄,不可復有往也,過則妄矣。

<sup>[</sup>註107] 一作「育」。

<sup>[</sup>註108] 一作「忒」。

<sup>[</sup>註 109] 底本作「盛」、《四庫》本作「茂」。《象》言「茂對」,以「茂對」爲是。《註評》本據《吉澄》本亦作「茂對」。

<sup>[</sup>註110] 《四庫》本作「得」。

<sup>[</sup>註][[]《四庫》本作「陽剛」。

<sup>[</sup>註112] 一无「實」字。

爻言往吉,謂以无妄之道而行則吉也。

#### 象曰:无妄之往,得志也。

以无妄而往,无不得其志也。蓋誠之於物,无不能動:以之脩身,則身正; 以之治事,則事得其理;以之臨人,則人感而化。无所往而不得其志也。

#### 六二:不耕獲,不菑畬,則利有所(註113)往。

凡理之所然者,非妄也;人所欲 [註114] 爲者,乃妄也,故以耕獲、菑畬譬之。

六二居中得正,又應五之中正,居動體而柔順,爲動能順乎中正,乃无妄者也,故 極言无妄之義。

耕,農之始;穫,其成終也。田一歲日菑,三歲日畬。不耕而穫,不菑而畬,謂不首造其事,因其事理所當然也。首造其事,則是人心所作爲,乃妄也。因事之當然,則是順理應物,非妄也,穫與畬是也。蓋耕則必有穫,菑則必有(註115)畬,是理(註116)之固然,非心意之所造作也。如是則爲无妄;不妄,則所往利而无害也(註117)。

或曰:「聖人制作以利天下者,皆造端也,豈非妄乎?」曰:「聖人隨時制作,合 (註118) 乎風氣之宜,未嘗先時而開之也。若不待時,則一聖人足以盡爲矣,豈待 累聖繼作也?時乃事之端,聖人隨時而爲也。」

穫, 黄郭反。菑, 側其反。畬, 羊諸反。

## 象曰:不耕獲,未富也。

未者,非必之辭。臨卦曰「未順命」,是也。不耕而穫,不菑而畬,因其事之當然; 既耕則必有穫,既菑則必成畬,非必以(註119)穫畬之富而爲也。其始耕菑,乃設心 在於求(註120)穫畬,是以其富也。心有欲而爲者,則妄也。

<sup>[</sup>註113] 《四庫》本作「攸」。

<sup>[</sup>註114] 一作「欲所」。《二程集》小註:一无「欲」字。

<sup>[</sup>註115] 一作「爲」。

<sup>[</sup>註116] 《四庫》本作「是事理」。

<sup>[</sup>註117] 《四庫》本無「如是則爲无妄;不妄,則所往利而无害也。」一句。

<sup>[</sup>註 | [8] 一作「因」。

<sup>[</sup>註119] 一无「以」字、一无「必」字。

<sup>[</sup>註120] 一无「求」字。

六三:无妄之災,或繫之牛。行人之得,邑人之災。

三以陰柔而不中正,是爲妄者也。又志應於上,欲也,亦妄也,在无妄之道爲災害 也。

人之妄動,由有欲也。妄動而得,亦必有失;雖使得其所利,其動而妄,失已大矣,況復凶悔隨之乎!知者見妄之得,則知其失必與稱也。故聖人因六三有妄之象,而發明其理云:「无妄之災,或繫之牛。行人之得,邑人之災。」言如三之爲妄,乃无妄之災害也。設如有得,其失隨至,如或繫之牛。或,謂設或也。或繫得牛,行人得之,以爲有得;邑人失牛,乃是災也。借使邑人繫得馬,則行人失馬,乃是災也。言有得則有失,不足以爲得也。

行人、邑人,但言有得則有失,非以爲彼己也。妄得之福,災亦隨之;妄得之得, 失亦稱之,固不足以爲得也。人能知此,則不爲妄動矣。

象曰:行人得牛,邑人災也。

行人得牛,乃邑人之災也。有得則有失,何足以爲得乎?

九四:可貞,无咎。

四,剛陽而居乾體,復无應與,无妄者也。剛而无私,豈有妄乎?可貞固守此,自 无咎也。

九居陰,得爲正(註121)乎?曰:「以陽居乾體,若復處剛,則爲(註122)過矣,過則 妄也。居四,无上(註123)剛之志也。

可貞與利貞不同。可貞,謂其所處,可貞固守之;利貞,謂利於貞也。

象曰:可貞无咎,固有之也。

貞固守之,則无咎也。

九五:无妄之疾,勿藥有喜。

九以中正當尊位,下復以中正順應之,可謂无妄之至者也,其道无以加矣!

疾,爲之病者也。以九五之无妄,如其有疾,勿以藥治,則有喜也。人之有疾,則 以藥石攻去其邪,以養其正。若氣體平和,本无疾病,而攻治之,則反害其正矣,

<sup>[</sup>註 121] 一作「貞」。

<sup>[</sup>註122] 一无「爲」字。

<sup>〔</sup>註123〕《四庫》本作「尚」。

故勿藥則有喜也。有喜,謂疾自亡也。

无妄之所謂「疾」者,謂若治之而不治,率之而不從,化之而不革,以妄而爲无妄 之疾;舜之有苗,周公之管、蔡,孔子之叔孫、武叔是也。既已无妄,而有疾之者, 則當自如无妄之疾,不足患也。若遂自攻治,乃是渝其无妄而遷於妄也。五既處无 妄之極,故唯戒在動,動則妄矣。

#### 象曰:无妄之藥,不可試也。

人之有妄,理必修改;既无妄矣,復藥以治之,是反爲妄也,其可用乎?故云「不可試也」。試,暫用也,猶曰「小嘗」之也。

#### 上九:无妄,行有眚,无攸利。

上九居卦之終,无妄之極者也。極而復行,過於理也,過於理則妄也(註124);故上九而行,則有過眚,而无所利也(註125)。

## 象曰:无妄之行,窮之災也。

无妄既極,而復加進,乃爲妄矣,是窮極而爲災害也。

### ■ 乾下 艮上 大畜

《序卦》:「有无妄然後可畜,故受之以大畜。」

无妄則爲有實,故可畜聚,大畜所以次无妄也。爲卦艮上乾下。

天而在於山中,所畜至大之象。畜爲畜止,又爲畜聚,止則聚矣(註 126)。取天在山中之象,則爲蘊畜;取艮之止乾,則爲畜止。止而後有積,故止爲畜義。

## 大畜:利貞,不家食,吉,利渉大川。

莫大於天,而在山中;艮在上,而止乾於下,皆蘊畜至大之象也。在人,爲學術道 德充積於內,乃所畜之大也。凡所畜聚,皆是專言其大者。

人之蘊畜,宜得正道,故云「利貞」。若夫異端偏學,所畜至多而不正者,固有矣。

<sup>[</sup>註124]一作「矣」。

<sup>[</sup>註125] 《四庫》本作「矣」。

<sup>[</sup>註126] 一有「又」字。

既道德充積於內,宜在上位,以享天祿;施爲於天下,則不獨於 (註 127) 一身之吉, 天下之吉也。若窮處而自食於家,道之否也,故不家食則吉。

所畜既大,宜施之於時,濟天下之艱險,乃大畜之用也,故利涉大川。

此只據大畜之義而言,《彖》更以卦之才德而言,諸爻則唯有止畜之義。蓋《易》體道隨宜,取明且近者。

畜, 勑六反

#### 彖曰:大畜剛健,篤實輝光,日新其德。

以卦之才德而言也。乾體剛健,艮體篤實。人之才,剛健篤實,則所畜能大,充實 而有輝光。畜之不已,則其德日新也。

#### 剛上而尚賢,能止健,大正也。

剛上,陽居上也。陽剛居尊位之上,爲尚賢之義。止居健上,爲能止健之義。止乎 健者,非大正,則安能以剛陽在上與尊尚賢德?能止至健,皆大正之道也。

## 不家食吉,養賢也;利涉大川,應乎天也。

大畜之人,所官施其所畜,以濟天下,故不食於家則吉,謂居天位、享天祿也。國 家養賢,賢者得行其道也。

利涉大川,謂大有蘊畜之人,宜濟天下之艱險也。《彖》更發明卦才云:「所以能涉 大川者,以應乎天也。」

六五,君也;下應乾之中爻,乃大畜之君,應乾而行也。所行能應乎天,无艱險之 不可濟,況其它乎?

## 象曰:天在山中,大畜;君子以多識前言往行,以畜其德。

天爲至大,而在山之中,所畜至大之象。君子觀象,以大其蘊畜。人之蘊畜,由學而大,在多聞前占聖賢之言與行,考跡以觀其用,察言以求其心,識而得之,以畜成其德,乃大畜之義也。

## 初九:有厲,利已。

大畜,艮止畜乾也,故乾三爻皆取被止〔註128〕爲義,艮三爻皆取止之爲義。

<sup>[</sup>註127] 一无「於」字。

<sup>[</sup>註128] 一作「止之」。

初以陽剛,又健體而居下,必上進者也。六四在上,畜止於已,安能敵在上得位之勢,若犯之而進,則有危厲,故利在已而不進也。在它卦,則四與初爲正應,相接者也;在大畜,則相應乃爲相止畜。上與三皆陽,則爲合志。蓋陽皆上進之物,故有同志之象,而无相止之義。

#### 象曰:有厲利已,不犯災也。

有危則宜已,不可犯災危而行也。不度其勢而進,有災必矣。

#### 九二:輿說輹。

二爲六五所畜止,勢不可進也。丘據在上之勢,豈可犯也?二雖剛健之體,然其處得中道,故進止无失;雖志於進,度其勢之不可,則止而不行,如車輿脫去(註129)輪輹,謂不行也。

說,徒活反。輹,音福[註130]。

#### 象曰:輿說輹,中无尤也。

輿說輹而不行者,蓋其處得中道,動不失宜,故无過尤也。善莫善於剛中,柔中者,不至於過柔耳;剛中,中而才也。初九處不得中,故戒以有危,宜已。二得中,進止自无過差,故但言「輿說輹」,謂其能不行也;不行,則无尤矣。初與二乾體,剛健而不足以進。四與五,陰柔而能止。時之盛衰,勢之強弱,學《易》者所宜深識也。

## 九三:良馬逐,利艱貞。曰閑輿衛,利有攸往。

三,剛健之極,而上九之陽,亦上進之物,又處畜之極而思變也,與三乃不相畜,而志同相應以進者也。三以剛健之才,而在上者與合志而進,其進如良馬之馳逐,言其速也。雖其進之勢 (註 131) 速,不可恃其才之健與上之應,而忘備與愼也;故宜艱難其事,而由貞正之道。輿者,用行之物。衛者,所以自防。當自 (註 132) 日常閑習其車輿與其防衛,則利有攸往矣。

三,乾體而居正,能貞者也,當其(註133)銳進,故戒以知難與不失其貞(註134)也。

<sup>[</sup>註129] 一有「其」字。

<sup>[</sup>註130] 一云:「車旁作复,音服:作畐,音福。」

<sup>[</sup>註131] 一作「志」。

<sup>[</sup>註132] 一无「自|字。

<sup>〔</sup>註133〕《二程集》作「有」。

<sup>[</sup>註134] 一作「正」。

志既銳於進,雖剛明,有時而失,不得不誠也。

曰:陸德明《釋文》云:「音越。」劉云:「曰,猶言也。」鄭:人實反;云:「日習車徒。」《易傳》從鄭音。(註135)

#### 象曰:利有攸往,上合志也。

所以利有攸往者,以與在上者合志也。上九陽性上進,且蕃已極,故不下畜三,而 與(註136)合志上進也。

## 六四:童牛之牿,元吉。

以位而言,則四下應於初,畜初者也。初居最下,陽之微者,微而畜之則易制,猶 童牛而加牿,大善而占也。

概論畜道,則四艮體,居上位而得正,是以正德居大臣之位,當畜之任者也。大臣之任,上畜止人君之邪心,下畜止天下之惡人(註137)。人之惡,止於初則易,既盛而後禁,則扞格而難勝。故上之惡既甚,則雖聖人救之,不能免違拂;下之惡既甚,則雖聖人治之,不能免刑戮。莫若止之於初,如童牛而加牿,則元吉也。牛之性,觝觸以角,故牿以制之。若童犢始角,而加之以牿,使觝觸之性不發,則易而无傷矣(註138);況六四能畜止上下之惡於未發之前,則大善之吉也。

牿,古毒反。觝,「禮反。觸,尺玉反。

## 象曰:六四元吉,有喜也。

天下之惡,已盛而止之,則上勞於禁制,而下傷於刑誅;故畜止於微小之前,則大 善而吉,不勞而无傷,故可喜也。四之畜初是也;上畜亦然。

## 六五: 豶豕之牙, 吉。

六 [註 139] 居君位,止畜天下之邪惡。夫以億兆之眾,發其邪欲之心,人君欲力以制之,雖密法嚴刑,不能勝也。

夫物有總攝,事有機會,聖人操得其要,則視(註140)億兆之心猶一心。道之斯行,

<sup>[</sup>註135] 《四庫》本不載反切,本節論「曰」字從《易傳》之由,《四庫》本亦不載。

<sup>[</sup>註136]一有「三」字。

<sup>[</sup>註137] 一无「人」字。

<sup>[</sup>註138] 《四庫》本作「以」。

<sup>[</sup>註139] 《四庫》本有「五」字。

<sup>[</sup>註140] 一无「視」字。

止之則戢,故不勞而治,其用若豶豕之牙也。

豕,剛躁之物,而牙爲猛利,若強制其牙,則用力勞而不能止其躁猛。雖蟄之維之,不能使之變也。若豶去其勢,則牙雖存,而剛躁自止;其用如此,所以吉也。君子 法豶豕之義,知天下之惡,不可以力制也。則察其機,持其要,塞絕其本原,故不 假刑法(註141)嚴峻,而惡自止也。

且如止盜,民有欲心,見利則動;苟不知教,而迫於饑寒,雖刑殺日施,其能勝億 兆利欲之心乎?聖人則知所以止之之道,不尙威刑,而修政教,使之有農 [註 [42] 桑之業,知廉恥之道,雖賞之不竊矣。故止惡之道,在知其本,得其要而已。不嚴 刑於彼,而修政於此,是猶患豕牙之利,不制其牙而豶其勢也。

豶,符云反。

#### 象曰:六五之吉,有慶也。

在上者,不知止惡之方,嚴刑以敵民欲,則其傷甚而无功。若知其本,制之有道則 不勞,无傷而俗革,天下之福慶也。


## 上九:何天之衢,亨。

予聞之胡先生曰:「天之衢亨,誤加何字。」事極則反,理之常也,故畜極而亨。小畜,畜之小,故極而成;大畜,畜之大,故極而散。既極 [註 143] 當變,又陽性上行,故遂散也。

天衢, 天路也, 謂虛空之中, 雲氣飛鳥往來, 故謂之「天衢」。天衢之亨, 謂其亨通 曠闊, 无有蔽阻也。在畜道則變矣, 變而亨, 非畜道之亨也。

## 象曰:何天之衢,道大行也。

何以謂之「天衢」?以其无止礙,道路大通行也。以「天衢」非常語,故《象》特 設問曰:「何謂天之衢?」以道路大通行,取空豁之狀也。以《象》有「何」字,故 爻下亦誤加之。



<sup>[</sup>註 141] 《二程集》作「罰」。

<sup>[</sup>註142] 一作「耕」。

<sup>[</sup>註143] 《四庫》本作「極既」。

《序卦》:「物畜然後可養,故受之以頤。」

夫物既畜聚,則必有以養之; 无養則不能存息,頤所以次大畜也。卦上艮下震。上下二陽爻,中含四陰,上止而下動,外實而中虚,人頤頷之象也。

頤,養也。人口所以飲食養人之身,故名爲頤。聖人設卦,推養之義,大至於天 地養育萬物,聖人養賢以及萬民,與人之養生、養形、養德、養人,皆頤養之道 也。動息節宣,以養生也;飲食衣服,以養形也;威儀行義,以養德也;推己及 物,以養人也。

#### 頤:貞吉。觀頤,自求口實。

頤之道,以正則吉也。人之養身、養德、養人、養於人,皆以正道則吉也。天地造化,育養(註144)萬物,各得其宜者,亦正而已矣。

觀頤,自求口實:觀人之所頤,與其自求口實之道,則善惡吉凶可見矣。 頤,以之反。

彖曰:頤,貞吉,養正則吉也。觀頤,觀其所養也。自求口實,觀其自養 也。

貞吉:所養者,正則吉也。所養,謂所養之人,與養之之道。自求口實,謂其自求 養身之道,皆以正則吉也。

## 天地養萬物,聖人養賢以及萬民。頤之時大矣哉!

聖人極言頤之道,而贊其大。天地之道,則養育萬物。養育萬物之道,正而已矣。 聖人則養賢才,與之共天位,使之食天祿,俾施澤於天下,養賢以及萬民也。養賢, 所以養萬民也。

夫天地之中,品物之眾,非養則不生。聖人裁成天地之道,輔相天地之宜,以養天下,至於鳥獸草木,皆有養之之政。其道配天地,故夫子推頤之道,贊天地與聖人之功曰「頤之時大矣哉」。或云「義」,或云「用」,或止云「時」,以其大者也。萬物之生與養,時爲大,故云「時」。

象曰:山下有雷,頤;君子以慎言語,節飲食。

以二體言之,山下有雷,雷震於山下,山之生物,皆動其根荄,發其萌芽,爲養之象。

<sup>[</sup>註144] 《四庫》本作「養育」。

以上下之義言之,艮止而震動,上止下動,頤頷之象(註145)。以卦形言之,上下二陽,中含(註146)四陰,外實中虚,頤口之象。

口,所以養身也;故君子觀其象以養其身,愼言語以養其德,節飲食以養其體,不 唯就口取養(註147)義。

事之至近,而所繫至大者,莫過於言語飲食也。在身爲言語,於天下,則凡命令、 政教,出於身者,皆是;愼之,則必當而无失。在身爲飲食,於天下,則凡貨資、 財用,養於人者,皆是;節之,則適宜而无傷。推養身(註148)之道(註149),養德、 養天下,莫不然也。

#### 初九:舍爾靈龜,觀我朵頤,凶。

蒙之初六,蒙者也,爻乃上發蒙而言。頤之初九,亦假外而言。

爾,謂初也。舍爾之靈龜,乃觀我而朵頤。我,對爾而設。初之所以朵頤者,四也;然非四謂之也,假設之辭爾。九,陽體剛明,其才智足以養正者也。龜能咽息不食;靈龜,喻其明智,而可以不求養於外也。才雖如是,然以陽居動體,而在頤之時,求頤,人所欲也,上應於四,不能自守,志在上行,說所欲而朵頤者也。心既動,則其自失必矣。迷欲而失己,以陽而從陰,則何所不至,是以凶也。朵頤,爲朵動其頤額。人(註150)見食而欲之,則動頤垂涎,故以爲象。

舍,音捨。朵,多果反。頷,戶感反。

## 象曰:觀我朵頤,亦不足貴也。

九,動體;朵頤,謂其說陰而志動。既爲欲所動,則雖有剛健明智之才,終必自失,故其才亦不足貴也。人之貴乎剛者,爲其能立而不屈於欲也;貴乎明者,爲其能照而不失於正也。既惑所欲而失其正,何剛明之有?爲可賤也。

## 六二: 顛頤, 拂經于丘頤。征凶。

女不能自處,必從男;陰不能獨立(註151),必從陽。二,陰柔,不能自養,待養於

<sup>[</sup>註145] 一有「也」字。

<sup>[</sup>註146] 一无「含」字。

<sup>[</sup>註147] 一无「養」字。

<sup>[</sup>註148] 《四庫》本無「身」字。

<sup>[</sup>註149] 一有「則」字。

<sup>[</sup>註150]《四庫》本「人」前有「又」字。

<sup>[</sup>註 151] 底本作「正」,《四庫》本作「立」。依前「自處」文意,以「獨立」爲是。

人者也。天子養天下,諸侯養一國,臣食君上之祿,民賴司牧之養,皆以上養下,理之正也。二既不能自養,必求養於剛陽;若反下求於初,則爲顚倒,故云「顚頤」。 顚則拂違經常,不可行也。若求養於丘,則往必有凶。丘,在外而高之物,謂上九也。卦止二陽,既不可顚頤于初,若求頤于上九,往則有凶。

在頤之時,相應則相養者也。上非其應而往求養,非道妄動,是以凶也。顚頤則拂經,不獲其養。爾妄求於上,往則得凶也。今有人,才不足以自養,見在上者勢力足以養人,非其族類,妄往求之,取辱得凶必矣。

六二中正,在它卦多吉,而凶,何也?曰:「時然也。陰柔既不足以自養,初、上二 爻,皆非其與,故往求則悖理而得凶也。」

顚, 丁田反。

象曰:六二征凶,行失類也。

征而從上則凶者,非其類故也。往求而失其類,得凶宜矣。行,往也。

六三:拂頤,貞凶。十年勿用,无攸利。

頤之道,唯正則吉。三以陰柔之質,而處 [註 152] 不中正,又在動之極,是柔邪不正而動者也。其養如此,拂違於頤之正道,是以凶也。

得頤之正,則所養皆吉。求養養人,則合於義,自養則成其德。三乃拂違正道,故 戒以十年勿用。十,數之終,謂終不可用,无所往而利也。

象曰:十年勿用,道大悖也。

所以戒終不可用,以其所由之道,大悖義理也。

悖,布內反。

六四:顛頤,吉。虎視眈眈,其欲逐逐,无咎。

四在人上,大臣之位;六以陰居之(註153),陰柔不足以自養,況養天下乎?初九以剛陽居下,在下之賢也,與四爲應;四又柔順而正,是能順於初,賴初之養也。以上養下則爲順,今反求下之養,顚倒也,故曰「顚頤」。然己以(註154)不勝其任,求在下之賢而順從之,以濟其事,則天下得其養,而己无曠敗之咎,故爲吉也。

<sup>[</sup>註152] 一有「又」字。

<sup>[</sup>註 [53] 《二程集》作「也」。

<sup>[</sup>註154]《四庫》本無「以」字。

夫居上位者,必有 (註 155) 才德威望,爲下民所尊畏,則事行而眾心服從。若或下易其上,則政出而人違,刑施而怨起,輕於陵犯,亂之由也。六四雖能順從剛陽,不廢厥職;然質本陰柔,賴人以濟,人之所輕,故必養其威嚴,眈眈然如虎視,則能重其體貌,下不敢易。

又:取 (註 156) 於人者,必有常;若間或无繼,則其政敗矣。其欲,謂所須用者,必 逐逐相繼而不乏,則其事可濟;若取於人而无繼,則困窮矣。既有威嚴,又所施不 窮,故能无咎也。

二顚頤則拂經,四則吉,何也?曰:「二在上,而反求養於下,下非其應類,故爲拂經。四則居上位,以貴下賤,使在(註157)下之賢,由己以行其道,上下之志相應,而(註158)施於民,何吉如之!」

自三以下,養口體者也;四以上,養德義者也。以君而資養於臣,以上位而賴養於下,皆養德也。

眈,丁南反。

象曰:顛頤之吉,上施光也。

顚倒求養,而所以吉者,蓋得剛陽之應以濟其事,致己居上之德施,光明被于天下, 吉孰大馬?

六五:拂經,居貞吉,不可涉大川。

六五,頤之時居君位,養天下者也;然其陰柔之質,才不足以養天下,上有剛陽之 賢,故順從之,賴其養己以濟天下。

君者,養人者也,反賴人之養,是違拂於經常。既以己之不足,而順從於賢師傅。 上,師傅之位也,必居守貞固,篤於委信,則能輔翼其身,澤及天下,故吉也。

陰柔之質,无貞剛之性,故戒以能居貞則吉。以陰柔之才,雖倚賴剛賢,能持循於 平時,不可處艱難變故之際,故云「不可涉大川」也。以成王之才,不至甚柔弱也。 當管、蔡之亂,幾不保於周公,況其下者乎?故《書》曰:「王亦未敢誚公。」賴二

<sup>[</sup>註155] 一作「其1。

<sup>[</sup>註156]《四庫》本作「從」。

<sup>[</sup>註157] 一无「在」字。

<sup>[</sup>註158] 一有「澤」字。

公得終信,故艱險(註159)之際,非剛明之主,不可恃也;不得已而濟艱險者,則有矣。發此義者,所以深戒於爲君也。於上九,則據爲臣致身盡忠之道言,故不同也。

象曰:居貞之吉,順以從上也。

居貞之吉者,謂能堅固順從於上九之賢,以養天下也。

上九:由頤,厲吉,利涉大川。

上九以剛陽之德,居師傅之任;六五之君,柔順而從於己,賴己之養,是當天下之任,天下由之以養也。以人臣而當是任,必常懷危厲則吉也。如伊尹、周公,何嘗不憂勤兢畏,故得終吉。

夫以君之才不足,而倚賴於己,身當天下(註 160)大任,宜竭其才力,濟天下之艱危,成天下之治安,故曰「利涉大川」。得君如此之專,受任如此之重,苟不濟天下之(註 161)艱危,何足稱委遇而謂之賢乎?當盡誠竭力,而不顧慮,然惕厲則不可忘也。

象曰:由頤厲吉,大有慶也。

若上九之當大任如是,能兢畏如是,天下被其德澤,是大有福慶也。

## 異下 兌上 **大過**

《序卦》曰:「頤者,養也。不養則不可動,故受之以大過。」

凡物養而後能成,成則能動,動則有過,大過所以次頤也。爲卦上兌下巽。

澤在木上,滅木也。澤者,潤養於木;乃至滅沒於木,爲大過之義。

大過者,陽過也。故爲大者過、過之大與大事過也;聖賢道德功業大過於人,凡事 之大過於常者,皆是也。

夫聖人盡人道,非過於理也。其制事以天下之正理,矯時 (註 161) 之用,小過於中者則有之,如行過乎恭,喪過乎哀,用過乎儉是也。蓋矯之小過,而後能及於中,乃

<sup>(</sup>註159)一作一有「之」字。「難」。

<sup>[</sup>註160] 一有「之」字。

<sup>[</sup>註161]《四庫》本無「之」字。

<sup>[</sup>註161] 《四庫》本作「失」。

求中之用也。

所謂大過者,常事之大者耳,非有過於理也。唯其大,故不常見;以其比常所見者大,故謂之大過。如堯、舜之禪讓,湯、武之放伐,皆由 [註 162] 道也。道无不中, 无不常,以世人所不常 [註 163] 見,故謂之「大過於常」也。

過,古臥反。

大過:棟橈,利有攸往,亨。

小過,陰過於上下;大過,陽過於中。陽過於中,而上下弱矣,故爲棟橈之象。棟,取其勝重;四陽聚於中,可謂重矣。九三、九四皆取棟象,謂任重也。橈,取其本未弱,中強而本未弱,是以橈也(註164)。陰弱而陽強,君子盛而小人衰,故利有攸往而亨也。棟,今人謂之檁。

棟, 丁貢反。橈, 乃教反。

彖曰:大過,大者過也。

大者過,謂陽過也。在事,爲事之大者過,與其過之大。

棟橈,本末弱也。

謂上下二陰衰弱。陽盛則陰衰,故爲大者過。在小過,則曰「小者過」,陰過也。

剛過而中,巽而說行;利有攸往,乃亨。

言卦才之善也。剛雖過,而二、五皆得中,是處不失 (註 165) 中道也。下巽上兌,是以巽順和說之道而行也。在大過之時,以中道巽說而行,故利有攸往,乃所以能亨也。

說,音悅。

## 大過之時大矣哉!

大過之時,其事甚大,故贊之曰「大矣哉」。如立非常之大事,興不 (註 166) 世之大功,成絕俗之大德,皆大過之事也。

<sup>[</sup>註162]一有「此」字。

<sup>[</sup>註163] 一作「嘗」。

<sup>[</sup>註164] 一作「橈取其中強而本末弱;本末弱,是以橈也」。

<sup>[</sup>註165] 不失,一作「得」。

<sup>[</sup>註166]《四庫》本作「百」。

#### 象曰:澤滅木,大過;君子以獨立不懼,遯世无悶。

澤,潤養於木者也;乃至滅沒於木,則過甚矣,故爲大過。君子觀大過之象,以立 其大過人之行。君子所以大過人者,以其能獨立不懼,遯世无悶也。

天下非之而不顧,獨立不懼也;舉世不見知而不悔,**遯**世无悶也。如此然後能自守, 所以爲大過人(註167)也。

#### 初六:藉用白茅,无咎。

初以陰柔異體而處下,過於畏愼者也。以柔在下,用茅藉物之象,不措諸地而藉以 茅,過於愼也,是以无咎。茅之爲物,雖薄而用可重者,以用之能成敬愼之道也。 愼守斯術而行,豈有失乎?大過之用也。

《繫辭》云:「苟措諸地而可矣,藉之用茅,何咎之有?愼之至也。夫茅之爲物,薄而用可重也;愼斯術也以往,其无所失矣。」言敬愼之至也。茅雖至薄之物,然用之可甚重,以之藉薦,則爲重愼之道,是用之重也。人之過於敬慎,爲之非難,而可以保其安而无過。苟能愼(註168)斯道,推而行之於事,其无所失矣。

藉,在夜反。

## 象曰:藉用白茅,柔在下也。

以陰柔居 [註 169] 卑下之道,唯當過於敬慎而已。以柔在下,爲以茅藉物之象,敬慎 之道也。

## 九二:枯楊生稊,老夫得其女妻,无不利。

陽之大過,比陰則合,故二與五皆有生象。九二當大過之初,得中而居柔,與初密 比而相與。初既切比於二,二復无應於上,其相與可知。是剛過之人,而能以中自 處,用柔相濟者也。過剛則不能有所為,九三是也。得中用柔,則能成大過之功, 九二是也。

楊者,陽氣易感之物,陽過則枯矣;楊枯槁而復生稊,陽過而未至於極也。九二陽 過而與初,老夫得女妻之象。老夫而得女妻,則能成生育之功。二得中居柔而與初, 故能復生稊,而无過極之失,无所不利也。在大過,陽爻居陰則善,二與四是也。 二不言吉,方言无所不利,未遽至吉也。

<sup>[</sup>註167] 一无「人」字。

<sup>[</sup>註168]一有「思」字。

<sup>(</sup>註169)《四庫》本作「處」。

梯,根也。劉琨《勸進表》云:「生繁華於枯荑。」謂枯根也。鄭玄《易》亦作「荑」, 字與稊同。徒稽反。

#### 象曰:老夫女妻,過以相與也。

老夫之說少女,少女之順老夫,其相與過於常分,謂九二、初六,陰陽相與之和, 過於當也。

#### 九三:棟橈,凶。

夫居大過之時,興大過之功,立大過之事,非剛柔得中,取於人以自輔,則不能也。 既過於剛強,則不能與人同常常之功;尚不能獨立,況大過之事乎?以聖人之才, 雖小事,必取於人;當天下之大任,則可知矣。九三以大過之陽,復以剛自居,而 不得中,剛過之甚者也。以過慎(註170)之剛,動則違於中和,而拂於眾心,安能當 大過之任乎?故不勝其任,如棟之橈,傾敗其室,是以凶也。取棟爲象者,以其无 輔,而不能勝重任也。

或曰:「三,巽體而應於上,豈无用柔之象乎?」曰:「言《易》者,貴乎識勢之重輕,時之變易。三居過而用剛,巽既終而且變,豈復有用柔之義?應者,謂志相從也。三方過剛,上能係其志乎?」

## 象曰:棟橈之凶,不可以有輔也。

剛強之過,則不能取於人,人亦不能 (註 171) 親輔之,如棟橈折,不可支輔也。棟,當室之中,不可加助,是不可以有輔也。

## 九四:棟隆,吉。有它,吝。

四居近君之位,當大過之任者也;居柔,爲能用柔相濟。既不過剛,則能勝其任,如棟之隆起,是以吉也。隆起 [註 172] ,取不下橈之義。大過之時,非陽剛不能濟;以剛處柔,爲得宜矣。若又與初六之陰相應,則過也。既剛柔得宜,而志復應陰,是有它也;有它則有累於剛,雖未至於大害,亦可吝也。蓋大過之時,動則過也。有它,謂更有它志。吝,爲不足之義,謂可少也。

或曰:「二比初則无不利,四若應初則爲吝,何也?」曰:「二得中而比於初,爲以 柔相濟之義。四與初爲正應,志相係者也。九既居四,剛柔得宜矣;復牽係於陰,

<sup>[</sup>註170]《四庫》本作「甚」。

<sup>[</sup>註171] 一作「肯」。

<sup>[</sup>註172] 一有「兼」字。

以害其剛,則可吝也。」

象曰:棟隆之吉,不橈乎下也。

棟,隆起則吉,不橈曲以就下也,謂不下係於初也。

九五:枯楊生華,老婦得其士夫,无咎、无譽。

九五當大過之時,本以中正居尊位,然下无應助,固不能成大過之功,而上比過極之陰,其所相濟者,如枯楊之生華。枯楊下生根稅,則能復生,如大過之陽,興成事功也。上生華秀,雖有所發,无益於枯也。

上六,過極之陰,老婦也。五雖非少,比老婦則爲壯矣 (註 173) ,於五无所賴也,故 反稱婦得。過極之陰,得陽之相濟,不爲无益也。以士夫而得老婦,雖无罪咎,殊 非美也,故云「无咎无譽」。《象》復言其「可醜也」。

華,如字。

象曰:枯楊生華,何可久也?老婦士夫,亦可醜也。

枯楊不生根而生華,旋復枯矣,安能久乎?老婦而得士夫,豈能成生育之功?亦 [註 174] 爲可醜也。

上六:過涉滅頂,凶,无咎。

上六以陰柔處過極,是小人過常之極者也。小人之所謂「大過」,非能爲大過人之事也,直過常越理,不恤危亡,履險蹈禍而已。如過涉於水,至滅沒其頂,其凶可知。

小人狂躁以自禍,蓋其宜也,復將何尤?故曰「无咎」。言自爲之,无所怨咎也。因 澤之象而取涉義。

象曰:過涉之凶,不可咎也。

過涉至溺,乃自爲之,不可以有咎也。言无所怨咎。

# 坎下 坎下 **習坎**

《序卦》:「物不可以終過,故受之以坎。坎者,陷也。」

<sup>(</sup>註173)一作「壯夫」、一作「士夫」。

<sup>[</sup>註174] 《四庫》本無「亦」字。

理无過而不已,過極則必陷,坎所以次大過也。

習,謂重習。它卦雖重,不加其名,獨坎加習者,見其重險,險中復有險,其義大也。 卦中一陽,上下二陰,陽實陰虛,上下无據;一陽陷於二陰之中,故爲坎陷之義。

陽居陰中,則爲陷;陰居陽中,則爲麗。凡陽在上者,止之象;在中,陷之象;在 下,動之象。陰在上,說之象;在中,麗之象;在下,巽之象。陷則爲險。

習,重也。如學習、溫習,皆重複之義也。坎,陷(註175)也。卦之所言,處險難之道。坎,水也。一始於中,有生之最先者也,故爲水。陷,水之體也。

#### 習坎:有孚,維心亨,行有尚。

陽實在中,爲中有孚信。維心亨,維其心誠一,故能亨通。至誠可以通金石、蹈水 火,何險難之不可亨也?

行有尚,謂以誠一而行,則能出險,有可嘉尚,謂有功也;不行,則常在險中矣。

#### 彖曰:習坎,重險也。水流而不盈,行險而不失其信。

習坎者 [註 176],上下皆坎,兩險相重也。初六 [註 177] 坎窞,是坎中之坎,重險也。

水流而不盈:陽動於險中,而未出於險,乃水性之流行,而未盈於坎;既盈,則出 乎坎矣。

行險而不失其信:陽剛中實,居險之中,行險而不失其信者也。坎中實,水就下, 皆爲信義,有孚也。

## 維心亨,乃以剛中也。

維其心可以亨通者,乃以其剛中也。中實爲有孚之象。至誠之道,何所不通 [註 178]? 以剛中之道而行,則可以濟險難而亨通也。

## 行有尚,往有功也。

以其剛中之才而往,則有功,故可嘉尚。若止(註179)不行,則常在險中矣(註180)。

<sup>[</sup>註175] 一作「險」。

<sup>[</sup>註176]《四庫》本「習坎者」後有「謂重險也」一句。

<sup>[</sup>註177]《四庫》本有「云」字。

<sup>[</sup>註178] 一作「亨」。

<sup>[</sup>註179]《四庫》本有「而」字。

<sup>[</sup>註180] 一作「也」。

坎以能行爲功。

天險,不可升也;地險,山川丘陵也。王公設險以守其國。險之時用大矣 哉!

高不可升者,天之險也。山川丘陵,地之險也。王公,君人者,觀坎之象,知險之 不可陵也,故設爲城郭溝池之險,以守其國,保其民人。是有用險之時,其用甚大, 故贊其「大矣哉」。

山河城池,設險之大端也。若夫尊卑之辨,貴賤之分,明等威,異物采,凡所以杜 絕陵僭,限隔上下者,皆體險之用也。

象曰:水洊至,習坎;君子以常德行,習教事。

坎爲水,水流仍洊而至。兩坎相習,水流仍洊之象也。水自涓滴至於尋丈,至於江海,洊習而不驟 [註 181] 者也。其因勢就下,信而有常,故君子觀坎水之象,取其有常,則常久其德行。人之德行,不常則僞也;故當如水之有常,取其洊習相受,則以習熟其教令之事。

夫發政行教,必使民熟於聞聽,然後能從[註182],故三令五申之。若驟告未喻,遽 責其從,雖嚴刑以驅之[註183],不能也,故當如水之洊習。

游, 在焉反。

初六:習坎,入于坎窞,凶。

初以陰柔 (註 184) 居坎險之下,柔弱无援,而處不得當,非能出乎險也,唯益陷於深險耳。 窗,坎中之陷處。已在習坎中,更入坎窞,其凶可知。

窞,徒坎反。

象曰:習坎入坎,失道凶也。

由習坎而更入坎窞,失道也,是以凶。能出於險,乃不失道也。

九二:坎有險,求小得。

<sup>[</sup>註181] 一作「讓」。

<sup>[</sup>註182] 《二程集》作「後」, 費解, 當爲誤植。

<sup>[</sup>註183] 一无「之」字。

<sup>(</sup>註184) 一无「柔」字。

二當坎險之時,陷上下二陰之中,乃至險之地,是有險也。然其剛中之才,雖未能出乎險中,亦可小自濟,不至如初,益陷入于深險,是所求小得也。君子處險艱(註185)而能自(註186)保者,剛中而已。剛,則才足自衛;中,則動不失宜。

#### 象曰:求小得,未出中也。

方爲二陰所陷,在至(註187)險之地,以剛中之才,不至陷於深險,是所求小得,然未能出坎中之險也。

#### 六三:來之坎坎,險且枕;入于坎窞,勿用。

六三在坎陷(註188)之時,以陰柔而居不中正,其處不善,進退與居,皆不可者也。來下則入于險之中,之上則重險也。退來與進之皆險,故云「來之坎坎」。既進退皆險,而居亦險。枕,謂支倚。居險而支倚以處,不安之甚也。所處如此,唯益入于深險耳!故云「入于坎窞」。如三所處之道(註189),不可用也,故戒「勿用」。

## 象曰:來之坎坎,終无功也。

枕, 針鴆反。

進退皆險,處又不安,若用此道,當益入于險,終豈能有功乎?以陰柔處不中正,雖平易之地,尚致悔咎,況處險乎?險者,人之所欲出也;必得其道,乃能去之。 求去而失其道,益困窮耳;故聖人戒如三所處,不可用也。

## 六四:樽酒,簋貳,用缶;納約自牖,終无咎。

六四陰柔而下无助,非能濟天下之險者,以其在高位,故言爲臣處險之道。大臣當 險難之時,唯至誠見信於君,其交固而不可間,又能開明君心,則可保无咎矣(註190)。

夫欲上之篤信,唯當盡其質實而已。多儀而尚飾,莫如燕亨之禮,故以燕享喻之; 言當不尚浮飾,唯以質實。所用一樽之酒,二簋之食,復以瓦缶爲器,質之至也。

其質實如此,又須納約自牖。納約,謂進結於君之道。牖 [註 1911 ,開通之義。室之

<sup>[</sup>註185] 《四庫》本作「難」。

<sup>[</sup>註186]《四庫》本作「自能」。

<sup>[</sup>註187]《四庫》本無「至」字。

<sup>[</sup>註188] 一作「險」。

<sup>[</sup>註189] 一无「之道」字。

<sup>[</sup>註190] 一作「也」。

<sup>(</sup>註191)一有「有」字。

暗也,故設牖所以通明。自牖,言自通明之處,以况君心所明處。《詩》云:「天之牖民,如壎如篪。」毛公訓牖爲道,亦開通之謂〔註 192〕。人臣以忠信善〔註 193〕道結於君心,必自其所明處,乃能入也。

人心有所蔽,有所通。所蔽者,暗處也;所通者,明處也。當就其明處而告之,求信則易也,故云「納約自牖」。能如是,則雖艱險之時,終得无咎也。

且如君心蔽於荒樂,唯其蔽也,故爾雖力詆其荒樂之非,如其不省何?必於所不蔽之事,推而及之,則能悟其心矣。自古能諫其君者,未有不因其所明者也。故計直強勁者,率多取忤;而溫厚明辯者,其說多行。且如漢祖愛戚姬,將易太子,是其所蔽也,群臣爭之者眾矣。嫡庶之義,長幼 (註 194) 之序,非不明也,如其蔽而不察何?四老者,高祖素知其賢而重之,此其不蔽之明心也,故因其所明而及其事,則悟之如反手。且四老人之力,孰與張良、群公卿及天下之士?其言之切,孰與周昌、叔孫通?然而,不從彼而從此者,由攻其蔽與就其明之異耳。

又如趙王太后,愛其少子長安君,不肯使質於齊,此其蔽於私愛也。大臣諫之雖強, 既曰蔽矣,其能聽乎?愛其子,而欲使之長久富貴者,其心之所明也,故左師觸龍, 因其(註195)明而導之以長久之計,故其聽也如響。

非唯告於君者如此,爲教者亦然。夫教,必就人之所長。所長者,心之所明也;從 其心之所明而入,然後推及其餘,孟子所謂「成德達才」是也。

樽,音尊。簋,音軌。缶,方有反。牖,音酉。

## 象曰: 樽酒簋貳, 剛柔際也。

《象》只舉首句,此〔註 196〕比多矣。樽酒簋貳,質實之至,剛柔相際接之道能如此, 則可終保无咎。君臣之交,能固而常者,在誠實而已。剛柔,指四與五,謂君臣之 交際也。

九五:坎不盈祇,

字義已見復卦。

<sup>[</sup>註192] 一作「義」。

<sup>[</sup>註193]《二程集》作「之」。

<sup>[</sup>註194]一作「少長」。

<sup>[</sup>註195] 一有「所」字。

<sup>(</sup>註196)《四庫》本作「如此」。

#### 既平, 无咎。

九五在坎之中,是不盈也,盈則平而出矣。祇,宜音柢,抵也。復卦云:「无祇悔。」 必抵於已平,則无咎。既曰「不盈」,則是未平,而(註197)尚在險中,未得无咎也。 以九五剛中之才居尊位,宜可以濟於險,然下无助也。二陷於險中,未能出,餘皆 陰柔,无(註198)濟險之才,人君雖才,安能獨濟天下之險?居君位而不能致天下出 於險,則爲有咎;必祗既平,乃得无咎。

#### 象曰: 坎不盈, 中未大也。

九五,剛中之才而得尊位,當濟天下之險難,而坎尙不盈,乃未能平乎險難,是其剛中之道未光大也。險難之時,非君臣協力,其能濟乎?五之道未大,以无臣也。 人君之道,不能濟天下之險難,則爲未大,不稱其位也。

#### 上六:係用徽繆,實于叢棘,三歲不得,凶。

上六以陰柔而居險之極,其陷之深者也。以其陷之深,取牢獄爲喻,如係縛之以徽 纆,囚寘於叢棘之中。陰柔而陷之深,其不能出矣,故云至於「三歲」之久,不得 免也,其凶可知。

徽,許韋反。纆,音墨。置,之跂反。

## 象曰:上六失道,凶三歲也。

以陰柔而自處極險之地,是其失道也,故其凶至于三歲也。三歲之久,而不得免焉, 終凶之辭也。言久,有曰「十」,有曰「三」,隨其事也。陷于獄,至于三歲,久之 極也。它卦以年數言者,亦各以其事也;如「三歲不興」、「十年乃字」是也。

# 離上離

《序卦》:「坎者,陷也。陷必有所麗,故受之以離。離者,麗也。」

陷於險難之中,則必有所附麗,理自然也,離所以次坎也。

離,麗也、明也。取其陰麗於上下之陽,則爲附麗之義;取其中虛,則爲明義。離 爲火,火體虛,麗於物而明者也。又爲日,亦以虛明之象。

<sup>[</sup>註197] 一无「而」字。

<sup>{</sup>註198] 一作「非」。

#### 離:利貞,亨。畜牝牛,吉。

離,麗也。萬物莫不皆有所麗,有形則有麗矣。在人,則為 [註 199] 所親附之人、所由之道、所主之事,皆其所麗也。人之所麗,利於貞正,得其正,則可以亨通,故曰「離:利貞,亨」。

畜牝牛,吉:牛之性順,而又牝焉,順之至也。既附麗於正,必能順於正道,如牝牛則吉也。畜牝牛,謂養其順德 [註 200]。人之順德,由養以成,既麗於正,當養習以成其順德也。

離,列池反。牝,頻忍反。

#### 彖曰:離,麗也。日月麗平天,百穀草木麗平土;

離,麗也,謂附麗也;如日月則麗於天,百穀草木則麗於土,萬物莫不各有所麗。 天地之中,无无麗之物。在人,當審其所麗;麗得其正,則能亨也。

#### 重明以麗乎正, 乃化成天下。

以卦才言也。上下皆離,重明也。丘、二皆處中正,麗乎正也。君臣上下,皆有明 德,而處中正,可以化天下,成文明之俗也。

## 柔麗乎中正,故亨;是以畜牝牛吉也。

二、五以柔順麗於中正,所以能亨。人能養其至順,以麗中正,則吉,故曰「畜牝 牛吉也」。

或曰:「二則中正矣, 五以陰居陽,得爲正乎?」曰:「離上(註201)所麗, 五,中正之位, 六麗於正位,乃爲正也。學者知時義而不失重輕(註202),則可以言《易》矣。」

## 象曰:明兩作離,大人以繼明照于四方。

若云「兩明」,則是二明,不見繼明之義,故云「明兩」。明而重兩,謂相繼也。作 離,明兩而爲離,繼明之義也。

震巽之類,亦取洊隨之義;然離之義尤重也。大人,以德言則聖人,以位言則王者。 大人觀離明相繼之象,以世繼其明德,照臨于四方。大凡以明相繼,皆繼明也。舉

<sup>[</sup>註199] 一无「爲」字。

<sup>[</sup>註200] 一无「德」字。

<sup>[</sup>註201] 《四庫》本有「於」字。

<sup>(</sup>註202)《四庫》本作「輕重」。

其大者,故以世襲繼照言之。

## 初九:履錯然,敬之,无咎。

陽固好動,又居下而離體。陽居下則欲進,離性炎上,志在上麗,幾於躁動。其履錯然,謂交錯也;雖未進,而跡已動矣,動則(註203)失居下之分而有咎也。然其剛明之才,若知其義而敬愼之,則不至於咎矣。

初在下,无位者也;明其身之進退,乃所麗之道也。其志既動,不能敬慎則妄動, 是不明所麗,乃有咎也。

錯,七各反。

#### 象曰:履錯之敬,以辟咎也。

履,錯然欲動,而知敬慎,不敢進,所以求辟免過咎也。居明而剛,故知而能辟。 不剛明則妄動矣。

辟,音避。

#### 六二: 黃離, 元吉。

二居中得正,麗於中正也。黃,中之色,文之美也。文明中正,美之盛也,故云「黃離」。以文明中正之德,上同於文明中順之君,其明如是,所麗如是,大善之吉也。

## 象曰: 黃離元吉, 得中道也。

所以「元吉」者,以其得中道也。不云「正」者,離以中爲重;所以成文明,由中也,「正」在其中矣。

## 九三:日昃之離,不鼓缶而歌,則大耋之嗟,凶。

八純卦皆有二體之義:乾,內外皆健;坤,上下皆順;震,威震相繼;巽,上下順 隨;坎,重險相習;離,二明繼照;艮,內外皆止;兌,彼己相說。而離之義,在 人事最大。

<sup>[</sup>註203] 一无「則」字。

缶,常用之器也。鼓缶而歌,樂其常也。不能如是,則以大耋爲嗟憂,乃爲凶也。 大耄,傾沒也。人之終盡,達者,則知其常理,樂天而已;遇常皆樂,如鼓缶而歌。 不達者,則恐恆有將盡之悲,乃大耋之嗟,爲其凶也。此處死生之道也。

耋,與昳同,田節反。昃,音仄。

## 象曰:日昃之離,何可久也?

日既傾昃,明能久乎?明者,知其然也,故求人以繼其事,退處以休其身。安常處順,何足以爲凶也?

九四:突如,其來如;焚如,死如,棄如。

九四,離下體而升上體,繼明之初,故言繼承之義。

在上而近君,繼承之地也。以陽居離體而處四,剛躁而不中正,且重剛;以不正而剛盛之勢,突如而來,非善繼者也。夫善繼者,必有巽讓之誠,順承之道,若舜、 啓然。今四突如其來,失善繼之道也。又承六五陰柔之君,其剛盛陵爍之勢,氣焰如焚然,故云「焚如」。

四之所行,不善如此,必被禍害,故曰「死如」。失繼紹之義,承上之道,皆逆德也, 眾所棄絕,故云「棄如」。至於死棄,禍之極矣,故不假言凶也。

突,徒忽反。

象曰:突如,其來如,无所容也。

上陵其君,不順所承;人惡眾棄,天下所不容也。

六五:出涕沱若,戚嗟若,吉。

六五,居尊位而守中,有文明之德,可謂善矣。然以柔居上,在下无助,獨附麗於剛強之間,危懼之勢也。唯其明也,故能畏懼之深,至於出涕;憂慮 [註 204] 之深,至於戚嗟,所以能保其吉也。出涕、戚嗟,極言其憂懼之深耳,時當然也。居尊位而文明,知憂畏如此,故得吉。若自恃其文明之德,與所麗中正,泰然不懼 [註 205],則安能保其吉也?

涕,他米反;又音替。沱,徒河反。

<sup>[</sup>註204] 一作「虞」。

<sup>[</sup>註205] 一作「慮」。

象曰:六五之吉,離王公也。

六五之吉者,所麗得王公之正位也。據在上之勢,而明察事理,畏懼憂虞以持之, 所以能吉也;不然,豈能安乎?

離,音麗。

上九:王用出征,有嘉。

九以陽居上,在離之終,剛明之極者也。明則能照,剛則能斷。能照,足以察邪惡; 能斷,足以行威刑,故王者宜用。如是剛明,以辨天下之邪惡,而行其征伐,則有 嘉美之功也。征伐,用刑之大者。

## 折首,獲匪其醜,无咎。

夫明極則无微不照,斷極則无所寬宥;不約之以中,則傷於嚴察矣。去天下之惡, 若盡究其漸染註誤,則何可勝誅?所傷殘亦甚矣,故但當折取其魁首。所執獲者, 非其醜類,則无殘暴之咎也。《書》曰:「殲厥渠魁,叠從罔治。」

折,之舌反。詰,音卦。殲,將廉反。

象曰:王用出征,以正邦也。

王者用此上九之德,明照而剛斷,以察除天下之惡,所以正治其邦國。剛明,居上 之道也。

# 《周易》上經 卷第三

<del>v</del> i	
	•

# 《周易》下經 卷第四

程頤傳

# 艮下 成

《序卦》:「有天地,然後有萬物;有萬物,然後有男女;有男女,然後有夫婦;有 夫婦,然後有父子;有父子,然後有君臣;有君臣,然後有上下;有上下,然後禮 儀有所錯。」

天地,萬物之本;夫婦,人倫之始。所以上經首乾、坤,下經首咸,繼以恒也。天地二物,故二卦分爲天地之道。男女交合而成夫婦,故咸與恒皆二體合爲夫婦之義。

咸,感也,以說爲主。恒,常也,以正爲本。而說之道,自有正也;正之道,固有 說焉。巽而動,剛柔皆應,說也。咸之爲卦,兌上艮下,少女、少男也。男女相感 之深,莫如少者,故二少爲咸也。艮體篤實,止爲誠慤之義。男志篤實以下交,女 心說而上應,男感之先也。男先以誠感,女[註1] 說而應也。

# 咸:亨,利貞,取女吉。

咸,感也。不曰「感」者,咸有皆義,男女交相感也。物之相感,莫如男女,而少 復甚焉。凡君臣、上下,以至萬物,皆有相感之道。

物之相感,則有亨通之理。君臣能相感,則君臣之道通;上下能相感,則上下之志通。以至父子、夫婦、親戚、朋友,皆情意相感,則和順而亨通。事物皆然,故感 [註2] 有亨之理也。

利貞:相感之道,利在於正也。不以正,則入於惡矣;如夫婦之以淫姣,君臣之以

<sup>[</sup>註 1] 《四庫》本「女」前有「則」字。

<sup>[</sup>註 2] 《四庫》本作「咸」。

媚說,上下之以邪僻,皆相感之不以正也。

取女吉,以卦才言也。卦有柔上剛下,二氣感應相與,止而說,男下女之義;以此 義取女,則得正而吉也。

取,七具反。

彖曰:咸,感也。柔上而剛下,二氣感應以相與;止而說,男下女,是以 亨。利貞,取女吉也。

咸之義,感也。在卦,則柔爻上而剛爻下,柔上變剛而成兌,剛下變柔而成艮。陰陽相交,爲男女交感之義。

又: 兌女在上, 艮男居下, 亦柔上剛下也。陰陽二氣, 相感相應而和合, 是相與也。

止而說:止於說,爲堅慤之意。艮止於下,篤誠相下也。兌說於上,和說相應也。 以男下女,和之至也。相感之道如此,是以能亨通而得正,取女如是則占也。卦才 如此,大率感道利於正也。

說,音說。

天地感而萬物化生,聖人感人心而天下和平。觀其所感,而天地萬物之情 可見矣。

既言男女相感之義,復推極感道,以盡天地之理、聖人之用。

天地二氣交感,而化生萬物;聖人至誠,以感億兆之心,而天下和平。天下之心所以和平,由聖人感之也。觀天地交感化生萬物之理,與聖人感人心致和平之道,則 天地萬物之情可見矣。感通之理,知道者,默而觀之可也。

象曰:山上有澤,咸;君子以虛受人。

澤性潤下,上性受潤。澤在山上,而其漸潤通徹,是二物之氣相咸 (註 3) 通也。君子觀山澤通氣之象,而虛其中以受於人。夫人中虛則能受,實則不能入矣。虛中者, 无我也;中无私上,則无感不通。以量而容之,擇合 (註 4) 而受之,非聖人有感必通之道也。

初六:咸其拇。

<sup>[</sup>註 3] 《四庫》本作「感」。

<sup>[</sup>註 4] 一作「交」。

初六在下卦之下,與四相感。以微處初,其感未深,豈能動於人?故如人拇之動, 未足以進也。拇,足大指。人之相感,有淺深輕重之異,識其時勢,則所處不失其 官矣。

拇,茂后反。

## 象曰:咸其拇,志在外也。

初志之動,感於四也,故曰「在外」。志雖動而感未深,如拇之動,未足以進也。

## 六二:咸其腓,凶,居吉。

[以陰在(註5)下,與五爲應,故設咸腓之戒。

腓,足肚。行則先動,足乃舉之,非如腓之自動也。二若不守道,待上之求,而如 腓自動,則躁妄自失,所以凶也。安其居而不動,以待上之求,則得進退之道而吉 也。二,中正之人,以其在咸而應五,故爲此戒。復云「居占」,若安其分,不自動, 則吉也。

腓, 房非反。

# 象曰:雖凶居吉,順不害也。

二居中得正,所應又中正,其才本善,以其在咸之時,質柔而上應,故戒以先動求 君則凶,居以自守則占。《象》復明之,云:「非戒之不得相感,唯順理則不害。」 謂守道不先動也。

# 九三:咸其股,執其隨,往吝。

九三以陽居剛,有剛陽之才,而爲主於內,居下之上,是宜自得於正道,以感於物, 而乃應於上六。陽好上而說,陰上居感說之極,故三感而從之。

股者,在身之下、足之上,不能自由,隨身而動者也,故以爲象。言九三不能自 上,隨物而動,如股然;其所執守者,隨於物也。剛陽之才,感於所說而隨之,如此而往〔註6〕,可羞吝也。

# 象曰:咸其股,亦不處也;志在隨人,所執下也。

<sup>[</sup>註 5] 《四庫》本作「居」。

<sup>[</sup>註 6] 底本作「可往」,《四庫》本「可」在「往」字後。《註評》本引《吉澄》本、《武英殿》本謂,「可」字置於「往」下。依爻辭「往吝」文意,「可」字應在「往」字後,與「羞吝」連讀爲宜,故更正之。

云「亦」者,蓋《象辭》 [註7] 本不與《易》相比,自作一處,故諸爻之《象辭》,意有相續者。此言「亦」者,承上爻 [註8] 辭也。上云「咸其拇,志在外也」、「雖凶居吉,順不害也」、「咸其股,亦不處也」。前 [註9] 二陰爻皆有感而動,三雖陽爻,亦然,故云「亦不處也」。不處,謂動也。有剛陽之質,而不能自主 [註 10] ,志反在於隨人,是所操執者,卑下之甚也。

九四:貞吉,悔亡。憧憧往來,朋從爾思。

感者,人之動也,故皆就人身取象。拇,取在下而動之微;腓,取先動;股,取其 隨。九四无所取,直言感之道。不言咸其心,感乃心也。四在中而居上,當心之位, 故爲感之主,而言感之道,貞正則吉而悔亡;感不以正,則有悔也。

又:四,說體,居陰而應初,故戒於貞。感之道,无所不通;有所私係,則害於感 通,乃有悔也。聖人感天下之心,如寒暑、雨暘,无不通,无不應者,亦貞而已矣。 貞者,慮中无我之謂也。

憧憧往來,朋從爾思:夫貞一,則所感无不通,若往來憧憧然。用其私心以感物, 則思之所及者,有所 (註 11) 感而動;所不及者,不能感也。是其朋類,則從其思也。 以有係之私心,既主於一隅一事,豈能廓然无所不通乎?

《繫辭》曰:「天下何思何慮?天下同歸而殊塗,一致而百慮。天下何思何慮?」夫子因咸極論感通之道。夫以思慮之私心感物,所感狹矣。天下之理一也,途雖殊而其歸則同,慮雖百而其致 [註 12] 則一。雖物有萬殊,事有萬變,統之以一,則无能違也。故貞其意,則窮天下无不感通焉。故曰「天下何思何慮」。用其思慮之私心, 豈能无所不感也?

「日往則月來,月往則日來,日月相推而明生焉。寒往則暑來,暑往則寒來,寒暑相推而歲成焉。往者,屈也;來者,信也。屈信相感而利生焉。」此以往來、屈信,明感通 (註13) 之理。屈則有信,信則有屈,所謂感應也。故「日月相推而明生,寒暑相推而歲成」。功用由是而成,故曰「屈信相感而利生焉」。

<sup>[</sup>註 7] 一作「體」。

<sup>[</sup>註 8] 一有「象」字。

<sup>[</sup>註 9] 一作「下」。

<sup>(</sup>註10) 一作「立」、一作「處」。

<sup>[</sup>註11] 《四庫》本作「能」。

<sup>[</sup>註12] 一有「極」字、一作「極致」。

<sup>[</sup>註13] 《四庫》本作「應」。

感,動也。有感必有應,凡有動皆爲感,感則必有應;所應復爲感(註14),感復有應,所以不已也。

「尺蠖之屈,以求信也。龍蛇之蟄,以存身也。精義入神,以致用也。利用安身, 以崇德也。過此以往,未之或知也。」前云「屈信之理」矣,復取物以明之。

尺蠖之行,先屈而後信。蓋不屈則无信,信而後有屈。觀尺蠖則知感應之理也(註15)。 龍蛇蟄(註16)藏,所以存息其身,而後能奮迅也;不蟄則不能奮矣。動息相感,乃 屈信也。君子潛心精微之義,入於神妙,所以致其用也。潛心精微,積也;致用, 施也。積與施,乃屈信也。

利用安身,以崇德也:承上文致用而言。利其施用,安處其身,所以崇大其德業也。 所爲合理,則事正而身安,聖人(註17)能事盡於此矣,故云「過此以往,未之或知也」。

窮神知化,德之盛也:既云「過此以往,未之或知」,更以此語結(註18)之,云:「窮極至誠(註19)之妙,知化育之道,德之至盛也。」无加於此矣。

憧,昌容反。

# 象曰:貞吉悔亡,未感害也;憧憧往來,未光大也。

貞,則吉而悔亡,未爲私感所害也;係私應,則害於感矣。憧憧往來,以私心相感, 感之道狹矣,故云「未光大也」。

# 九五:咸其脢,无悔。

九居尊位,當以至誠感天下,而應二比上。若係二而說上,則偏私淺狹,非人君之道,豈能感天下乎?

脢,背肉也,與心相背而所不見也。言能背其私心,感非其所見而說者,則得人君 感天下之正,而无悔也。

脢,武坯反。

<sup>[</sup>註 [4] 一有「所」字。

<sup>[</sup>註15] 《四庫》本作「矣」。

<sup>[</sup>註16] 《四庫》本作「之」。

<sup>[</sup>註17] 一作「賢」。

<sup>[</sup>註18] 《四庫》本作「終」。

<sup>[</sup>註19] 《四庫》本作「神」。

象曰:咸其脢,志末也。

戒使背其心而咸脢者,爲其存心(註20)淺末,係二而說上,感於私欲也。

上六:咸其輔頰舌。

上,陰柔而說體,爲說之主;又居感之極,是其欲感物之極也。故不能以至誠感物, 而發見於口舌之間,小人、女子之常態也,豈能動於人乎?不直云「口」,而云「輔 賴舌」,亦猶今人謂口過曰「唇吻」,曰「頬舌」也。輔頬舌,皆所用以言也。

輔, 音甫。頰, 兼叶反。

象曰:咸其輔頰舌,滕口說也。

唯至誠爲能感人,乃以柔說騰揚於口舌。言說,豈能感於人乎?

# 異 異 恒

《序卦》:「夫婦之道,不可以不久也,故受之以恒。恒,久也。」

咸,夫婦之道;夫婦(註21)終身不(註22)變者也,故咸之後,受之以恒也。

咸,少男在少女之下,以男下女,是男女交感之義。恒,長男在長女之上,男尊女卑,夫婦居室之常道也。論交感之情,則少爲深(註23)切;論尊卑之敘(註24),則長當謹正,故兌艮爲咸,而震巽爲恒也。男在女上,男動于外,女順于內,人理之常,故爲恒也。

又:剛上柔下,雷風相與;巽而動,剛柔相應,皆恒之義也。

恒:亨,无咎;利貞,利 註25,有攸往。

恒者,常久也。恒之道,可以亨通。恒而能亨,乃无咎也;恒而不可以亨,非可恒之道也,爲有咎矣。如君子之恒於善,可恒之道也;小人恒於惡,失可恒之道也。 恒所以能亨,由貞正也,故云「利貞」。

<sup>[</sup>註20] 一作「志」。

<sup>(</sup>註21) 一有「之道」字。

<sup>[</sup>註22] 一有「可」字。

<sup>[</sup>註23] 《四庫》本作「親」。

<sup>[</sup>註24] 《四庫》本作「序」。

<sup>[</sup>註25] 《四庫》本無「利」字。

夫所謂「恒」,謂可常 (註 26) 久之道,非守一隅而不知變也,故利於有往。唯其有往,故能恒也;一定,則不能常矣。又:常久之道,何往不利?

恒, 音常。

## 彖曰:恒,久也。

恒者,常(註27)久之義也。

## 剛上而柔下, 雷風相與; 巽而動, 剛柔皆應, 恒。

卦才有此四者,成恒之義也。

剛上而柔下,謂乾之初,上居於四;坤之初(註28),下居於初:剛爻上而柔爻下也。 二爻易處,則成震巽。震上巽下,亦剛上而柔下也。剛處上而柔居下,乃恒道也。

雷風相與:雷震則風發,二者相須,交助其勢,故云「相與」,乃其常也。

巽而動:下巽順,上震動,爲以巽而動。天地造化,恒久不已者,順動而已。巽而動,常久之道也。動而不順,豈能常也?

剛柔皆應(註29):一卦剛柔之爻皆相應。剛柔相應,理之常也。

此四者,恒之道也,卦所以爲恒也。

# 恒亨、无咎、利貞: 久於其道也。

恒之道,可致亨而无過咎,但所恒宜得其正;失正,則非可恒之道也,故曰「久於其道」。其道,可恒之正道也。不恒其道 [註 30],與恒於不正,皆不能亨,而有咎也。

# 天地之道,恒久而不已也。

天地之所以不已,蓋有恒久之道。人能恒於可恒之道,則合天地之理也。

# 利有攸往,終則有始也。

天下 (註31) 之理,未有不動而能恒者也;動則終而復始,所以恒而不窮。凡天地所

<sup>[</sup>註26] 《四庫》本作「恒」。

<sup>[</sup>註27] 《四庫》本作「長」。

<sup>[</sup>註28] 一作「四」。

<sup>[</sup>註29] 一有「恒」字。

<sup>[</sup>註30] 《四庫》本作「德」。

<sup>[</sup>註31] 一作「地」。

生之物,雖山嶽之堅厚,未有能不變者也;故恒,非「一定」之謂也,一定則不能恒矣。唯隨時變易,乃常道也,故云「利有攸往」。明理之如是,懼人之泥於常也。

日月得天而能久照,四時變化而能久成,聖人久於其道,而天下化成。觀 其所恒,而天地萬物之情可見矣。

此極言常理。

日月,陰陽之精 (註32) 氣耳;唯其順天之道,往來盈縮,故能久照而不已。得天,順天理也。四時,陰陽之氣耳;往來變化,生成萬物,亦以得天,故常久不已。聖人以常久之道,行之有常,而天下化之,以成美俗也。

觀其所恒,謂觀日月之久照、四時之久成、聖人之道所以能常久之理。觀此,則天 地萬物之情理可見矣。天地常久之道,天下常久之理,非知道者,孰能識之?

## 象曰:雷風,恒;君子以立不易方。

君子觀雷風相與,成恒之象,以常久之[註33]德,自立於大中常久之道,不變易其 方所也。

# 初六:浚恒, 貞凶, 无攸利。

初居下,而四爲正應。柔暗之人,能守常而不能度勢。四,震體而陽性,以剛居高,志上而不下;又爲二、三所隔,應初之志,異乎常矣。而初乃求望之深,是知常而不知變也。

浚,深之也。浚恒,謂求恒之深也。守常而不度勢,求望於上之深,堅固守此,凶 之道也。泥常如此,无所往而利矣。

世之責望,故素而至悔咎 [註 34] 者,皆浚恒者也。志既上求之深,是不能恒安其處者也。柔微而不恒安其處,亦致凶之道。

凡卦之初終,淺與深、微與盛之地也。在下而求深,亦不知時矣。

浚, 荀潤反。

象曰:浚恒之凶,始求深也。

<sup>[</sup>註32] 一有「二」字。

<sup>[</sup>註33] 《四庫》本作「其」。

<sup>(</sup>註34) 一作「吝」。

居恒 (註35)之始,而求望於上之深,是知常而不知 (註36) 度勢之甚也,所以凶;陰 暗不得恒之官也。

## 九二:悔亡。

在恒之義,居得其正,則常道也。九,陽爻,居陰位,非常理也。處非其常,本當有悔,而九二以中德而應於五,五復居中,以中而應中,其處與動,皆得中也,是能恒久於中也。能恒久(註37)於中,則不失正矣。中重於正,中則正矣,正不必中也。九二以剛中之德而應於中,德之勝也,足以亡其悔矣。人能識重輕之勢,則可以言《易》矣。

## 象曰:九二悔亡,能久中也。

所以得悔亡者,由其能恒久於中也。人能恒久於中,豈止亡其悔,德之善也。

## 九三:不恒其德,或承之羞,貞吝。

三,陽爻居陽位,處得其位,是其常處也;乃志從於上六,不唯陰陽相應,風復從雷,於恒處而不處,不恒之人也。其德不常(註38),則羞辱或承之矣。或承之,謂有時而至也。

貞吝:固守不恒以爲恒,豈不可羞吝乎?

# 象曰:不恒其德,无所容也。

人既无常(註39),何所容處?當處之地,既不能恒,處非其據,豈能恒哉?是不恒之人,无所容處其身也。

# 九四:田无禽。

以陽居陰,處非其位,處非其所,雖常何益?人之所爲,得其道,則久而成功;不 得其道,則雖久何益?故以田爲喻,言九之居四,雖使恒久,如田獵而无禽獸之獲, 謂徒用力而无功也。

象曰: 久非其位, 安得禽也?

<sup>[</sup>註35] 一作「常」。

<sup>[</sup>註36] 一无「知」字。

<sup>[</sup>註37] 一无「久」字。

<sup>[</sup>註38] 《四庫》本作「恒」。

<sup>[</sup>註39] 《四庫》本作「恒」。

處非其位,雖久,何所得平?以田爲喻,故云「安得禽也」。

## 六五:恒其德,貞。婦人吉,夫子凶。

五應於二,以陰柔而應陽剛;居中,而所應又中,陰柔之正也。故恒久其德,則爲 貞也(註40)。

夫以順從爲恒者,婦人之道;在婦人則爲貞,故吉。若丈夫而以順從於人爲恒,則 失其剛陽之正,乃凶也。

五,君位,而不以君道言者,如六五之義,在丈夫猶凶,況 (註41) 人君之道乎?在它卦,六居君位而應剛,未爲失也;在恒,故不可耳。君道豈可以柔順爲恒也?

## 象曰:婦人貞吉,從一而終也;夫子制義,從婦凶也。

如五之從二,在婦人,則爲正而吉。婦人以從爲正,以順爲德,當終守於從一。夫子則以義制者也,從婦人之道,則爲凶也。

#### 上六:振恒, 凶。


六居恒之極,在震之終。恒極則不常,震終 [註 42] 動極,以陰居上,非其安處。又: 陰柔不能堅固其守,皆不常之義也;故爲「振恒」,以振爲恒也。

振者,動之速也;如振衣,如振書,抖擻連 [註 43] 動之意。在上而其動无節,以此 爲恒,其凶官矣。

振,之刃反。

# 象曰:振恒在上,大无功也。

居上之道,必有恒德,乃能有功。若躁動不常,豈能有(註44)所成乎?居上而不恒, 其凶甚矣。《象》又言其不能有所成立,故曰「大无功也」。



<sup>[</sup>註40] 一「則」字在「其」字上。

<sup>[</sup>註41] 一作「豈」。

<sup>[</sup>註42] 《四庫》本「終」後有「則」字。

<sup>[</sup>註43] 《四庫》本作「運」。

<sup>[</sup>註44] 底本作「在」, 費解。《四庫》本作「有」。《註評》本引《吉澄》本、《武英殿》本亦作「有」。「有」、「在」形近而譌,今據《四庫》本、《註評》本更正。

《序卦》:「恒者,久也。物不可以久居其所,故受之以遯。遯者,退也。」

夫久則有去,相須之理也,遯所以**繼**恒也。遯,退也、避也,去之之謂也。爲卦天下有山。

天,在上之物;陽性,上進。山,高起之物;形雖高起,體乃止物。有上陵之象, 而止不進,天乃上進而去之;下陵而上去,是相違遯,故爲遯去之義。

二陰生於下,陰長將盛,陽消而退;小人漸盛,君子退而避之(註45),故爲遯也。

## 遯:亨,小利貞。

遯者,陰長陽消,君子遯藏之時也。君子退藏以伸其道,道不屈則爲亨,故遯所以 有亨也。在事,亦有由遯避而亨者。雖小人道長之時,君子知幾退避,固善也;然 事有不齊,與時消息,无必同也。陰柔方長,而未至於甚盛,君子尚有遲遲致力之 道,不可大貞,而尚利小貞也。

遯,徒困反。

## 彖曰: 遯亨, 遯而亨也。

小人道長之時, 君子遯退, 乃其道之亨也。君子遯藏, 所以伸道也。此言處遯之道。 自「剛當位而應」以下, 則論時與卦才, 尚有可爲之理也。

# 剛當位而應,與時行也。

雖遯之時,君子處之,未有必遯之義。五以剛陽之德,處中正之位,又下與六二以中正相應,雖陰長之時,如卦之才,尚當隨時消息,苟可以致其力,无不至誠自盡,以扶持其道,未必於遯(註46)藏而不爲,故曰「與時行也」。

# 小利貞,浸而長也。遯之時義大矣哉!

當陰長之時,不可大貞,而尚小利貞者,蓋陰長必以浸漸,未能遽盛,君子尚可小貞其道;所謂「小利貞」,扶持使未遂亡也。

遯者,陰之始長;君子知微,故當深戒。而聖人之意,未便 (註47) 遂已也,故有「與時行」、「小利貞」之教。

<sup>[</sup>註45]一作「避而去之」。

<sup>[</sup>註46] 一作「退」。

<sup>〔</sup>註47〕一作「使」。

聖賢之於天下,雖知道之將廢,豈肯坐視其亂而不救?必區區致力於未極之間,強此之衰,艱彼之進,圖其暫安。苟得爲之,孔、孟之所屑爲也;王允、謝安之於漢、晉是也。若有可變之道、可亨之理,更不假言也。此處遯時之道也。故聖人贊其時義大矣哉!或久、或速,其義皆大也。

浸, 乎爲反。長, 下丈反。

## 象曰:天下有山,遯;君子以遠小人,不惡而嚴。

天下有山,山下 (註48) 起而乃止,天上進而相違,是遯避之象也。君子觀其象,以避遠乎小人。遠小人之道,若以惡聲厲色,適足以致其怨忿。唯在乎矜莊威嚴,使知敬畏,則自然遠矣。

## 初六: 遯尾, 厲, 勿用有攸往。

它卦,以下爲初。遯者,往遯也。在前者先進,故初乃爲尾。尾,在後之物也。遯 而在後,不及者也,是以危也。初以柔處微,既已後矣,不可往也;往則危矣。微 者,易於晦藏;往既可(註49)危,不若不往之无災也。

# 象曰: 遯尾之厲, 不往, 何災也?

見幾先**遯**,固爲善也。**遯**而爲尾,危之道也。往既有危,不若不往,而晦藏可免於 災,處微故也。占人處微下,隱亂世而不去者,多矣。

# 六二:執之用 [註 50] 黃牛之革,莫之勝說。

二與五爲正應,雖在相違遯之時,二以中正順應於五,五以中正親合於二,其交自固。 黃,中色。牛,順物。革,堅固之物。二、五以中正順道相與,其固如執繫之以牛 革也。

莫之勝說,謂其交之固,不可勝言也。在遯之時,故極言之。

勝,升證反;又音升。說,如字。

# 象曰:執用黃牛,固志也。

上下以中順之道相固結,其心志甚(註51)堅,如執之以牛革也。

<sup>[</sup>註48] 一作「上」。

<sup>[</sup>註49] 《四庫》本作「有」。

<sup>[</sup>註50] 《四庫》本無「用」字。

<sup>(</sup>註51) 一作「其」。

九三:係遯,有疾,厲。畜臣妾,吉。

陽志說陰,三與二切比,係乎二者也。遯貴速而遠,有所係累,則安能速且遠也? 害於遯矣,故爲有疾也。遯而不速,是以危也。

臣妾、小人、女子,懷恩而不知義;親愛之,則忠其上。係戀之私恩,乃(註52)小人、女子之道也;故以畜養臣妾,則得其心爲吉也。然君子之待小人,亦不如是也。 三與二非正應,以暱比相親,非待君子之道。若以正,則雖係,不得爲有疾;蜀先 上之不忍棄上民是也。雖危,爲无咎矣。

## 象曰:係遯之厲,有疾憊也;畜臣妾吉,不可大事也。

遯而有係累,必以困憊致危;其有疾,乃憊也,蓋力亦不足矣。以此暱愛之心,畜 養臣妾則吉,豈可以當大事乎?

## 九四:好遯,君子吉,小人否。

四與初爲正應,是所好愛者也。君子雖有所好愛,義苟當遯,則去而不疑;所謂克己復禮,以道制欲,是以吉也。小人則不能以義處,暱於所好,牽於所私,至於陷辱其身而不能已,故在小人則否也。否,不善也。

四、乾體、能剛斷者;聖人以其處陰而有係、故設小人之戒、恐其失於正也。

# 象曰: 君子好遯, 小人否也。

君子雖有好而能**遯**,不失於義。小人則不能勝其私意,而至於不善也。 否,俯九反。

# 九五:嘉遯,貞吉。

九五中正,遯之嘉美者也。處得中正之道,時止時行,乃所謂嘉美也,故爲貞正而 吉。九五非无係應,然與二皆以中正自處,是其心志及乎動止,莫非中正,而无私 係之失,所以爲嘉也。

在《彖》,則概言遯時,故云「與時行,小利貞」,尚有濟遯之意。於爻至五,遯將極矣,故唯以中正處遯言之。遯 [註 53] ,非人君之事,故不主君位言;然人君之所避遠,乃遯也,亦在中正而已。

<sup>[</sup>註52] 《四庫》本作「懷」。

<sup>[</sup>註53] 一无「遯」字。

象曰:嘉遯貞吉,以正志也。

志正,則動必由正,所以爲遯之嘉也。居中得正,而應中正,是其志正也,所以爲 吉。人之遯也、止也,唯在正其志而已矣!

## 上九:肥遯,无不利。

肥者,充大寬裕之意。遯者,唯飄然遠逝,无所係滯之爲善。上九乾體剛斷,在卦之外矣;又下无所係,是遯之遠而无累,可謂寬綽有餘裕也。遯者,窮困之時也, 善處則爲肥矣。其遯如此,何所不利?

象曰:肥遯,无不利,无所疑也。

其遯之遠,无所疑滯也。蓋在外則已遠,无應則无累,故爲剛決无疑也。

# 整下 震上 大壯

《序卦》:「遯者,退也。物不可以終遯,故受之以大壯。」

遯爲違去之義,壯爲進盛之義。遯者,陰長而陽遯也。大壯,陽之壯盛也。衰則必盛,消息(註 54)相須,故既遯則必壯,大壯所以次遯也。爲卦震上乾下。

乾剛而震動,以剛而動,大壯之義也。剛陽大也,陽長已過中矣。大者,壯盛也。 又:雷之威震而在天上,亦大壯之義也。

大壯:利貞。

大壯之道,利於貞正也。大壯而不得其正,強猛之爲耳,非君子之道壯盛也。

彖曰:大壯,大者壯也。剛以動,故壯。

所以名「大壯」者,謂大者壯也。陰爲小,陽爲大;陽長已 [註 55] 盛,是大者壯也。 下剛而上動,以乾之至剛而動,故爲大壯,爲大者壯,與壯之大也。

大壯利貞,大者正也;正大,而天地之情可見矣。

大者既壯,則利於貞正。正而大者,道也。極正大之理,則天地之情可見矣。

天地之道,常久而不已者,至大至正也。正大之理,學者默識心通可也。不云「大

<sup>[</sup>註54] 一作「長」。

<sup>[</sup>註55] 《四庫》本作「以」。

正」,而云「正大」,恐疑爲一事也。

## 象曰:雷在天上,大壯;君子以非禮弗履。

雷震於天上,大而壯也。君子觀大壯之象,以行其壯。君子之大壯者,莫若克己復禮。占人云:「自勝之謂強。」《中庸》於「和而不流」、「中立而不倚」,皆曰「強哉矯」。赴湯火,蹈白刃,武夫之勇可能也;至於克己復禮,則非君子之大壯不可能也,故云「君子以非禮弗履」。

## 初九:壯干趾,征凶,有孚。

初,陽剛乾體而處下,壯于進者也。在下而用壯,壯于趾也。趾,在下而進動之物。 九在下,用壯而不得其中。

夫以剛處壯,雖居上猶不可行,況在下乎?故征,則其凶有孚。孚,信也;謂以壯往,則得凶可必也。

## 象曰:壯于趾,其孚窮也。

在最下而用壯以行,可必信其窮困而凶也。

# 九二:貞吉。

二雖以陽剛當大壯之時,然居柔而處中,是剛柔得中,不過於壯,得貞正而吉也。

或曰:「貞,非以九居二爲戒乎?」曰:「《易》取所勝爲義。以陽剛健體,當大壯之時,處得中道,无不正也。在四,則有不正之戒。人能識時義之輕重,則可以學《易》矣。」

# 象曰:九二貞吉,以中也。

所以貞正而吉者,以其得中道也。中則不失正,況陽剛(註56)而乾體乎?

# 九三:小人用壯,君子用罔,貞厲。羝羊觸藩,羸其角。

九三以剛居陽而處壯,又當乾體之終,壯之極者也。極壯如此,在小人則爲用壯, 在君子則爲用罔。小人尚力,故用其壯勇;君子志剛,故用罔。

罔,无也,猶云「蔑也」。以其至剛,蔑視於事,而无所忌憚也。

君子、小人,以地言,如君子有勇而无義爲亂。剛柔得中,則不折不屈,施於天下

<sup>[</sup>註56] 一有「壯」字。

而无不宜。苟剛之大過,則无和順之德,多傷莫與,貞固守此,則危道也。

凡物莫不用其壯:齒者齧,角者觸,蹄者踶。羊壯於首,羝爲喜觸,故取爲象。羊 喜觸藩籬,以藩籬當其前也。蓋所當必觸,喜用壯如此,必羸困其角矣。猶人尚剛 壯,所當必用,必至摧困也。

三, 肚甚, 如此而不至凶, 何也? 曰: 「如三之爲, 其往足以致凶; 而方言其危, 故未及於凶也。凡可以致凶而未至者, 則曰『厲』也。」

羝, 音低。藩, 方袁反。羸, 力追反; 又律悲反。

## 象曰:小人用壯,君子罔也。

在小人,則爲用其強壯之力;在君子,則爲用罔。志氣剛強,蔑視於事,靡所顧憚也。

## 九四:貞吉,悔亡。藩決不贏,壯干大輿之輹。

四,陽剛長盛,壯已過中,壯之甚也;然居四爲不正,方君子道長之時,豈可有不正也?故戒以貞,則吉而悔亡。

蓋方道長之時,小失則害亨進之勢,是有悔也。若在它卦,重剛而居柔,未必不爲 善也,大過是也。藩,所以限隔也。藩籬決開,不復羸困其壯也。

高大之車,輪輹強壯,其行之利可知,故云「壯于大輿之輹」。輹,輪之要處也。車之敗,常在折輹,輹壯則車強矣。云「壯干輹」,謂壯於進也。

輹,與輻同;並方六反。

# 象曰:藩決不贏,尚往也。

剛陽之長,必至於極;四雖已盛,然其往未止也。以正(註57)盛之陽,用壯而進,故莫有當之;藩決開而不羸困其力也。尚往,其進不已也。

# 六五:喪羊于易,无悔。

羊群行而喜觸,以象諸陽並進。四陽方長而並進,五以柔居上,若以力制,則難勝而有悔;唯和易以待之,則群陽无所用其剛,是喪其壯于和易也。如此,則可以无悔。五,以位言則正,以德言則中,故能用和易之道,使群陽雖壯,无所用也。

喪、易,並去聲。

<sup>[</sup>註57] 《四庫》本作「至」。

## 象曰:喪羊于易,位不當也。

所以必用柔和者,以陰柔居尊位故也。若以陽剛中正得(註58)尊位,則下无壯矣。 以六五位不當也,故設喪羊 F易之義。然大率治壯不可用剛。夫君臣上下之勢,不 相侔也。苟君之權足以制乎下,則雖有強壯跋扈之人,不足謂之壯也。必人君之勢 有所不足,然後謂之治壯;故治壯之道,不可以剛也。

## 上六:羝羊觸藩,不能退,不能遂;无攸利,艱則吉。

羝羊但取其用 (註59) 壯,故陰爻亦稱之。六以陰處震終,而當壯極,其過可知。如 羝羊之觸藩籬,進則礙身,退則妨角,進退皆不可也。才本陰柔,故不能勝己以就 義,是不能退也。陰柔之人,雖極用壯之心,然必不能終其壯;有摧必縮,是不能 遂也。其所爲如此,无所往而利也。陰柔處壯,不能固其守,若遇艱困,必失其壯; 失其壯,則反得 (註60) 柔弱之分矣,是艱則得占也。用壯則不利,知艱而處柔則吉 也。居壯之終,有變之義也。

象曰:不能退,不能遂,不詳也;艱則吉,咎不長也。

非其處而處,故進退不能,是其自處之不詳愼也。

艱則占:柔遇艱難,又居壯終,自當變矣;變則得其分,過咎不長,乃占也。

# 坤下 離上 晉

《序卦》:「物不可以終壯,故受之以晉。晉者,進也。」

物无壯而終止之理,既盛壯則必進,晉所以繼大壯也。爲卦離在坤上,明出地上也。 日出於地,升而益明,故爲晉。晉,進而光明盛大之意 (註61) 也。凡物漸盛爲進,故《彖》云:「晉,進也。」

卦有有德者,有无德者,隨其宜也。乾、坤之外,云「元亨」者,固有也;云「利 貞」者,所不足而可以有功也。有不同者,革、漸是也,隨卦可見。晉之盛而无德 者,无用者(註62)也。晉之明盛,故更不言亨。順乎大明,无用戒正也。

<sup>[</sup>註58] 一作「居」。

<sup>[</sup>註59] 一无「用」字。

<sup>[</sup>註60] 一有「其」字。

<sup>[</sup>註61] 一作「義」。

<sup>[</sup>註62] 《四庫》本作「有」。

## 晉:康侯用錫馬蕃庶,晝日三接。

晉爲進盛之時,大明在上,而下體順附,諸侯承王之象也,故爲康侯。康侯者,治安之侯也。上之大明,而能同德,以順附治安之侯也;故受其寵數,錫之馬眾多也。

車、馬,重賜也。蕃庶,眾多也。不唯錫與之厚,又見親禮,晝日之中,至於三接, 言寵遇之至也。晉,進盛之時,上明下順,君臣相得。在上而言,則進於明盛;在 臣而言,則進升高顯,受其光寵也。

# 彖曰:晉,進也。明出地上,順而麗乎大明,柔進而上行,是以康侯用錫 馬蕃庶,書日三接也。

晉,進也,明進而盛也。明出於地,益進而盛,故爲晉。所以不謂之「進」者,進 爲前進,不能包明盛之義。

明出地上:離在坤上也。坤麗於離,以順麗於大明;順德之臣,上附於大明之君也。

柔進於 (註 63) 上行:凡卦,離在上者,柔居君位,多云「柔進而上行」。噬嗑、睽、鼎是也。六五以柔居君位,明而順麗,爲能待下寵遇親密之義,是以爲「康侯用錫 馬蕃庶,書日三接」也。

大明之君,安天下者也;諸侯能順附天子之明德,是康民安國之侯也,故謂之「康侯」。是以享寵錫而見親禮,書日之間,王接見於天子也。

不曰「公卿」而曰「侯」: 天子治於上者也,諸侯治於下者也; 在下而順附於大明之君,諸侯之象也。

# 象曰:明出地上,晉;君子以自昭明德。

昭,明之也。《傳》曰:「昭德塞違……昭其度也。」君子觀明出地上,而益明盛之象,而以自昭其明德。去蔽致知,昭明德於己也。明明德於天下,昭明德於外也。明明德在己,故云「自昭」。

# 初六:晉如,摧如,貞吉。罔孚,裕,无咎。

初居晉之下,進之始也。晉如,升進也。摧如,抑退也。於始進而言,遂其進、不 遂其進,唯得正則吉也。

罔孚者,在下而始進,豈遽能深見信於上?苟上未見信,則當安中自守,雍容寬裕,

<sup>[</sup>註63] 《四庫》本作「而」。

无急於求上之信也。苟欲信之心切,非汲汲以失其守,則悻悻以傷於義矣,皆有咎也;故裕則无咎,君子處進退之道也。

摧,罪雷反。

## 象曰:晉如摧如,獨行正也;裕,无咎,未受命也。

无進无抑,唯獨行正道也。寬裕則无咎者,始欲進而未當位故也。君子之於進退, 或遲或速,唯義所當,未嘗不裕也。聖人恐後之人不達寬裕之義,居位者,廢職失 守以爲裕,故特云「初六裕則无咎」者,始進,未受命當職任故也。若有官守,不 信於上而失其職,一日不可居也。然事非一概,久速唯時,亦容有爲之兆者。

## 六二:晉如,愁如,貞吉。受茲介福,于其王母。

六二在下,上无應援,以中正柔和 (註 64) 之德,非強於進者也,故於進爲可憂愁, 謂其進之難也。然守其貞正,則當得吉,故云「晉如,愁如,貞吉」。

王母,祖母也,謂陰之至尊者,指六五也。二以中正之道自守,雖上无應援,不能 自進,然其中正之德,久而必彰,上之人自當求之。蓋六五大明之君,與之同德, 必當求之,加之寵祿,受介福於王母也。介,大也。

# 象曰:受茲介福,以中正也。

受茲介福,以中正之道也。人能守中正之道,久而必亨;況大明在上而同德,必受 大福也。

# 六三:眾允,悔亡。

以六居三,不得中正,宜有悔咎(註65)。而三在順體之上,順之極者也。三陰皆順上者也,是三之順上,與眾志同,眾所允從,其悔所以亡也。有順上向明之志,而眾允從之,何所不利?

或曰:「不由中正,而與眾同,得爲善乎?」曰:「眾所允者,必至當也;況順上之 大明,豈有不善也?是以悔亡,蓋亡其不中正之失矣。古人曰:『謀從眾,則合天心。』」

# 象曰:眾允之志,上行也。

上行,上順麗於大明也。上從大明之君,眾志之所同也。

<sup>[</sup>註64] 一作「順」。

<sup>[</sup>註65] 一作「吝」。

## 九四:晉如鼫鼠,貞厲。

以九居四,非其位也;非其位而居之,貪據其位者也。貪處高位,既非所安,而又 與上同德,順麗於上。

三陰皆在己下,勢必上進,故其心畏忌之。貪而畏人者,鼫鼠也,故云「晉如鼫鼠」。 貪於非據,而存畏忌之心,貞固守此,其危可知。言貞厲者,開有改之道也。

## 象曰:鼫鼠貞厲,位不當也。

賢者以正德,宜在高位;不正而處高位,則爲非據。貪而懼失則畏人,固處其地, 危可知也。

## 六五:悔亡,失得勿恤;往吉,无不利。

六以柔居尊位,本當有悔;以大明而下皆順附,故其悔得亡也。下既同德順附,當 推誠委任,盡眾人之才,通天下之志,勿復自任其明,恤其失得。如此而往,則吉 而无不利也。

六丘,大明之主,不患其不能明照,患其用明之過,至於察察,失委任之道,故 戒以「失得勿恤」也。夫私意偏任,不察則有蔽;盡天下之公,豈當(註66)復用 (註67)私察也?

# 象曰:失得勿恤,往有慶也。

以大明之德,得下之附,推誠委任,則可以成天下之大功,是往而有福慶也。

# 上九:晉其角,維 註681伐邑。厲吉,无咎,貞吝。

角,剛而居上之物。上九以剛居卦之極,故取角爲象,以陽居上剛之極也;在晉之上,進之極也。剛極則有強猛之過,進極則有躁急之失。以剛而極於進,失中之甚也。无所用而可,維獨用於伐邑,則雖厲而吉,且无咎也。

伐四方者,治外也;伐其居邑者,治内也。言伐邑,謂內自治也。人之自治,剛極 則守道愈固,進極則遷善愈速。如上九者,以之自治,則雖傷於厲,而吉且无咎也。

嚴厲,非安和之道,而於自治則有功也。復云「貞吝」,以盡其義。極於剛進,雖自治有功,然非中和之德,故於貞正之道爲可吝也。不失中正爲貞。

<sup>[</sup>註66] 一作「得」。

<sup>[</sup>註67] 一有「其」字。

<sup>[</sup>註68] 《四庫》本有「用」字。

## 象曰:維用伐邑,道未光也。

維用伐邑,既得吉而无咎,復云「貞吝」者,其(註69)道未光大也。以正理言之, 猶可吝也。夫道既光大,則无不中正,安有過也?今以過剛自治,雖有功矣(註70), 然其道未光大,故亦可吝。聖人言盡善之道。

# 離下 崩夷 明夷

《序卦》:「晉者,進也。進必有所傷,故受之以明夷。夷者,傷也。」

夫進之 (註71) 不已,必有所傷,理自然也,明夷所以次晉也。爲卦坤上離下,明入 地中也。

反晉成明夷,故義與晉正相反。晉者,明盛之卦;明君在上,群賢並進之時也。明夷, 昏暗之卦;暗君在上,明者見傷之時也。日入於地中,明傷而昏暗也,故爲明夷。

## 明夷:利艱貞。

君子當明夷之時,利在知艱難而不失其貞正也。在昏暗艱難之時,而能不失其正, 所以爲明(註72)君子也。

彖曰:明入地中,明夷。內文明而外柔順,以蒙大難,文王以之。

明入於地,其明滅也,故爲明夷。內卦離,離者,文明之象;外卦坤,坤者,柔順之象。爲人,內有文明之德,而外能柔順也。昔者,文王如是,故曰「文王以之」。

當紂之昏暗,乃明夷之時;而文王內有文明之德,外柔順以事紂,蒙犯大難,而內不失其明聖,而外足以遠禍患(註73)。此文王所用之道也,故曰「文王以之」。

難,乃日反;下同。

# 利艱貞,晦其明也。內難而能正其志,箕子以之。

明夷之時,利於處艱戹而不失其貞正,謂能晦藏其明也。不晦其明,則被禍患;

<sup>(</sup>註69) 《四庫》本作「貞」。

<sup>(</sup>註70) 底本作「失」, 費解, 疑爲形譌。《四庫》本作「矣」, 從《四庫》本更正。

<sup>[</sup>註71] 一作「而」。

<sup>[</sup>註72] 一有「爲」字。

<sup>[</sup>註73] 一作「害」。

不守其正,則非賢明。箕子當紂之時,身處其國內,切近於 (註 74) 難,故云「內難」。然箕子能 (註 75) 藏晦其明,而自守其正志;箕子所用之道也,故曰「箕子以之」。

象曰:明入地中,明夷;君子以莅眾,用晦而明。

明所以照,君子无所不照;然用明之過,則易 (註 76) 於察,太察則盡事,而无含弘 之度。故君子觀明入地中之象,於蒞眾也,不極其明察而用晦,然後能容物和眾,眾親而安。是用晦,乃所以爲明也。若自任其明,无所不察,則己不勝其忿疾,而 无寬厚含容 (註 77) 之德,人情睽疑而不安,失莅眾之道,適所以爲不明也。古之聖 人,設前旒屛樹者,不欲明之,盡乎隱也。

初九:明夷于飛,垂其翼。君子于行,三日不食。有攸往,主人有言。 初九,明體,而居明夷之初,見傷之始也。

九,陽明上升者也,故取飛象。昏暗在上,傷陽之明,使不得上進,是于飛而傷其 翼也。翼見傷,故垂朵(註78)。凡小人之害君子,害其所以行者。

君子于行,三日不食:君子明照,見事之微,雖始有見傷之端,未顯也,君子則能 見之矣,故行去避之。君子于行,謂去其祿位而退藏也。三日不食,言困窮之極也。

事未顯而處甚艱,非見幾之明不能也。夫知幾者,君子之獨見,非眾人所能識也。故明夷之始,其見傷未顯而去之,則世俗孰不疑怪?故有所往適,則主人有言也。然君子不以世俗之見怪,而遲疑其行也。若俟眾人盡識,則傷已及,而不能去矣;此薛方所以爲明,而揚雄所以不獲其去也。

或曰:「傷至於垂翼,傷已明矣,何得眾人猶未識也?」曰:「初,傷之始也。云『垂 其翼』,謂傷其所以飛爾,其事則未顯也。君子見幾,故亟去之,世俗之人,未能見 也(註79),故異而非之。如穆生之去楚,申公、白公且非之,況世俗之人乎?但譏 其責小禮,而不知穆生之去,避胥靡之禍也。當其言曰:『不去,楚人將鉗我於市。』 雖二儒者亦以爲過甚之言也。

<sup>[</sup>註74] 《四庫》本作「其」。

<sup>[</sup>註75] 一无「能」字。

<sup>〔</sup>註76〕《四庫》本作「傷」。

<sup>[</sup>註77] 一作「弘」。

<sup>[</sup>註78] 《四庫》本作「大」,則與下句連讀。

<sup>(</sup>註79)《四庫》本無「也」字。

「又如袁閎,於黨事未起之前,名德之士方鋒起,而獨潛身士室,故人以爲狂生, 卒免黨錮之禍。所往而人有言,胡(註80)足怪也?」

# 象曰:君子于行,義不食也。

君子遯藏而困窮,義當然也。唯義之當然,故安處而无悶,雖不食可也。

## 六二:明夷,夷于左股。用拯馬壯,吉。

六二以至明之才,得中正而體順,順時自處,處之至善也。雖君子自處之善,然當 陰闇小人傷明之時,亦不免爲其所傷;但君子自處有道,故不能深相傷害,終能違 避之爾。

足者,所以行也。股在脛足之上,於行之用,爲不甚切,左又非便用者。手足之用,以右爲便,唯蹶張用左。蓋右立爲本也,夷于左股,謂傷害其行而不甚切也。雖然,亦必自免有道,拯用(註81) 壯健之馬,則獲免之速而吉也。

君子爲陰闇所傷,其自處有道,故其傷不甚。自拯有道,故獲免之疾,用拯之道不 壯,則被傷深矣,故云「馬壯則吉」也。

二以明居陰闇之下,所謂「吉」者,得免傷害而已,非謂可以有爲於斯時也。

# 象曰:六二之吉,順以則也。

六二之得吉者,以其順處而有法則也。則,謂中正之道。能順而得中正,所以處明 傷之時,而能保其吉也。

# 九三:明夷于南狩,得其大首,不可疾貞。

九三,離之上,明之極也,又處剛而進。上六,坤之上,暗之極也。至明居下,而 爲下之上;至暗在上,而處窮極之地:正相敵應,將以明去暗者也。斯義也,其湯、 武之事乎?

南,在前而明方也;狩,畋而去害之事也。南狩,謂前進而除害也,當克獲其大首。 大首,謂暗之魁首,上六也。三與上正相應,爲至明克至暗之象。

不可疾貞,謂誅其元惡。舊染污俗,未能遽革,必有其漸。革之遽,則駭懼而不安,故《酒誥》云:「惟殷之迪,諸臣惟(註82)工,乃湎于酒,勿庸殺之。姑惟教之。」

<sup>[</sup>註80] 據《導讀》本,《周易折中》作「何」。

<sup>[</sup>註81] 一作「其」。

<sup>[</sup>註82] 《二程集》:「惟」當作「百」。

至於既久,尚曰「餘風未殄」。是漸漬 (註 83) 之俗,不可以遽革也,故曰「不可疾 貞」,正之不可急也。

上六雖非君位,以其居上而暗之極,故爲暗之主,謂之大首。

## 象曰:南狩之志,乃大得也。

夫以下之明,除上之暗,其志在去害而已;如商、周之湯、武,豈有意於利天下乎? 得其大首,是能去害,而大得其志矣。志苟不然,乃悖亂之事也。

## 六四:入于左腹,獲明夷之心,出于門庭。

六四以陰居陰,而在陰柔之體,處近君之位,是陰邪小人居高位,以柔邪順於君者也。六五,明夷之君位,傷明之主也。四以柔邪順從之,以固其交。夫小人之事君, 未有由顯明以道合者也,必以隱僻之道,自結於上。

右當用,故爲明顯之所;左不當用,故爲隱僻之所。人之手足,皆以右爲用。世謂僻所爲僻左,是左者,隱僻之所也。四由 (註 84) 隱僻之道,深入其君,故云「人于左腹」。入腹,謂其交深也。其交之深,故得其心。凡姦邪之見信於其君,皆由奪其心也。不奪其心,能无悟乎?

于出 (註 85) 門庭:既信之於 (註 86) 心 (註 87) ,而後行之於外也。邪臣之事暗君,必 先蟲其心,而後能行於外。

# 象曰:入于左腹,獲心意也。

入于左腹,謂以邪僻之道入於君,而得其心意也。得其心,所以終不悟也。

# 六五:箕子之明夷,利貞。

五爲君位,乃常也。然《易》之取義,變動隨時。上六處坤之上,而明夷之極,陰暗傷明之極者也。五切近之,聖人因以五爲切近至暗之人,以見處之之義,故不專以君位(計88)言。

上六陰暗,傷明之極,故以爲明夷之主。五切近傷明之主,若顯其明,則見傷害必

<sup>[</sup>註83] 《四庫》本作「潰」。

<sup>[</sup>註84] 一有「是」字。

<sup>[</sup>註85] 一作「出于」。

<sup>[</sup>註86] 《四庫》本無「於」字。

<sup>[</sup>註87] 一作「既奪其心」。

<sup>[</sup>註88] 一作「義」。

矣;故當如箕子之自晦藏,則可以 (註 89) 免於難。箕子,商之舊臣,而同姓之親,可謂切近於紂矣。若不自晦其明,被禍可必也;故佯狂爲奴,以免於害。雖晦藏其明,而內守其正,所謂內難而能正其志,所以謂之仁與明也,若箕子,可謂貞矣。以五陰柔,故爲之戒云「利貞」,謂宜如箕子之貞固也。若以君道言,義亦如是。人君有當含晦之時,亦外晦其明,而內正其志也。

## 象曰:箕子之貞,明不可息也。

箕子晦藏,不失其貞固,雖遭患難,其明自存,不可滅息也。若逼禍患,遂失其所 守,則是亡其明,乃滅息也;古之人,如揚雄者是也。

## 上六:不明晦,初登于天,後入于地。

上居卦之終,爲明夷 [註90] 之主,又爲明夷之極。上,至高之地,明在至高,本當遠照,明既夷傷,故不明而反昏晦也。本居於高,明當及遠,初登于天也;乃夷傷其明而昏暗,後入于地也。上,明夷之終,又坤陰之終,明傷之極者也。

## 象曰:初登于天,照四國也;後入于地,失則也。

初登于天,居高而明,則當照及四方也。乃被傷而昏暗,是後入于地,失明之道也。 失則,失其道也。

# 離下 家人

《序卦》:「夷者,傷也。傷於外者,必反於 [註91] 家,故受之以家人。」

夫傷困於外,則必反於內,家人所以次明夷也。家人者,家內之道。父子之親,夫婦之義,尊卑長幼之序;正倫理,篤恩義,家人之道也。

卦外巽內離,爲風自火出。火熾,則風生(註92)自火,自內而出也。自內而出,由家而(註93)及於外之象也(註94)。

<sup>[</sup>註89] 一无「以」字。

<sup>[</sup>註90] 一作「夷明」。

<sup>[</sup>註91] 《二程集》作「其」。

<sup>[</sup>註92] 《四庫》本「風生」二字重複出現:則其斷句爲:「火熾則風生,風生自火。」

<sup>[</sup>註93] 一无「而」字。

<sup>[</sup>註94] 《四庫》本無「也」字。

二與五,正男女之位於內外,爲家人之道。明於內而巽於外,處家之道也。

夫人有諸身者,則能施於家;行於家者,則能施於國,至於天下治。治天下之道, 蓋治家之道也,推而行之於外耳;故取自內而出之象,爲家人之義也。

《文中子》書以明內齊外爲義,占今善之,非取象之意也。所謂齊乎異,言萬物潔 齊於巽方,非巽有齊義也;如戰乎乾,乾非有戰義也。

## 家人:利女貞。

家人之道,利在女正;女正,則家道正矣。夫夫婦婦而家道正,獨云「利女貞」者: 夫正者,身正也;女正者,家正也。女正,則男正可知矣。

彖曰:家人,女正位乎內,男正位乎外。男女正,天地之大義也。

《彖》以卦才而言。陽居五,在外也;陰居二,處內也,男女各得其正位也。尊卑、 內外之道正,合天地、陰陽之大義也。

# 家人有嚴君焉,父母之謂也。

家人 [註95] 之道,必有所尊,嚴而君長者,謂父母也。雖一家之小,无尊嚴則孝敬 衰,无君長則法度廢。有嚴君而後家道正;家者,國之則也。

**父父、子子、兄兄、弟弟、夫夫、婦婦**,而家道正;正家而天下定矣。 父子、兄弟、夫婦,各得其道,則家道正矣。推一家之道,可以及天下,故家正則 天下定矣。

象曰:風自火出,家人;君子以言有物而行有恒。

正家之本,在正其身。身正之道,一言一動,不可易也。君子觀風自火出之象,知事之由內而出,故所言必有物,所行必有恒也。

物,謂事實;恒,謂常度、法則也。德業之著於外,由言行之謹於內也。言慎行脩, 則身正而家治矣。

# 初九:閑有家。悔亡。

初,家道之始也。閑,謂防閑法度也。治其有家之始,能以法度爲之防閑,則不至 於悔矣。

<sup>[</sup>註95] 一无「人」字。

治家者,治乎眾人也。苟不閑之以法度,則人情流放,必至於有悔;失長幼之序, 亂男女之別;傷恩義,害倫理,无所不至。能以法度閑之於始,則无是矣,故悔 亡也。

九,剛明之才,能閑其家者也。不云「无悔」者,群居必有悔,以能閑,故亡耳。

## 象曰:閑有家,志未變也。

閑之於始,家人志意未變動之前也。正志未流散變動而閑之,則不傷恩、不失義, 處家之善也,是以悔亡。志變而後治,則所傷多矣,乃有悔也。

## 六二: 无攸遂, 在中饋, 貞吉。

人之處家,在骨肉父子之間,大率以情勝禮(註96),以恩奪義。唯剛立之人,則能不以私愛失其正理;故家人卦,大要以剛爲善,初、三、上是也。

六二以陰柔之才而居柔,不能治於家者也,故无攸遂,无所爲而可也。夫以英雄之才,尚有溺情愛而不能自守者,況柔弱之人,其能勝妻子之情乎?如二之才,若爲婦人之道,則其正也。以柔順處中正,婦人之道也;故在中饋,則得其正而吉也。婦人,居中而主饋者也,故云「中饋」。

饋,巨愧反。

# 象曰:六二之吉,順以巽也。

二以陰柔居中正,能順從而卑異者也,故爲婦人之貞吉也。

# 九三:家人嗃嗃,悔厲吉。婦子嘻嘻,終吝。

嗝嗝,未詳字義;然以文義 [註97] 及音意 [註98] 觀之,與嗷嗷相類。又若 [註99] 急束 [註100] 之意。

九三在內卦之上, 上治乎內者也。以陽居剛而不中, 雖得正, 而過乎剛者也。治內 過剛, 則傷於嚴急, 故家人嗃嗃然。治家過嚴, 不能无傷, 故必悔於嚴厲。骨肉恩 勝, 嚴過, 故悔也。

<sup>[</sup>註96] 《四庫》本作「理」。

<sup>[</sup>註97] 《二程集》作「意」。

<sup>[</sup>註98] 《二程集》作「義」。

<sup>[</sup>註99] 一作「人苦」。

<sup>[</sup>註100] 一作「速」。

雖悔於嚴厲,未得寬猛之中;然而家道齊肅,人心祇畏,猶爲家之吉也。若婦子嘻嘻,則終至羞吝矣。

在卦,非有嘻嘻之象;蓋對嗃嗃而言,謂與其失於放肆,寧過於嚴也。嘻嘻,笑樂 无節也。自恣无節,則終至敗家,可羞吝也。

蓋嚴謹之過,雖於人情不能无傷;然苟法度立,倫理正,乃恩義之所存也。若嘻嘻 无度,乃法度之所由廢,倫理之所由亂,安能保其家乎?嘻嘻之甚,則致敗家之凶。 但云「吝」者,可吝之甚,則至于凶,故未遽言凶也。

**嗃,呼洛反。嘻,喜悲反。** 

象曰:家人嗃嗃,未失也;婦子嘻嘻,失家節也。

雖嗃嗃、於治家之道、未爲甚失;若婦子嘻嘻、是无禮法、失家之節、家必亂矣。

六四:富家 (註101)。大吉。

六以巽順之體而居四,得其正位。居得其正,爲安處之義。巽順於事,而由正道,能保有(註102)其富者也。居家之道,能保有(註103)其富,則爲大吉也。四,高位,而獨云「富」者,於家而言。高位,家之尊也;能有其富,是能保其家也,吉孰大焉?

象曰:富家大吉,順在位也。

以巽順而居正位,正而巽順,能保有(註104)其富者也。富,家之大吉也。

九五:王假有家,勿恤,吉。

九五, 男而在外, 剛而處陽, 居尊而中正, 又其應順正於內, 治家之至正至善者也。

王假有家:五,君位,故以王言。假,至也,極乎有家之道也。夫王者之道,修身以齊家,家正則天下治矣。自占聖王,未有不以恭己正家爲本,故有家之道既至,則不憂勞而天下治矣,勿恤而吉也。五恭己於外,二正家於內,內外同德,可謂至矣。

假,更白反。

<sup>[</sup>註101] 《四庫》本作「貴」。

<sup>[</sup>註102] 一无「有」字。

<sup>[</sup>註103] 一无「有」字。

<sup>[</sup>註104] 一无「有」字。

## 象曰:王假有家,交相愛也。

王假有家之道者,非止能使之順從而已,必致其心化誠合。夫愛其內助,婦愛其 刑家,交相愛也。能如是者,文王之妃乎?若身修法立而家未化,未得爲假有家 之道也。

## 上九:有孚威如,終吉。

上,卦之終,家道之成也,故極言治家之本。

治家之道,非至誠不能也;故必中有孚信,則能常久,而眾人自化爲善。不由至誠, 己且不能常守也,況欲使 (註 105) 人乎?故治家以有孚爲本。

治家者,在妻孥情愛之間。慈過則无嚴,恩勝則掩義;故家之患,常在禮法不足, 而瀆慢 (註 106) 生也。長失尊嚴,少忘恭順,而家不亂者,未之有也;故必有威嚴, 則能終占。保家之終,在有孚、威如二者而已,故於卦終言之。

## 象曰:威如之吉,反身之謂也。

治家之道,以正身爲本,故云「反身之謂」。爻辭謂治家當有威嚴,而夫子又復戒云:「當先嚴其身也。」威嚴不先行於己,則人怨而不服,故云:「威如而吉者,能自反於身也。」孟子所謂「身不行道,不行於妻子」也。

## 党下 離上 **睽**

《序卦》:「家道窮必乖,故受之以睽。睽者,乖也。」

家道窮,則睽乖離散,理必然也;故家人之後,受之以睽也。爲卦上離下兌。離火炎上,兌澤潤下,二體相違,睽之義也。

又:中少二女雖同居,而所歸各異,是其志不同行也,亦爲睽義。

# 睽:小事吉。

睽者,睽乖離散之時,非吉道也。以卦才之善,雖處睽時,而小事吉也。

睽,苦圭反。

<sup>[</sup>註105]一作「使眾」。

<sup>[</sup>註106]《四庫》本作「漫」。

彖曰:睽,火動而上,澤動而下。二女同居,其志不同行。

《彖》先釋睽[註107]義[註108],次言卦才,終言合睽之道,而贊其時用之大。

火之性,動而上;澤之性,動而下。二物之性違異,故爲睽義。中少二女雖同居, 其志不同行,亦爲睽義。女之少也同處,長則各適其歸,其志異也。言睽者,本同 也;本不同,則非睽也。

少,去聲。

說而麗乎明,柔進而上行,得中而應乎剛,是以小事吉。

卦才如此,所以小事吉也。

兑,說也。離,麗也;又爲明,故爲說順而附麗於明。凡麗 (註 109) 在上,而《彖》欲見柔居尊者,則曰「柔進而上行」,晉、鼎是也。方睽乖之時,六五以柔居尊位,有說順麗明之善,又得中道而應剛;雖不能合天下之睽,成天下之大事,亦可以小濟,是於小事吉也。

五以明而應剛,不能致大吉,何也?曰:「五陰柔,雖應二,而睽之時,相與之道未 能深固,故二必遇主于巷;五,噬膚則无咎也。天下睽散之時,必君臣剛陽中正, 至誠協力,而後能合也。」

說,音悅。

天地睽,而其事同也;男女睽,而其志通也;萬物睽,而其事類也。睽之 時用大矣哉!

推物理之同,以明睽之時用,乃聖人合睽之道也。見同之爲同者,世俗之知也;聖 人則明物理之本同,所以能同天下,而和合萬類也。

以天地、男女、萬物明之: 天高地下,其體睽也; 然陽降陰升,相合而成化育之事則同也。男女異質,睽也; 而相求之志則通也。生物萬殊,睽也; 然而得天地之和, 禀陰陽之氣則相類也。物雖異而理本同,故天下之大,群生之眾,睽散萬殊,而聖人爲能同之。處睽之時,合睽之用,其事至大,故云「大矣哉」。

象曰:上火下澤,睽;君子以同而異。

<sup>[</sup>註107] 一无「睽|字。

<sup>[</sup>註108] 一作「意」。

<sup>[</sup>註109] 《四庫》本作「離」。

上(註110)火下澤, 二物之性違異,所以爲睽離之象。君子觀睽異之象,於大同之中, 而知所當異也。

夫聖賢之處世,在人理之常,莫不大同;於世俗所同者,則有時而獨異。蓋於秉彝則同矣,於世俗之失則異也。不能大同者,亂常拂(註山)理之人也;不能獨異者,隨俗習非之人也。要在同而能異耳,《中庸》曰:「和而不流。」是也。

## 初九:悔亡。喪馬,勿逐自復。見惡人,无咎。

九居卦初,睽之始也。在睽乖之時,以剛動於下,有悔可知。所以得亡者,九四在 上,亦以剛陽,睽離无與,自然同類相合。同是陽爻,同居下,又當相應之位。二 陽本非相應者,以在睽,故合也。上下相與,故能亡其悔也。

在睽,諸爻皆有應。夫合則有睽,本異則何睽?唯初與四,雖非應,而同德相與, 故相遇。

馬者,所以行也。陽,上行者也;睽獨无與,則不能行,是喪其馬也。四既與之合,則能行矣,是勿逐而馬復得也。

惡人,與己乖異者也;見者,與相通也。當睽之時,雖同德者相與,然小人乖異者至眾,若棄絕之,不幾盡天下以仇君子乎?如此,則失含 [註 112] 弘之義,致凶咎之道也,又安能化不善而使之合乎?故必見惡人則无咎也。占之聖 E,所以能化姦凶爲善良,革仇敵爲臣民者,由弗絕也。

喪, 去聲。

# 象曰:見惡人,以辟咎也。

睽離之時,人情乖違,求和合之,且病其不 (註113) 能得也;若以惡人而拒絕之,則 將眾仇於君子,而禍咎至矣。故必見之,所以免辟 (註114) 怨咎也。无怨咎,則有可 合之道。

辟,音避。

<sup>[</sup>註110] 底本作「主」,形譌。據《四庫》本更正。

<sup>[</sup>註111] 《四庫》本作「咈」。

<sup>[</sup>註112] 《四庫》本作「合」。

<sup>[</sup>註113] 一作「未」。

<sup>[</sup>註114] 《四庫》本作「避」。

## 九二:遇主于巷,无咎。

二與五爲 [註 115] 正應,相與者也;然在睽乖之時,陰陽相應之道衰,而剛柔相戾之意勝,學《易》者識此,則知變通矣。故二、五雖正應,當委曲以相求也。

二以剛中之德居下,上應六五之君,道合則志行,成濟睽之功矣。而居睽離之時, 其交非固,二當委曲求於相遇,覬其得合也,故曰「遇主于巷」。必能合而後无咎; 君臣睽離,其咎大矣。

巷者,委曲之塗也。遇者,會逢之謂也。當委曲相求,期於會遇,與之合也。所謂 委曲者,以善道宛轉將就,使合而已,非枉己屈道也。

## 象曰:遇主于巷,未失道也。

當睽之時,君心未合,賢臣在下,竭力盡誠,期使之信合而已。至誠與 [註 116] 感動之,盡力以扶持之,明義理以致其知,杜蔽惑以誠其意:如是宛轉以求其合也。

遇,非枉道迎逢也;巷,非邪僻由 (註 117) 徑也,故夫子特云「遇主于巷,未失道也」。 未,非必也;非必,謂失道也。

# 六三:見輿曳,其牛掣。其人天且劓,无初有終。

陰柔,於平時且不足以自立,況當睽離之際乎?三,居二剛之間,處不得其所安, 其見侵陵可知矣。三以正應在上,欲進與上合志,而四阻於前,二牽於後。車、牛, 所以行之具也。輿曳,牽於後也;牛掣,阻於前也。在後者,牽曳之而已;當前者, 進者之所力犯也,故重傷於上,爲四所傷也。

曳,以制反。掣,昌逝反。劓,魚器反。

# 象曰:見輿曳,位不當也;无初有終,遇剛也。

以六居三,非正也;非正則不安。又在二陽之間,所以有如是艱戹,由位不當也。

<sup>[</sup>註115] 四庫「爲」字在「應」字後。

<sup>[</sup>註116]《四庫》本作「以」。

<sup>[</sup>註117] 《四庫》本作「曲」。

无初 [註 118] 有終者,終必與上九相遇而合,乃遇剛也。不正而合,未有久而不離者也。合以正道,自无終睽之理;故賢者順理而安行,智者知幾而固守。

## 九四:睽孤,遇元夫;交孚,厲,无咎。

九四當睽時,居非所安; 无應,而在二陰之間,是睽離孤處者也。以剛陽之德,當 睽離之時,孤立无與,必以氣類相求而合,是以遇元夫也。

夫,陽稱。元,善也。初九當睽之初,遂能與同德,而亡睽之悔,處睽之至善者也,故目之爲元夫,猶云「善士」也。四則過中,爲睽已甚,不若初之善也。

四與初皆以陽處一卦之下,居相應之位。當睽乖之時,各无應援,自然同德相親, 故會遇也。同德相遇,必須至誠相與。交至,各有孚誠也。

上下二陽,以至誠相合,則何時之不能行?何危之不能濟?故雖處 [註 119] 危厲,而 无咎也。

當睽離之時,孤居二陰之間,處不當位,危且有咎也;以遇元夫而交孚,故得无咎也。

夫,如字。

# 象曰:交孚无咎,志行也。

初、四皆陽剛。君子當睽乖之時,上下以至誠相交,協志同力,則其志可以行,不 止无咎而已。卦辭但言无咎,夫子又從而明之,云:「可以行其志。」救時之睽也。 蓋以君子陽剛之才,而至誠相輔,何所不能濟也?唯有君子,則能行其志矣。

# 六五:悔亡,厥宗噬膚,往何咎?

六以陰柔當睽離之時,而居尊位,有悔可知;然而,下有九二剛陽之賢,與之爲應, 以輔翼之,故得悔亡。

厥宗,其黨也,謂九二正應也。噬膚,噬齧其肌膚而深入之也。當睽之時,非入之者深,豈能合也? 五雖陰柔之才,二輔以剛陽 (註 120) 之道,而深入之,則可往而有慶 (註 121) ,復何過咎之有?以周成之幼稚,而興盛王之治;以劉禪之昏弱,而有中

<sup>[</sup>註118] 一有「而」字

<sup>[</sup>註[19] 一无「處 | 字。

<sup>[</sup>註120] 《四庫》本作「陽剛」。

<sup>[</sup>註121] 一有「也」字。

興之勢,蓋由任聖賢 [註 122] 之輔,而姬公、孔明所以入之者深也。 噬,時制反。

#### 象曰:厥宗噬膚,往有慶也。

爻辭但言厥宗噬膚,則可以往而无咎,《象》復推明其義,言人君雖己才不足,若能 信任賢輔,使以其道深入於己,則可以有爲,是往而有福慶也。

上九: 睽孤,見豕負塗,載鬼一車。先張之弧,後說之弧。匪寇婚媾;往, 遇雨則吉。

上居卦之終, 睽之極也; 陽剛居上, 剛之極也; 在離之上, 用明之極也。睽極, 則 咈戾而難合; 剛極, 則躁暴而不詳; 明極, 則過察而多疑。

上九有六三之正應,實不孤;而其才性如此,自睽孤也。如人雖有親黨,而多自疑猜,妄生乖離,雖處骨內親黨之間,而常孤獨也。上之與三,雖爲正應,然居睽極, 无所不疑。其見三如豕之污穢,而又背負泥塗,見其可惡之甚也。既惡之甚,則猜成其罪惡,如見載鬼滿一車也。

鬼本无形,而見載之一車,言其以无爲有,妄之極也。物理,極而必反,以近明之:如人適東,東極矣,動則西也;如升高,高極矣,動則下也,既極則動而必反也。 上之睽乖既極,三之所處者正理。大凡失道既極,則必反正理;故上於三,始疑而 終必合也。

先張之弧,始疑惡而欲射之也。疑之者,妄也;妄安能常?故終必復於正。三實无惡,故後說弧而弗射。睽極而反,故與三非復是寇讎,乃婚媾也。此「匪寇婚媾」之語,與它(註123)卦同,而義則殊也。

陰陽交而和暢,則爲雨。上於三,始疑而睽,睽極則不疑而合。陰陽合而益和,則 爲雨,故云「往遇雨則吉」。往者,自此以往也,謂既合而益和,則吉也。

## 象曰:遇雨之吉,群疑亡也。

雨者,陰陽和也。始睽而能終和,故吉也。所以能和者,以群疑盡亡也。其始睽也, 无所不疑,故云「群疑」。睽極而合,則皆亡也(註124)。

<sup>[</sup>註122] 《四庫》本作「賢聖」。

<sup>[</sup>註123] 一作「屯」。

<sup>[</sup>註124] 《四庫》本作「矣」。一作「則疑皆亡也」。

## 長下 大上 蹇

《序卦》:「睽者,乖也。乖必有難,故受之以蹇。蹇者,難也。」

睽乖之時,必有蹇難,蹇所以次睽也。蹇,險阻之義,故爲蹇難。爲卦坎上艮下。 坎,險也。艮,止也。險在前而止,不能進也。前有險陷,後有峻阳,故爲蹇也。

#### 蹇:利西南,不利東北;利見大人,貞吉。

西南,坤方。坤,地也,體順而易。東北,艮方。艮,山也,體止而險。在蹇難之時,利於順處平易之地,不利止於危險也。處順易,則難可紓;止於險,則難益甚矣。

蹇難之時,必有聖賢之人,則能濟天下之難,故利見大人也。濟難者,必以太 [註 125] 正之道,而堅固其守,故貞則吉也。

凡處難者,必在乎(註 126)守貞正(註 127)。設使難不解,不失正德,是以吉也。若 遇難而不能固其守,入於邪濫,雖使苟免,亦惡德也。知義命者,不爲也。

蹇,紀免反。

## 彖曰:蹇,難也,險在前也。

蹇,難也:蹇之爲難,如乾之爲健;若易之爲難,則義有未足(註128)。蹇,有險阻之義。屯,亦難也;困,亦難也。同爲難而義則異:屯者,始難而未得通;困者,力之窮;蹇乃險阻、艱難之義,各不同也。

險在前也:坎險在前,下止而不(註129)進,故爲蹇。

## 見險而能止,知矣哉!

以卦才言處蹇之道也。

上險而下止,見險而能止也。犯險而進,則有悔咎(註130),故美其能止爲知也。方

<sup>[</sup>註125] 《四庫》本作「大」。

<sup>[</sup>註126] 一无「乎」字。

<sup>[</sup>註127] 一无「正|字。

<sup>[</sup>註128] 一作「盡」。

<sup>〔</sup>註129〕《四庫》本有「得」字。

<sup>[</sup>註130] 一作「吝」。

蹇難之時,唯能止爲善;故諸爻除五與二外,皆以往爲失,來爲得也。 知,去聲。

#### 蹇,利西南,往得中也;不利東北,其道窮也。

蹇之時,利於處平易。西南,坤方,爲順易。東北,艮方,爲險阻。九上居丘,而得中正之位,是往而得平易之地,故爲利也。

五居坎險之中,而謂之平易者:蓋卦本坤,由五往而成坎,故但取往而得中,不取成 坎之義也。方蹇而又止危險之地,則蹇益甚矣,故不利東北。其道窮也,謂蹇之極也。

#### 利見大人,往有功也。當位貞吉,以正邦也。

蹇難之時,非聖賢 [註 131] 不能濟天下之蹇,故利於見大人也。大人當位,則成濟蹇之功矣:往而有功也。

能濟天下之蹇者,唯大正之道,夫子又取卦才而言。蹇之諸爻,除初外,餘皆當正位,故爲貞正而吉也。

初六,雖以陰居陽而處下,亦陰之正也;以如(註132)此正道正其邦,可以濟於蹇矣。

## 蹇之時用大矣哉!

處蹇之時,濟蹇之道,其用至大,故云「大矣哉」。天下之難,豈易平也?非聖賢不能,其用可謂大矣。順時而處,量險而行,從平易之道,由至正之理,乃蹇之時用也。

## 象曰:山上有水,蹇;君子以反身脩德。

山之峻阻,上復有水;坎水爲險陷之象,上下險阻,故爲蹇也。

君子觀蹇難之象,而以反身脩德。君子之遇艱阻,必反求諸己,而益自脩。孟子曰: 「行有不得者,皆反求諸己。」故遇艱蹇,必自省於身。有失而致之乎?是反身也。 有所未善則改之, 无歉於心則加勉,乃自脩其德也。君子脩德以俟時而已。

## 初六:往蹇,來譽。

六居蹇之初,往進則益入於蹇,往蹇也。當蹇之時,以陰柔无援而進,其蹇可知。 來者,對往之辭。上進則爲往,不進則爲來;止而不進,是有見幾知時之美,來則 有譽也。

<sup>[</sup>註 [31] 一有「大人」字。

<sup>[</sup>註132] 一作「如以」。

#### 象曰:往蹇來譽,宜待也。

方蹇之初,進則益蹇,時之未可進也,故宜見幾而止,以待時可行而後行也。

諸爻皆蹇往而善來,然則无出蹇之義乎?曰:「在蹇而往,則蹇也;蹇終則變矣,故 上已(註133)有碩義。」

#### 六二:王臣蹇蹇, 匪躬之故。

二以中正之德居艮體,止於中正者也。與五相應,是中正之人,爲中正之君所信任,故謂之「王臣」。雖上下同德,而五方在大蹇之中,致力於蹇難之時,其艱蹇至甚,故爲蹇於蹇也。

二雖中正,以陰柔之才,豈易勝其任?所以蹇於蹇也。志在濟君於蹇 (註 134) 難之中, 其蹇蹇者,非爲身之故也。雖使不勝,志義可嘉,故稱其忠蓋不爲己也;然其才不 足以濟蹇也。小可濟,則聖人當盛稱以爲勸矣。

#### 象曰:王臣蹇蹇,終无尤也。

雖艱 註 135 : 尼於蹇時,然其志在濟君難,雖未能 (註 136) 成功,然 (註 137) 終无過尤也。聖人取其志義,而謂其无尤,所以勸忠藎也。

## 九三:往蹇,來反。

九三以剛居正,處下體之上,當蹇之時,在下者皆柔,必依於三,是爲下所附者也。 三與上爲正應;上,陰柔而无位,不足以爲援,故上往則蹇也。來,下來也。反, 還歸也。三爲下二陰所喜,故來爲反其所也,稍安之地也。

## 象曰:往蹇來反,內喜之也。

內,在下之陰也。方蹇之時,陰柔不能自立,故皆附於九三之陽,而喜愛之。九之 處三,在蹇爲得其所也。處蹇而得下之心,可以求安,故以來爲反,猶《春秋》之 言歸也。

六四:往蹇,來連。

<sup>[</sup>註133] 一作「六」。

<sup>[</sup>註 134] 一作「艱」。

<sup>[</sup>註135] 一作「蹇」。

<sup>[</sup>註136]《四庫》本無「能」字。

<sup>〔</sup>註[37]一无「然」字。

往,則為入於坎險之深,往蹇也。

居蹇難之時,同處艱戹者,其志不謀而同也。又:四居上位,而與在下者同有得位 之正,又與三相比相親者也。二與初同類,相與者也,是與下同志,眾所從附也, 故曰「來連」。來,則與在下之眾相連合也。能與眾合,得處蹇之道也。

#### 象曰:往賽來連,當位實也。

四,當蹇之時,居上位,不往而來,與下同志,固足以得眾矣。

又:以陰居陰,爲得其實;以誠實與下,故能連合而下之。二、三亦各得其實。初 以陰居下,亦其實也。當同患之時,相交以實,其合可知;故來而連者,當位以實 也。處蹇難,非誠實,何以濟?當位不曰「正」而曰「實」,上下之交,主於誠實, 用各有其所也。

當,去聲。

#### 九五:大蹇,朋來。

五居君位,而在蹇難之中,是天下之大蹇也。當蹇而又在險中,亦爲大蹇。大蹇之時,而二在下,以中正相應,是其朋助之來也。方天下之蹇,而得中正之臣相輔, 其助豈小也?

得朋來而无吉,何也?曰:「未足以濟蹇也。」以剛陽中正之君,而方在大蹇之中, 非得剛陽中正之臣相輔之,不能濟天下之蹇也。二之中正,固有助矣;欲以陰柔之助,濟天下之難,非所能也。

自古聖王濟天下之蹇,未有不由賢聖之臣爲之助者,湯、武得伊、呂是也。中常之 君,得剛明之臣而能濟大難者,則有矣,劉禪之孔明,唐肅宗之郭子儀,德宗之李 晟是也。

雖賢明之君,苟无其臣,則不能濟於難也。故凡六居五,九居二者,則多由助而有功,蒙、泰之類是也。九居五,六居二,則其(註138)功(註139)多不足,屯、否之類是也。 蓋臣賢於君,則輔君以君所不能;臣不及君,則贊助之而已,故不能成大功也。

## 象曰:大蹇朋來,以中節也。

朋者,其朋類也。五有中正之德,而二亦中正,雖大蹇之時,不失其守,蹇於蹇,

<sup>[</sup>註138]《四庫》本無「其」字。

<sup>[</sup>註[39]一作「助」。

以相應助,是以其中正之節也。

上下中正而弗濟者,臣之才不足也。自古守節秉義,而才不足以濟者,豈少乎?漢 李固、王允,晉周顕、王導之徒是也。

#### 上六:往蹇來碩,吉,利見大人。

六以陰柔居蹇之極,冒極(註140)險(註141)而往,所以蹇也。不往而來,從五求三, 得陽剛(註142)之助,是以碩也。

蹇之道, 戹塞窮蹙。碩, 大也, 寬裕之稱。來則寬大, 其蹇舒矣。蹇之極, 有出蹇之道。上六以陰柔, 故不得出 (註 143);得剛陽之助, 可以舒蹇而已。在蹇極之時, 得舒則爲吉矣。非剛陽中正, 豈能出乎蹇也?

利見大人:蹇極之時,見大徳之人,則能(註144)有濟於蹇也。大人,謂五;以相比, 發此義。五,剛陽中正而居君位,大人也。

在五不言其濟蹇之功,而上六利見之,何也?曰:「在五不言,以其居坎險之中,无剛陽之助,故无能濟蹇之義。在上六,蹇極而見大德之人,則能濟於蹇,故爲利也。各爻取義不同,如屯初九之志正,而於六二則目之爲(註145)寇也。諸爻皆不言吉,上獨言吉者,諸爻皆得正,各有所善,然皆未能出於蹇,故未足爲吉;唯上處蹇極而得寬裕,乃爲吉也。」

象曰:往蹇來碩,志在內也;利見大人,以從貴也。

上六應 三而從五,志在內也。蹇既極而有助,是以碩而吉也。六以陰柔當蹇之極, 密近剛陽中正之君,自然其志從附,以求自濟,故利見大人,謂從九五之貴也。所 以云「從貴」,恐人不知大人爲指五也。

### 東 東上 解

《序卦》:「蹇者,難也。物不可以終難,故受之以解。」

<sup>[</sup>註140] 一作「陰」。

<sup>[</sup>註 [4]] 一作「蹇」。

<sup>[</sup>註142]《四庫》本作「剛陽」。

<sup>[</sup>註143]一作「得耳」。

<sup>[</sup>註[44]一作「利」。

<sup>[</sup>註145] 底本作「爲之」,《四庫》本作「之爲」。「目之爲寇」語較順,據《四庫》本更正。

物无終難之理,難極則必散;解者,散也,所以次蹇也。爲卦震上坎下。

震,動也。坎,險也。動於險外,出乎險也,故爲患難解散之象。

又:震爲雷,坎爲雨;雷雨之作,蓋陰陽交感,和暢而緩散,故爲解。解者,天下 患難解散之時也。

### 解:利西南。无所往,其來復,吉;有攸往,夙吉。

西南,坤方。坤之體,廣大平易,當天下之難方解,人始離艱苦,不可復以煩苛嚴 急治之,當濟以寬大簡易,乃其宜也。如是,則人心懷而安之,故利於西南也。湯 除桀之虐,而以寬治;武王誅紂之暴,而反商政,皆從寬易也。

无所往,其來復吉;有攸往,夙吉:无所往,謂天下之難已解散,无所爲也。有攸往,謂尚有所當解之事也。

夫天下國家,必紀綱法度廢亂,而後禍患生。聖人既解其難,而安平无事矣,是无 所往也;則當修復治道,正紀綱、明法度,進復先代明王之治,是來復也,謂反正 理也,天下之吉也。

其,發語辭。自古聖王救難定亂,其始未暇遽爲也;既安定,則爲可久可繼之治。 自漢以下,亂既除,則不復有爲,姑隨時維持而已,故不能成善治,蓋不知來復之 義也。

有攸往, 夙吉, 謂尚有當解之事, 則早爲之, 乃吉也。當解而未盡者, 不早去, 則 將復盛; 事之復生者, 不早爲則將漸大, 故夙則吉也。

解,音響。

## 彖曰:解,險以動;動而免乎險,解。

坎險、震動,險以動也。不險則非難,不動則不能出難。動而出於險外,是免乎險 難也,故爲解。

## 解,利西南,往得眾也。

解難之道,利在廣大平易。以寬易而往濟解,則得眾心之歸也。

## 其來復吉,乃得中也。

不云「无所往」,省文爾。救亂除難,一時之事,未能成治道也。必待難解,无所往, 然後來復先王之治,乃得中道,謂合宜也。

#### 有攸往,夙吉,往有功也。

有所爲則夙吉也。早,則往而有功;緩,則惡滋而害深矣。

## 天地解而雷雨作,雷雨作而百果草木皆甲拆。解之時大矣哉!

既明處解之道,復言天地之解,以見解時之大。

天地之氣開散,交感而和暢,則成雷雨。雷雨作,則 (註 146) 萬物皆生發甲拆。天地 之功,由解而成,故贊解之時「大矣哉」。

王者,法天道,行寬宥,施恩惠,養育兆民。至於昆蟲(註147)、草木,乃順解之時,與天地合德也。

#### 象曰:雷雨作,解;君子以赦過宥罪。

天地解散而成雷雨,故雷雨作而爲解也;與「明兩而作離」語不同。

赦,釋之。宥,寬之。過失,則赦之可也;罪惡而赦之,則非義也,故寬之而已。 君子觀雷雨作解之象,體其發育,則施恩仁;體其解散,則行寬釋也。

## 初六 [註 148] : 无咎。

六居解初,患難既解之時,以柔居剛,以陰應陽,柔而能剛之義。既无患難,而自處得剛柔之宜(註149)。患難既解,安寧无事,唯自處得宜,則爲无咎矣。方解之初,官安靜以休息之。爻之辭寡,所以示意。

## 象曰:剛柔之際,義无咎也。

初、四相應,是剛柔相際接也。剛柔相接(註150),爲得其宜。難既解,而處之剛柔得宜,其義无咎也。

## 九二:田獲三狐,得黃矢,貞吉。

九二以陽剛得中之才,上應六五之君,用於時者也。天下小人常眾,剛明之君在上,則明足以照之,威足以懼之,剛足以斷之,故小人不敢用其情;然猶(註151)常存警

<sup>[</sup>註146]《四庫》本作「而」。

<sup>[</sup>註147] 四庫作「蠱」。

<sup>[</sup>註148]《四庫》本作「九」。

<sup>[</sup>註149]一有「也」字。

<sup>[</sup>註150] 《四庫》本作「際」。

<sup>[</sup>註151] 《四庫》本作「尤」。

戒,慮其有間而害正(註152)也。

六五以陰柔居尊位,其明易蔽,其威易犯,其斷不果而易惑。小人一近之,則移其 心矣。況難方解而治之初,其變尚易。二既當用,必須能去小人,則可以正君心, 而行其剛中之道。

田者,去害之事。狐者,邪媚之獸。三狐,指卦之三陰,時之小人也。獲,謂能變 化除去之,如田之獲狐也。獲之,則得中直之道,乃貞正而吉也。黃,中色。矢, 直物。黃矢,謂中直也。群邪不去,君心一入,則中直之道无由行矣;桓敬之不去 武三思是也。

象曰:九二貞吉,得中道也。

所謂「貞吉」者,得其中道也。除去邪惡,使其[註153]中直之道得行,乃正而吉也。

六三: 負且乘, 致寇至, 貞吝。

六三陰柔,居下之上,處非其位,猶小人宜在下以負荷;而且乘車,非其據也,必 致寇奪之至,雖使所爲得正,亦可鄙吝也。小人而竊盛位,雖勉爲正事,而氣質卑 下,本非在上之物,終可咎也。

若能大正 (註 154) 則如何?曰:「大正,非陰柔所能也;若能之,則是化爲君子矣。 三,陰柔小人,宜在下,而反處下之上,猶小人宜負而反乘,當致寇奪也。難解之 時,而小人竊位,復致寇矣。」

乘,如字;石證反。

象曰:負且乘,亦可醜也;自我致戎,又誰咎也?

負荷之人,而且乘載,爲可醜惡也。

處非其據,德不稱 (註 155) 其器,則寇戎之致,乃己招取,將誰咎乎?聖人又於《繫辭》明其致寇之道,謂:「作《易》者,其知盜乎?」盜者,乘釁而至,苟无釁隙,則盜安能犯?負者,小人之事。乘者,君子之器。以小人而乘君子之器,非其所能安也,故盜乘釁而奪之。

<sup>[</sup>註 152] 一作「政」。

<sup>(</sup>註153) 一无「其」字。

<sup>[</sup>註154] 《四庫》本作「正大」。

<sup>[</sup>註155] 一作「勝」。

小人而居君子之位,非其所能堪也,故滿假而陵慢其上,侵暴其下,盜則乘其過惡 而伐之矣。伐者,聲其罪也。

盗,横暴而至者也。貨財而輕慢其藏,是教誨乎盜,使取之也;女子而夭冶其容, 是教語(註156)淫者,使暴之也;小人而乘君子之器,是招盜使奪之也:皆自取之之 謂也。

#### 九四:解而拇,朋至斯孚。

九四以陽剛之才居上位,承六五之君,大臣也,而下與初六之陰爲應。

拇,在下而微者,謂初也。居上位而親小人,則賢人正士遠退矣。斥去小人,則君 子之黨進,而誠相得也。四能解去初六之陰柔,則陽剛君子之朋來至,而誠合矣。 不解去小人,則己之誠未至,安能得人之孚也?初六其應,故謂遠之爲解。

拇,茂后反。

#### 象曰:解而拇,未當位也。

四雖陽剛,然居陰,於正疑不足;若復親比小人,則其失正必矣。故戒必解其拇,然後能來君子,以其處未當位也。解者,本合而離之也,必解拇而後朋孚。蓋君子之交,而小人容於其間,是與君子之誠未至也。

## 六五:君子維有解,吉,有孚于小人。

六五居尊位,爲解之主,人君之解也,以君子通言之。君子所親比者,必君子也; 所解去者,必小人也,故君子維有解則吉也。小人去,則君子進矣,占孰大焉?

有孚者,世云「見驗」也,可驗之於小人。小人之黨去,則是君子能有解也。小人去,則君子自進,正道自行,天下不足治也。

## 象曰:君子有解,小人退也。

君子之所解者,謂退去小人也。小人去,則君子之道行,是以吉也。

## 上六:公用射隼,于高墉之上獲之,无不利。

上六,尊高之地,而非君位,故曰「公」,但據解終而言也。

隼,鷙害之物,象爲害之小人。墉,牆內外之限也。害若在內,則是未解之時也;

<sup>[</sup>註156] 《四庫》本作「誨」。

若出墉外,則是无害矣,復何所解?故在墉上,離乎內而未去也。云「高」,見防限之嚴而未去者。

上,解之極也。解極之時,而獨有未解者,乃害之堅強者也。上居解極,解道已至, 器已成也,故能射而獲之。既獲之,則天下之患解已盡矣,何所不利?

夫子於《繫辭》復伸其義曰:「隼者,禽也。弓矢者,器也。射之者,人也。君子藏器於身,待時而動,何不利之有?動而不括,是以出而有獲,語成器而動者也。」 鷙害之物在墉上,苟无其器,與不待時而發,則安能獲之?所以解之之道,器也; 事之當解,與已解之之道至者,時也。如是而動,故无括結,發而无不利矣。括結, 謂阻礙。聖人於此發明藏器待時之義。

夫行一身至於天下之事,苟无其器,與不以時而動,小則括塞,大則喪敗。自占喜 有爲而无成功,或顚覆者,皆由是也。

射,食亦反。隼,荀尹反。墉,音容。鷙,音至。

象曰:公用射隼,以解悖也。

至解終而未解者,悖亂之大者也。射之,所以解之也;解,則天下平矣。

解,佳買反。悖,布內反。

## 《周易》下經 卷第四

## 《周易》下經 卷第五

程頤傳

# 

《序卦》:「解者,緩也。緩必有所失,故受之以損。」

縱緩則必有所失,失則損也,損所以繼解也。爲卦艮上兌下。

山體高,澤體深;下深則上益高,爲損下益上之義。

又:澤在山下,其氣上通,潤及草木百物,是損下而益上也。

又:下爲兌說,三爻皆上應,是說以奉上,亦損下益上之義。

又:下兌之成兌,由六三之變也。上艮之成艮,自上九之變也。三本剛而成柔,上 本柔而成剛,亦損下益上之義。損上而益於下,則爲益;取下而益於上,則爲損。

在人,上者施其澤以及下,則益也;取其下以自厚,則損也。譬如累土 (註 1),損 於上以培厚其基本,則上下安固矣,豈非益乎?取於下以增上之高,則危墜至矣, 豈非損乎?故損者,損下益上之義;益則反是。

損,蓑本反。

損:有孚,元吉,无咎,可貞,利有攸往。

損,減損也。凡損抑其過以就義理,皆損之道也。損之道,必有孚誠,謂至誠順於

<sup>[</sup>註 1] 《四庫》本作「譬諸壘土」。

理也。損而順理,則大善而吉。所損无過差,可貞固常行,而利有所往也。

人之所損,或過或不及, [註2] 或不常 [註3], 皆不合正理, 非有字也。非有字,則 无吉而有咎, 非可貞之道, 不可行也。

### 曷之用?二篡可用享。

損者,損過而就中,損浮末而就本實也。聖人以寧儉爲禮之本,故於 [註 4] 損發明 其義,以享祀言之。

享祀之禮,其文最繁,然以誠敬爲本。多儀備物,所以將飾其誠敬之心;飾過其誠, 則爲僞矣。損飾,所以存誠也,故云「曷之用?二簋可用享」。二簋之約,可以享祭, 言在乎誠而已,誠爲本也。

天下之害,无不由末之勝也。峻字雕墙,本於宮室;酒池肉林,本於飲食;淫酷殘忍,本於刑罰;窮兵黷武,本於征討。凡人欲之過者,皆本於奉養;其流之遠,則爲害矣。先王制其本者,天理也;後人流於末者,人欲也。損之義,損人欲以復天理而已。

曷,何葛反。篡,音軌。

## 彖曰:損,損下益上,其道上行。

損之所以爲損者,以損於下而益於上也。取下以益上,故云「其道上行」。

夫損上而益下則爲益,損下而益上則爲損。損基本以爲高者,豈可謂之益乎?

## 損而有孚,元吉,无咎,可貞,利有攸往。

謂損而以至誠,則有此元吉以下四者,損道之盡善也。

## 曷之用?二簋可用享。二簋應有時,損剛益柔有時。

夫子特釋「曷之用,二簋可用享」。

卦辭簡直,謂當損去浮飾,曰:「何所用哉?二簋可以享也。」厚本損末之謂也。夫子恐後人不達,遂以爲文飾當盡去,故詳言之。

有本必有末,有實必有文,天下萬事无不然者。无本不立,无文不行。父子主恩,

<sup>(</sup>註 2) 一有「或常」字。

<sup>[</sup>註 3] 一作「當」。

<sup>[</sup>註 4] 《四庫》本作「爲」。

必有嚴順之體;君臣主敬,必有承接之儀。禮讓存乎內,待威儀而後行;尊卑有其序,非物采則(註5)无別。文之與實,相須而不可闕也。及乎文之勝,末之流,遠本喪實,乃當損之時也;故云:「曷所用哉?二簋足以薦其誠矣。」謂當務實而損飾也。夫子恐人之泥言也,故復明之曰:「二簋之質,用之當有時。非其所用而用之,不可也。」謂文飾未過而損之,與損之至於過甚,則非也。

損剛益柔有時:剛爲過,柔爲不足,損益,皆損剛益柔也;必順時而行,不當時而 損益之,則非也。

#### **捐益盈虚**,與時偕行。

或損或益,或盈或虛,唯隨時而已。過者損之,不足(註6)者益之;虧者盈之,實者虛之:與時偕行也。

#### 象曰:山下有澤,損;君子以懲忿窒欲。

山下有澤,氣通上潤,與深下以增高,皆損下之象。君子觀損之象,以損於己。在 修己之道,所當損者,惟忿與欲;故以懲戒其忿怒,窒塞其意欲也。

懲,直升反。忿,芳粉反。窒,珍栗反。

## 初九:已事遄往。无咎,酌損之。

損之義,損剛益柔,損下益上也。初以陽剛應於四,四以陰柔居上位,賴初之益者也。下之益上,當損己而不自以爲功。所益於上者,事既已則速去之,不居其功, 乃无咎也。若享其成功之美,非損己益上也;於爲下之道,爲有咎矣。四之陰柔, 賴初者也,故聽於初。初當酌度其宜,而損己以益之。過與不及,皆不可也。

已,音以。遄,市專反。

## 象曰:已事遄往,尚合志也。

尚,上也,時之所崇用爲尚。初之所尚者,與上合志也。四賴於初,初益於四,與 上合志也。

## 九二:利貞,征凶,弗損益之。

二以剛中,當損剛之時,居柔而說體,上應六丘陰柔之君,以柔說應上,則失其剛

<sup>[</sup>註 5] 一作「而」。

<sup>[</sup>註 6] 一作「及」。

中之德,故戒所利在貞正也。

征,行也。離乎中,則失其真正而凶矣。守其中,乃貞也。

弗損益之:不自損其剛貞,則能益其上,乃益之也。若失其剛貞而用柔說,適足以 損之而已(註7),非損己而(註8)益上也。世之愚者,有雖无邪心,而唯知竭力順上 爲忠者,蓋不知「弗損益之」之義也。

#### 象曰:九二利貞,中以為志也。

九居二,非正也;處說,非剛也,而得中爲善。若守其中德,何有不善?豈有中而不正者?豈有中而有過者?二所謂「利貞」,謂以中爲志也。志存乎中,則自正矣。 大率中重於正,中則正矣,正不必中也。能守中,則有益於上矣。

## 六三:三人行,則損一人;一人行,則得其友。

損者,損有餘也;益者,益不足也。三人,謂下三陽、上三陰。三陽同行,則損九 三以益上;三陰同行,則損上六以爲三:三人行則損一人也。

上以柔易剛而謂之損,但言其減一耳。上與三雖本相應,由二爻升降,而一卦皆成,兩相與也。初、二,二陽;四、五,二陰,同德相比。三與上應,皆兩相與,則其志專,皆爲得其友也。三雖與四相比,然異體而應上,非同行者也。

三人則損一人,一人則得其友。蓋天下无不二者,一與二相對待,生生之本也;三 則餘而當損矣,此損益之大義也。夫子又於《繫辭》盡其義曰:「天地絪縕,萬物化 醇,男女構精,萬物化生。《易》曰:『三人行,則損一人;一人行,則得其友。』 言致一也。」

絪縕,交密之狀。天地之氣,相交而密,則生萬物之化醇。醇,謂醲厚。醲厚,猶精一也。男女精氣交構,則化生萬物;唯精醇專一,所以能生也。一陰一陽,豈可二也?故三則當損,言專致乎一也。天地之間,當損益之,明且大者,莫過此也。

## 象曰:一人行,三則疑也。

一人行而得一人,乃得友也。若三人行,則疑所與矣,理當損去其一人,損其餘也。

<sup>[</sup>註 7] 一无「而已」字。

<sup>[</sup>註 8] 一有「以」字。

六四:損其疾,使遄有喜,无咎。

四以陰柔居上,與初之剛陽相應。在損時而應剛,能自損以從剛陽也,損不善以從善也。初之益四,損其柔而益之以剛,損其不善也,故曰「損其疾」。

疾,謂疾病,不善也。損於不善,唯使之遄速,則有喜而无咎。人之損過,唯患不速;速則不至於深過,爲可喜也。

象曰:損其疾,亦可喜也。

損其所疾,固可喜也。云「亦」,發語辭。

六五:或益之,十朋之,龜弗克違,元吉。

六五於損時,以中順居尊位。虛其中,以應乎二之剛陽,是人君能虛中自損,以順從在下之賢也。能如是,天下孰不損己自盡以益之?故或有益之之事,則十朋助之矣。十,眾辭。龜者,決是非吉凶之物。眾人之公論,必合正理,雖龜筴不能違也。如此,可謂大善之吉矣。占人曰:「謀從眾,則合天心。」

象曰:六五元吉,自上祐也。

所以得元吉者,以其能盡眾人之見,合天地之理,故自上天降之福祐也。

上九:弗損益之,无咎;貞吉,利有攸往,得臣无家。

凡損之義有三:損己從人也;自損以益於人也;行損道以損於人也。損己從人,徙於 義也。自損益人,及於物也。行損道以損於人,行其義也。各因其時,取大者言之。 四、五二爻,取損己從人。下體三爻,取自損以益人。損時之用,行損道以損天下 之當損者也。

上九則取不行其損爲義。九居損之終,損極而當變者(註9)也。以剛陽居上,若用(註10)剛以損削於下,非爲上之道,其咎大矣。若不行其損,變而以剛陽之道益於下,則无咎而得其正且吉也。如是,則宜有所往,往則有益矣。在上能不損其下而益之,天下孰不服從?從服(註11)之眾,无有內外也,故曰「得臣无家」。得臣,謂得人心歸服。无家,謂无有遠近內外之限也。

象曰:弗損益之,大得志也。

<sup>[</sup>註 9] 一无「者」字。

<sup>[</sup>註10] 一有「其」字。

<sup>[</sup>註11] 《四庫》本作「服從」。

居上,不損下而反益之,是君子大得行其志也。君子之志,唯在益於人而已。

## 震下 異上 盆

《序卦》:「損而不已必益,故受之以益。」

盛衰損益如循環,損極必益,理之自然,益所以繼損也。爲卦巽上震下。

雷、風二物,相益者也;風烈則雷迅,雷激則風怒,兩相助益,所以爲益:此以象言也。

巽、震二卦,皆由下變而成。陽變而爲陰者,損也;陰變而爲陽者,益也。上卦損 而下卦益,損上益下,所以爲益:此以義言也。下厚則上安,故益下爲益。

益:利有攸往,利涉大川。

益者,益於天下之道也,故利有攸往。益之道,可以濟險難,利涉大川也。

**彖曰:益,損上益下,民說无疆。自上下下,其道大光。** 以卦義與卦才言也。

卦之爲益,以其損上益下也。損於上而益下,則民說之无疆,謂无窮極也。自上而 降己以下下,其道之大光顯也。陽下居初,陰上居四,爲自上下下之義。

說,音悅。疆,居良反;下同。下下:上,遐嫁反;下,如字。

## 利有攸往,中正有慶。

丘以剛陽中正居尊位,二復以中正應之,是以中正之道益天下,天下受其福慶也。

## 利涉大川,木道乃行。

益之爲 [註 12] 道,於平常无事之際,其益猶小。當艱危險難,則所益至大,故利涉 大川也。於濟艱險,乃益道大行之時也。

益誤作「木」。或以爲上巽下震,故云「木道」,非也。

## 益,動而巽,日進无疆。

又以二體言卦才。

<sup>[</sup>註12] 一无「爲」字。一作「於」。

下動而上異,動而異也。爲益之道,其動異順於理,則其益日進 (註 13),廣大无有 疆限也。動而不順於理,豈能成大益也?

#### 天施地生,其益无方。

以天地之功,言益道之大,聖人體之,以益天下也。天道資始,地道生物;天施地生,化育萬物,各正性命,其益可謂无方矣。

方,所也,有方所(註14)則有限量。无方,謂廣大无窮極也。天地之益萬物,豈有 窮際平?

施,始鼓反。

#### 凡益之道,與時偕行。

天地之益无窮者, 理而已矣。聖人利益天下之道, 應時順理, 與天地合, 與時偕行也。

#### 象曰:風雷,益;君子以見善則遷,有過則改。

風烈則雷迅,雷激則風怒,二物相益者也。君子觀風雷相益之象,而求益於己。爲益之道,无若見善則遷,有過則改也。見善能遷,則可以盡天下之善;有過能改,則无過矣。益於人者,无大於是。

## 初九:利用為大作,元吉,无咎。

初九,震動之主,剛陽之盛也。居益之時,其才足以益物;雖居至 (註15)下,而上有六四之大臣應於己。四,巽順之主;上能巽於君,下能順 (註16) 於賢才也。在下者,不能有爲也;得在上者應從之,則宜以其道輔於上,作大益天下之事:利用爲大作也。

居下而得上之用,以行其志,必須所爲大善而吉,則无過咎。不能元吉,則不唯在 己有咎,乃累乎上,爲上之咎也。在至下而當大任,小善不足以稱也;故必元吉, 然後得无咎。

## 象曰:元吉无咎,下不厚事也。

在下者,本不當處厚事;厚事,重大之事也。以爲在上所任,所以當大事,必能濟

<sup>[</sup>註13] 一本「益|字在「日進|下。

<sup>[</sup>註14] 一无「所」字。

<sup>[</sup>註15] 一无「至」字。

<sup>[</sup>註16] 一作「巽」。

大事,而致元吉,乃爲无咎。能致元吉,則在上者任之爲知人,己當之爲勝任;不 然,則上下皆有咎也。

六二:或益之,十朋之,龜弗克違,永貞吉。王用享于帝,吉。

六二處中正而體柔順,有虛中之象。人處中正之道,虛其中以求益,而能順從天下, 孰不願告而益之? 孟子曰:「夫苟好善,則四海之內,皆將輕千里而來,告之以善。」

夫滿則不受,虛則來物,理自然也;故或有「益之事,則眾朋助而益之。上者,眾 辭。眾人所是,理之至當也。龜者,占吉凶、辯是非之物;言其至是,龜不能違也。

永貞吉,就六二之才而言。二,中正虛中,能得眾人之益者也;然而,質本陰柔, 故戒在常永貞固,則吉也。求益之道,非永貞則安能守也(註17)?

損之六五,十朋之則 (註 18) 元吉者,蓋居尊自損,應下之剛,以柔而居剛。柔爲虚受,剛爲固守,求益之至善,故元吉也。六二虛中求益,亦有剛陽之應。而以柔居柔,疑從 (註 19) 益之未固也,故戒能常永貞固則吉也。

王用享于帝吉:如二之虚中而能永貞,用以享上帝,猶當獲吉,況與人接物,其意 有不通乎?求益於人,有不應乎?祭天,天子之事。故云「王用」也。

享〔註20〕,香兩反。

## 象曰:或益之,自外來也。

既中正虚中,能受天下之善而固守,則有有益之事,眾人自外來益之矣。

或曰:「自外來,豈非謂五乎?」曰:「如二之中正虛中,天下孰不願益之? 丘爲正應,固在其中矣。」

## 六三: 益之用凶事, 无咎。有孚中行, 告公用圭。

三居下體之上,在民上者也,乃守令也。居陽應剛,處動之極。居民上而剛決,果於爲益者(註 21)也。果於爲益,用之於(註 22)凶事則无咎。凶事,謂患難非常之事。

<sup>[</sup>註17] 一作「之」。

<sup>[</sup>註18] 據《導讀》本,《李》本作「龜」。《二程集》亦作「龜」。

<sup>[</sup>註19] 《四庫》本無「從」字。

<sup>[</sup>註20] 底本「享」字前有「用」字,應爲衍文,故刪之。

<sup>[</sup>註21] 一无「者」字。

<sup>[</sup>註22] 《四庫》本無「於|字。

三居下之上,在下當承稟於上,安得自任,擅爲益乎?唯於患難非常之事,則可量宜應卒,奮不顧身,力庇其民,故无咎也。下專自任,上必忌疾,雖當凶難,以(註 23)義在可爲;然必有其孚誠,而所爲合於中道,則誠意通於上,而上信與之矣。專爲而无爲上愛民之至誠,固不可也;雖有誠意,而所爲不合中行,亦不可也。

生者,通信之物。《禮》云:「大夫執圭而使,所以申信也。」凡祭祀朝聘用 圭玉, 所以通達誠信也。有誠孚而得中道,則能使上信之,是猶告公上用圭玉也,其孚能 通達於上矣。在下而有爲之道,固當有孚中行。又:三,陰爻而不中,故發此義。

或曰:「三乃陰柔,何得反以剛果任事爲義?」曰:「三,質雖本陰,然其居陽,乃 自處以剛也。應剛,乃志在乎剛也。居動之極,剛果於行也。以此行益,非剛果而 何?《易》以所勝爲義,故不論其本質也。」

### 象曰:益用凶事,固有之也。

六三,益之獨可用於凶事者,以其固有之也,謂專固自任其事也。居下當稟承於上, 乃專任其事;唯救民之凶災,拯時之艱急,則可也。乃處急難變故之權宜,故得无 咎;若平時,則不可也。

## 六四:中行,告公從,利用為依遷國。

四當益時,處近君之位,居得其正,以柔巽輔上,而下順應於初之剛陽;如是,可 以益於上也。唯處不得其中,而所應又不中,是不足於中也;故云:「若行得中道, 則可以益於君上,告於上而獲信從矣。」

以柔巽之體,非有剛特之操,故「利用爲依遷國」。爲依,依附於上也。遷國,順下 而動也。上依剛中之君,而致其益;下順剛陽之才,以行其事:利用如是也。自占 國邑,民不安其居則遷;遷國者,順下而動也。

## 象曰:告公從,以益志也。

爻辭但云:「得中行,則告公而獲從。」《象》復明之曰:「告公而獲從者,告之以益 天下之志也。」志苟在於益天下,上必信而從之。事君者,不患上之不從,患其志 之不誠也。

九五:有孚惠心,勿問,元吉。有孚,惠我德。

<sup>[</sup>註23] 一无「以」字。

五,剛陽中正居尊位,又得六二之(註 24)中正相應,以行其益,何所不利?以陽實在中,有孚之象也。以九五之德之才之位,而中心至誠,在惠益於物,其至善大吉,不問可知,故云:「勿問,元吉。」人君居得致之位,操可致之權,苟至誠益於(註 25)天下,天下受其大福,其元吉不假言也。

有字,惠我德:人君至誠益於(註26)天下,天下之人,无不至誠愛戴,以君之德澤 爲恩惠也。

#### 象曰:有孚惠心,勿問之矣;惠我德,大得志也。

人君有至誠惠益天下之心,其元占不假言也,故云「勿問之矣」。天下至誠,懷吾德 以爲惠,是其道大行,人君之志得矣。

#### 上九:莫益之,或擊之,立心勿恒,凶。

上,居无位之地(註27),非行益於人者也;以剛處益之極,求益之甚者也。所應者陰,非取善自益者也。利者,眾人所同欲也;專欲益己,其害大矣。欲之甚,則昏蔽而忘義理;求之極,則侵奪而致仇怨,故夫子曰:「放於利而行,多怨。」孟子謂:「先利,則不奪不厭。」聖賢之深戒也。九以剛而求益之極,眾人所共惡,故无益之者,而或攻擊之矣。

立心勿恒,凶:聖人戒人存心不可專利,云:「勿恒如是,凶之道也。」所 [註 28] 當速改也。

## 象曰:莫益之,偏辭也;或擊之,自外來也。

理者,天下之至公。利者,眾人所同欲。苟公其心,不失其正理,則與眾同利,无 侵於人,人亦欲與之。若切於好利,蔽於自私,求自益以損於人,則人亦與之力爭; 故莫肯益之,而有擊奪之者矣。云「莫益之」者,非其偏己之辭也。苟不偏己,合 於公道,則人亦益之,何爲擊之乎?既求益於人,至於甚極,則人皆惡而欲攻之, 故擊之者,自外來也。

人爲善,則千里之外應之。六二中正虛己,益之者自外而至,是也。苟爲不善,則

<sup>[</sup>註24] 一无「之」字。

<sup>[</sup>註25] 一作「於益」。

<sup>[</sup>註26] 一作「於益」。

<sup>(</sup>註27) 底本作「也」,字體偏小,疑爲「地」字脱落「土」部所致。今從《四庫》本更正。(註28) 一作「謂」。

千里之外違之。上九求益之極,擊之者自外而至,是也。《繫辭》曰:「君子安其身而後動,易其心而後語,定其交而後求。君子脩此三者,故全也。危以動,則民不與也;懼以語,則民不應也;无交而求,則民不與也。莫之與,則傷之者至矣。《易》曰:『莫益之,或擊之,立心勿恒,凶。』」君子言動與求,皆以其道,乃完善也;不然,則取傷而凶矣。

## 乾下 分

《序卦》:「益而不已必決,故受之以夬。夬者,決也。」

益之極,必決而後止。理无常益,益 [註 29] 而不已,已乃決也,夬所以次益也。爲卦兌上乾下。

以二體言之,澤,水之聚也,乃上於至高之處,有潰決之象。以爻言之,丘陽在下, 長而將極;一陰在上,消而將盡;眾陽上進,決去一陰,所以爲夬也。夬者,剛決 之義。眾陽進而決去一陰,君子道長,小人道(註30)衰,將盡之(註31)時也。

## 夬:揚于王庭,孚號,有厲。

小人方盛之時,君子之道未勝,安能顯然以正道決去之?故含晦俟時,漸圖消之之道。今既小人衰微,君子道盛,當顯行之於公朝,使人明知善惡,故云「揚于 E庭」。

孚信之在中,誠意也。號者,命眾之辭。君子之道雖長盛,而不敢忘戒備,故至誠以命眾,使知尚有危道。雖以此之甚盛,決彼之甚衰,若易而无備,則有不虞之悔; 是尚有危理,必有戒懼之心,則无患也。聖人設戒之意深矣。

夬,古恠反。號,去聲。

## 告自邑,不利即戎,利有攸往。

君子之治小人,以其不善也,必以己之善道勝革之;故聖王誅亂,必先脩己,舜之 敷文德是也。

邑,私邑。告自邑,先自治也。以眾陽之盛,決去[註32]一陰,力固有餘,然不可

<sup>[</sup>註29] 一无下「益|字。

<sup>[</sup>註30] 《四庫》本作「消」。

<sup>[</sup>註31] 《四庫》本有二「之」字。

<sup>[</sup>註32] 《四庫》本作「於」。

極其剛,至於太過;太過,乃如蒙上九之爲寇也。

戎,兵者強武之事。不利即戎,謂不宜尚壯武也。即,從也。從戎,尚武也。

利有攸往:陽雖盛,未極乎上;陰雖微,猶有未去,是小人尚有存者,君子之道, 有未至也,故宜進而往也。不尚剛武,而其道益進,乃夬之善也。

#### 彖曰:夬,決也,剛決柔也。健而說,決而和。

央爲決義,五陽決上之一陰也。健而說,決而和,以二體言卦才也。下健而上說, 是健而能說,決而能和,決之至善也。兌說爲和。

說,音悅。決,古穴反。

#### 揚于王庭,柔乘五剛也。

柔雖消矣,然居五剛之上,猶爲乘陵之象。陰而乘陽,非理之甚,君子勢既足以去之,當顯揚其罪於王朝大庭,使眾知善惡也。

#### 孚號有厲,其危乃光也。

盡誠信以命其眾,而知有危懼,則君子之道,乃无虞而光大也。

## 告自邑,不利即戎,所尚乃窮也。

當先自治,不宜專尙剛武;即戎,有(註33)所尚,乃至窮極矣。夬之時所尙,謂剛武也。

## 利有攸往,剛長乃終也。

陽剛雖盛長,猶未終,尚有一陰,更當決去,則君子之道純一,而无害之者矣,乃 剛長之終也。

## 象曰:澤上於天,夬;君子以施祿及下,居德則忌。

澤,水之聚也,而上於天至高之處,故爲夬象。君子觀澤決於上,而注溉於下之象,則以施祿及下;謂施其祿,澤以及於下也。

觀其決潰之象,則以居德則忌。居德,謂安處其德。則,約也;忌,防也,謂約立 防禁。有防禁,則无潰散也。王弼作「明忌」,亦通。

不云「澤在天上」,而云「澤上於天」: 上於天,則意不安而有決潰之勢。云「在天

<sup>[</sup>註33] 《四庫》本作「則有」。

上」,乃安辭也。

止,時掌反。施,去聲。潰,胡對反。

#### 初九: 壯干前趾, 往不勝, 為咎。

九,陽爻而乾體,剛健在上之物,乃在下而居決時,壯于前進者也。

前趾,謂進行。人之決於行也,行而宜,則其決爲是;往而不宜,則決之過也。故 往而不勝,則爲咎也。

央之時而往,往決也,故以勝負言。九居初而壯於進,躁於動者也,故有「不勝」 之戒。陰雖將盡,而己之躁動,自宜有不勝之咎,不計彼也。

#### 象曰:不勝而往,咎也。

人之行,必度其事可爲,然後決之,則无過矣。理不能勝,而且往,其咎可知。凡 行而有咎者,皆決之過也。

#### 九二: 惕號, 莫夜有戎, 勿恤。

央者,陽決陰,君子決小人之時,不可忘戒備也。陽長將極之時,而二處中居柔,不爲過剛,能知戒備,處夬之至善也。內懷兢惕,而外嚴誠號,雖暮夜有兵戎(註34),亦可勿恤矣。

號,去聲。莫,音暮。

## 象曰:有戎勿恤,得中道也。

暮夜有兵戎(註35),可懼之甚也;然可勿恤者,以自處之善也。既得中道,又知惕懼,且有戒備,何事之足恤也?

九居二,雖得中,然非正,其爲至善,何也?曰:「陽決陰,君子決小人,而得中, 豈有不正也?知時識勢,學《易》之大方也。」

## 九三:壯于頄,有凶。君子夬夬,獨行遇雨,若濡有慍,无咎。

爻辭差錯,安定胡公移其文曰:「壯于頄,有凶。獨行遇雨,若濡有慍。君子夬夬, 无咎。」亦未安也。當云:「壯于頄,有凶。獨行遇雨,君子夬夬,若濡有慍,无咎。」

<sup>[</sup>註34] 《四庫》本無「戎」字。

<sup>[</sup>註35] 底本作「戒」,應爲形譌。今據《四庫》本更正。

央決尙剛健之時,三居下體之上,又處健體之極,剛果於決者也。順,顴骨也,在 上而未極於上者也。三居下體之上,雖在上,而未爲最上。上有君,而自任其剛決, 壯王順者也,有凶之道也。

獨行遇雨:三與上六爲正應,方群陽共決一陰之時,己若以私應之,故不與眾同而獨行,則與上六陰陽和合,故云「遇雨」。《易》中言雨者,皆謂陰陽和也。君子道長,決去小人之時,而己獨與之和,其非可知。唯君子處斯時,則能夬夬;謂夬其夬,果決其斷也。雖其私與,當遠絕之。若見濡污,有慍惡之色,如此則无過咎也。

三,健體而處正,非必有是失也,因此義以爲教耳。爻文所以交錯者,由有「遇雨」字,又有「濡」字,故誤以爲連也(註36)。

頄,音求;又音逵。慍,紆運反。顴,音權。

#### 象曰:君子夬夬,終无咎也。

牽梏於私好,由无決也。君子義之與比,決於當決,故終不至於有咎也。

牽,苦年反。梏,音酷。

## 九四:臀无膚,其行次且。牽羊悔亡,聞言不信。

臀无膚,居不安也。行次且,進不前也。次且,進難之狀。九四以陽居陰,剛決不足,欲止,則眾陽並進於下,勢不得安,猶臀傷而居,不能安也;欲行,則居柔,失其剛壯,不能強進,故「其行次且」也。

牽羊悔亡:羊者,群行之物。牽者,挽拽之義。言若能自強而牽挽,以從群行,則可以亡其悔。然既處柔,必不能也;雖使聞是言,亦必不能信用也。夫過而能改,聞善而能用,克己以從義,唯剛明者能之。

在它卦,九居四,其失未至如此之甚;在夬而居柔,其害大矣。

臀,音豚。次,七私反。且,七餘反。

## 象曰:其行次且,位不當也;聞言不信,聰不明也。

九處陰,位不當也。以陽居柔,失其剛決,故不能強進,其行次且。

剛然後能明,處柔則遷,失其正性,豈復有明也?故聞言而不能信者,蓋其聰聽之

<sup>(</sup>註36) 一作「誤而相連也」。

不明也。

#### 九五:莧陸夬夬,中行无咎。

五雖剛陽中正居尊位,然切近於上六;上六說體,而卦獨一陰,陽之所比也。五爲 決陰之主,而反比之,其咎大矣;故必決其決,如莧陸然,則於其中行之德,爲无 咎也。

中行,中道也。莧陸,今所謂馬齒莧是也;曝之難乾,感陰氣之多者也,而脆易折。 五若如莧陸,雖感於陰,而決斷之易,則於中行无過咎矣;不然,則失其中正也。 感陰多之物,莧陸爲易斷,故取爲象。

**莧**, 侯辨反。曝, 音僕。脆, 七歲反。易, 去聲。

#### 象曰:中行无咎,中未光也。

卦辭言夬夬,則於中行爲无咎矣。《象》復盡其義云「中未光也」。夫人心正意誠, 乃能極中正之道,而充實光輝。五心有所比,以義之不可而決之,雖行於外,不失 中正之義,可以无咎;然於中道,未得爲光大也。蓋人心一有所欲,則離道矣。夫 子於此,示人之意深矣。

## 上六:无號,終有凶。

陽長將極,陰消將盡,獨一陰處窮極之地,是眾君子得時,決去危極之小人也;其 勢必須消盡,故云:「无用號咷畏懼,終必有凶也。」

號,戶羔反。


## 象曰:无號之凶,終不可長也。

陽剛君子之道,進而益盛。小人之道,既已窮極,自然消亡,豈復能久長 (註 37) 乎? 雖號咷,无以爲也,故云「終不可長也」。

先儒以卦中有「孚號」、「惕號」,欲以「无號」爲「无號」,作去聲,謂无用更加號 令,非也。一卦中,適有兩去聲字,一平聲字,何害?而讀《易》者,率皆疑之。

或曰:「聖人之於天下,雖大惡,未嘗必絕之也。今直使之无號,謂必有凶,可乎?」曰:「夬者,小人之道消亡之時也。決去小人之道,豈必盡誅之乎?使之變革,乃小人之道亡也。道亡,乃其凶也。」

<sup>[</sup>註37] 《四庫》本作「長久」。



《序卦》:「夬,決也。決必有[註38] 遇,故受之以姤。姤,遇也。」

决,判也。物之决判,則有遇合。本合則何遇?姤所以次夬也。爲卦乾上巽下。

以二體言之,風行天下,天之下者,萬物也;風之行,无不經觸,乃遇之象。又: 一陰始生於下,陰與陽遇也,故爲姤。

#### 姤:女壯,勿用取女。

一陰始生,自是而長,漸以盛矣 [註 39],是女之將長壯也。陰長則陽消,女壯則男弱,故戒勿用取如是之女。取女者,欲其柔和順從,以成家道。

姤,乃方進之陰,漸壯而敵陽者,是以不可取也。女漸壯,則失男女之正,家道敗矣。 姤,雖一陰甚微,然有漸壯之道,所以戒也。

姤,古反豆。

## 彖曰:姤,遇也,柔遇剛也。

姤之義,遇也。卦之爲姤,以柔遇剛也。一陰方生,始與陽相遇也。

## 勿用取女,不可與長也。

一陰既生,漸長而盛,陰盛則陽衰矣。取女者,欲長久而成家也。此漸盛之陰,將 消勝於陽,不可與之長久也。凡女子、小人、夷狄,勢苟漸盛,何可與久也?故戒 勿用取如是之女。

## 天地相遇,品物咸章也。

陰始生於下,與陽相遇,天地相遇也。陰陽不相交遇,則萬物不生。天地相遇,則 化育庶類,品物咸章,萬物章明也。

## 剛遇中正,天下大行也。

以卦才言也。五與二皆以陽剛居中與正,以中正相遇也。君得剛中之臣,臣遇中正

<sup>[</sup>註38] 《二程集》有「所」字。原《序卦》亦有「所」字。

<sup>[</sup>註39] 《四庫》本作「大」。

之君; 君臣以剛陽遇中正, 其道可以大行於天下也 [註40]。

#### 姤之時義大矣哉!

**贊**姤之時與姤之義至大也。

天地不相遇,則萬物不生; 君臣不相遇,則政治不興; 聖賢不相遇,則道德不亨; 事物不相遇,則功用不成。姤之時與義皆甚大也。

#### 象曰:天下有風,姤;后以施命誥四方。

風行天下, 无所不周; 爲君后者, 觀其周偏(註41)之象, 以施其命令, 周誥四方也。

風行地上,與天下有風,皆爲周徧庶物之象。而行於地上,徧觸萬物,則爲觀,經 歷觀省之象也;行於天下,周徧四方,則爲姤,施發命令之象也。

諸《象》或稱先王,或稱后,或稱君子、大人。稱先王者,先王所以立法制、建國,作樂、省方,勑法、閉關,育物、享帝,皆是也。稱后者,后王之所爲也;財成天地之道,施命誥四方是也。君子,則上下之通稱。大人者,王公之通稱。

## 初六:繫于金柅,貞吉;有攸往,見凶,羸豕孚蹢躅。

姤,陰始生而將長之卦。一陰生,則長而漸盛。陰長則陽消,小人道長也,制之當 於其微而未盛之時。

棍, 止車之物; 金爲之, 堅強之至也。止之以金棍, 而又繫之, 止之固也。固止使不得進, 則陽剛貞正之道吉也。使之進往, 則漸盛而害於陽, 是見凶也。

贏豕孚蹢躅:聖人重爲之戒,言陰雖甚微,不可忽也。豕,陰躁之物,故以爲況。 羸弱之豕,雖未能強猛,然其中心在乎蹢躅。蹢躅,跳躑也。陰微而在下,可謂羸 矣;然其中心常在乎 (註42) 消陽也。君子、小人異道,小人雖微弱之時,未嘗无害 君子之心。防於微,則无能爲矣。

柅,女凡反。羸,劣隨反。

## 象曰:繫于金柅,柔道牽也。

牽者,引而進也。陰始生而漸進,柔道方牽也。繫之于金柅,所以止其進也。不使

<sup>[</sup>註40] 《四庫》本作「矣」。

<sup>[</sup>註4]] 底本作「偏」,應爲形譌。據《四庫》本更正。

<sup>[</sup>註42] 一无「乎」字。

進,則不能消正道,乃貞吉也。

#### 九二:包有魚,无咎,不利賓。

姤,遇也。二與初密比,相遇者也。在它卦,則初正應於四;在姤,則以遇爲重。相 遇之道,主於專一。二之剛中,遇固以誠;然初之陰柔,群陽在上,而又有相 (註43) 應者,其志所求也。陰柔之質,鮮克貞固;二之於初,難得其誠心矣。所遇不得其誠 心,遇道之乖也。

包者, 苴裹也。魚, 陰物之美者。陽之於陰, 其所說美, 故取魚象。二於初, 若能 固畜之, 如包苴之有魚, 則於遇爲无咎矣。

賓,外來者也。不利賓,包苴之魚,豈能及賓?謂不可更及外人也。遇道當專一, 二則雜矣。

苴,千余反。裹, 音果。

#### 象曰:包有魚,義不及客也。

二之遇初,不可使有二於外,當如包苷之有魚。包苷之魚,義不及於賓客也。

## 九三:臀无膚,其行次目,厲,无大咎。

二與初既相遇,三說初而密比於二,非所安也。又爲二所忌惡,其居不安,若臀之 无慮也。

處既不安,則當去之。而居姤之時,志求乎遇,一陰在下,是所欲也;故處雖不安,而其行則又次且也。次且,進難之狀,謂不能遽舍也。然三剛正而處巽,有不終迷之義。若知其不正,而懷危懼,不敢妄動,則可以无大咎也。非義求遇,固已有咎矣,知危而止,則不至於大(註44)也。

## 象曰:其行次且,行未牽也。

其始,志 [註45] 求遇於初,故其行遲遲。未牽,不促其行也。既知危而改之,故未至於大咎也。

九四:包无魚,起凶。

<sup>[</sup>註43] 《四庫》本作「所」。

<sup>[</sup>註44] 一有「咎」字。

<sup>[</sup>註45] 《四庫》本有「在|字。

包者,所裹畜也。魚,所美也。四與初爲正應,當相遇者也。而初已遇於二矣,失 其所遇,猶包之无魚,亡其所有也。四當姤遇之時,居上位而失其下;下之離,由 己之失德也。四之失者,不中正也;以不中正而失其民,所以凶也。

曰:「初之從二,以比近也。豈四之罪乎?」曰:「在四而言,義當有咎;不能保其下,由失道也。豈有上不失道,而下離者乎?遇之道,君臣、民主、夫婦、朋友皆在焉。四以下睽,故主民而言。爲上而下離,必有凶變;起者,將生之謂。民心既離,難將作矣。」

#### 象曰:无魚之凶,遠民也。

下之離,由己致之。遠民者,己遠之也。爲上者,有以使之離也。

遠,去聲。

### 九五:以杞包瓜,含章,有隕自天。

九五,下亦无應,非有遇也。然得遇之 [註46] 道,故終必有遇。夫上下之遇,由相求也。

尼,高木而葉大。處高體大,而可以包物者,杞也。美實之在下者,瓜也。美而居下者,側微之賢之象也。九丘尊居君位,而下求賢才,以至高而求至下,猶以杞葉而包瓜,能自降屈如此。又:其內蘊中正之德,充實章美,人君如是,則无有不遇所求者也。

雖屈己求賢,若其德不正,賢者不屑也,故必含畜章美,內積至誠,則「有隕自天」 矣,猶云「自天而降」,言必得之也。

自古人君至誠降屈,以中正之道,求天下之賢,未有不遇者也。高宗感於夢寐,文 王遇於魚(註47)釣,皆由是道也。

杞,音起。包,日交反。瓜, [花反。

## 象曰:九五含章,中正也;

所謂「含章」,謂其含蘊(註48)中正之德也。德充實,則成章而有輝光。

<sup>[</sup>註46] 一有「之」字。

<sup>[</sup>註47] 《四庫》本作「漁」。

<sup>[</sup>註48] 一无「蘊」字。

#### 有隕自天,志不舍命也。

命,天理也。舍,違也。至誠中正,屈己求賢,存志合於天理,所以有隕自天,必 得之矣。

#### 上九:姤其角,吝,无咎。

至剛而在最上者,角也。九以剛居上,故以角爲象。人之相遇,由降屈以相從,和順以相接,故能合也。上九高亢而剛極,人誰與之?以此求遇,固可吝也。己則如是,人之遠之,非它人之罪也。由己致之,故无所歸咎。

#### 象曰:姤其角,上簈吝也。

既處窮上,剛亦極矣,是上窮而致吝也。以剛極居高而求遇,不亦難乎?

# 坤下 兌上 萃

《序卦》:「姤者,遇也。物相遇而後聚,故受之以萃。萃者,聚也。」

物相會遇,則成群聚[註49],萃所以次姤也。爲卦兌上坤下,[註50]澤上於地。

水之聚也,故爲萃。不言「澤在地上」,而云「澤上於地」,言「上於地」,則爲方聚之義也。

## 萃:亨,王假有廟。

王者萃聚天下之道,至於有廟,極 (註 51) 也。群生至眾也,而可一其歸仰;人心莫知其鄉也,而能致其誠敬;鬼神之不可度也,而能致其來格天下。萃合人心,總攝眾志之道非一,其至大莫過於宗廟;故王者萃天下之道,至於有廟,則萃道之至也。

祭祀之報,本於人心,聖人制禮以成其德耳。故豺獺能祭,其性然也。

萃下有「亨」字,羨文也。亨字自在下,與渙不同。渙則先言卦才,萃乃先言卦義, 《彖辭》甚明。

萃,在季反。假,更曰反;下同。

<sup>[</sup>註49]《四庫》本無「聚」字。

<sup>[</sup>註50] 底本無「兑上坤下」四字,依《程傳》體例,疑刻本缺漏,故據《四庫》本補入。

<sup>[</sup>註51] 一无「極|字。

#### 利見大人,亨,利貞。

天下之聚,必得大人以治之。人聚則亂,物聚則爭,事聚則紊,非大人治之,則 萃所以致爭亂也。萃以不正,則人聚爲苟合,財聚爲悖入,安得亨平?故利貞。

#### 用大牲,吉,利有攸往。

萃者,豐厚(註52)之時也,其用宜稱,故用大牲吉。

事莫重於祭,故以祭享而言。上交鬼神,下接民物,百用莫不皆(註53)然。當萃之時,而交物以厚(註54),則是享豐富之吉也,天下莫不同其富樂矣。若時之(註55)厚,而交物以薄,乃不享其豐美,天下莫之與,而悔吝生矣。蓋隨時之宜,順理而行,故《彖》云「順天命也」。

夫不能有爲者,力之不足也。當萃之時,故利有攸往。大凡興功 [註 56] 立事,貴得可爲之時;萃而後用,是以動而有裕,天理然也。

#### 彖曰:萃,聚也;順以說,剛中而應,故聚也。

萃之義,聚也。順以 (註 57) 說,以卦才言也。上說而下順,爲上以說道使民,而順於人心;下說上之政令,而順從於上。既上下順說,又陽剛處中正之位,而下有應助;如此,故能聚也。欲天下之萃,才非如是,不能也。

說,音悅;下同。

## 王假有廟,致孝享也。

王者萃人心之道,至於建立宗廟,所以致其孝享之誠也。祭祀,人心之所自盡也,故萃天下之心者,无如孝享。王者萃天下之道,至於有廟,則其極也。

享,香兩反。

## 利見大人,亨,聚以正也。

萃之時,見大人則能亨,蓋聚以正道也。見大人,則其聚以正道,得其正則亨矣。

<sup>[</sup>註52] 《四庫》本作「亨」。

<sup>[</sup>註53] 一作「當」。

<sup>[</sup>註54] 底本作「享」,以下文「交物以薄」觀之,應爲「厚」字,據《四庫》本更正。

<sup>[</sup>註55] 一无「之」字。

<sup>(</sup>註56) 《四庫》本作「工」。

<sup>[</sup>註57] 一作「而」。

萃不以正,其能亨(註58) 平?

#### 用大牲,吉,利有攸往,順天命也。

用大牲,承上有廟之文,以享祀而言;凡事莫不如是。豐聚之時,交於物者當厚,稱其宜也。物聚而力贍,乃可以有爲,故利有攸往;皆天理然也,故云「順天命也」。

#### 觀其所聚,而天地萬物之情可見矣。

觀萃之理,可以見天地萬物之情也。天地之化育,萬物之生成,凡有者皆聚也。有 无、動靜、終始之理,聚散而已;故觀其所以聚,則天地萬物之情可見矣。

### 象曰:澤上於地,萃;君子以除戎器,戒不虞。

澤上於地,爲萃聚之象。君子觀萃象,以除治戎器,用戒 (註 59) 備於不虞。凡物之萃,則有不虞度之事,故眾聚則有爭,物聚則有奪。大率既聚 (註 60) 則多故矣,故觀萃象而戒也。

除,謂簡治也,去弊惡也。除而聚之,所以戒不虞也。

上, 時掌反。除, 如字; 本亦作儲。

## 初六:有孚不終,乃亂乃萃。若號,一握為笑,勿恤,往无咎。

初與四爲正應,本有孚以相從者也;然當萃時,三陰聚處,柔无守正之節,若捨正 應而從其類,乃有孚而不終也。

乃亂,惑亂其心也。乃萃,與其同類聚也。初若守正,不從號呼,以求正應,則一握笑之矣。一握,俗語,一團也,謂眾 [註 61] 以爲笑也。若能勿恤,而往從剛陽之正應,則无過咎;不然,則入小人之群矣。

握,鳥學反。號,呼報反。

## 象曰:乃亂乃萃,其志亂也。

其心志爲同類所惑亂,故乃萃於群陰也。不能固其守,則爲小人所惑亂,而失其正矣。

<sup>[</sup>註58] 底本作「享」,形譌。據上文「得其正則亨矣」觀之,應爲「亨」字,據《四庫》本 更正。

<sup>[</sup>註59] 底本作「戎」,形譌。《象》爲「戒不虞」,故應爲「戒」字,據《四庫》本更正。

<sup>[</sup>註60] 《四庫》本作「眾」。

<sup>[</sup>註61] 一有「聚」字。

#### 六二:引吉,无咎,孚乃利用禴。

初,陰柔又非中正,恐不能終其孚,故因其才而爲之戒。二,雖陰柔而得中正,故雖 戒而微辭(註62)。凡爻之辭,關(註63)得失二端者,爲法爲戒,亦各隨其才而設也。

引吉无咎:引者,相牽也。人之交,相求則合,相待(註64)則離。二與五爲正應,當萃者也;而相遠,又在群陰之間,必相牽引,則得其萃矣。

五居尊位,有中正之德;二亦以中正之道往與之萃,乃君臣和合也。其所共致,豈 可量也,是以吉而无咎也。无咎者,善補過也;二與五不相引,則過矣。

孚乃利用禴: 孚信之在中,誠之謂也。禴,祭之簡薄者也。菲薄而祭,不尙備物, 專 (註 65) 以誠意交於神明也。孚乃者,謂有其 (註 66) 孚,則可不用文飾,專以至誠 交於上 (註 67) 也。以禴言者,謂薦其誠而已。上下相聚而尙飾焉,是未誠也。蓋其 中實者,不假飾於外,用禴之義也。孚信者,萃之本也。不獨君臣之聚,凡天下之 聚,在誠而已。

禴, 羊略反。

## 象曰:引吉无咎,中未變也。

萃之時,以得聚爲吉,故九四爲得上下之萃。二與五雖正應,然異處有間,乃當萃而未合者也;故能相引而萃,則吉而无咎。以其有中正之德,未遽至改變也;變則不相引矣。

或曰:「二既有中正之德,而《象》云「未變」,辭若不足,何也?」曰:「群陰比處, 乃其類聚。方萃之時,居其間,能自守不變,遠須正應,剛立者能之。二,陰柔之 才,以其有中正之德,可覬其未至於變耳,故《象》含其意以存戒也。」

## 六三:萃如,嗟如,无攸利。往无咎,小吝。

三,陰柔不中正之人也,求萃於人,而人莫與求。四,則非其正應,又非其類,是以 不正,爲四所棄也。與二,則二自以中正應五,是以不正,爲二所不與也。故欲 (計

<sup>[</sup>註62] 一作「其辭微」。

<sup>[</sup>註63] 一作「開」。

<sup>[</sup>註64] 一作「恃」。

<sup>[</sup>註65] 《四庫》本作「直」。

<sup>[</sup>註66] 一作「其有」。

<sup>[</sup>註67] 一有「下」字。

<sup>[</sup>註68] 一无「欲」字。

68〕 萃如,則爲人棄絕而嗟如,不獲萃而嗟恨也。上下皆不與,无所利也。唯往而從 上六,則得其萃,爲无咎也。

三與上,雖非陰陽正應,然萃之時,以類相從,皆以柔居一體之上;又皆无與,居相應之地,上復處說順之極,故得其萃而无咎也。

《易》道變動无常,在人識之。然而小吝,何也?三始求聚 [註 69] 於四與二,不獲,而後往從上六。人之動爲如此,雖得所求,亦可小羞吝也。

#### 象曰:往无咎,上巽也。

上居柔說之極,三往而无咎者,上六巽順而受之也。

#### 九四:大吉,无咎。

四當萃之時,上比九五之君,得君臣之聚也;下比下體群陰,得下民之聚也。得上下之聚,可謂善矣。然四以陽居陰,非正也;雖得上下之聚,必得大吉,然後爲无咎也。大爲周遍之義。无所不周,然後爲大;无所不正,則爲大吉,大吉則无咎也(註70)。

夫上下之聚,固有不由正道而得者;非理枉道而得君者,自古多矣。非理枉道而得 民者,蓋亦有焉;如齊之陳常 [註 71],魯之季氏是也。然得爲大吉乎?得爲无咎乎? 故九四必能大吉,然後爲 註 72 无咎也。

## 象曰:大吉无咎,位不當也。

以其位之不當,疑其所爲未能盡善,故云:「必得大吉,然後爲 註 73 无咎也。」 非盡善,安得爲大吉乎?

## 九五:萃有位,无咎。匪孚,元永貞,悔亡。

九五居天下之尊,萃天下之眾,而君臨之,當正其位,修其德。

以陽剛居尊位,稱其位矣,爲有其位矣(註74)。得中正之道,无過咎也。如是而有不信而未歸者,則當自反,以脩其「元永貞」之德,則无思不服,而「悔亡」矣。

<sup>[</sup>註69] 《四庫》本作「萃」。

<sup>[</sup>註70] 一作「矣」。

<sup>[</sup>註71] 《四庫》本作「恒」。按:陳常,春秋齊人,漢避孝文帝諱,改恒爲常。

<sup>[</sup>註72] 一作「能」。

<sup>〔</sup>註73〕一作「能」。

<sup>[</sup>註74] 一作「也」。

元永貞者,君之德,民所歸也;故比天下之道,與萃天下之道,皆在此三者。

王者既有其位,又有其德,中正无過咎,而天下尚有未信服歸附者,蓋其道未光大也,元永貞之道未至也,在脩德以來之;如苗民逆命,帝乃誕敷文德。舜德非不至也,蓋有遠近昏明之異,故其歸有先後;既有未歸,則當脩德也。所謂德,元永貞之道也。

元,首也、長也,爲君德,首出庶物,君長群生,有尊大之義焉,有主統之義焉;而又恒永貞固,則通於神明,光於四海,无思不服矣。乃无匪孚,而其悔亡也。所謂「悔」,志之未光,心之未慊也。

#### 象曰: 萃有位, 志未光也。

《象》舉爻上句。王者之志,必欲誠信著於天下,有感必通,含生之類,莫不懷歸。若尚有匪孚,是其志之未光大(註75)也。

#### 上六:齎咨涕洟,无咎。

六,說之主。陰柔小人,說高位而處之,天下孰肯與也?求萃而人莫之與,其窮至 於齎咨而涕洟也。齎咨,咨嗟也。人之絕之,由己自取,又將誰咎?爲人惡絕,不 知所爲,則隕穫而至嗟涕,眞小人之情狀也。

齎,將池反。咨,音諮。涕,音體。洟,池麗反。

## 象曰: 齎咨涕洟, 未安上也。

小人所處,常失其官。既貪而從欲,不能自擇安地,至於困窮,則顚沛不知所爲。 六之涕洟,蓋不安於處上也。君子慎其所處,非義不居;不幸而有危困,則泰然自 安,不以累其心。小人居不懌(註76)安,常履非據;及其窮迫,則隕穫躁撓,甚至 涕泣(註77),爲可羞也。未者,非遽之辭,猶俗云「未便」也;未便能安於上也。 陰而居上,孤處无與,既非其據,豈能安乎?

## 異下 坤上 升

《序卦》:「萃者,聚也。聚而上者,謂之升,故受之以升。」

<sup>[</sup>註75] 底本作「夫」,形譌,據《四庫》本更正。

<sup>[</sup>註76] 《四庫》本作「擇」。

<sup>[</sup>註77] 《四庫》本作「洟」

物之積聚,而益高大,聚而上也,故爲升,所以次於萃也。爲卦坤上巽下。

木在地下,爲地中生木。木生地中,長而益高,爲升之象也。

## 升:元亨,用見大人,勿恤。南征吉。

升者,進而上也。升進 [註 78] 則有亨義,而以卦才之善,故元亨也。用此道以見大人,不假憂恤,前進則吉也。南征,前進也。

升,式陵反。

#### 彖曰:柔以時升,巽而順,剛中而應,是以大亨。

以二體言,柔升,謂坤上行也。巽既體卑而就下,坤乃順時而上,升以時也,謂時當升也。柔既上而成升,則下巽而上順。以巽順之道升,可謂時矣。

二以剛中之道應於五,五以中順之德應於二,能異而順,其升以時,是以元亨也。《彖》 文誤作「大亨」,解在大有卦。

#### 用見大人,勿恤,有慶也。

凡升之道,必由大人。升於位,則由王公;升於道,則由聖賢。用巽順剛中之道以 見大人,必遂其升。

勿恤,不憂其不遂也。遂其升,則己之(註79)福慶,而福慶及物也。

# 南征吉,志行也。

南,人之所向。南征,謂前進也。前進則遂其升,而得行其志,是以吉也。

# 象曰:地中生木、升;君子以順德、積小以高大。

木生地中,長而上升,爲升之象。君子觀升之象,以順修其德,積累微小,以至高大也。順則可進,逆乃退也。萬物之進長(註80),皆以順道也。善不積,不足以成名;學業之充實,道德之崇高,皆由積累而至。積小所以成高大,升之義也。

# 初六:允升,大吉。

初以柔居巽體之下,又巽之主,上承於九二之剛,巽之至者也。二以剛中之德,上 應於君,當升之任者也。

<sup>[</sup>註78] 一作「進升」。

<sup>[</sup>註79] 一作「有」。

<sup>[</sup>註80] 《四庫》本無「長」字。

允者,信從也。初之柔異,唯信從於二;信二而從之同升,乃大吉也。

二,以德言則剛中,以力言則當任。初之陰柔,又无應援,不能自升,從於剛中之 賢以進,是由剛中之道也,吉孰大焉?

#### 象曰:允升大吉,上合志也。

與在上者合志同升也。上,謂九二。從二而升,乃與二同志也。能信從剛中之賢 (註81),所以大吉。

# 九二:孚乃利用論,无咎。

二,陽剛而在下;五,陰柔而居上。夫以剛而事柔,以陽而從陰,雖有時而然,非順道也。以暗而臨明,以剛而事弱,若黽勉於事勢,非誠服也。上下之交不以誠,其可以(註82)久乎?其可以有爲乎?五雖陰柔,然居尊位;二雖剛陽,事上者也,當內存至誠,不假文飾於外。誠積於中,則自不事外飾,故曰「利用禴」,謂尚誠敬也。

自占剛強之臣,事柔弱之君,未有不爲矯飾者也。禴,祭之簡質者也。云「孚乃」, 謂既孚,乃宜不用文飾,專以其誠感通於上也。如是則得无咎。以剛強之臣,而事 柔弱之君,又當升之時,非誠意相交,其能免於咎乎?

# 象曰:九二之孚,有喜也。

二能以孚誠事上,則不唯爲臣之道无咎而已,可以行剛中之道,澤及天下,是有喜也。凡《象》言「有慶」者,如是則有福慶及於物也。言「有喜」者,事既善而又 [註 83] 有可 [註 84] 喜也。如大畜「童牛之牿,元吉」,《象》云「有喜」。蓋牿於童則易,又免強制之難,是有可喜也。

# 九三:升虚邑。

三以陽剛之才,正而且巽,上皆順之;復有援應(註85),以是而升,如入无人之邑。 孰禦哉?

象曰:升虚邑,无所疑也。

<sup>(</sup>註81) 一作「道」。

<sup>(</sup>註82) 一无「以|字。

<sup>[</sup>註83] 一无「又|字。

<sup>(</sup>註84) 一无「可|字。

<sup>[</sup>註85] 一作「者」。

入无人之邑,其進无疑阻也。

六四: 王用亨于岐山, 吉, 无咎。

四,柔順之才,上順君之升,下順下之進,己則止其所焉。以陰居柔,陰而在下, 止其所也。

昔者,文王之居岐山之下,上順天子,而欲致之有道;下順天下之賢,而使之升進; 己則柔順謙恭,不出其位。至德如此,周之王業,用是而亨也。四能如是,則亨而 吉,且无咎矣。

四之才固自善矣,復有无咎之辭,何也?曰:「四之才雖善,而其位當戒也。居近君之位,在升之時,不可復升,升則凶咎可知,故云:『如文王則吉而无咎也。』然處大臣之位,不得无事於升。當上升其君之道,下升天下之賢,己則止其分焉。分雖當止,而德則當升也,道則當亨也。盡斯道者,其唯文王乎!」

亨,許更反。岐,其宜反;下同。

#### 象曰:王用亨于岐山,順事也。

四居近君之位,而當升時,得吉而无咎者,以其有順德也。以柔居坤,順之至也。 文王之亨于岐山,亦以順時順事(註86)而已。上順於上,下順乎下,己順處其義, 故云「順事也」。

# 六五: 貞吉, 升階。

五,以下有剛中之應,故能居尊位而吉。然質本陰柔,必守貞固,乃得其吉也。若 不能貞固,則信賢不篤,任賢不終,安能吉也?

階,所由而升也。任剛中之賢,輔之而升,猶登進自階,言有由而易也,指言九二 正應。然在下之賢,皆用升之階也。能用賢,則彙升矣。

# 象曰:貞吉升階,大得志也。

倚任賢才,而能貞固,如是而升,可以致天下之大治,其志可大得也。君道之升 (註87),患无賢才之助爾;有助,則由(註88)自階而升也。

<sup>(</sup>註86) 《四庫》本無「順事」二字。

<sup>[</sup>註87] 一作「興」。

<sup>(</sup>註88) 《四庫》本作「猶」。《註評》本引《吉澄》本、《武英殿》本亦作「猶」。

#### 上六: 冥升, 利于不息之貞。

六以陰居升之極,昏冥於升,知進而不知止者也,其爲不明甚矣。然求升不已之心,有時而用於貞正,而當不息之事,則爲宜矣。君子於貞正之德,終日乾乾,自強不息,如(註89)上六不已之心,用之於此,則利也。以小人貪求无已之心,移於進德,則何善如之?

#### 象曰:冥升在上,消不富也。

香冥於升,極上而不知已,唯有消亡,豈復有加益也?不富,无復增益也。升既極, 則有退而无進也。

# 大下 分上 **困**

《序卦》:「升而不已必困,故受之以困。」

升者,自下而上。自下升上,以力進也,不已必困矣;故升之後,受之以困也。困者,憊乏之義。爲卦兌上而坎下。

水居澤上,則澤中有水也;乃在澤下,枯涸无水之象,爲困乏之義。

又: 兌以陰在上, 坎以陽居下, 與上六在二陽之上, 而九二陷於二陰之中, 皆陰柔 揜於陽剛, 所以爲困也。君子爲小人所掩蔽, 窮困之時也。

# 困:亨,貞大人,吉,无咎,有言不信。

如卦之才,則困而能亨;且得貞正,乃大人處困之道也,故能吉而无咎。大人處困, 不唯其道自吉,樂天安命(註90),乃不失其吉也;況隨時善處,復有咎(註91)乎? 有言不信:當困而言,人誰信之?

# 彖曰:困,剛揜也。

卦所以爲困,以剛爲柔所掩蔽也。陷於下而掩於上,所以困也。陷亦揜也,剛陽君 子而爲陰柔小人所掩蔽,君子之道困窒之時也。

揜,於檢反。

<sup>[</sup>註89] 一作「以」。

<sup>[</sup>註90] 一作「知命」、一作「安義」。

<sup>[</sup>註91] 《四庫》本作「裕」,應爲形譌。《二程集》:「有」字疑當作「何」,語法方順。

#### 險以說,困而不失其所,亨,其唯君子乎?

以卦才言處困之道也。

下險而上說,爲處險而能說;雖在困窮艱險(註92)之中,樂天安義,自得其說樂也。 時雖困也,處不失義,則其道自亨,困而不失其所亨也。能如是者,其唯君子乎? 若時當困而反亨,身雖亨,乃其道之困也。君子,大人通稱。

說,音悅。

#### 貞大人吉,以剛中也。

困而能貞,大人所以吉也,蓋其以剛中之道也,五與二是也。非剛中,則遇困而失 其正矣。

#### 有言不信,尚口,乃窮也。

當困而言,人所不信,欲以口免困,乃所以致窮也。以〔註93〕說處困,故有尙口之 戒。

## 象曰:澤无水,困;君子以致命遂志。

澤无水,困乏之象也。君子當困窮之時,既盡其防慮之道,而不得免,則命也;當 推致其命,以遂其志。知命之當然也,則窮塞禍患,不以動其心,行吾義而已。苟 不知命,則恐懼於險難,隕穫於窮戹;所守亡矣,安能遂其爲善之志乎?

# 初六:臀困于株木,入于幽谷,三歲不覿。

六以陰柔處於至卑,又居坎險之下,在困不能自濟者也。必得在上剛明之人爲援助, 則可以濟其困矣。

初與四爲正應。九四以陽而居陰,爲不正,失 (註 94) 剛而不中,又方困於陰揜,是 惡能濟人之困,猶株木之 (註 95) 不能蔭覆於物。

株木,无枝葉之木也。四,近君之位,在它卦,不爲无助。以居困而不能庇物,故 爲株木。臀,所以居也。臀困於株木,謂无所庇,而不得安其居;居安則非困也。

入於幽谷:陰柔之人,非能安其所遇;既不能免於困,則益迷闇妄動,入於深困。

<sup>[</sup>註92] 一作「險難」。

<sup>[</sup>註93] 《四庫》本有二「以」字,其一應爲衍文。

<sup>(</sup>註94) 一作「夫」。

<sup>[</sup>註95] 《四庫》本有「下」字。

幽谷,深暗之所也。方益入於困,无自出之勢,故至於三歲不覿,終困者也。不覿, 不遇其所亨也。

臀,徒敦反。株、張愚反。覿、大歷反。

象曰:入于幽谷,幽不明也。

幽者(註96),不明也;謂益入昏闇,自陷於深困也。明則不至於陷矣。

九二:困于酒食,朱紱方來,利用享[註97]祀,征凶,无咎。

二以剛中之德困於下,上有九五剛中之君,道同德合,必來相求,故云「朱紱方來」。 方來(註98),方且來也。朱紱,王者之服,蔽膝也。以行來爲義,故以蔽膝言之。

利用享祀:享祀,以至誠通神明也。在困之時,利用至誠,如享祀然。其德既誠 (註 99) , 自能感通於上。自昔賢哲困於幽遠,而德卒升聞,道卒爲用者,唯自守至誠而已。

征凶,无咎:方困之時,若不至誠安處以俟命,往(註100)而求之,則犯難得凶,乃自取也,將誰咎乎?不度時而征,乃不安其所,爲困所動也。失剛中之德,自取凶悔,何所怨咎?諸卦,二、五以陰陽相應而吉,唯小畜與困乃戹於陰,故同道相求。小畜,陽爲陰所畜;困,陽爲陰所搶也。

# 象曰:困于酒食,中有慶也

雖困於所欲,未能施惠於人;然守其剛中之德,必能致亨而有福慶也。雖使時未亨 通,守其中德,亦君子之道亨,乃有慶也。

六三:困于石,據于蒺藜;入于其宮,不見其妻,凶。

六三以隂柔不中正之質,處險極而用剛。居陽,用剛也,不善處困之甚者也。

<sup>[</sup>註96] 《四庫》本無「者」字。

<sup>[</sup>註97] 享祀,《四庫》本皆作「亨祀」。按:亨、享,古義通,下文不再校出。

<sup>[</sup>註98] 「方且來也」, 乃釋「方來」之義。底本缺「方來」二字,據《四庫》本補正。

<sup>[</sup>註99] 一作「成」。

<sup>[</sup>註100]據《導讀》本,《李》本作「征」。

石,堅重難勝之物。蒺藜,刺 (註 101) 不可據之物。三以剛險而上進,則二陽在上, 力不能勝,堅不可犯,益自困耳:困于石也。以不善之德,居九二剛中之上,其不 安猶藉刺:據于蒺藜也。進退既皆益困,欲安其所,益不能矣 (註 102)。

宮,其居所安也。妻,所安之主也。知進退之不可,而欲安其居,則失其所安矣。 進退與處皆不可(註103),唯死而已,其凶可知。

《繫辭》曰:「非所困而困焉,名必辱;非所據而據焉,身必危。既辱且危,死期將至,妻其可得見邪?」

二陽不可犯也,而犯之以取困,是非所困而困也。名辱,其事惡也。三在二上,固 爲據之;然苟能謙柔以下之,則无害矣;乃用剛險以乘之,則不安而取困,如據蒺 藜也。如是,死期(註104)將至,所安之主可得而(註105)見乎?

蒺,音疾。藜,音梨。

象曰:據于蒺藜,乘剛也;入于其宮,不見其妻,不祥也。

據 F 蒺藜 ,謂乘九 二之剛 ,不安猶藉刺也。不祥者 ,不善之徵 ; 失其所安者 ,不善之效 , 故 云 「不見其妻 ,不祥也」。

九四:來徐徐,困于金車,吝,有終。

唯力不足,故困。亨困之道,必由援助。當困之時,上下相求,理當然也。四與初為正應;然四以不中正處困,其才不足以濟人之困。初六 (註 106) 比二,二有剛中之才,足以拯困,則宜爲初所從矣。

金,剛也。車,載物者也。二以剛在下載己,故謂之金車。四欲從初,而阻於二,故其來遲疑而徐徐,是困于金車也。己之所應,疑其少己而之它,將從之,則猶豫 不敢遽前,豈不可羞吝乎?

有終者,事之所歸者,正也;初、四正應,終必相從也。寒士之妻,弱國之臣,各 安其正而已。苟擇勢而從,則惡之大者,不容於世矣。二與四皆以陽居陰,而二以

<sup>[</sup>註101] 一无「刺」字。

<sup>[</sup>註102] 一作「也」。

<sup>[</sup>註103] 一有「則」字。

<sup>[</sup>註104] 《四庫》本作「其」。

<sup>(</sup>註105) 一无「而」字。

<sup>[</sup>註106]《四庫》本無「六」字。

剛中之才,所以能濟困也。居陰者,尙柔也;得中者,不失剛柔之宜也。

象曰:來徐徐,志在下也;雖不當位,有與也。

四應於 [註 107] 初,而隔於二,志在下求,故徐徐而來;雖居不當位爲未善,然其正應相與,故有終也。

九五:劓刖,困于赤紱;乃徐有說,利用祭祀。

截鼻曰劓,傷於上也。去足爲刖,傷於下也。上下皆揜於隂,爲其傷害,劓刖之象 也。

五,君位也。人君之困,由上下无與也。赤紱,臣下之服,取行來之義,故以紱言。人君之困,以天下不來也;天下皆來,則非困也。五雖在困,而有剛中之德;下有九二剛中之賢,道同德合,徐必相應而來,共濟天下之困,是始困而徐有喜說也。

利用祭祀:祭祀之事,必致其誠敬,而後受福。人君在困時,宜念天下之困,求天下之賢,若祭祀然。致其誠敬(計108),則能致天下之賢,濟天下之困矣。

五與二同德,而云「上下无與」,何也?曰:「陰陽相應者,自然相應也;如夫婦、骨內,分定也。五與二皆陽爻,以剛中之德,同而相應,相求而後合者 (註 109) 也,如君臣、朋友,義合也。方其始困,安有上下之與?有與,則非困也 (註 110) ,故徐合而後有 (註 111) 說也。」

二云「享祀」, 五云「祭祀」, 大意則宜用至誠, 乃受福也。祭與祀、享, 泛言之, 則可通; 分而言之, 祭天神、祀地示(註112)、享人鬼。五, 君位, 言祭; 二在下, 言享; 各以其所當用也。

劓, 魚器反。刖, 音月。紱, 音弗。

象曰:劓刖,志未得也;乃徐有說,以中直也;利用祭祀,受福也。 始爲隂搶,无上下之與,方困未得志之時也。徐而有說,以中直之道,得在下之賢,

<sup>[</sup>註107] 一无「於」字。

<sup>[</sup>註108] 一作「至誠」。

<sup>[</sup>註109] 一无「者」字。

<sup>[</sup>註110]《四庫》本無「也」字。

<sup>[</sup>註]]] 一无「有」字。

<sup>[</sup>註112] 《四庫》本作「祇」。

共 (註 113) 濟於困也。不曰「中正與二合」者,云「直」乃宜也。「直」比「正」意 差緩。盡其誠意,如祭祀然;以求天下之賢,則能 (註 114) 亨天下之困,而享受其福 慶也。

上六:困于葛藟,于臲卼,曰動悔有悔,征吉。

物極則反,事極則變。困既極矣,理當變也 註 115)。

葛藟,纏束之物。臲卼,危動之狀。六處困之極,爲困所纏束,而居最高危之地, 困 F 葛藟與臲卼也。

動悔,動輒有悔,无所不困也。有悔,咎前之失也。

曰,自謂也。若能曰:「如是動皆得悔,當變前之所爲,有悔也。能悔,則往而得吉也。」困極而征,則出於困矣,故吉。

三以隂在下卦之上而凶,上居一卦之上而无凶,何也?曰:「三居剛而處險,困而用剛險,故凶。上以柔居說,唯爲困極耳,困極(註116)則有變困之道也。」

困與屯之上,皆以无應居卦終;屯則「泣血漣如」,困則「有悔征吉」,屯險極而困 說體故也。以說順進,可以離乎困也。

藟,力軌反。臲,五結反。卼,五骨反。

象曰:困于葛藟,未當也;動悔有悔,吉行也。

爲困所纏而不能變,未得其道也,是處之未當也。知動則得悔,遂有悔而去之,可 出於困,是其行而吉也。

# 異下 坎上 井

《序卦》:「困乎上者必反下,故受之以井。」

承上「升而不已必困」爲言,謂上升不已而困,則必反於下也。物之在下者,莫如 井,井所以次困也。爲卦坎上巽下。

<sup>(</sup>註113) 《四庫》本作「其」。

<sup>[</sup>註114] 一无「能」字。

<sup>[</sup>註115] 《四庫》本作「矣」。

<sup>[</sup>註116] 底本作「變」,形譌。上文作「困極」,故據《四庫》本更正。

坎,水也。巽之象,則木也;巽之義,則入也。木,器之象,木入於水下而上乎水, 汲(註117) 井之象也。

#### 井:改邑不改井,无喪无得,往來井井。

井之爲物,常而不可改也。邑可改而之它,井不可遷也,故曰「改邑不改井」。汲之 而不竭,存之而不盈:无喪无得也。至者皆得其用:往來井井也。

无喪无得,其德也常;往來井井,其用也周。常也,周也,井之道也。

喪,息浪反。

#### 汔至,亦未繘井。羸其瓶,凶。

汔,幾也。繘,綆也。井以濟用爲功,幾至而未及用,亦與未下繘於井同也。

君子之道, 貴乎有成, 所以五穀不熟, 不如荑稗; 掘井九仞, 而不及泉, 猶爲棄井。 有濟物之用, 而未及物, 猶无有也。羸敗其瓶而失之, 其用喪矣, 是以凶也。羸, 毀敗也。

汔,許訖反。繘,音橘。羸,律悲反;下同。

**彖曰:巽乎水而上水,井。井,養而不窮也。改邑不改井,乃以剛中也。** 巽入於水下,而上其水者,井也。井之養於物,不有窮已 (註 118) ;取之而不竭,德 有常也。邑可改,井不可遷,亦其德之常也。二、五之爻,剛中之德,其常乃如是, 卦之才與義合也。

上,時掌反。

# 汔至,亦未繘井,未有功也。羸其瓶,是以凶也。

雖使幾至,既未爲用,亦與未繘井同。井以濟用爲功,水出乃爲用,未出則何功也? 瓶,所以上水而致用也,羸敗其瓶,則不爲用矣,是以凶也。

# 象曰:木上有水,井;君子以勞民勸相。

木承水而上之(註119),乃器汲水而出井之象。君子觀井之象,法井之德,以勞徠其民,而勸勉以相助之道也。勞徠其民,法井之用也;勸民使相助,法井之施也。

<sup>[</sup>註117] 底本作「伋」,形譌,據四庫更正。

<sup>[</sup>註118] 一作「无有窮也」。

<sup>[</sup>註119] 一作「來」。

勞,力報反。相,息亮反。

初六:井泥不食,舊井无禽。

井與鼎皆物也,就物以爲義。

六以陰柔居下, 上无應援, 无上水之象; 不能濟物, 乃井之不可食也。井之不可 (註 120)食, 以泥污也。在井之下, 有泥之象。井之用, 以其水之養人也, 无水, 則舍置不用矣。

井水之上,人獲其用,禽鳥亦就而求焉。舊廢之井,人既不食,水不復上,則禽鳥亦不復往矣;蓋无以濟物也。

井本濟人之物,六以陰居下,无上水之象,故爲不食。井之不食,以泥也;猶人當 濟物之時,而才弱无援,不能及物,爲時所舍也。

舍,上聲。

# 象曰:井泥不食,下也;舊井无禽,時舍也。

以陰而居井之下,泥之象也。无水而泥,人所不食也。人不食,則水不上,无以及禽鳥,禽鳥亦不至矣。見其不能濟物,爲時所舍置不用也。若能及禽鳥,是亦有所濟也。舍,上聲;與乾之時舍,音不同。

# 九二:井谷射鮒,甕敝漏。

二雖剛陽之才而居下,上无應而比於初,不上而下之象也。井之道,上行者也;澗谷之水,則旁出而就下。二居井而就下,失井之道,乃井而如谷也。井上出,則養人而濟物 [註 121],今乃下就污泥,注於鮒而已。鮒,或以爲鰕,或以爲蟇,井泥中微物耳。

射,注也;如谷之下流,注於鮒也。甕敝漏,如甕之破漏也。陽剛之才,本可以養人濟物,而上无應援,故不能上而就下,是以无濟用之功。如水之在甕,本可爲用, 乃破敝而漏之,不爲用也。

井之初、 〔无功,而不言悔吝 (註 122) ,何也?曰:「失則有悔,過則爲咎; 无應援而不能成用, 非悔咎也。」居二比初, 豈非過乎?曰:「處中, 非過也。不能上, 由

<sup>[</sup>註120] 一无「可」字。

<sup>[</sup>註121] 一作「上出而養人濟物」。

<sup>[</sup>註122] 《四庫》本作「咎」。

无援, 非以比初也。」

谷,古木反。射,食亦反。鮒,音附。甕,屋送反。

#### 象曰: 井谷射鮒, 无與也。

井以上出爲功,二,陽剛之才,本可濟用,以在下而上无應援,是以下比而射鮒。 若上有與之者,則當汲引而上,成井之功矣。

# 九三:井渫不食,為我心惻。可用汲,王明,並受其福。

三以陽剛居得其正,是以(註123)濟用之才者也。在井下之上,水之清潔可食者也。 井以上爲用,居下,未得其用也。陽之性上,又志應上六,處剛而過中,汲汲於上 進,乃有才用而切於施爲;未得其用,則如井之渫治清潔而不見食,爲其(註124) 心之惻怛(註125)也。

三居井之時,剛而不中,故切於施爲,異乎用之則行,舍之則藏者也。然明王用人, 豈求備也,故王明則受福矣。三之才足以濟用,如井之清潔,可用汲而食也。若上 有明王,則當用之而得其效。賢才見用,則己得行其道,君得享其功,下得被其澤, 上下並受其福也。

渫,息列切。

# 象曰:井渫不食,行惻也;求王明,受福也。

井渫治而不見食,乃人有才智而不見用,以不得行爲憂惻也。既以不得行爲惻,則 豈免有求也?故求王明而受福,切(註126)於行也。

# 六四:井甃, 无咎。

四雖陰柔而處正,上承九五之君,才不足以廣施利物,亦可自守者也,故能修治, 則得无咎。

整,砌累也,謂修治也。四雖才弱,不能廣濟物之功,修治其事,不至於廢可也。 若不能修治,廢其養人之功(註1271,則失井之道,其咎大矣。

<sup>[</sup>註123] 《四庫》本作「有」。

<sup>[</sup>註124] 《四庫》本無「其」字。

<sup>[</sup>註125] 底本作「但」,形譌,據《四庫》本更正。

<sup>[</sup>註126] 《四庫》本作「志切」。

<sup>[</sup>註127] 底本作「切」,形譌,據《四庫》本更正。

居高位而得剛陽中正之君,但能處正承上,不廢其事,亦可以免咎也。

象曰:井甃无咎,脩井也。

發者,脩治於井也。雖不能大其濟物之功,亦(註 128) 能脩治(註 129) 不廢也;故无咎,僅能免咎而已。若在剛陽,自不至如是;如是,則可咎矣。

九五 (註130):井冽寒泉食。

五以陽剛中正居尊位,其才其德,盡善盡美,井冽寒泉食也。冽,謂甘潔也。井泉以寒爲美,甘潔之寒泉,叮爲人食也,於井道爲至善也。然而不言吉者,井以上出爲成功,未至於上,未及用也,故至上而後言元吉。

冽,音烈。

象曰:寒泉之食,中正也。

寒泉而可食,井道之至善者也。九(註131) 五中正之德,爲至善之義。


上六: 井收勿幕, 有孚, 元吉。

井以上出爲用,居井之上,井道之成也。收,汲取也。幕,蔽覆也。取而不蔽,其 利无窮。井之施,廣矣!大矣!

有孚,有常而不變也。博施而有常,大善之吉也。夫 (註 132) 體井 (註 133) 之用,博施而有常,非大人孰能?他卦之終,爲極爲變,唯井與鼎終,乃爲成功,是以吉也。收,詩敕切;又如字。

象曰:元吉在上,大成也。

以大善之吉,在卦之上,井道之大成也。井以上爲成功。



<sup>[</sup>註 128] 一作「若」。

<sup>[</sup>註129] 一有亦「字」。

<sup>[</sup>註130] 底本漏刻「九」字,據各本經文補正。

<sup>[</sup>註 131] 底本作「刊」,《四庫》本作「九」。《二程集》亦作「九」。據《註評》本,《吉澄》 本、《武英殿》本均作「九」,應作「九」爲是,更正之。

<sup>[</sup>註132] 一作「人」。

<sup>[</sup>註133] 底本漏刻「井」字,據《四庫》本補正。

《序卦》:「井道不可不革,故受之以革。」

井之爲物,存之則穢敗,易之則清潔,不可不革者也,故井之後,受之以革也。爲 卦兌上離下,澤中有火也。

革,變革也。水火,相息之物,水滅火,火涸水,相變革者也。火之性上,水之性下,若相違行,則睽而已;乃火在下,水在上,相就而相剋,相滅息者也,所以爲革也。 又:二女同居,而其歸各異,其志不同,爲不相得也,故爲革也。

革:已(註134 日乃孚,元亨,利貞,悔亡。

革者,變其故也。變其故,則人未能遽信,故必已日,然後人心信從。

元亨,利貞,悔亡:弊壞而後革之,革之所以致其通也,故革之而可以大亨。革之而利(註135)正,道則可久,而得去故之義。无變動之悔,乃悔亡也。革而无甚益,猶(註136)可悔已(註137),況反害乎?占人所以重改作也。

#### 彖曰:革,水火相息。二女同居,其志不相得,曰革。

澤火相滅息,二(註138) 女志不相得,故爲革。息爲止息,又爲生息;物止而後有生,故爲生義。革之相息,謂止息也。

# 已日乃孚[註139],革而信之。

事之變革,人心豈能便信?必終日而後孚。在上者,於改爲之際,當詳(註140)告申令,至於已日,使人信之。人心不信,雖強之行,不能成也。先正政令,人心始以爲疑者有矣,然其久也必信。終不孚而成善治者,未之有也。

# 文明以說,大亨以正,革而當,其悔乃亡。

以卦才言革之道也。

離爲文明,兌爲說。文明,則理无不盡,事无不察;說,則人心和順,革而能照察

<sup>[</sup>註 134] 底本刻字, 已、已、己不分。已日, 有作已者, 有作已者, 有作己者。《程傳》作 「終」解, 故從之作「已」(一×)。

<sup>[</sup>註135]《四庫》本作「利於」。

<sup>[</sup>註136] 一有「有」字。

<sup>[</sup>註137] 《四庫》本作「也」。

<sup>[</sup>註138] 《四庫》本,「二」字前有「又」字。

<sup>[</sup>註139] 底本缺「巳日乃」三字,據《四庫》本及參考各家經文補正。

<sup>[</sup>註140]《四庫》本作「祥」。

事理。和順人心,可致大亨,而得貞正如是,變革得其至當,故悔亡也。

天下之事,革之不得其道,則反致弊害,故革有悔之道。唯革之至當,則新舊之悔皆亡也。

說,音悅。

# 天地革而四時成。湯、武革命,順乎天而應乎人,革之時大矣哉!

惟 (註 141) 革之道,極乎天地變易,時運終始也。天地、陰陽,推遷改易而成四時,萬物於是生長成終,各得其官,革而後四時成也。

時運既終,必有革而新之者。王者之興,受命於天,故易世謂之革命。湯、武之王, 上順天命,下應人心,順乎天而應乎人也。天道變改,世故 (註 142) 遷易,革之至大 也,故贊之曰「革之時大矣哉」。

#### 象曰: 澤中有火, 革; 君子以治歷明時。

水火相息為革;革,變也。君子觀變革之象,推日月星辰之遷易,以治歷數,明四時之序也。夫變易之道,事之至大,理之至明,跡之至著,莫如四時;觀四時而順變革,則與天地合其序矣。

# 初九:鞏用黃牛之革。

變革,事之大也;必有其時,有其位,有其才,審慮而慎動,而後可以无悔。

九,以時,則為 (註 143) 初也;動於事初,則无審慎之意,而有躁易之象。以位,則下也;无時无援而動於下,則有僭妄之咎,而无體勢之重。以才,則離體而陽也;離性上而剛體健,皆速於動也。其才如此,有爲則凶咎至矣。蓋剛不中而體躁,所不足者,中與順也;當以中順自固,而无妄動則可也。

鞏,局束也。革,所以包束。黄,中色。牛,順物。鞏用黃牛之革,謂以中順之道 自固,不妄動也。

不云「吉凶」,何也?曰:「妄動則有凶咎;以中順自固,則不革而已,安得便有吉 凶乎?」

<sup>(</sup>註 141) 《四庫》本作「推」。《註評》本據《吉澄》本、《武英殿》本亦作「推」。作「惟」 字文意亦通,尊重原刻本,不作更動。

<sup>[</sup>註142] 一作「事」。

<sup>[</sup>註143]《四庫》本無「爲」字。

#### 象曰:鞏用黃牛,不可以有為也。

以初九時、位、才,皆不可以有爲,故當以中順自固也。

六二:已日乃革之,征吉,无咎。

以六居二,柔順而得中正;又文明之主,上有剛陽之君,同德相應。中正則无偏蔽, 文明則盡事理,應上則得權勢,體順則无違悖。時可矣,位得矣,才足矣,處革之 至善者也。然臣道不當爲革之先,又必待上下之信,故已日乃革之也。

如二之才德,所居之地,所逢之時,足以革天下之弊,新天下之治;當進而上輔於 君,以行其道,則吉而无咎也。不進則失可爲之時,爲有咎也。

以二體柔而處當位,體柔則其進緩,當位則其處 (註 144) 固。變革者,事之大,故有此戒。二得中而應剛,未至失於柔也。聖人因其有可戒之疑,而明其義耳,使賢才不失可爲之時也。

# 象曰:已日革之,行有嘉也。

已日而革之,征則吉而无咎者,行則有嘉慶也。謂可以革天下之弊,新天下之事; 處而不行,是无救弊濟世之心,失時而有咎也。

# 九三:征凶,貞厲。革言三就,有孚。

九三以剛陽爲下之上,又居離之上,而不得中,躁動於革者也。在下而躁於變革,以是而行,則有凶也。然居下之上,事苟當革,豈可不爲也?在乎守貞正而懷危懼,順從公論,則可行之不疑。

革言,謂當革之論。就,成也、合也。審察當革之言,至於三而皆合,則可信也,言重慎之至。能如是,則必得至當,乃有孚也,己(註145)可信而眾所信也。如此,則可以革矣。

在革之時,居下之上,事之(註146)當革,若畏懼而不爲,則失時爲害。唯當慎重之至,不自任其剛明,審稽公論,至於三就(註147)而後革之,則无過矣。

# 象曰:革言三就,又何之矣?

<sup>[</sup>註 144] 《註評》本作「事」,不知何據?疑爲誤植。

<sup>{</sup>註145}底本作「已」,《四庫》本作「己」,《導讀》本、《註評》本皆從之。今從眾。

<sup>[</sup>註146] 一作「有」。

<sup>〔</sup>註147〕一作「復」。

稽之眾論,至於三就,事至當也。又何之矣,乃俗語,更何往也。如是而行,乃順 理時行,非己之私意所欲爲也,必得其宜矣。

#### 九四:悔亡,有孚,改命吉。

九四,革之盛也。陽剛,革之才也。離下體而進上體,革之時也。居水火之際,革之勢也。得近君之位,革之任也。下无係 [註 148] 應,革之志也。以九居四,剛柔相際,革之用也。四既具此,可謂當革之時也。

事之可悔而後革之,革之而當,其悔乃亡也。革之既當,唯在處之以至誠,故有孚 則改命吉。改命,改爲也,謂革之也。既事當而弊革,行之以誠,上信而下順,其 吉可知。

四非中正而至善,何也?曰:「唯其處柔也,故剛而不過,近而不逼,順承中正之君, 乃中正之人也。《易》之取義无常也,隨時而已。」

#### 象曰:改命之吉,信志也。

改命而吉,以上下信其志也。誠既至,則上下信矣 [註 149]。革之道,以上下之信爲本,不當、不孚,則不信。當而不信,猶不可行也,況不當乎?

# 九五:大人虎變,未占,有孚。

九五以陽剛 (註 150) 之才、中正之德居尊位,大人也。以大人之道,革天下之事,无不當也,无不時也。所過變化,事理炳著,如虎之文采,故云「虎變」。龍虎,大人之象也;變者,事物之變。

曰「虎」,何也?曰:「大人變之,乃大人之變也。以大人中正之道 (註 151) 變革之, 炳然昭著,不待占決。知其至當,而天下必信也。天下蒙大人之革,不待占決,知 其至當而信之也。」

# 象曰:大人虎變,其文炳也。

事理明著,若虎文之炳焕明盛也。天下有不孚乎?

炳,兵領反。

<sup>[</sup>註148] 一有「无」字。

<sup>(</sup>註149)一作「也」。

<sup>[</sup>註150] 《四庫》本作「剛陽」。

<sup>(</sup>註151)一作「徳」。

上六:君子豹變,小人革面,征凶;居,貞吉。

革之終,革道之成也。君子,謂善人。良善,則己從革而變,其著見若豹之彬蔚也。 小人,昏愚難遷者;雖未能心化,亦革其面,以從上之教令也。龍虎,大人之象, 故大人云「虎」,君子云「豹」也。

人性本善,皆可以變化;然有下愚,雖聖人不能移者。以堯、舜爲君,以聖繼聖, 百有餘年,天下被化,可謂深且久矣;而有苗、有象,其來格烝乂,蓋亦革面而已。

小人既革其外,革道可以爲成也。苟更從而深治之,則爲已甚;已甚,非道也,故 至革之終而又征,則凶也,當貞固以自守。革至於極,而不守以貞,則所革隨復變 矣。天下之事,始則患乎難革;已革,則患乎不能守也。 故革之終,戒以居貞則吉 也。居貞,非爲六戒乎?曰:「爲革終言也;莫不在其中矣。」

人性本善,有不可革者,何也?曰:「語其性,則皆善也;語其才,則有下愚之不移。所謂下愚,有二焉:自暴也(註152),自棄也。人苟以善自治,則无不可移者;雖昏愚之至,皆可漸磨而進也。唯自暴者,拒之以不信;自棄者,絕之以不爲。雖聖人與居,不能化而入也,仲尼之所謂下愚也。然天下自棄自暴者,非必皆昏愚也;往往強戾而才力有過人者,商辛是也。聖人以其自絕於善,謂之下愚;然考其歸,則誠愚也。」

既曰「下愚」,其能革面,何也?曰:「心雖絕於善道,其畏威而寡罪,則與人同也。 唯其有與人同,所以知其非性之罪也。」

象曰:君子豹變,其文蔚也;小人革面,順以從君也。

君子從化遷善,成文彬蔚,章見於外也。中人以上,莫不變革,雖 [註 153] 不移之小人,則亦不敢肆其惡。革易其外,以順從君上之教令,是革面也。至此,革道成矣。小人勉而假善,君子所容也;更往而治之,則凶矣。



《序卦》:「革物者莫若鼎,故受之以鼎。」

鼎之爲用,所以革物也;變腥而爲熟,易堅而爲柔。水火不可同處也,能使相合爲

<sup>(</sup>註152) 一无「也」字。

<sup>[</sup>註153] 一作「唯」。

用而不相害,是能革物也,鼎所以次革也。爲卦上離下巽。

所以爲鼎,則取其象焉,取其義焉。取其象者有二:以全體言之,則下植爲足,中 實爲腹。中實(註154)受物,在中之象。對峙於上者,耳也;橫亘乎上者,鉉也,鼎 之象也。以上下三體言之,則中虛在上,下有足以承之,亦(註155)鼎之象也。

取其義,則木從火也。巽,入也,順從之義。以木從火,爲燃之象。火之用,唯燔 與烹。燔不假器,故取烹象而爲鼎。以木巽火,烹飪之象也。

制器取其 [註 156] 象也,乃象器以爲卦乎?曰:「制器取於象也。象存 [註 157] 乎卦,而卦不必先器。聖人制器,不待見卦而後知象,以眾人之不能知象也,故設卦 [註 158]以示之。卦器之先後,不害於義也。」

或疑鼎非自然之象,乃人爲也。曰:「固人爲也;然烹飪可以成物,形制如是則可用,此非人爲,自然也。在井亦然。器雖在卦先,而所取者,乃卦之象,卦復用器以爲義也。」

#### 鼎:元吉,亨。

以卦才言也。如卦之才,可以致元亨也。止當云「元亨」,文羨「吉」字。卦才可以 致元亨,未便有元吉也。《彖》復止云「元亨」,其羨明矣。

鼎,下冷反。

# 彖曰:鼎,象也。

卦之爲鼎,取鼎之象也。鼎之爲器,法卦之象也 [註 159]。有象而後有器,卦復用器而爲義也。

鼎,大器也,重寶也;故其制作形模,法象尤嚴。鼎之名,正也;古人訓方,方, 實正也。以形言,則耳對植於上,足分峙於下,周圓內外,高卑厚薄,莫不有法而 至正。至正,然後成安重之象 (註 160);故鼎者,法象之器,卦之爲鼎,以其象也。

<sup>[</sup>註154] 《四庫》本無「中實」二字。

<sup>[</sup>註155] 一无「亦」字。

<sup>[</sup>註156] 一作「諸」。

<sup>[</sup>註157] 底本作「百」, 形譌,據《四庫》本更正。《註評》本據《武英殿》本亦作「存」。

<sup>(</sup>註158) 一无「卦|字。

<sup>[</sup>註159]一作「法象之器也」。

<sup>[</sup>註160] 底本作「彖」,據《四庫》本更正。

以木巽火,亨飦也;聖人亨以享上帝,而大亨以養聖賢。

以二體言鼎之用也。

以木巽火:以木從火,所以烹(註161)飪也。鼎之爲器,生人所賴至切者也;極其用之大,則聖人亨以享上帝,大亨以養聖賢。聖人,古之聖王。大,言其廣。

亨,普庚反。飪,入甚反。

巽而耳目聰明,柔進而上行,得中而應乎剛,是以元亨。

上既言鼎之用矣,復以卦才言。人能如卦之才,可以致元亨也。

下體巽,爲巽順於理。離明而中虛於上,爲耳目聰明之象。凡離在上者,皆云「柔進而上行」。柔,在下之物,乃居尊位,進而上行也。以明居尊,而得中道,應乎剛,能用剛陽之道也。五居中,而又以柔而應剛,爲得中道。其才如是,所以能元亨也。上,時掌反。

象曰:木上有火,鼎;君子以正位凝命。

木上有火,以木巽火也,烹飪之象,故爲鼎。君子觀鼎之象,以正位凝命。

鼎者,法象之器,其形端正,其體安重;取其端正之象,則以正其位,謂正其所居 之位。

君子所處必正,其小至於席,不正不坐,毋跛毋倚。取其安重之象,則以 (註 162) 凝其命令,安重其命令也。

凝,聚止之義,謂安重也。今世俗有「凝然」之語,以命令而言耳,凡動爲皆當安 重也。

凝,魚承反。

初六:鼎,顛趾,利出否。得妾以其子,无咎。

六在鼎下,趾之象也;上應於四,趾而向上,顚之象也。鼎覆則趾顚,趾顚則覆其 實矣,非順道也;然有當顚之時,謂傾出敗惡,以致潔取新則可也。故顚趾,利在 於出否;否,惡也。

四近君,大臣之位;初,在下之人,而相應,乃上求於下,下從其上也。上能用下

<sup>[</sup>註161]《四庫》本作「亨」。

<sup>[</sup>註162]《四庫》本無「以」字。

之善,下能輔上之爲,可以成事功,乃善道,如鼎之顚趾,有當顚之時,未爲悖理 也。

得妾以其子,无咎:六陰而卑,故爲妾。得妾,謂得其人也。若得良妾,則能輔助 其主,使无過咎也。子, 主也。以其子,致其主於无咎也。六陰居下,而卑巽從陽, 妾之象也。以六上應四爲顚趾,而發此義。初六,本无才德可取,故云「得妾」,言 得其人則如是也。

顚,下田反。趾,音止。出,尺逐反。否,悲己反。

#### 象曰:鼎顛趾,未悖也。

鼎覆而趾顚,悖道也;然非必爲悖者,蓋有傾出否惡之時也。

悖,必內反。

#### 利出否,以從貴也。

出[註163]故而納新,瀉惡而受美,從貴之義也。應於四,上從於貴者也。

# 九二:鼎有實,我仇有疾,不我能即,吉。

二以剛實居中,鼎中有實之象。鼎之有實,上出則爲用。二,陽剛 [註 164],有濟用之才,與五相應,上從六五之君,則得正,而其道可亨。然與初密比,陰從陽者也。 九二居中而應中,不至失正;己雖自守,彼必相求,故戒能遠之,使不來即我,則 吉也。

仇,對也。陰陽相對之物,謂初也。相從則非正而害義,是有疾也。二當以正自守, 使之不能來就己。人能自守以正,則不正不能(註165)就之矣,所以吉也。

仇, 音求。

# 象曰:鼎有實,慎所之也。

鼎之有實,乃人之有才業也,當慎所趨向;不慎所往,則亦陷於非義。二能不暱於初,而上從六五之正應,乃是慎所之也。

# 我仇有疾,終无尤也。

<sup>[</sup>註 163] 《四庫》本作「去」。

<sup>[</sup>註164] 《四庫》本作「剛陽」。

<sup>(</sup>註165)一有「以」字。

我仇有疾,舉上文也。我仇,對己者,謂初也。初比己而非正,是有疾也。既自守 以正,則彼不能即我,所以終无過尤也。

#### 九三:鼎耳革,其行塞,雉膏不食,方雨,虧悔終吉。

鼎耳,六五也,爲鼎之主。三以陽居巽之上,剛而能巽,其才足以濟務,然與五非 應而不同。五,中而非正;三,正而非中,不同也,未得於君者也;不得於君,則 其道何由而行?

革,變革爲 [註 166] 異也, [與五異而不合也。其行塞,不能亨也。不合於君,則不得其任,无以施其用。

膏,甘美之物,象禄位。雉,指丘也,有文明之德,故謂之雉。三有才用,而不得 六五之禄位,是不得雉膏食之也。君子蘊其德,久而必彰;守其道,其終必亨。五 有聰明之象,而三終上進之物。陰陽交暢則雨,方雨,且將雨也,言五與三,方將 和合。

虧悔終吉 (註 167) ,謂不足之悔 (註 168) ,終當獲吉也。三,懷才而不偶,故有不足之悔;然其有陽剛 (註 169) 之德,上聰明而下巽正,終必相得,故吉也。三雖不中,以巽體,故无過剛之失;若過剛,則豈能終吉?

行,下孟反。塞,悉則反。

# 象曰:鼎耳革,失其義也。

始與鼎耳革異者,失其相求之義也;與五非應,失求合之道也;不中,非同志之象也:是以其行塞而不通。然上明而下才,終必和合,故方雨而占也。

# 九四:鼎折足,覆公餗,其形渥,凶。

四,大臣之位,任天下之事者也。天下之事,豈一人所能獨任?必當求天下之賢智,與之協力。得其人,則天下之治,可不勞而致也;用非其人,則敗國家之事,貽天下之患。

四下應於初。初,陰柔小人,不可用者也,而四用之,其不勝任而敗事,猶鼎之折足也。鼎折足,則傾覆公上之餘。餘,鼎實也。居大臣之位,當天下之任,而所用

<sup>[</sup>註166] 一作「謂」。

<sup>[</sup>註167] 一无此二字。校者按:即無「終吉」二字。

<sup>[</sup>註168] 一再有「不足之悔」字。

<sup>[</sup>註169] 《四庫》本作「剛陽」。

非人,至於覆敗,乃不勝其任,可羞愧之甚也。

其形渥,謂赧汗(註170)也,其凶可知。《繫辭》曰:「德薄而位尊,知小而謀大,力少(註171)而任重,鮮不及矣。」言不勝其任也。蔽於所私,德薄知小也。

折,之折反。餗,送鹿反。渥,於角反。

#### 象曰:覆公餗,信如何也。

大臣當天下之任,必能成天下之治安,則不誤君上之所信(註172),下民之所望,與己致身任道之志。不失所期(註173),乃(註174)所謂信也;不然,則失其職,誤上之委任,得爲信乎?故曰:「信如何也。」

#### 六五:鼎,黄耳金鉉,利貞。

五在鼎上,耳之象也。鼎之舉措在耳,爲鼎之主也。五有中德,故云「黃耳」。鉉,加耳者也。二應於五,來從於耳(註175)者,鉉也。二有剛中之德,陽體剛中、色黃,故爲金鉉。

五,文明得中而應剛;二,剛中巽體而上應。才无不足也,相應至善矣,所利在貞 固而已。六五居中應中,不至於失正,而質本陰柔,故戒以貞固於中也。

鉉,玄典反。

# 象曰:鼎黃耳,中以為實也。

六五以得中爲善,是以中爲實德也。五之所以聰明應剛,爲鼎之主,得鼎之道,皆 由得中也。

# 上九:鼎,玉鉉,大吉,无不利。

井與鼎以上出爲用,處終,鼎功之成也。在上,鉉之象。剛而溫者,玉也。九雖剛陽,而居陰履柔,不極剛而能溫者也。居成功之道,唯善處而已。剛柔適宜,動靜

<sup>(</sup>註 170) 底本作「汙」,據《導讀》本,《周易折中》與《李》本作「汗」。作「汙」費解, 更正作「汗」。

<sup>[</sup>註171] 《四庫》本作「小」。

<sup>[</sup>註172] 《四庫》本作「倚」。

<sup>[</sup>註173] 《四庫》本作「斯」。

<sup>[</sup>註174] 底本作「及」,據《四庫》本更正。

<sup>[</sup>註175] 一作「五」。

不過,爲 (註 176) 大吉,无所不利矣。在上爲鉉,雖居无位之地,實當用也,與它卦異矣;并亦然。

#### 象曰:玉鉉在上,剛柔節也。

剛而溫,乃有節也。上居功成 (註 177) 致 (註 178) 用之地,而剛柔中節,所以大吉, 无不利也。

井、鼎皆以終爲成功,而鼎不云「元吉」,何也?曰:「井之功用,皆在上出,又有 博施有常之德,是以元吉。鼎以烹飪爲功,居上爲成德,與井異;以剛柔節,故得 大吉也。」

# 《周易》下經 卷第五

<sup>[</sup>註176]《四庫》本作「則爲」。

<sup>(</sup>註177)《四庫》本作「成功」。

<sup>[</sup>註178] 《二程集》小注:一作「无」。



# 《周易》下經 卷第六

程頤傳

# 震下震上震

《序卦》:「主器者, 莫若長子, 故受之以震。」

鼎者,器也;震爲長男,故取主器之義,而繼鼎之後。

長子,傳國家、繼位號者也,故爲主器之主。《序卦》取其一義之大者,爲相繼之義。 震之爲卦,一陽生於二隂之下,動而上者也,故爲震。震,動也。不曰「動」者, 震有動而奮發震驚之義。

乾坤之交,一索而成震,生物之長也,故爲長男。其象則爲雷,其義則爲動。雷有 震奮之象,動爲驚懼之義。

#### 震:亨。

陽生於下而上進,有亨之義。

又:震爲動,爲恐懼,爲有主。震而奮發,動而進,懼而修,有主而保大,皆可以 致亨,故震則有亨。

震,止慎反。

# 震來虩虩,笑言啞啞。

當震動之來,則恐懼不敢自寧,旋顧周慮〔註〕,虩虩然也。虩虩,顧慮不安之貌。蠅虎謂之虩者,以其周環顧慮,不自寧也。處震如是,則能保其安裕,故笑言啞啞。

<sup>[</sup>註 ]] 一作「周旋顧慮」。《四庫》本亦作「周旋顧慮」。

啞啞,言笑[註2]和適之貌。

虩,許逆反。啞,鳥客反。

#### 震驚百里,不喪匕〔註3〕 鬯。

言震動之大,而處之之道。

動之大者,莫若雷;震爲雷,故以雷言。雷之震動,驚及百里之遠,人无不懼而自 失。

雷聲所及百里也,唯宗廟祭祀執七鬯者,則不至於喪失。人之致其誠敬,莫如祭祀。 七以載鼎實,升之於俎;鬯以灌地而[註4]降神。方其酌裸以求神,薦牲而祈饗[註5], 盡其誠敬之心,則雖雷震[註6]之威,不能使之懼而失守。故臨大震懼,能安而不自 失者,唯誠敬而已。此處震之道也。卦才无取,故但言處震之道。

喪,去聲。七,必以反。鬯,勒亮反。

#### 彖曰:震亨。震來虩虩,恐致福也;笑言啞啞,後有則也。

震自有亨之(註7)義,非由卦才。震來而能恐懼,自修自慎,則可反致福吉也。

笑言啞啞,言自若也(註8);由能恐懼,而後自處有法則也。有則,則安而不懼矣, 處震之道也。

# 震驚百里,驚遠而懼邇也。

雷之震,及於百里,遠者驚,邇者懼,言其威遠大也。

# 出,可以守宗廟社稷,以為祭主也。

《彖》文脫「不喪匕鬯」一句。卦辭云「不喪匕鬯」,本謂(註9)誠敬之至,威懼不能使之自失。《彖》以長子宜如是,因(註10)承上文用長子之義通解之,謂其誠敬

<sup>[</sup>註 2] 《四庫》本作「笑言」。

<sup>[</sup>註 3] 《二程集》誤植爲「七字」,下皆逕行更正,不另校出。

<sup>[</sup>註 4] 一无「而」字。

<sup>(</sup>註5)《四庫》本作「享」。

<sup>[</sup>註 6] 一作「霆」。

<sup>[</sup>註7] 一无「之」字。

<sup>(</sup>註 8) 一作「啞啞笑,言自若也」。

<sup>[</sup>註 9] 《四庫》本作「爲」。

<sup>[</sup>註10] 一有「以|字。

能不喪匕鬯,則君出而可以守宗廟社稷,爲祭上也。長子如是,而後可以守世祀、 承國家也。

#### 象曰: 洊雷,震; 君子以恐懼脩省。

游,重襲也。上下皆震,故爲洊雷。雷重仍,則威益盛。君子觀洊雷威震之象,以恐懼自修飭循省也。君子畏天之威,則脩正其身,思省其過咎而改之。不唯雷震, 凡遇驚懼之事,皆當如是。

#### 初九:震來虩虩,後笑言啞啞,吉。

初九,成震之主,致震者也;在卦之下,處震之初也。知震之來,當震之始,若能以爲恐懼,而周旋顧慮,虩虩然不敢寧止,則終必保其安吉,故(註 11)後笑言啞啞也。

### 象曰:震來虩虩,恐,致福也;笑言啞啞,後有則也。

震來而能恐懼周顧,則无患矣,是能因恐懼而反致福也。因恐懼而自脩省,不敢違 於法度,是由震而後有法則,故能保其安吉,而笑言啞啞也。

# 六二:震來厲,億喪貝,躋于九陵。勿逐,七日得。

六二居中得正,善處震者也,而乘初九之剛。九,震之主;震,剛動而上奮,孰能禦之?厲,猛也、危也。彼來既猛,則己處危矣。

億,度也。貝,所有之資也。躋,升也。九陵,陵之高也。逐,往追也。以震來之厲,度不能當,而必喪其所有,則升至高以避之也。九,言其重,崗(註12)陵之重,高之至也。九,重之多也,如九天、九地也。

勿逐,七日得:二之所貴者,中正也;遇震懼之來,雖量勢巽避,當守其中正,无自失也。億知 (註13) 必喪也,故遠避以自守,過則復其常矣,是勿逐而自得也。逐,即物也。以己即物,失其守矣,故戒勿逐。避遠自守,處震之大方也。如二者,當危懼而善處者也。卦位有六,七乃更始。事既終,時既易也,不失其守,雖一時不能禦其來,然時過事已,則復其常,故云「七日得」。

躋,子西反。

<sup>[</sup>註]] 一作「然」。

<sup>[</sup>註12] 《四庫》本作「岡」。

<sup>〔</sup>註13〕《四庫》本作「之」。

象曰:震來厲,乘剛也。

當震而乘剛,是以彼厲而己危。震剛之來,其可禦乎?

六三: 震蘇蘇, 震行无眚。

蘇蘇,神氣緩散自失之狀。三以陰居陽,不正;處不正,於平時且不能安,況處震乎?故其震懼而蘇蘇然。若因震懼而能行,去不正而就正,則可以无過。告,過也。 三行則至四,正也。動以就正爲善,故二勿逐則自得,三能行則无告。以不(註14) 正而處震懼,有告可知。

眚,生領反。

象曰: 震蘇蘇, 位不當也。

其恐懼自失蘇蘇然,由其所處不當故也。不中不正,其能安乎?

九四:震遂泥。

九四,居震動之時,不中不正;處柔,失剛健之道。居四无中正之德,陷溺於重陰之間,不能自震奮者也,故云「遂泥」。泥,滯溺也。以不正之陽,而上下重陰,安能免於泥乎?遂,无反之意。處震懼,則莫能守也;欲震動,則莫能奮也。震道亡矣,豈復能光亨也?

泥,乃計反。

象曰:震遂泥,未光也。

陽者,剛物;震者,動義。以剛處動,本有光亨之道,乃失其剛正,而陷於重陰, 以致遂泥,豈能光也?云「未光」,見陽剛,本能震也;以失德,故泥耳。

六五:震往來厲,億无喪,有事。

六五雖以陰居陽,不當位,爲不正;然以柔居剛,又得中,乃有中德者也。不失中, 則不違於正矣,所以中爲貴也。

諸卦,二、五雖不當位,多以中爲美。三、四雖當位,或以不中爲過,中常重於 正也。蓋中則不違於正,正不必中也。天下之理,莫善於中,於六二、六五可見。

五之動,上往,則柔不可居動之極;下來則犯剛,是往來皆危也。當君位,爲動之 上,隨宜應變,在中而已。故當億度,无喪失其所有之事而已。所有之事,謂中德。

<sup>[</sup>註14] 一有「中」字。

苟不失中,雖有危, (註15) 不至於凶也。

億度,謂圖慮,求不失中也。五所以危,由非剛陽而无助;若以剛陽有助,爲動之 上,則能亨矣。

往來皆危,時則甚難(註 16),但期於不失中,則可自守。以柔主動,固不能致亨濟也。

#### 象曰:震往來厲,危行也;其事在中,大无喪也。

往來皆厲,行則有危也。動皆有危,唯在无喪其事而已。其事,謂中也。能不失其中,則可自守也。大无喪,以无喪爲大也。

上六:震索索,視雙雙,征凶。震不于其躬,于其鄰,无咎,婚媾有言。索索,消索不存之狀,謂其志氣如是。六以陰柔居震動之極,其驚懼之甚,志氣殫索也。瞿瞿,不安定貌。志氣索索,則視瞻徊徨。以陰柔不中正之質,而處震動之極,故征則凶也。

震之及身,乃于其躬也;不于其躬,謂未及身也。鄰者,近於身者也。能震懼於未 及身之前,則不至於極矣,故得无咎。苟未至於極,尚有可改之道。

震終當變,柔不固守,故有畏 (註 17) 鄰戒而能變之義。聖人於震終,示人知懼能改 之義,爲勸深矣。

婚媾,所親也,謂同動者。有言,有怨咎之言也。六居震之上,始爲眾(註18)動之首,今乃畏鄰戒而不敢進,與諸處震者異矣,故婚媾有言也。

媾,古亘反。瞿,俱縛反。

# 象曰:震索索,中未得也;雖凶无咎,畏鄰戒也。

所以恐懼自失如此,以未得於中道也,謂過中也。使之得中,則不至於索索矣。極而復征則凶也,若能見鄰戒而知懼,變於未極之前,則无咎也。上六,動之極,震極則(註19)有變義也。

<sup>[</sup>註15] 一有「終」字。

<sup>[</sup>註16] 一作「艱」

<sup>〔</sup>註17〕一作「見」。

<sup>(</sup>註18) 一作「震」。

<sup>[</sup>註19] 一作「之終」。

#### 

《序卦》:「震者,動也。物不可以終動,止之,故受之以艮。艮者,止也。」

動靜相因,動則有靜,靜則有動;物无常動之理,艮所以次震也。艮者,止也;不 曰「止」者:艮,山之象,有安重堅實之意,非止義可盡也。

乾坤之交,三索而成艮,一陽居二隂之上。陽,動而上進之物;既至於上,則止矣。 隂者,靜也;上止而下靜,故爲艮也。

然則,與畜止之義何異?曰:「畜止者,制畜之義,力止之也。艮止者,安止之義, 止其所也。」

#### 艮其背,不獲其身;行其庭,不見其人,无咎。

人之所以不能安其止者,動於欲也;欲牽於前而求其止,不可得也。故艮之道,當 艮其背。所見者在前,而背乃背之,是所不見也。止於所不見,則无欲以亂其心, 而止乃安。

不獲其身,不見其身也,謂忘我也。无我則止矣;不能无我,无可止之道。

行其庭,不見其人:庭除之間,至近也。在背,則雖至近不見,謂不交於物也。外物不接,內欲不萌,如是而止,乃得止之道,於止爲无咎也(註20)。

艮,根根反。背,必內反。

# 彖曰:艮,止也。時止則止,時行則行;動靜不失其時,其道光明。

艮爲止;止之道,唯其時。行止動靜不以時,則妄也;不失其時,則順理而合義。 在物爲理,處物爲義,動靜合理義,不失其時也,乃其道之光明也。君子所貴乎時, 仲尼行止久速是也。艮體篤實,有光明之義。

# 艮其止,止其所也。

艮其止,謂止之而止也。止之而能止者,由止得其所也。止(註21)不得其所,則无可止之理。夫子曰:「於止,知其所止。」謂當止之所也。

夫有物必有則,父止於慈,子止於孝,君止於仁,臣止於敬。萬物庶事,莫不各有

<sup>(</sup>註20) 一无「也」字。

<sup>[</sup>註21] 《四庫》本有「而」字。

其所,得其所則安,失其所則悖。聖人所以能使天下順治,非能爲物作則也,唯止 之各於其所而已。

#### 上下敵應,不相與也。

以卦才言也。上下二體,以敵相應,无相與之義。陰陽相應,則情通而相與;乃以 其敵,故不相與也。不相與則相背,爲(註22)艮其背,止之義(註23)也。

#### 是以不獲其身,行其庭,不見其人,无咎也。

相背,故不獲其身,不見其人;是以能止,能止則无咎也。

#### 象曰:兼山艮,君子以思不出其位。

上下皆山,故爲兼山。此而并彼爲兼,謂重復(註24)也,重艮之象也。君子觀艮止之象,而思安所止,不出其位也。位者,所處之分也。萬事各有其所;得其所,則止而安。若當行而止,當速而久,或過或不及,皆出其位也,況踰分非據乎?

#### 初六:艮其趾,无咎,利永貞。

六在最下,趾之象。趾,動之先也。艮其趾,止於動之初也。事止於初,未至失正,故无咎也。以柔處下,當止(註25)之時也。行則失其正矣,故止乃无咎。陰柔,患其不能常也,不能固也;故方止之初,戒以利在常永貞固,則不失止(註26)之道也。

# 象曰:艮其趾,未失正也。

當止而行,非正也。止之於初,故未至失正。事止於始則易,而未至於失也。

# 六二:艮其腓,不拯其隨,其心不快。

六二居中得正,得止之道者也。上无應援,不獲其君矣。三(註27)居下之上,成止之主,主乎止者也,乃剛而失中,不得止之宜。剛止於上,非能降而下求,二(註28)雖有中正之德,不能從也。二之行止,繫乎所主,非得自由,故爲腓之象。股動則腓隨,動止在股,而不在腓也。

<sup>[</sup>註22] 一作「與」。

<sup>[</sup>註23] 一有「同」字。

<sup>[</sup>註24] 一作「複」。

<sup>[</sup>註25] 《四庫》本作「趾」。

<sup>[</sup>註26]一作「正」。

<sup>[</sup>註27] 底本作「二」,誤。居下之上應爲第三爻,據《四庫》本更正爲「三」。

<sup>[</sup>註28] 底本作「三」,誤。「中正之德」指二,據《四庫》本更正爲「二」。

二既不得以中正之道,拯救三之不中,則必勉而隨之,不能拯而唯隨也。雖咎不在己,然豈其所欲哉?言不聽、道不行也;故其心不快,不得(註29)行其志也。七之處高位,則有拯而无隨;在下位,則有當拯、有當隨、有拯之不得而後隨。

腓,符肥反。

### 象曰:不拯其隨,未退聽也。

所以不拯之而唯隨者,在上者未能下從也。退聽,下從也。

# 九三:艮其限,列其夤,厲薰心。

限,分隔也,謂上下之際。三以剛居剛而不中,爲成艮之主,決止之極(註30)也。 已在下體之上,而隔上下之限,皆爲止義,故爲艮其限,是確(註31)乎止而不復能 進退者也。

在人身,如列其夤。夤,膂也,上下之際也。列絕其夤,則上下不相從屬,言止於下之堅也。止道貴乎得宜,行止不能以時,而定於一;其堅強如此,則處世乖戾, 與物睽絕,其危甚矣。

人之固止一隅,而舉世莫與宜者,則艱蹇忿畏,忿 [註 32] 撓其中,豈有安裕之理? 厲薰心,謂不安之 (註 33) 勢,薰爍其中 [註 34] 也。

薰,許云反。

# 象曰:艮其限,危薰心也。

謂其固止不能進退,危懼之慮,常薰爍其中心也。

# 六四:艮其身,无咎。

四,大臣之位,止天下之當止者也。以陰柔而不遇剛陽之君,故不能止物,唯自止 其身,則可无咎。所以能无咎者,以止於正也。言止其身无咎,則見其不能止物; 施於政,則有咎矣。在上位而僅能善其身,无取之甚也。

<sup>[</sup>註29] 《四庫》本作「能」。

<sup>(</sup>註30) 底本「拯」與「極」形近混似,據《四庫》本作「極」,九三爲下卦之極也。

<sup>(</sup>註31) 底本作「隨」, 費解。《四庫》本作「確」, 《註評》本引《吉澄》本及《武英殿》本皆作「確」, 今從眾。

<sup>[</sup>註32] 《四庫》本作「焚」。

<sup>[</sup>註33] 一作「其」。

<sup>[</sup>註34] 一有「心」字。

象曰:艮其身,止諸躬也。

不能爲天下之止,能止於其身而已,豈足稱大臣之位也?

六五:艮其輔,言有序,悔亡。

五,君位,艮之主也,主天下之止者也;而陰柔之才,不足以當此義,故止以在上 取輔(註35)義言之(註36)。

人之所當愼而止者,唯言行也。五在上,故以輔言;輔,言之所由出也。

艮於 (註37) 輔,則不妄出而有序也。言輕發而无序,則有悔;止之於輔,則 (註38) 悔亡也。

有序,中節有次序也。輔與頰舌,皆言所由出,而輔在中。艮其輔,謂止於中也。

#### 象曰:艮其輔,以中正也。

五之所善者,中也。艮其輔,謂止於中也,言以得中爲正;止之於輔,使不失中, 乃得正也。

#### 上九:敦艮,吉。

九以剛實居上,而又成艮之主,在艮之終,止之至堅篤者也。敦,篤實也。居止之極,故不過而爲敦。人之止,難於久終,故節或移於晚,守或失於終,事或廢於久, 人之所同患也。上九能敦厚於終,止道之至善,所以吉也。六爻之德,唯此爲吉。

# 象曰:敦艮之吉,以厚終也。

天下之事, 唯終守之爲難; 能敦於止, 有終者也。上之吉, 以其能厚於終也。

# **■** 艮下 異上 **漸**

《序卦》:「艮者,止也。物不可以終止,故受之以漸。漸者,進也。」

止必有進,屈伸消息之理也。止之所生,亦進也;所反,亦進也,漸所以次艮(註39)

<sup>[</sup>註35] 一有「之」字。

<sup>[</sup>註36] 一无「之」字。

<sup>[</sup>註37] 一作「其」。

<sup>[</sup>註38] 一作「故」。

<sup>[</sup>註39] 《四庫》本作「卦」。

也。進以序爲漸,今人以緩進爲漸進,以序不越次,所以緩也。爲卦上巽下艮。 山上有木,木之高而因山,其高 [註 40] 有因也。其高有因,乃其進有序也,所以爲漸也。

漸:女歸,吉,利貞。

以卦才兼漸義而言也。

乾坤之變爲異艮,異艮重而爲漸。在漸體而言,中二爻交也。由二爻之交,然後男 女各得正位。初、終二爻,雖不當位,亦陽上陰下,得尊卑之正。男女各得其正, 亦得位也。與歸妹正相對。女之歸,能如是之正,則吉也。

天下之事,進必以 (註 41) 漸者,莫如女歸。臣之進於朝,人之進於事,固當有序; 不以其序 (註 42),則陵節犯義,凶咎隨之。然以義之輕重,廉恥之道、女之從人, 最爲大也,故以女歸爲義;且男女,萬事之先也。

(註 43) 諸卦多有利貞,而所施或不同:有涉不正之疑,而爲之戒者;有其事必貞, 乃得其宜者;有言所以利者,以其有貞也。

所謂涉不正之疑,而爲之戒者,損之九二是也;處陰居說,故戒以宜貞也。有其事 必貞,乃得宜者,大畜是也;言所畜利於貞也。有言所以利者,以其有貞者,漸是 也;言女歸之所以占,利於如此貞正也。蓋其固有,非設戒也。漸之義,宜能亨, 而不云「亨」者,蓋亨者,通達之義,非漸進之義也。

漸,捷檢反。

彖曰:漸之進也,女歸吉也。

如漸之義而進,乃女歸之吉也;謂正而有漸也,女歸爲大耳。他進亦然。

# 進得位,往有功也。

漸進之時,而陰陽各得正位,進而有功也。四,復由上進而得正位。三,離下而為 上,遂得正位,亦爲進得位之義(註44)。

<sup>[</sup>註40] 一有「而」字。

<sup>[</sup>註41] 一作「有」。

<sup>[</sup>註42] 一作「漸」。

<sup>[</sup>註43] 一有「利貞」字。

<sup>[</sup>註44] 一有「是往而有功也」六字。

#### 進以正,可以正邦也。

以正道而進,可以正邦國,至於天下也。凡進於事、進於德、進於位,莫不皆當以 正也。

#### 其位,剛得中也。

上云「進得位,往有功也」,統言陰陽得位,是以進而有功。復云「其位,剛得中也」, 所謂「位」者,五以剛陽中正得尊位也。諸爻之得正,亦可謂之得位矣;然未若五 之得尊位,故特言之。

#### 止而巽,動不窮也。

內艮止,外巽順;止爲安靜之象,巽爲和順之義。人之進也,若以欲心之動,則躁而不得其漸,故有困窮。在漸之義,內止靜而外巽順,故其進動不有(註 45)困窮也。

#### 象曰:山上有木,漸;君子以居賢德善俗。

山上有木,其高有因,漸之義也。君子觀漸之象,以居賢善之德,化美於風俗。人 之進於賢德,必有其漸,習而後能安,非可陵節而遽至也。在己且然,教化之於人, 不以漸,其能人乎?移風易俗,非一朝一夕所能成,故善俗必以漸也。

# 初六:鴻漸于干,小子厲,有言,无咎。

漸諸爻皆取鴻象。

鴻之爲物,至有時而群有序,不失其時序,乃爲漸也。千(註46),水湄。水鳥止於水之湄,水至近也,其進可謂漸矣。行而以時,乃所謂漸(註47)。進(註48)不失漸,得其宜矣。

六居初,至下也;陰之才,至弱也,而上无應援,以此而進,常情之所憂也。君子則深識遠照,知義理之所安,時事之所宜,處之不疑。小人、幼子,唯能見已然之事,從眾人之〔註49〕知,非能燭理也,故危懼而有言。蓋不知,在下,所以有進也;用柔,所以不躁也;无應,所以能漸也:於義自无咎也。若漸之初,而用剛急進,則失漸之義。不能進,而有咎必矣。

<sup>(</sup>註45) 一作「有不」。《二程集》:一作「至」。

<sup>[</sup>註46] 底本作「于」,形譌,據《四庫》本更正。

<sup>[</sup>註47] 一无「漸」字。

<sup>[</sup>註48] 《四庫》本作「漸進」。如依《四庫》本,則其斷句爲:「漸進不失,漸得其宜矣。」

<sup>[</sup>註49] 一有「所」字。

象曰:小子之厲,義无咎也。

雖小子以爲危厲,在義理實无咎也。

六二:鴻漸于磐,飲食衎衎,吉。

二居中得正,上應於五,進之安裕者也;但居漸,故進不速。磐,石之安平者,江河之濱所有,象進之安。自干之磐,又漸進也。

二與九五之君,以中正之道相應,其進之安,固平易莫加焉;故其飲食和樂衎衎然, 吉可知也。

磐,畔干反。衎,若旦反。

#### 象曰:飲食衎衎,不素飽也。

爻辭以其進之安平,故取飲食和樂爲言。夫子恐後人之未喻,又釋之云:「中正君子, 遇中正之主,漸進於上,將行其道以及天下。」所謂「飲食衎衎」,謂其得志和樂, 不謂空飽飲(註50)食而已。素,空也。

## 九三:鴻漸于陸, 夫征不復, 婦孕不育, 凶。利御寇。

平高日陸,平原也。三在下卦之上,進至於陸也。陽,上進者也;居漸之時,志將漸進,而上无應援,當守正以俟時,安處平地,則 (註51) 得漸之道。若或不能自守,欲有所牽,志有所就,則失漸之道。四,陰在上而密比,陽所說也;三,陽在下而相親,陰所從也。二爻相比而无應。相比,則相親而易合;无應,則无適而相求,故爲之戒。

夫,陽也,謂[註52] 三。三若不守正,而與四合,是知征而不知復。征,行也。復, 反也。不復[註53],謂不反顧義理。婦,謂四。若以不正而合,則雖孕而不育;蓋 非其道也,如是則凶也。

三之所利,在於禦寇。非理 [註 54] 而至者,寇也。守正以閑 [註 55] 邪,所謂「禦寇」也。不能禦寇,則自失而凶矣。

<sup>(</sup>註50) 一无「飲」字。

<sup>[</sup>註51] 一无「則」字。

<sup>[</sup>註52] 《四庫》本「謂」前有「夫」字。

<sup>[</sup>註53] 底本作「後」,形譌,據《四庫》本更正。

<sup>[</sup>註54] 一作「禮」。

<sup>[</sup>註55] 底本作「閉」,形譌,據《四庫》本更正。《註評》本引《吉澄》本、《武英殿》本亦作「閑」。

**象曰:夫征不復,離群醜也;婦孕不育,失其道也;利用御寇,順相保也。** 夫征不復,則失漸之正;從欲而失正,離叛其群類,爲可醜也。卦之諸爻,皆无不善;若獨失正,是離其群類。

婦孕不由其道,所以不育也。

所利在禦寇,謂以順道相保。君子之與小人比也,自守以正,豈唯君子自完其己而 已乎?亦使小人得不陷於非義,是以順道相保,禦止其惡,故曰「禦寇」。

離, 力智反。

六四:鴻漸于木,或得其桷,无咎。

當漸之時,四以陰柔進據剛陽之上,陽剛而上進,豈能安處陰柔之下?故四之處非安地,如鴻之進(註56)于木也。木漸高矣(註57),而有不安之象。

鴻趾連,不能握枝,故不木棲。桷,横平之柯。唯平柯之上,乃能安處;謂四之處 本危,或能自得安寧之道,則无咎也。如鴻之於木,本不安,或得平柯而處之,則 安也。四居正而巽順,宜无咎者也。必以得失言者,因得失以明其義也。

桷, 音角。棲, 音西。

象曰:或得其桷,順以巽也。

桷者,平安之處。求安之道,唯順與巽;若其義順正,其處卑巽,何處而不安?如 四之順正而巽,乃得桷也。

九五:鴻漸于陵,婦三歲不孕,終莫之勝,吉。

陵,高阜也,鴻之所止最高處也,象君之位。雖得尊位,然漸之時,其道之行,固亦 非遽。與二爲正應,而中正之德同,乃隔於三、四。三比二,四比五,皆隔其交者也。 未能即合,故三歲不孕。然中正之道,有必亨之理;不正豈能隔害之?故終莫之能勝, 但其合有漸耳,終得其占也。以不正而敵中正,一時之爲耳;久,其能勝乎?

象曰:終莫之勝,吉,得所願也。

君臣以中正相交,其道當行;雖有間其間者,終豈能勝哉?徐必得其所願,乃漸之 (註 58) 吉也。

<sup>[</sup>註56] 一作「漸」。

<sup>[</sup>註57] 一无「矣」字。

<sup>[</sup>註58] 《四庫》本無「之」字。

#### 上九:鴻漸于陸,其羽可用為儀,吉。

安定胡公以「陸」爲逵。逵,雲路也,謂虛空之中。《爾雅》:「九達謂之逵。」逵, 通達无阻蔽之義也。上九在至高之位,又益上進,是出乎位之外,在它時則爲過矣; 於漸之時,居巽之極,必有其序,如鴻之離所止,而飛於雲空。在人,則超逸乎常 事之外者也。進至於是,而不失其漸,賢達之高致也,故可用爲儀法而吉也。羽, 鴻之所用進也;以其進之用,況上九進之道也。

#### 象曰:其羽可用為儀,吉,不可亂也。

君子之進,自下而上,由微而著,跬步造次,莫不有序。不失其序,則无所不得其 占,故九雖窮高而不失其占。可用爲儀法者,以其有序而不可亂也。

# 党下 震上 **歸妹**

《序卦》:「漸者,進也。進必有所歸,故受之以歸妹。」

進則必有所至,故漸有歸義,歸妹所以繼漸也。歸妹者,女之歸也。妹,少女之稱。 爲卦震上兌下,以少女從長男也。男動而女說,又以說而動,皆男說女,女從男之 義。

卦有男女配合之義者四:咸、恒、漸、歸妹也。咸,男女之相感也。男下女,二氣感應,止而說,男女之情相感之象。恒,常也;男上女下,巽順而動,陰陽皆得(註59)應,是男女居室,夫婦唱隨之常道。漸,女歸之得其正也;男下女而各得正位,止靜而巽順,其進有漸,男女配合,得其道也。歸妹,女之嫁歸也;男上女下,女(註60)從男也,而有說少之義。以說而動,動以說,則不得其正矣,故位皆不當。初與上雖當陰陽之位,而陽在下,陰在上,亦不當位也,與漸正相對。

咸、恒,夫婦之道;漸、歸妹,女歸之義。咸與歸妹,男女之情也。咸止而說,歸 妹動於說,皆以說也。恒與漸,夫婦之義也。恒巽而動,漸止而巽,皆以巽順也。 男女之道,夫婦之義,備於是矣。

歸妹爲卦,澤上有雷;雷震而澤動,從之象也。物之隨動,莫如水。男動於上而女從之,嫁歸從男之象。震,長男。兌,少女。少女從長男,以說而動,動而相說也。 人之所說者,少女,故云「妹」,爲女歸之象。又有長男說少女之義,故爲歸妹也。

<sup>[</sup>註59] 《四庫》本作「相」。

<sup>[</sup>註60] 一无「女|字。

#### 歸妹:征凶,无攸利。

以說而動,動而不當,故凶。不當,位不當也。征凶,動則凶也。如卦之義,不獨 女歸,无所往而利也。

#### 彖曰:歸妹,天地之大義也。

一陰一陽之謂道。陰陽交感、男女配合,天地之常理也。歸妹,女歸於男也,故云 「天地之大義也」。男在女上,陰從陽動,故爲女歸之象。

#### 天地不交,而萬物不興;歸妹,人之終始也。

天地不交,則萬物何從而生?女之歸男,乃生生相續之道。男女交而後有生息,有 生息而後其終不窮。前者有終,而後者有始,相續不窮,是人之終始也。

#### 說以動,所歸妹也。征凶,位不當也。

以二體釋歸妹之義。

男女相感,說而動者,少女之事,故以說而動所歸者,妹也。所以征則凶者,以諸 爻皆不當位也。所處皆不正,何動而不凶?大率以說而動,安有不失正者?

# 无攸利,柔乘剛也。

說,音悅。

不唯位不當也,又有乘剛之過;三、五皆乘剛。

男女有尊卑之序,夫婦有唱隨之禮,此 [註 61] 常理也;如恒是也。苟不由常正之道,徇情肆欲,唯說是動,則夫婦瀆亂;男牽欲而失其剛,婦狃說而忘其順,如歸妹之乘剛是也。所以凶,无所往而利也。

夫陰陽之配合,男女之交構(註62),理之常也;然從欲而流放,不由義理,則淫邪 无所不至,傷身敗德,豈人理哉?歸妹之所以(註63)凶也。

## 象曰:澤上有雷,歸妹;君子以永終知敝。

雷震於上,澤隨而動;陽動於上,陰說而從,女從男之象也,故爲歸妹。

君子觀男女配合,生息相續之象,而以永其終,知有敝也。永終,謂生息嗣續,

<sup>[</sup>註61] 一无「此」字。

<sup>[</sup>註62] 《四庫》本作「媾」。

<sup>[</sup>註63] 一有「征」字。

永久其傳也。知敝,謂知物有敝壞,而爲相續〔註 64〕之道也。女歸則有生息,故 有永終之義。又夫婦之道,當常永有終。必知其有敝壞之理,而戒愼之。敝壞, 謂離隙。

歸妹,說以動者也,異乎恒之巽而動、漸之止而巽也。少女之說,情之感動;動則 失正,非夫婦正而可常之道,久必敝壞。知其必敝,則當思永其終也。天下之反目 者,皆不能永終者也。不獨夫婦之道,天下之事,莫不有終有敝,莫不有可繼可久 之道。觀歸妹,則當思永終之戒也。

#### 初九:歸妹以娣,跛能履,征吉。

女之歸,居下而无正應,娣之象也。剛陽,在婦人爲賢(註65)貞之德;而處卑順, 娣之賢正者也。處說居下爲順義。

娣之卑下,雖賢,何所能爲?不過自善其身,以承助其君而已;如跛之能履,言不能及遠也。然在其分爲善,故以是而行則吉也。

娣,大計反。跛,波我反。

## 象曰:歸妹以娣,以恒也;跛能履吉,相承也。

歸妹之義,以說而動,非夫婦能常之道。九乃剛陽,有賢(註66)貞之德,雖娣之微, 乃能以常者也。雖在下,不能有所爲,如跛者之能履,然征而吉者,以其能相承助 也。能助其君,娣之吉也。

# 九二: 眇能視, 利幽人之貞。

九二,陽剛而得中,女之賢正 (註 67) 者也。上有正應,而反陰柔之質,動於說者也。 乃女賢而配不良,故二雖 (註 68) 賢,不能自遂以成其內助之功,適可 (註 69) 善其身 而小施之,如眇者之能視而已,言不能及遠也。

男女之際,當以正禮;五雖不正,二自守其幽靜貞正,乃所利也。二有剛正之德, 幽靜之人也。二之才如是,而言利貞者(註70),利,言宜於如是之貞(註71),非不

<sup>[</sup>註64] 《四庫》本作「繼」。

<sup>[</sup>註65] 一作「堅」。

<sup>(</sup>註66) 一作「堅」。

<sup>[</sup>註67] 一作「貞」。

<sup>(</sup>註68) 一作「之」。

<sup>(</sup>註69) 《四庫》本作「可以」。

<sup>[</sup>註70] 一无此五字。

足而爲之戒也。

眇,彌小反。

## 象曰: 利幽人之貞, 未變常也。

守其幽貞,未失夫婦常正之道也。世人以媒狎爲常,故以貞靜爲變常,不知乃常久 之道也。

#### 六三:歸妹以須,反歸以娣。

三居下之上,本非賤者,以失徳而无正應,故爲欲有歸而未得其歸。

須,待也。待者,未有所適也。六居三,不當位,德不正也;柔而尚(註72)剛,行不順也;爲說之主,以說求歸,動非禮也;上无應,无受之者也。无所適,故須也。 女子之處如是,人誰取之?不可以爲人配矣,當反歸而求爲娣媵則可也,以不正而 失其所也。

#### 象曰:歸妹以須,未當也。

未當者,其處、其德、其求歸之道,皆不當;故无取之者,所以須也。

## 九四:歸妹愆期,遲歸有時。

九以陽居四;四,上體,地之高也。陽剛,在女子爲正德,賢明者也;无正應,未得其歸也。過時未歸,故云「愆期」。女子居貴高之地,有賢明之資,人情所願娶,故其愆期,乃爲有時。蓋自有待,非不售也,待得佳配而後行也。九居四,雖不當位,而處柔,乃婦人之道(註73);以无應,故爲愆期之義,而聖人推理,以女賢而愆期,蓋有待也。

# 象曰: 愆期之志,有待而行也。

所以愆期者,由己而不由彼。賢女,人所願娶,所以愆期,乃其志欲有所待,待得 佳配而後行也。

六五:帝乙歸妹,其君之袂,不如其娣之袂良。月幾望,吉。

六五居尊位,妹之貴高者也;下應於二,爲下嫁之象。 E姬下嫁,自占而然,至帝

<sup>[</sup>註71] 一无「之貞」字。

<sup>〔</sup>註72〕一作「上」。

<sup>[</sup>註73] 一有「也」字。

乙而後正婚姻之禮,明男女之分,雖至貴之女,不得失柔巽之道,有貴驕之志;故《易》中陰尊而謙降者,則曰「帝乙歸妹」,泰六五是也。

貴女之歸,唯謙降以從禮,乃尊高之德也,不事容飾以說於人也。娣媵者,以容飾 爲事者也,衣袂所以爲容飾也。六五尊貴之女,尚禮而不尚飾,故其袂不及其娣之 袂良也。良,美好也。

月望,陰之盈也,盈則敵陽矣。幾望,未至於盈也。五之貴高,常不至於盈極,則 不亢其夫,乃爲吉也,女之處尊貴之道也。

袂,彌世反。幾,音機。

象曰:帝乙歸妹,不如其娣之袂良也;其位在中,以貴行也。

以帝乙歸妹之道,言其袂不如其娣之袂良,尚禮而不尙飾也。五以柔中在尊高之位, 以尊貴而行中道也。柔順降屈,尚禮而不尙飾,乃中道也。


上六:女承筐无實,士刲羊无血,无攸利。

上六,女歸之終,而无應,女歸之无終者也。婦者,所以承先祖,奉祭祀;不能奉 祭祀,則不可以爲婦矣。

夫婦共承宗廟,婦不能奉祭祀,乃夫不能承祭祀也;故刲羊而无血,亦无以祭也,謂不可以承祭祀也。婦不能奉祭祀,則當離絕矣(註75);是夫婦之无終者也,何所往而利哉?

象曰:上六无實,承虛筐也。

筐无實,是空筐也;空筐,可以祭乎?言不可以奉祭祀也。女不可以承祭祀,則離 絕而已,是女歸之无終者也。



<sup>[</sup>註74] 一作「醯」

<sup>[</sup>註75] 一无「矣」字。

《序卦》:「得其所歸者,必大,故受之以豐。」

物所歸聚,必成其大,故歸妹之後,受之以豐也。豐,盛大之義。爲卦震上離下。 震,動也。離,明也。以明而動,動而能(註76)明,皆致豐之道。明足以照,動足 以亨,然後能致豐大也。

#### 豐:亨,王假之,勿憂,宜日中。

豐爲盛大,其義自亨。極天下之光大者,唯王者能至之。假,至也。天位之尊,四海之富,群生之眾,王道之大,極豐之道,其唯王者乎?豐之時,人民之繁庶,事物之殷盛,治之豈易周?爲可憂 [註 77] 慮,宜如日中之盛明廣照,无所不及,然後无憂也。

豐, 芳忠反。假, 庚白反; 下同。

彖曰:豐,大也。明以動,故豐。

豐者,盛大之義。離明而震動,明動相資,而成豐大也。

## 王假之,尚大也。

王者,有四海之廣,兆民之眾,極天下之大也;故豐大之道,唯王者**能**致之。所有 既大,其保之、治之之道,亦當大也,故王者之所尚至大也。

# 勿憂,宜日中,宜照天下也。

所有既廣,所治既眾,當憂慮而 (註 78) 不能周及,宜如日中之盛明,普照天下,无 所不至,則可勿憂矣。如是,然後能保其豐大。保有豐大,豈小才小知之所能也?

日中則**昃**,**月盈則食**;**天地盈虚**,與時消息;而況於人乎?況於鬼神乎? 既言豐盛之至,復言其難常,以爲戒也。

日中盛極,則當昃昳;月既盈滿,則有虧缺。天地之盈虛,尚與時消息,況人與鬼神乎?盈虛,謂盛衰。消息,謂進退。天地之運,亦隨時進退也。鬼神,謂造化之跡;於萬物盛衰,可見其消息也。於豐盛之時,而爲此誠,欲其守中,不至過盛。處豐之道,豈易也哉?

<sup>[</sup>註76] 一无「能」字。

<sup>[</sup>註77] 一作「患」。

<sup>[</sup>註78] 《四庫》本作「其」。

#### 象曰:雷電皆至,豐;君子以折獄致刑。

雷電皆至,明震並行也。 1體相合,故云「皆至」。明動相資,成豐之象。

離,明也,照察之象。震,動也,威斷之象。折獄者,必照其情實,惟明克允。致 刑者,以威於(註79)奸惡,唯斷乃成。故君子觀雷電明動之象,以折獄致刑也。

噬嗑言「先王飭(註80)法」,豐言「君子折獄」:以明在上,而麗於威震, E者之事, 故爲制刑立法;以明在下,而麗於威震,君子之用,故爲折獄致刑。旅,明在上, 而云「君子」者,旅取愼用刑與不留獄,君子皆當然也。

折, 之舌反。

## 初九:遇其配主,雖旬无咎,往有尚。

雷電皆至,成豐之象;明動相資,致豐之道。非明,无以照;非動,无以行 [註 81]。相須猶形影,相資猶表裡。

初 [註 82] 九,明之初;九 [註 83] 四,動之初;宜相須以成其用,故雖旬而相應。位則相應,用則相資,故初謂四爲配主,己所配也。配雖匹稱,然就之者也;如配天,以配君子。故初於四云「配」,四於初云「夷」也。

雖旬无咎:旬,均也。天下之相應者,常非均敵,如陰之應陽,柔之從剛,下之附上。敵則安肯相從?唯豐之初、四,其用則相資,其應則相成;故雖均是陽剛,相從而无過咎也。蓋非 (註 84) 明,則動无所之;非動,則明无所用,相資而成用。同舟,則胡越一心;共難,則仇怨協力,事勢使然也。往而相從,則能成其豐,故云「有尙」,有可嘉尙也。在它卦,則不相下而離隙矣。

## 象曰:雖旬无咎,過旬災也。

聖人因時而處宜,隨事而順理。夫勢均則不相下者,常理也。然有雖敵而相資者,則相求也,初、四是也,所以雖旬而无咎也。與人同而力均者,在乎降己以相求,協力(註85)以從事。若懷先(註86)己之私,有加上之意,則患當至矣,故曰「過旬

<sup>[</sup>註79] 一作「其」。

<sup>[</sup>註80] 底本作「飾」,形譌,據《四庫》本更正。

<sup>[</sup>註81] 一作「亨」。

<sup>[</sup>註82] 一无「初」字。

<sup>[</sup>註83] 一无「九」字。

<sup>[</sup>註84] 一有「剛」字。

<sup>[</sup>註85] 一作「心」。

災也」。均而先己,是過旬也;一求勝,則不能同矣。

六二:豐其蔀,日中見斗,往得疑疾,有孚發若,吉。

明動相資,乃能成豐。二爲明之主,又得中正,可謂明者也;而五在正應之地,陰柔不正,非能動者。二、五雖皆陰,而在明動相資之時,居相應之地,五(註87)才不足(註88),既其應之才(註89)不足資,則獨明不能成豐;既不能成豐,則喪其明功,故爲「豐其蔀」。

日中見斗:二,至明之才,以所應不足與,而不能成其豐,喪其明功。无明功,則爲昏暗,故云「見斗」。斗,昏見者也。蔀,周匝之義。用障蔽之物,掩晦於明者也。斗屬陰,而主運乎(註90)象。五以陰柔而當君位,日中盛明之時,乃見斗,猶豐大之時,乃(註91)遇柔弱之主。斗以昏見,言見斗,則是明喪(註92)而暗矣。二雖至明中正之才,所遇乃柔暗不正之君,既不能下求於己,若往求之,則反得疑猜忌疾。暗主如是也,然則如之何而可?

夫君子之事上也,不得其心,則盡其至誠,以感發其志意而已。苟誠意能動,則雖 昏蒙可開也,雖柔弱可輔也,雖不正可正也。古人之事庸君常主,而克行其道者, 己之誠意(註93)上達,而君見信之篤耳。管仲之相桓公,孔明之輔後主是也。若能 以誠信發其志意,則得行其道,乃爲吉也。

蔀, 普苟反; 又音部。

象曰:有孚發若,信以發志也。

有孚發若,謂以己之孚信,感發上之心志也。苟能發,則其吉可知;雖柔 [註 94] 暗,有可發之道也。

九三:豐其沛,日中見沬,折其右肱,无咎。

沛字,古本有作「斾」字者。王弼以爲幡幔,則是施也。幡幔,圍蔽於內者。豐其

<sup>[</sup>註86] 一作「先懷」。

<sup>[</sup>註87] 一作「乃」。

<sup>[</sup>註88] 一有「耳」字。

<sup>[</sup>註89] 一无「才」字。

<sup>[</sup>註90] 《二程集》作「平」。

<sup>[</sup>註91] 一作「而」。

<sup>[</sup>註92] 一作「喪明」。

<sup>[</sup>註93] 一无「意」字。

<sup>[</sup>註94] 一作「昏」。

沛,其暗更甚於蔀也。

三,明體,而反暗於四者,所應陰暗故也。三居明體之上,陽剛得正,本能明者也。 豐之道,必明動相資而成。三應於上,上陰柔,又无位,而處震之終;既終則止矣, 不能動者也。它卦,至終則極,震至終則止矣。三无上之應,則不能成豐。沬,星 之微小无名數者 [註95];見沬,暗之甚也。豐之時而遇上六,日中而見沬者也。

右肱,人之所用,乃折矣,其无能爲可知。賢智之才,遇明君,則能有爲於天下。 上无可賴之主,則不能有爲,如人之折其右肱也。人之爲,有所失,則有所歸咎, 曰:「由是,故致是。」若欲動而无右肱,欲爲而上无所賴,則不能而已,更復何言? 无所歸咎也。

沬,亡對反;又音妹。肱,古弘反。

象曰:豐其沛,不可大事也;折其右肱,終不可用也。

三應於上,上陰(註96)而无位;陰柔无勢力,而處既終,其可共濟大事乎?既无所賴,如右肱之折,終不可用矣。

九四:豐其蔀,日中見斗,遇其夷主,吉。

四雖陽剛,爲動之主,又得大臣之位;然以不中正,遇陰暗柔弱之主,豈能致豐大也?故爲「豐其蔀」。蔀,周圍掩蔽之物。周圍則不大,掩蔽則不明。日中見斗,當盛明之時,反昏暗也。

夷主,其等夷也;相應,故謂之主。初、四皆陽,而居初是其德同;又居相應之地,故爲夷主。居大臣之位,而得(註97)在下之賢,同德相輔,其助豈小也哉?故吉也。

如四之才,得在下之賢為之助,則能致豐大乎?曰:「在下者,上有當位為之與;在 上者,下有賢才為之助,豈无益乎?故吉也。然而,致天下之豐,有君而後能也。 五,陰柔居尊而震體,无虛中巽順下賢之象,下雖多賢,亦將何為?蓋非陽剛中正, 不能致天下之豐也。」

# 象曰:豐其蔀,位不當也。

位不當,謂以不中正居高位,所(註98)以暗而不能致豐(註99)。

<sup>[</sup>註95] 一有「是」字

<sup>[</sup>註96] 《四庫》本作「應」。

<sup>[</sup>註97] 一作「德」: 又有「同」字。

<sup>(</sup>註98) 一作「非」。

#### 日中見斗,幽不明也。

謂幽暗不能光明,君陰柔而臣不中正故也。

#### 遇其夷主, 吉行也。

陽剛相遇,吉之行也。下就於初,故云「行」,下求則爲吉也。

## 六五:來章,有慶譽,吉。

五以陰柔之才,爲豐之主,固不能成其豐大;若能來致在下章美之才而用之,則有 福慶,復得美譽,所謂吉也。

六二,文明中正,章美之才也。爲五者,誠能致之,在位而委任之,可以致豐大之慶,名譽之美,故占也。章美之才,上二而言。然初與三、四,皆陽剛之才,五能用賢,則彙征矣。

二雖陰,有文明中正之德,大賢之在下者也。五與二雖非陰陽正應,在明動相資之時,有相爲用之義。五若能來章,則有慶譽而吉也;然六五无虚己下賢之義,聖人 設此義以爲教耳。

## 象曰:六五之吉,有慶也。

其所 (註 100) 吉者,可以有慶福及於天下也。人君雖柔暗,若能用賢才,則可以爲天下之福;唯患不能耳。

上六:豐其屋,蔀其家,闚其戶,闃其无人,三歲不觀,凶。

六以陰柔之質,而居豐之極,處動之終,其滿假躁動甚矣。

處豐大之時,宜乎謙屈,而處極高;致豐大之功,在乎剛健,而體陰柔;當豐大之任,在乎得時,而不當位。如上(註101) 六者,處无一當,其凶可知。

豐其屋,處大高也。蔀其家,居不明也。以陰柔居豐大,而在无位之地,乃高亢昏暗,自絕於人,人誰與之?故闚其戶,関其无人也。至於三歲之久,而不知變,其 凶宜矣。

不觀,謂尚不見人,蓋不變也。六居卦終,有變之義;而不能遷,是其才不能也。

<sup>[</sup>註99] 一有「乎」字。

<sup>[</sup>註100]《四庫》本作「所謂」。

<sup>[</sup>註101] 一无「上」字。

闚,苦規反。闃,苦鵙反。

象曰:豐其屋,天際翔也;闚其戶,闐其无人,自藏也。

六處豐大之極,在上而自高,若飛翔於天際,謂其高大之甚。闚其戶而无人者,雖居豐大之極,而實无位之地 [註 102]。人以其昏暗自高大,故皆棄絕之,自藏避而弗與親也。

# 

《序卦》:「豐,大也。窮大者必失其居,故受之以旅。」

豐盛至於窮極,則必失其所安,旅所以次豐也。爲卦離上艮下。山止而不遷,火行而不居,違去而不處之象,故爲旅也。又:麗乎外,亦旅之象。

#### 旅:小亨。旅貞吉。

以卦才言也。如卦之才,可以小亨,得旅之真正而吉也。

旅, 力舉反。

彖曰:旅,小亨;柔得中乎外而順乎剛,止而麗乎明,是以小亨,旅貞吉也。

六上居五,柔得中乎外也。麗乎上下之剛,順乎剛也。下艮止,上離麗,止而麗於 明也。柔順而得在外之中,所止能麗於明,是以小亨,得旅之貞正而吉也。

旅困之時,非陽剛中正有助於下,不能致大亨也,所謂得在外之中。中非一揆,旅 有旅之中也。止麗於明,則不失時宜,然後得(註103)處旅之道。

# 旅之時義大矣哉!

天下之事,當隨時各適其宜;而旅爲難處,故稱其時義之大。

象曰:山上有火,旅 (註 104); 君子以明慎用刑,而不留獄。

火之在高,明无不照;君子觀明照之象,則以明愼用刑。明不可恃,故戒於愼。明

<sup>[</sup>註102] 底本作「也」字, 費解, 應爲形譌。據《四庫》本更正。

<sup>〔</sup>註103〕一作「能」。

<sup>[</sup>註 104] 底本作「振」,費解:又不合《象》行文貫例,應爲形譌,據《四庫》本更正。

而止,亦慎象。觀火行不處之象,則不留獄。獄者,不得已而設;民有罪而入,豈 可留滯淹久也。

#### 初六:旅瑣瑣,斯其所取災。

六以陰柔在旅之時,處於卑下,是柔弱之人,處旅困而在卑賤,所存污下者也。志 卑之人,既處旅困,鄙猥瑣細,无所不至;乃其所以致悔辱,取災咎也。

瑣瑣,猥細之狀。當旅困之時,才質如是,上雖有援,无能爲也。四,陽性而離體, 亦非就下者也;又在旅,與它卦爲大臣之位者,異矣。

瑣,悉果反。

## 象曰:旅瑣瑣,志窮災也。

志意窮迫,益自取災也。災眚,對言則有分,獨言則謂災患耳。

## 六二: 旅即次, 懷其資, 得童僕貞。

二有柔順中正之德。柔順則眾與之,中正則處不失當;故能保其所有,童僕亦盡其 忠信。雖不若五有文明之德、上下之助,亦處旅之善者也。

次舍,旅所安也。財貨,旅所資也。童僕,旅所賴也。得就次舍,懷畜其資財, 又得童僕之貞良,旅之善也。柔弱在下者,童也;強壯處外者,僕也。 〔柔順中 正,故得內外之心。在旅所親比者,童僕也;不云「吉」者,旅寓之際,得免於 災厲 [註 105],則已善矣。

## 象曰:得童僕貞,終无尤也。

羈旅之人所賴者,童僕也;既得童僕之忠貞,終无尤悔矣。

# 九三: 旅焚其次, 喪其童僕貞, 厲。

處旅之道,以柔順謙下爲先。三剛而不中,又居下體之上與艮之上,有自高之象。 在旅而過剛自高,致困災之道也。自高,則不順於上,故上不與而焚其次,失所安 也。上離爲焚象,過剛則暴下,故下離而喪其竜僕之貞信,謂失其心也。如此,則 [註106] 危厲之道也。

# 象曰:旅焚其次,亦以傷矣;以旅與下,其義喪也。

<sup>[</sup>註105] 底本作「屬」, 形譌,據《四庫》本更正。《註評》本據《吉澄》本亦作「厲」。 [註106] 一作「者」。

旅焚,失其次舍,亦以困傷矣。以旅之時,而與下之道如此,義當喪也。在旅,而 以過剛自高待下,必喪其忠貞,謂失其心也。在旅而失其童僕之心,爲可危也。

#### 九四:旅于處,得其資斧,我心不快。

四,陽剛,雖不居中,而處柔,在上體之下,有用柔能下之象,得旅之宜也。以剛明之才,爲五所與,爲初所應,在旅之善者也。然四非正位,故雖得其處止,不若二之就次舍也。有剛明之才,爲上下所與,乃旅而得貨財之資、器用之利也。雖在旅爲善,然上无剛陽之與,下唯陰柔之應,故不能伸其才、行其志,其心不快也。云(註107)「我」者,據四而言。

## 象曰:旅于處,未得位也;得其資斧,心未快也。

四以近君爲當位;在旅, 五不取君義, 故四爲未得位也。曰:「然則以九居四, 不正, 爲有咎矣?」曰:「以剛居柔, 旅之宜也。九以剛明之才, 欲得時而行其志, 故雖得資斧, 於旅爲善, 其心志未快也。」

## 六五:射雉,一矢亡,終以譽命。

六五有文明柔順之德,處得中道,而上下與之,處旅之至善者也。人之處旅,能合 文明之道,可謂善矣。羈旅之人,動而或失,則困辱隨之;動而无失,然後爲善。

離爲雉,文明之物。射雉,謂取則於文明之道而必合,如射雉,一矢而亡之,發无不中,則終能致譽命也。

譽,令聞也。命,福祿也。丘居文明之位,有文明之德,故動必中文明之道也。五, 君位;人君无旅,旅則失位,故不取君義。

射,食亦反。

# 象曰:終以譽命,上逮也。

有文明柔順之德,則上下與之。逮,與也。能順承於上,而上與之,爲上所逮也。在 (註 108) 上而得乎下,爲下所上 (註 109) 逮也。在旅而上下與之,所以致譽命也。旅者,困而未得所安之時也。終以譽命,終當致譽命也。已譽命,則非旅也。困而親寡則爲旅,不必在外也。

<sup>[</sup>註 107] 底本作「天」,疑爲「夫」字,形譌。但《四庫》本作「云」,《註評》本據《吉澄》 本、《武英殿》本亦作「云」。今從眾。

<sup>[</sup>註108] 《四庫》本作「言」。

<sup>[</sup>註109] 一无「上」字。

上九:鳥焚其巢,旅入先笑,後號咷。喪牛于易,凶。

鳥,飛騰處高者也。上九,剛,不中,而處最高;又離體,其亢可知,故取鳥象。 在旅之時,謙降柔和,乃可自保;而過剛自高,失其所宜安矣。巢,鳥所安止 (註110)。 焚其巢,失其所安,无所止也。在離上,爲焚象。陽剛自處於至高,始快其意,故 先笑;既而失安莫與,故號咷。輕易以喪其順德,所以凶也。

牛,順物;喪牛于易,謂忽易以失其順也。離火性上,爲躁易之象;上承鳥焚其巢,故更加「旅人」字。不云「旅人」,則是鳥笑哭也。

號,戶羔反。咷,直羔反。喪、易,並去聲。

## 象曰:以旅在上,其義焚也;喪牛于易,終莫之聞也。

以旅在上,而以尊高自處,豈能保其居?其義當有焚巢之事。方以極剛自高,爲 得志而笑,不知喪其順德於躁易,是終莫之聞,謂終不自聞知也。使自覺知,則 不至於極而號咷矣。陽剛不中而處極,固有高亢躁動之象;而火復炎象,則又甚 焉。



《序卦》:「旅而无所容,故受之以巽。巽者,入也。」

羈旅親寡,非巽順何所取容?苟能巽順,雖旅困之中,何往而不能入?巽所以次旅也。為卦,一陰在二陽之下,巽順於陽,所以爲巽也。

## 巽:小亨,利有攸往,利見大人。

卦之才,可以小亨;利有攸往,利見大人也。

異與兌皆剛,中正異說 (註 111),義亦相類;而兌則亨,異乃小亨者:兌,陽之爲也; 異,陰之爲也。兌柔在外,用柔也;異柔在內,性柔也,異之亨所以小也。

## 彖曰:重異以申命,

重巽者,上下皆巽也。上順道以出命,下奉命而順從;上下皆順,重巽之象也。

又: 重爲重復之義, 君子體重巽之義, 以申復其命令。申, 重復也, 丁寧之謂也。

<sup>(</sup>註110) 一有「上」字

<sup>[</sup>註][] 一作「兑」。

## 剛巽乎中正而志行,柔皆順乎剛,是以小亨。

以卦才言也。陽剛居巽,而得中正,巽順於中正之道也。陽性上,其志在以中正之道上行也。又:上下之柔,皆巽順於剛。其才如是,雖內柔,可以小亨也。

## 利有攸往,利見大人。

巽順之道,无往不能入,故利有攸往。巽順雖善道,必知所從,能巽順於陽剛中正之大人,則爲利,故利見大人也。如五、二之陽剛中正,大人也。巽順不於大人, 未必不爲過也。

## 象曰:隨風,巽;君子以申命行事。

兩風相重 [註 112],隨風也。隨,相繼之義;君子觀重異相繼以順之象,而以申命令、 行政事。隨與重,上下皆順也。上順下而出之,下順上而從之;上下皆順,重巽之 義也。命令、政事,順理則合民心,而民順從矣。

# 初六:進退,利武人之貞。

六以陰柔居卑,巽而不中,處最下而承剛,過於卑異者也。陰柔之人,卑異大 (註 113) 過,則志意恐畏而不安;或進或退,不知所從。其所利,在武人之貞;若能用武人剛貞之志,則爲官也。勉爲剛貞,則无過卑恐畏之失矣。

## 象曰:進退,志疑也;利武人之貞,志治也。

進退不知所安者,其志疑懼也。利用武人之剛貞,以立其志,則其志治也。治,謂修立也。

## 九二:巽在床下,用史巫紛若,吉,无咎。

二居異時,以陽處陰而在下,過於異者也。牀,人之所安;異在牀下,是過於異, 過所安矣。人之過於卑異,非恐怯,則諂說,皆非正也。二實剛中,雖巽體而居柔, 爲過於異,非有邪心也。恭異之過,雖非正禮,可以遠恥辱、絕怨咎,亦吉道也。

史巫者,通誠意於神明者也。紛若,多也。苟至誠,安於謙巽,能使通其誠意者多, 則吉而无咎,謂其誠足以動人也。人不察其誠意,則以過巽爲諂矣。

象曰:紛若之吉,得中也。

<sup>[</sup>註112]一作「從」。

<sup>[</sup>註113] 《四庫》本作「太」。

二以居柔在下,爲過巽之象;而能使通其誠意者,眾多紛然,由得中也。陽居中,爲中實之象。中既誠實,則(註114)人自當信之。以誠意則非諂畏也,所以吉而无咎。

#### 九三:頻巽,吝。

三以陽處剛,不得其中,又在下體之上,以剛亢之質而居巽順之時,非能巽者,勉 而爲之,故屢失也。

居巽之時,處下而上臨之以巽;又四以柔巽相親,所乘者剛,而上復有重剛,雖欲 不巽,得乎?故頻失而頻巽,是可吝也。

## 象曰:頻巽之吝,志窮也。

三之才質,本非能異,而上臨之以異,承重剛而履剛,勢不得行其志,故頻失而頻 異,是其志窮困,可吝之甚也。

#### 六四:悔亡,田獲三品。

陰柔无援,而承乘皆剛,宜有悔也。而四以陰居陰,得巽之正;在上體之下,居上 而能下也。居上之下,巽於上也;以巽臨下,巽於下也。善處如此,故得悔亡。所 以得悔亡,以如田之獲三品也。田獲三品,及於上下也。

田獵之獲,分三品:一為乾豆;一供賓客與充庖;一頒徒御。四能異於上下之陽,如田之獲三品,謂遍及上下也。

四之地,本有悔,以處之至善,故悔 (註 115) 亡而復有功。天下之事,苟善處,則悔或可以爲功也。

## 象曰:田獲三品,有功也。

巽於上下,如田之獲三品,而遍及上下,成巽之功也。

九五: 貞吉, 悔亡, 无不利。无初有終, 先庚三日, 後庚三日, 吉。 五居尊位,爲巽之主,命令之所出也。處得中正,盡巽之善; 然巽者, 柔順之道, 所利在貞, 非五之不足, 在巽當戒也。既貞, 則吉而悔亡, 无所不利。

貞,正中也,處巽出令,皆以中正爲吉。柔巽而不貞,則有悔,安能无所不利也? 命令之出,有所變更也。无初,始未善也。有終,更之使善也。若已善,則何用命

<sup>[</sup>註114] 一无「則」字。

<sup>[</sup>註115] 一无「悔」字。

#### 也?何用更也?

先庚三日,後庚三日,吉:出命更改 (註116) 之道,當如是也。甲者,事之端也。庚者,變更之始也。十千戊己爲中,過中則變,故謂之庚。事之改更,當原始要終,如先甲後甲之義,如是則吉也。解在蠱卦。

先, 西薦反。

#### 象曰:九五之吉,位正中也。

九五之吉,以處正中也。得正中之道則吉,而其悔亡也。正中,謂不過、无不及 (註117),正得其中也。處柔異與出命令,唯得中爲善,失中則悔也。

#### 上九:巽在牀下,喪其資斧,貞凶。

床,人所安也。在床下,過所安之義也。九居巽之極,過於巽者 (註 118) 也。資,所有也。斧,以斷也。陽剛本有斷,以過巽而失其剛斷,失其所有,喪資斧也。居上而過巽,至於自失,在正道爲凶也。

## 象曰:巽在牀下,上窮也;喪其資斧,正乎?凶也。

異在床下,過於異也。處卦之上,異至於窮極也。居上而過極於異,至於自失,得 爲正乎?乃凶道也。異本善行,故疑之曰:「得爲正乎?」;復斷之曰:「乃凶也。」

# 党下 兌上 **兌**

《序卦》:「巽者,入也。入而後說之,故受之以兌。兌者,說也。」

物相入則相說,相說則相入,兌所以次巽也。

## 兌:亨,利貞。

兌,說也。說,致亨之道也。能說於物,物莫不說而與之,足以致亨。然爲說之道, 利於貞正;非道求說,則爲邪諂而有悔咎(註119),故戒利貞也。

兌,徒外反。

<sup>[</sup>註116] 一作「故」。

<sup>[</sup>註117] 一作「无過不及」。

<sup>[</sup>註118] 一无「者」字。

<sup>[</sup>註 [19] 一作「吝」。

彖曰:兌,說也。剛中而柔外,說以利貞,是以順乎天而應乎人。說以先 民,民忘其勞;說以犯難,民忘其死。說之大,民勸矣哉!

兌之義,說也。一陰居二陽之上,陰說於陽,而爲陽所說也。陽剛居中,中心誠實之象。柔爻在外,接物和柔之象,故爲說而能貞也。

利貞,說之道宜正(註120)也。卦有剛中之德,能貞者也。說而能貞,是以上順天理,下應人心,說道之至正至善者也。若夫違道以下百姓之譽者,苟說之道。違道不順天,下譽非應人,苟取一時之說耳,非君子之正道。

君子之道,其說於民,如天地之施,感於其心,而說服无斁。故以之先民,則民心 說隨而忘其勞;率之以犯難,則民心(註121)說服於義,而不恤其死。

說道之大,民莫不知勸。勸,謂信之而勉力順從。人君(註122)之道,以人心說服爲本,故聖人贊其大。

應,應對之應。說,音悅。先,西薦反。難,乃旦反。

#### 象曰:麗澤,兌;君子以朋友講習。

麗澤, 二澤相附麗也。兩澤相麗, 交相浸潤, 互有滋益之象; 故君子觀其象, 而以朋友講習。朋友講習, 互相益也; 先儒謂, 天下之可說, 莫若 [註 123] 朋友講習。朋友講習, 固可說之大者, 然當明相益之象。

# 初九:和兌,吉。

初雖陽爻,居說體而在最下,无所係應,是能卑下和順以爲說,而无所偏私者也。 以和爲說而无所偏(註124)私,說之正也。陽剛則不卑,居下則能巽,處說則能和, 无應則不偏。處說如是,所以吉也。

# 象曰:和兌之吉,行未疑也。

有求而和,則涉於邪諂。初隨時順處(註 125),心无所係,无所爲也,以和而已,是以吉也。《象》又以其處說,在下而非中正,故云「行未疑也」。其行未有可疑,謂未

<sup>[</sup>註120] 一作「貞」。

<sup>[</sup>註121] 一无「心」字。

<sup>[</sup>註 [22] 一作「君人」。

<sup>[</sup>註123]《四庫》本作「如」。

<sup>[</sup>註124] 一无「偏」字。

<sup>[</sup>註125] 一作「處順」。

見其有失也。若得中正,則无是言也。說以中正爲本,爻直陳其義,《象》則推而盡 之。

九二: 孚兌, 吉, 悔亡。

二承比陰柔;陰柔,小人也,說之則當有悔。二,剛中之德, 字信內充;雖比小人, 自守不失。君子和而不同,說而不失剛中,故吉而悔亡。非二之剛中,則有悔矣, 以自守而亡也。

象曰: 孚兌之吉, 信志也。

心之所存爲志。二剛實居中,孚信存於中也。志存誠信,豈至說小人而自失乎?是以吉也。

六三:來兌,凶。

六三,陰柔不中正之人,說不以道者也。來兌,就之以求說也。比於在下之陽,枉 己非道,就以求說,所以凶也。之內爲來;上下俱陽,而獨之內者,以同體而陰性 [註126]下也,失道下行也。

象曰:來兌之凶,位不當也。

自處不中正,无與而妄求說,所以凶也。

九四:商兌未寧,介疾有喜。

四上承中正之五,而下比柔邪之三,雖剛陽而處非正。三,陰柔,陽所說也,故不能決而商度。未寧,謂擬議;所從而未決,未能有定也。

兩間謂之介,分限也。地之界則加田,義乃同也。故人有節守,謂之介。若介然守 正,而疾遠邪惡,則有喜也。

從五,正也。說三,邪也。四,近君之位,若剛介守正,疾遠邪惡,將得君以行道, 福慶及物,爲有喜也。若四者,得失未有定,繫所從耳。

象曰:九四之喜,有慶也。

所謂喜者,若守正而君說之,則得行其剛陽之道,而福慶及物也。

九五: 孚于剝, 有厲。

<sup>[</sup>註 126] 一作「性陰」

九五得尊位,而處中正,盡說道之善矣,而聖人復設有厲之戒。

蓋堯、舜之盛,未嘗无戒也,戒所當戒而已。雖聖賢在上,天下未嘗无小人;然不敢肆其惡也,聖人亦說其能勉而革面也。彼小人者,未嘗不知聖賢之可說也;如四凶,處堯朝,隱惡而順命是也。聖人非不知其終惡也,取其畏罪而強仁耳。五若誠心,信小人之假善爲實善,而不知其包藏,則危道也。小人者,備之不至,則害於善,聖人爲戒之意深矣。

剝者,消陽之名,陰,消陽者也,蓋指上六,故孚于剝則危也。以五在說之時,而 密比於上六,故爲之戒。雖舜之聖,且畏巧言令色,安得不戒也?說之惑人,易入 而可懼也如此。

#### 象曰: 孚于剝, 位正當也。

戒孚于剝者,以五所處之位正當戒也。密比陰柔,有相說之道,故戒在信之也。

## 上六:引兌。

它卦,至極則變;兌爲說,極則愈說。上六,成說之主,居說之極,說不知已者也;故說既極矣,又引而長之。然而不至悔咎,何也?曰:「方言其說不知已,未見其所說善惡也;又下乘九五之中正,无所施其邪說。六三則承乘皆非正,是以有凶。」

# 象曰:上六引兌,未光也。

說既極矣,又引而長之,雖說之之心不已,而事理已過,實无所說。事之盛,則有 光輝;既極而強引之長,其无意味甚矣,豈有光也?未,非必之辭。《象》中多用。 非必能有光輝,謂不能光也。

## 大下 第上 **渙**

《序卦》:「兌者,說也。說而後散之,故受之以渙。」

說則舒散也。人之氣,憂則結聚,說則舒散;故說有散義,渙所以繼兌也。爲卦巽 上坎下。風行於水上,水遇風則渙散,所以爲渙也。

渙:亨。王假有廟,利涉大川,利貞。

渙,離散也。人之離散,由乎中;人心離,則散矣。治乎散,亦本於 [註 127] 中;能 [註 128] 收合人心,則散可聚也。故卦之義,皆上於中。利貞,合渙散之道,在乎正 固也。

渙,呼亂反。假,庚白反。

# 彖曰:渙亨。剛來而不窮,柔得位乎外而上同。

渙之能亨者,以卦才如是也。渙之成渙,由九來居二,六上居四也。剛陽之來,則不窮極於下,而處得其中;柔之往,則得正位於外,而上同於五之中。巽順於五, 乃上同也。

四、丘,君臣之位,當渙而比,其義相通;同丘,乃從中也。當渙之時,而守其中, 則不至於離散,故能亨也。

#### 王假有廟,王乃在中也。

王假有廟之義,在萃卦詳矣。

天下離散之時,王者收合人心,至於有廟,乃是在其中也。在中,謂求得其中,攝其心之謂也。中者,心之象。剛來而不窮,柔得位而上同。卦才之義,皆主於中也。王者拯渙之道,在得其中而已。孟子曰:「得其民有道。得其心,斯得民矣。」享帝立廟,民心所歸從也。歸人心之道,无大於此,故云「至于有廟」。拯渙之道極於此也。

# 利涉大川,乘木有功也。

治渙之道,當濟於險難,而卦有乘木涉(註129)川之象。上巽,木也;下坎水,大川也:利涉險以濟(註130)渙也。木在水上,乘木之象;乘木所以涉川也。涉則有濟渙之功。卦有是義,有是象也。

## 象曰:風行水上,渙;先王以享于帝,立廟。

風行水上,有渙散之象。先王觀是象,救天下之渙散,至于享帝立廟也。收合人心,无如宗廟。祭祀之報,出於其心;故享帝立廟,人心之所歸也。係人心、合

<sup>(</sup>註127)一作「必由」。

<sup>[</sup>註128] 一有「利貞|字。

<sup>[</sup>註129]《四庫》本作「濟」。

<sup>[</sup>註130] 底本作「齊」,應爲形譌,據《四庫》本更正。

[註 [31] 離散之道,无大於此。

#### 初六:用拯馬壯,吉。

六居卦之初, 渙之始也。始渙而拯之, 又得馬壯, 所以吉也。六爻獨初不云「渙」者, 離散之勢, 辨之官早; 方始而拯之, 則不至於渙也。爲教深矣。

馬,人之所託也;託於壯馬,故能拯渙。馬,謂二也。二有剛中之才,初陰柔順,兩皆无應;无應,則親比相求。初之柔順,而託於剛中之才,以拯其渙;如得壯馬 以致遠,必有濟矣,故吉也。渙拯於始,爲力則易,時之順也。

## 象曰:初六之吉,順也。

初之所以吉者,以其能順從剛中之才也。始渙而用拯,能順乎時也。

## 九二: 渙奔其机, 悔亡。

諸爻皆云「渙」,謂渙之時也。在渙離之時,而處險中,其有悔可知。若能奔就所安, 則得悔亡也。

机者,俯憑以爲安者也。俯,就下也。奔,急往也。二與初雖非正應,而當渙離之時,兩皆无與,以陰陽親比相求,則相賴者也。故二目初爲机,初謂二爲馬;二急就於初以爲安,則能亡其悔矣。初雖坎體,而不在險中也。

或疑初之柔微,何足賴?蓋渙之時,合力爲 (註 132) 勝;先儒皆以五爲机,非也。方 渙離之時,二陽豈能同也?若能同,則成濟渙之功,當大 (註 133) ,豈能 (註 134) 悔 亡而已?机,謂俯就也。

机, 音几。

## 象曰: 渙奔其机, 得願也。

渙散之時,以合爲安; [居險中,急親 [註 135] 於初,求安也。賴之如机,而亡其悔, 乃得所願也。

六三: 渙其躬, 无悔。

<sup>[</sup>註131] 底本作「台」,應爲形譌,據《四庫》本更正。

<sup>[</sup>註132] 一作「而」。

<sup>[</sup>註133] 一有「吉」字。

<sup>[</sup>註134]《四庫》本作「止」。

<sup>[</sup>註135]《四庫》本作「就」。

三在渙時,獨有應與,无渙散之悔也。然以陰柔之質,不中正之才,上居无位之地, 豈能拯時之渙而及人也?止於其身,可以无悔而已。上加「渙」字,在渙之時,躬, 无渙之悔也。

## 象曰: 渙其躬, 志在外也。

志應於上,在外也;與上相應,故其身得免於渙而无悔。悔亡者,本有而得亡;无 悔者,本无也。

六四: 渙其群, 元吉。渙有丘, 匪夷所思。

澳,四、五二爻,義相須,故通言之,《彖》故曰「上同」也。

四,巽順而正,居大臣之位。丘,剛中而正,居君位。君臣合力,剛柔相濟,以拯 (註136)天下之渙者也。方渙散之時,用剛,則不能使之懷附;用柔,則不足爲之依 歸。四以巽順之正道,輔剛中正之君;君臣同功,所以能濟渙也。天下渙散,而能 (註137)使之群聚,可謂大善之吉也。

澳有丘,匪夷所思,贊美之辭也。丘,聚之大也;方渙散而能致其大聚,其功甚 大,其事甚難,其用至妙。夷,平常也;非平常之見所能思及也。非大賢智,孰 能如是?

## 象曰:渙其群,元吉,光大也。

稱「元吉」者,謂其功德光大也。元吉光大不在五,而在四者,二爻之義通言也。 於四言其施用,於五言其成功,君臣之分也。

## 九五:渙汗其大號,渙王居,无咎。

五與四,君臣合德,以剛中正巽順之道治渙,得其道矣。唯在浹洽於人心,則順從也。當使號令治 [註 138] 於民心,如人身之汗,浹於四體,則信服而從矣。如是,則可以濟天下之渙,居王位,爲稱而无咎。

大號,大政令也,謂新民之大命,救渙之大政。再云「渙」者,上謂渙之時,下謂 處渙如是,則无咎也。在四已言「元吉」,五唯言稱其位也。

澳之四、五通言者, 澳以離散爲害, 拯之使合也; 非君臣同功合力, 其能濟乎? 爻

<sup>{</sup>註 [36] 底本作「極」,應爲形譌,據《四庫》本更正。

<sup>[</sup>註137] 一无「能」字。

<sup>〔</sup>註138〕一作「浹」。

義相須,時之官也已(註139)。

汗, 万日反。

象曰:王居无咎,正位也。

王居,謂正位,人君之尊位也。能如五之爲,則居尊位爲稱而无咎也。

上九:渙其血去逖出,无咎。

渙之諸爻,皆无係應,亦渙離之象。唯上應於三,三居險陷之極,上若下從於彼, 則不能出於渙也。險,有傷害、畏懼之象,故云「血惕」。

然九以陽剛處渙之外,有出渙之象。又居巽之極,爲能巽順於事理,故云:「若能使 其血去,其惕出,則无咎也。」其者,所有也。渙之時,以能合爲功;獨九居渙之 極,有係而臨險,故以能出渙遠害爲善也。

去,羌呂反。逖,湯歷反。

#### 象曰: 渙其血, 遠害也。

若如《象》文,爲「渙其血」,乃與「屯其膏」同也;義則不然。蓋血字下脫「去」字。血去惕出,謂能遠害則无咎也。

# 

《序卦》:「渙者,離也。物不可以終離,故受之以節。」

物既離散,則當節止之,節所以次渙也。爲卦澤上有水。澤之容有限,澤上置水,滿則不容,爲有節之象,故爲節。

節:亨。苦節,不可貞。

事既有節,則能致亨通,故節有亨義。節貴適中,過則苦矣。節至於苦,豈能常也? 不可固守以爲常,不可貞也。

彖曰:節亨,剛柔分,而剛得中。

節之道,自有亨義,事有節則能亨也。又:卦之才,剛柔分處,剛得中而不過,亦

<sup>[</sup>註139] 《四庫》本無「已」字。一作「而已」。

所以為節,所以能亨也。

#### 苦節不可貞,其道窮也。

節至於極而苦,則不可堅固常守,其道已窮極也。

#### 說以行險,當位以節,中正以通。

以卦才言也。內兌外坎,說以行險也。人於 [註 140] 所說,則不知已,遇艱險則思止。 方說而止,爲節之義。

當位以節:五居尊,當位也;在澤上,有節也。當位而以節,主節者也。處得中正, 節而能通也。中正則通,過則苦矣。

#### 天地節而四時成。節以制度,不傷財,不害民。

推言節之道。天地有節,故能成四時,无節則失序也。聖人立制度以爲節,故能不傷財害民。人欲之无窮也,苟非節以制度,則侈肆至於傷財害民矣。

#### 象曰:澤上有水,節;君子以制數度,議德行。

澤之容水有限,過則盈溢,是有節,故爲節也。君子觀節之象,以制立數度。凡物 之大小、輕重、高下、文質,皆有數度,所以爲節也。

數,多寡。度,法制。議德行者,存諸中爲德,發於外爲行。人之德行,當義則中 節。議,謂商度,求中節也

行,下孟反。

## 初九:不出戶庭,无咎。

戶庭,戶外之庭;門庭,門內(註141)之庭。初以陽在下,上復有應,非能節者也。 又當節之初,故(註142)戒之謹守,至於不出戶庭,則无咎也。初能固守,終或渝之; 不謹於初,安能有卒?故於節之初,爲戒甚嚴也。

# 象曰:不出戶庭,知通塞也。

爻辭於節之初,戒之謹守,故云:「不出戶庭,則无咎也。」《象》恐人之泥於言也,故復明之云:「雖當謹守,不出戶庭,又必知時之通塞也。」通則行,塞則止;義當

<sup>[</sup>註140] 一作「之」。

<sup>[</sup>註141] 一作「外」。

<sup>[</sup>註142] 一无「故」字。

出則出矣。尾生之信〔註143〕,水至不去,不知通寒也。故君子貞而不諒。

《繫辭》所解,獨以言者,在人所節,唯言與行。節於言,則行可知,言當在先也。

#### 九二:不出門庭, 凶。

二雖剛中之質,然處陰居說而承柔。處陰,不正也;居說,失剛也;承柔,近邪也。 節之道,當以剛中正,二失其剛中之德,與九五剛中正異矣。

不出門庭,不之於外也,謂不從於五也。二、五非陰陽正應,故不相從。若以剛中之道相合,則可以成節之功;唯其失德失時,是以凶也。不合於五,乃不正之節也。以剛中正爲節,如懲忿窒慾,損過抑有餘(註144)是也。不正之節,如嗇節於用,懦節於行是也。

#### 象曰:不出門庭,凶,失時極也。

不能上從九五剛中正之道,成節之功,乃係於私暱之陰柔,是失時之至極,所以凶也。失時,失其所宜也。

#### 六三:不節若,則嗟若,无咎。

六三不中正,乘剛而臨險,固宜有咎。然柔順而和說,若能自節而順於義,則可以 无過;不然,則凶咎必至,可傷嗟也,故「不節若,則嗟若」。己所自致,无所歸咎 也。

## 象曰:不節之嗟,又誰咎也。

節則可以免(註145)過,而不能自節,以致可嗟,將誰咎乎?

## 六四:安節,亨。

四,順承九五剛中正之道,是以中正為節也。以陰居陰,安於正也。當位,爲有節之象,下應於初。四,坎體,水也。水上溢爲无節,就下,有節也。如四之義,非強節之,安於節者也,故能致亨。節以安爲善,強守而不安,則不能常,豈能亨也?

# 象曰:安節之亨,承上道也。

四能安節之義非一、《象》獨舉其重者。上承九五剛中正之道以爲節,足以亨矣〔註146〕,

<sup>[</sup>註143] 一无「信」字。

<sup>[</sup>註 144] 一作「益不及」。

<sup>(</sup>註145) 一作「无」。

<sup>[</sup>註146] 一作「是以亨也」。

餘善亦不出於中正也。

九五:甘節,吉,往有尚。

九五剛中正,居尊位,爲節之主,所謂「當位以節,中正以通」者也。在己則安,行 天下則說從,節之甘美者也,其吉可知。以此而行,其功大矣,故往則有可嘉尚也。

象曰:甘節之吉,居位中也。

既居尊位,又得中道,所以吉而有功。節以中爲貴,得中則正矣;正,不能盡中也。

上六:苦節,貞凶,悔亡。

上六居節之極,節之苦者也。居險之極,亦爲苦義,固守則凶,悔則凶亡。悔,損過從中之謂也。節之悔亡,與他卦之悔亡,辭同而義異也。

象曰:苦節貞凶,其道窮也。

節既苦,而貞固守之則凶;蓋節之道,至於窮極矣。

## 党下 異上 中**孚**

《序卦》:「節而信之,故受之以中孚。」

節者,爲之制節,使不得過越也。信而後能行,上能信守之,下則信從之,節而信之也,中孚所以次節也。爲卦澤上有風。

風行澤上,而感于水中,爲中孚之象。感,謂感而動也。內外皆實而中虛,爲中孚之象。又:二、五皆陽 [註 147],中實亦爲孚義。在二體則中實,在全體則中虛。中虛,信之本;中實,信之質。

中孚:豚魚,吉,利涉大川,利貞。

**豚躁、魚冥,物之難感者也,孚信能感於豚魚,則无不至矣,所以吉也。忠信可以** 蹈水火,況涉川乎?守信之道,在乎堅正,故利於貞也。

**②**,芳夫反。豚,徒尊反。

彖曰:中孚,柔在內而剛得中。

<sup>[</sup>註[47]一有「而」字。

二柔在內,中虛,爲誠之象。二剛得上下體之中,中實,爲字之象,卦所以爲中孚也。

#### 說而異,孚乃化邦也。

以二體言卦之用也。上異下兌 (註 148),爲上至誠以順異於下,下有孚以說從其上。如是,其孚乃能化於邦國也。若人不說從,或違拂事理,豈能化天下乎?

說, 音悅; 下同。

#### 豚魚吉, 信及豚魚也。

信能及於豚魚,言(註149)道至矣,所以吉也。

#### 利涉大川,乘木舟虚也。

以中孚 (註 150) 涉 (註 151) 險難,其利如乘木濟川,而以虛舟也。舟虛 (註 152),則无 沉覆之患 (註 153)。卦虛中,爲虛舟之象。

## 中孚以利貞,乃應乎天也。

中孚而貞,則應乎天矣。天之道,孚貞而已。

## 象曰:澤上有風,中孚;君子以議獄緩死。

澤上有風,感於澤中。水體虛,故風能入之。人心虛,故物能感之。風之動乎澤, 猶物之感于中,故爲中孚之象。

君子觀其象,以議獄與緩死。君子之於議獄,盡其忠而已;於決死,極於惻而已,故誠意常求於緩。緩,寬也。於天下之事,无所不盡其忠,而議獄緩死,最其大者也。

# 初九: 虞吉, 有它不燕。

九當中孚之初,故戒在審其所信。虞,度也,度其可信而後從也。雖有至信,若 (註 154)不得其所,則有悔咎,故虞度而後信,則吉也。

既得所信,則當誠一;若有它,則不得其燕安矣。燕,安裕也。有它,志不定也。

<sup>[</sup>註148] 《四庫》本作「説」。

<sup>[</sup>註149]《四庫》本作「信」。

<sup>[</sup>註150] 一作「虛」。

<sup>[</sup>註151] 底本作「步」。《彖》言「利涉大川」,以「涉」爲是,依《四庫》本更正。

<sup>[</sup>註152] 一有「中」字。

<sup>[</sup>註153] 一无「之患」二字。

<sup>[</sup>註154]《四庫》本作「苦」。

人志不定,則惑而不安。初與四爲正應;四,巽體而居正,无不善也。爻以謀始之 義大,故不取相應之義;若用應,則非虞也。

燕,音鷰。

#### 象曰:初九虞吉,志未變也。

當信之始,志(註155)未有所從,而虞度所信,則得其正,是以占也。蓋其志未有變動;志有所從,則是變動,虞之不得其正矣。在初,言求所信之道也。

## 九二:鳴鶴在陰,其子和之;我有好爵,吾與爾靡之。

二,剛實於 (註 156)中, 字之至者也, 字至則能感通。鶴鳴於幽隱之處, 不聞也; 而其子相應和, 中心之願相通也。

好爵我有,而彼亦係慕,說好爵之意同也。

有孚於中,物无不應,誠同故也。至誠,无遠近幽深之間,故《繫辭》云:「善,則 千里之外應之;不善,則千里(註157)違之。」言誠通也。至誠感通之理,知道者, 爲能識之。

和,胡臥反。靡,广池反。

## 象曰:其子和之,中心願也。

中心願,謂誠意所願也,故通而相應。

## 六三:得敵,或鼓或罷,或泣或歌。

敵,對敵也,謂所交孚者,正應上九是也。三、四皆以虛中爲成孚之主,然所處則 異。四得位居正,故亡匹以從上。三不中,失正,故得敵以累志(註158)。以柔說之 質,既有所係,唯所信是從。或鼓張、或罷廢、或悲泣、或歌樂,動息憂樂,皆係 乎所信也。唯係所信,故未知占凶;然非明達君子之所爲也。

罷, 音皮。

象曰:或鼓或罷,位不當也。

<sup>[</sup>註155] 一无「志」字。

<sup>[</sup>註156]《四庫》本無「於」字。

<sup>[</sup>註157] 《四庫》本有「之外」二字。

<sup>[</sup>註 158] 一作「心」。

居不當位,故无所主,唯所信是從。所處得正,則所信有方矣。

#### 六四:月幾望,馬匹亡, 无咎。

四爲成孚之主,居近君之位,處得其正,而上信之至 (註 159),當孚之任者也。如月之幾望,盛之至也。已望則敵矣;臣而敵君,禍敗必至,故以幾望爲至盛。

馬匹亡:四與初為正應,匹也。古者,駕車用四馬,不能備純色,則兩服兩驂,各一色。又小大必相稱,故兩馬為匹,謂對也。馬者,行物也。初上應四,而四亦進從五,皆上行,故以馬爲象。

孚道在一,四既從五,若復下係於初,則不一而害於孚,爲有咎矣,故馬匹亡則无 咎也。上從五而不係於初,是亡其匹也。係初則不進,不能成孚之功也。

幾,音機。

## 象曰:馬匹亡,絕類上也。

絕其類而上從五也。類,謂(註160)應也。

上,時掌反。

## 九五:有孚攣如,无咎。

五居君位。人君之道,當以至誠感通天下,使天下之心信之,固結如拘攣然,則爲 无咎也。人君之孚,不能使天下固結如是,則億兆之心,安能保其不離乎?

攣,力圓反。

## 象曰:有孚攣如,位正當也。

五居君位之尊,由中正之道,能使天下信之,如拘攣之固,乃稱其位。人君之道, 當如是也。

## 上九:翰音登于天,貞凶。

翰音者,音飛而實不從。處信之終,信終則衰;忠篤內喪,華美外颺,故云「翰音登天」,正亦滅矣。陽性上進,風體飛颺;九居中孚之時,處於最上,孚於上進而不知止者也。其極至於羽翰之音,登聞于天,貞固於此,而不知變,凶可知矣。夫子曰:「好信不好學,其蔽也賊。」固守而不通之謂也。

<sup>[</sup>註159] 一作「位」。

<sup>[</sup>註160] 一作「相」。

翰,胡旦反。

象曰:翰音登于天,何可長也?

守孚至於窮極,而不知變,豈可長久也?固守而(註1611不通,如是則凶也。

## 艮下 震上 **小過**

《序卦》:「有其信者,必行之,故受之以小過。」

人之所信則必行,行則過也,小過所以繼中孚也。為卦山上有雷。雷震於高,其聲 過常,故為小過。

又:陰居尊位,陽失位而不中,小者過其常也。蓋爲小者過,又爲小事過,又爲過 之小。

小過:亨,利貞。

過者,過其常也;若矯枉而過正,過所以就正也。事,有時而當然有待過而後能亨者,故小過自有亨義。

利貞者,過之道,利於貞也;不失時官之謂正。

過,占臥反。

可小事,不可大事。飛鳥遺之音,不宜上,宜下,大吉。

過,所以求就中也;所過者,小事也。事之大者,豈<u>可過也</u>?於大過論之詳矣。

飛鳥遺之音,謂過之不遠也。不宜上,宜下,謂宜順也。順則大吉,過以就之,蓋順理也。過而順理,其吉必大。

彖曰:小過,小者過而亨也。

陽大陰小。陰得位,剛失位而不中,是小者過也,故爲小事過,過之小。小者與小事, 有時而當過,過之亦小,故爲小過。事固有待過而後能亨者,過之所以能(註162)亨也。

過以利貞,與時行也。

<sup>[</sup>註161] 一无「而」字。

<sup>〔</sup>註162〕一作「求」。

過而利於貞,謂與時行也。時當過而過,乃非過也,時之宜也,乃所謂正也。

柔得中,是以小事吉也。剛失位而不中,是以不可大事也。有飛鳥之象 焉。

小渦之道,於小事有渦則吉者,而《彖》以卦才言吉義。

条得中,二、五居中也。陰柔得位,能致小事吉耳,不能濟大事也。剛失位而不中, 是以不可大事;大事,非剛陽之才不能濟。三不中,四失位,是以不可大事。小過 之時,自不可大事;而卦才又不堪大事,與時合也。

有飛鳥之象焉:此一句不類《彖》體,蓋解者之辭,誤入《彖》中。中剛 [註 163] 外柔,飛鳥之象。卦有此象,故就飛鳥爲義。

#### 飛鳥遺之音,不宜上,宜下,大吉,上逆而下順也。

事有時而過當,所以從宜,然豈可甚過也?如過恭、過哀、過儉,大過則不可,所以在小過也。所過當如飛鳥之遺音。鳥飛迅疾,聲出而身已過,然豈能相遠也?事之當過者,亦如是。身不能甚遠於聲,事不可(註164)遠過其常,在得宜耳。

不宜上,宜下,更就鳥音取宜順之義。過之道,當如飛鳥之遺音。夫聲逆而上則難,順而下則易,故在高則大。山上有雷,所以爲過也。過之道,順行則占,如飛鳥之遺音宜順也;所以過者,爲順乎宜也。能順乎宜,所以大吉。

## 象曰:山上有雷,小過;君子以行過平恭,喪過平哀,用過平儉。

雷震於山上,其聲過常,故爲小過。天下之事,有時當過,而不可過甚,故爲小過。 君子觀小過之象,事之宜過者,則勉之;行過乎恭,喪過乎哀,用過乎儉是也。當 過而過,乃其官也。不當過而過,則過矣。

行,下孟反。

# 初六:飛鳥以凶。

初六,陰柔在下,小人之象。又上應於四,四復動體。小人躁易,而上有應助, 於所當過,必至過甚,況不當過而過乎?其過如飛鳥之迅疾,所以凶也。躁疾如 是(註165),所以過之速且遠,救止莫及也。

<sup>[</sup>註 [63] 一作「貴」。

<sup>[</sup>註164] 一作「能」。

<sup>[</sup>註165] 一有「則」字。

#### 象曰:飛鳥以凶,不可如何也。

其過之疾,如飛鳥之迅,豈容救止也?凶其宜矣。不可如何,无所用其力也。

六二:過其相,遇其妣;不及其君,遇其臣,无咎。

陽之在上者,父之象。尊於父者,祖之象。四在三上,故爲祖。二與五居相應之地, 同有柔中之德,志不從於三、四;故過四而遇五,是過其祖也。五陰而尊,祖妣之 象,與二同德相應。在它卦,則陰陽相求。過之時,必過其常,故異也。无所不過, 故二從五,亦戒其過。

不及其君,遇其臣,謂上進而不陵及於君,適當臣道,則无咎也。遇,當也。過臣 之分,則其咎可知。

妣, 必履反。

## 象曰:不及其君,臣不可過也。

過之時,事无不過其常,故於上進,則戒及其(註166)君。臣不可過,不可過(註167)臣之分也。

## 九三: 弗過防之, 從或戕之, 凶。

小過,陰過陽,失位之時,三獨居正;然在下,无所能爲,而爲陰所忌惡,故有(註168) 當過者,在過防於小人。若弗過防之,則或從而戕害之矣,如是則凶也。三於陰過之 時,以陽居剛,過於剛也。既戒之過防,則過剛亦在所戒矣。防小人之道,正己爲先。 三不失正,故无必凶之義,能過防則免矣。三居下之上,居上爲下,皆如是也。

戕,在良反。

# 象曰:從或戕之,凶如何也!

陰過之時,必害於陽;小人道盛,必害君子,當過爲之防。防之不至,則爲其所戕矣,故曰「凶如何也」,言其甚也。

# 九四:无咎。弗過遇之,往厲必戒,勿用永貞。

四當小過之時,以剛處柔,剛不過也,是以无咎。既弗過,則合其宜矣,故云「遇之」,謂得其道也。若往則有危,必當戒懼也。往,去柔而以剛進也。

<sup>[</sup>註166]一作「其及」。

<sup>(</sup>註167)《四庫》本無「不可過」三字。

<sup>[</sup>註 168] 一作「所」。

勿用永貞:陽性堅剛,故戒以隨官,不可固守也。方陰過之時,陽剛失位,則君子當隨時順處,不可固守其常也。四居高位,而无上下之交,雖比五應初,方陰過之時,彼豈肯從陽也?故往則有厲。

#### 象曰:弗過遇之,位不當也;往厲必戒,終不可長也。

位不當,謂處柔。九四當過之時,不過剛而反居柔,乃得其官,故曰「遇之」,遇其 宜也。以 (註 169) 九居四,位不當也。居柔,乃遇其宜也。當陰過之時,陽退縮自保, 足矣,終豈能長而盛也?故往則有危,必當戒也。

長,上聲。作下聲,則大失《易》意。以夬與剝觀之,可見與夬之《象》,文同而音 異也。

## 六五:密雲不雨,自我西郊,公弋取彼在穴。

五以陰柔居尊位,雖欲過爲,豈能成功?如密雲而不能成雨。所以不能成雨,自西郊故也。陰不能成雨,小畜卦中已解。

公弋取彼在穴:弋,射取之也。射止是射,弋有取義。穴,山中之空;中虚,乃空也。在穴,指六二也。丘與二本非相應,乃弋而取之。五當位,故云「公」,謂公上也。同類相取,雖得之,兩陰豈能濟大事乎?猶密雲之不能成雨也。

弋,餘職反。

## 象曰:密雲不雨,已上也。

陽降陰升,合則和而成雨。陰已在上,雲雖密,豈能成雨乎?陰過,不能成大之義也。

## 上六:弗遇過之,飛鳥離之,凶,是謂災眚。

六,陰而動體,處過之極,不與理遇,動皆過之;其違理過常,如飛鳥之迅速,所以凶也。離,過之遠也。是謂災眚,是當有災眚也。災者,天殃;眚者,人爲。既過之極,豈唯人眚,天災亦至,其凶可知。天理、人事皆然也。

# 象曰:弗遇過之,已亢也。

居過之終,弗遇於理而過之,過已亢極,其凶宜也(註170)。

<sup>[</sup>註[69]一无「以」字。

<sup>[</sup>註170] 一作「矣」。

#### 

《序卦》:「有過物者,必濟,故受之以既濟。」

能過於物,必可以濟,故小過之後,受之以既濟也。爲卦水在火上。水火相交,則 爲用矣;各當其用,故爲既濟,天下萬事已濟之時也。

#### 既濟:亨小,利貞;初吉,終亂。

既濟之時,大者既已亨矣,小者尚有 (註 171) 亨也。雖既濟之時,不能无小未亨也。 「小」字在下,語當然也。若言小亨,則爲亨之小也。

利貞,處既濟之時(註172),利在貞固以守之也。初吉,方濟之時也。終亂,濟極則 反也。

濟,節計反。

### 彖曰:既濟,亨,小者亨也。利貞,剛柔正而位當也。

既濟之時,大者固 (註 173) 已亨矣,唯有小者 (註 174) 亨也。時既濟矣,固宜貞固以 守之。卦才剛柔正當其位,當位者,其常也,乃正固之義,利於如是之貞 (註 175) 也。陰陽各得正位,所以爲既濟也。

### 初吉,柔得中也。

二以柔順文明而得中,故能成既濟之功。二居下體,方濟之初也;而又善處,是以 占也。

### 終止則亂,其道窮也。

天下之事,不進則退,无一定之理。濟之終,不進而止矣。无常止也,衰亂至矣,蓋 其道已窮極也。九五之才,非不善也,時極道窮,理當必變也,聖人至此奈何?曰 (註 176) :「唯聖人爲能通其變於未窮,不使至於極也,堯、舜是也,故有終而无亂。」

<sup>[</sup>註 171] 一有「未」字。底本「未」作「末」,形譌,據《註評》本、《二程集》更正。

<sup>[</sup>註172] 一无「之時」字。

<sup>[</sup>註173] 一无「固」字。

<sup>[</sup>註 174] 一有「未」字。

<sup>[</sup>註175] 一有「正」字。

<sup>[</sup>註176] 一无「曰」字。

#### 象曰:水在火上,既濟;君子以思患而豫防之。

水火既交,各得其用,爲既濟。時當既濟,唯慮患害之生,故思患 (註 177) 豫防,使不至於患也。自占天下既濟而致禍亂者,蓋不能思患而豫防也。

#### 初九:曳其輪,濡其尾,无咎。

初以陽居下,上應於四;又火體,其進之志銳也。然時既濟矣,進不已則及於悔咎 (註178),故曳其輪,濡其尾,乃得无咎。輪所以行,倒曳之,使不進也。獸之涉水, 必揭其尾;濡其尾,則不能濟。方既濟之初,能止其進,乃得无咎;不知已,則至 於咎也。

曳,以制反。濡,音儒。

#### 象曰:曳其輪,義无咎也。

既濟之初,而能止其進,則不至於極,其義自无咎也。

### 六二:婦喪其茀,勿逐,七日得。

二以文明中正之德,上應九五剛陽中正之君,宜得行其志也。然五既得尊位,時已 既濟,无復進而有爲矣,則於在下賢才,豈有求用之意?故二不得遂其行也。

自占既濟而能用人者,鮮矣!以唐太宗之用言,尚怠於終,況其下者乎?於斯時也, 則剛中反爲中滿,坎離乃爲相戾矣。人能識時知變,則可以言《易》矣。

二,陰也,故以婦言。茀,婦人出門以自蔽者也;喪其茀,則不可行矣。二不爲五之求用,則不得行,如婦之喪茀也。然中正之道,豈可廢也?時過則行矣。

逐者,從物也。從物則失其素守,故戒勿逐。自守不失,則七日當復得也。卦有六位,七則變矣。七日得,謂時變也。雖不爲上所用,中正之道,无終廢之理。不得 行於今,必行於異時也。聖人之(註179)勸戒深矣。

喪,息浪反。茀,方拂反。

### 象曰:七日得,以中道也。

中正之道,雖不爲時所用,然无終不行之理,故喪茀,七日當復得;謂自守其中, 異時必行也。不失其中,則正矣。

<sup>[</sup>註177]《四庫》本作「而」。

<sup>[</sup>註178] 一作「吝」。

<sup>[</sup>註179] 一有「爲」字。

#### 九三:高宗伐鬼方,三年克之,小人勿用。

九三當既濟之時,以剛居剛,用剛之至也。既濟而用剛如是,乃高宗伐鬼方之事。 高宗,必商之高宗;天下之事既濟,而遠伐暴亂也。威武可及,而以救民爲心,乃 臣者之事也,唯聖賢之君則可;若騁威武,忿不服,貪土地,則殘民肆欲也,故成 不可用小人。小人爲之,則以貪忿私意也;非貪忿,則莫肯爲也。

三年克之,見其勞憊之甚。聖人因九三當既濟而用剛,發此義以示人,爲法爲誠, 豈淺見所能及也?

### 象曰:三年克之, 憊也。

言憊,以見其事之至難,在高宗爲之則可;无高宗之心,則貪忿以殃 (註 180) 民也。 憊,備拜反。

#### 六四: 繻有衣袽,終日戒。

四在濟卦而水體,故取舟爲義。

四,近君之位,當其任者也。當既濟之時,以防患慮變爲急。繻,當作濡,謂滲漏也。舟有罅漏,則塞以衣袽。有衣袽以備濡漏,又終日戒懼不怠,慮患當如是也。不言占,方免於患也。既濟之時,免患則足矣,豈復有加也?

繻,而朱反。袽,女居反。

### 象曰:終日戒,有所疑也。

終日戒懼,常疑患之將至也。處既濟之時,當畏慎如是也。

### 九五:東鄰殺牛,不如西鄰之禴祭,實受其福。

五,中實,字也; 1,虛中,誠也。故皆取祭祀爲義。

東鄰,陽也,謂丘;西鄰,陰也,謂二。殺牛,盛祭也;禴,薄祭也。盛不如薄者, 時不同也。二、五皆有孚誠中正之德。二在濟下,尚有進也,故受福。丘處濟極, 无所進矣,以至誠中正守之,苟未至於反耳,理,无極而終不反者也。已至於極, 雖善處,无如之何矣,故《爻象》唯言其時也。

禴,羊略反。

<sup>〔</sup>註180〕一作「殘」

象曰:東鄰殺牛,不如西鄰之時也;實受其福,吉大來也。

五之才德非不善,不如二之時也。二在下,有進之時,故中正而孚,則其占大來, 所謂受福也。占大來者,在既濟之時爲大來也,「亨小」、「初吉」是也。

上六:濡其首,厲。

既濟之極,固不安而危也;又陰柔處之,而在險體之上。坎爲水,濟亦取水義,故 言其窮,至於濡首,危可知也。既濟之終,而小人處之,其敗壞可立而待也。

象曰:濡其首厲,何可久也?

既濟之窮,危至於濡首,其能長久乎?

# 東京 坎下 離上 **未濟**

《序卦》:「物不可窮也,故受之以未濟終焉。」

既濟矣,物之窮也;物窮而不變,則无不已之理。易者,變易而不窮也,故既濟之後,受之以未濟而終焉。未濟則未窮也,未窮則有生生之義。爲卦離上坎下。火在 水上,不相爲用,故爲未濟。

未濟:亨。小狐汔濟,濡其尾,无攸利。

未濟之時,有亨之理;而卦才復有致亨之道,唯在愼處。

狐能渡水,濡尾則不能濟。其老者多疑畏,故履冰而聽,懼其陷也。小者則未能畏 愼,故勇於濟。

泛,當為仡,壯勇之狀。《書》曰:「仡仡勇夫。」小狐果於濟,則濡其尾而不能濟也。未濟之時,求濟之道,當至愼則能亨,若如小狐之果,則不能濟也;既不能濟, 无所利矣。

汔,許訖反。

彖曰:未濟,亨,柔得中也。

以卦才言也。所以能亨者,以柔得中也。五以柔居尊位,居剛而應剛,得柔之中也。 剛柔得中,處未濟之時,可以亨也。

小狐汔濟,未出中也。

據二而言也。二以剛陽居險中,將濟者也。又上應於五險,非可安之地。五有當從之理,故果於濟,如小狐也。既果於濟,故有濡尾之患,未能出於險中也。

#### 濡其尾,无攸利,不續終也。

其進銳者,其退速。雖(註181) 勇於濟,不能繼續而終之,无所往而利也。

#### 雖不當位,剛柔應也。

雖陰陽不當位,然剛柔皆相應。當未濟而有與,若能重慎,則有可濟之理。二以汔濟,故濡尾也。卦之諸爻,皆不得位,故爲未濟。《雜卦》云:「未濟,男之窮也。」謂三陽皆失位也。斯義也,聞之成都隱者。

### 象曰:火在水上,未濟;君子以慎辨物居方。

水火不交,不相濟爲用,故爲未濟。火在水上,非其處也;君子觀其處不當之象, 以愼處於事物,辨其所當,各居其方,謂止於其所也。

#### 初六:濡其尾,吝。

六以陰柔在下,處險而應四。處險,則不安其居;有應,則志行於上。然己既陰柔,而 (註 182) 四非中正之才,不能援之以濟也。獸之濟水,必揭其尾,尾濡則不能濟。 濡其尾,言不能濟也。不度其才力而進,終末 (註 183) 能濟,可羞吝也。

### 象曰:濡其尾,亦不知極也。

不度其才力而進,至於濡尾,是不知之極也。

### 九二:曳其輪,貞吉。

在它卦,九居二,爲居柔得中,无過剛之義也。於未濟,聖人深取卦象以爲戒,明 事上恭順之道。

未濟者,君道艱難之時也。五以柔處君位,而二乃剛陽之才,而居相應之地,當用者也。剛有陵柔之義,水有勝火之象。方艱難之時,所賴者才臣耳,尤當盡恭順之道,故戒曳其輪,則得正而吉也。

<sup>[</sup>註181] 《四庫》本作「始雖」字。

<sup>[</sup>註182] 一无「而」字。

<sup>[</sup>註183]《二程集》作「不」。

倒曳其輪,殺其勢,緩其進,戒用剛之過也;剛過,則好犯上 (註 184) 而順不足。唐之郭子儀、李晟,當艱危未濟之時,能極其恭順,所以爲得正,而能保其終吉也。 於六丘,則言其貞吉光輝,盡君道之善。於九二,則戒其恭順,盡臣道之正,盡上下之道也。

象曰:九二貞吉,中以行正也。

九二得正而吉者,以曳輪而得中道,乃正也。

六三:未濟,征凶,利涉大川。

未濟征凶,謂居險,无出險之用而行,則凶也。必出險而後可征。

三以陰柔不中正之才而居險,不足以濟;未有可濟之道、出險之用而征,所以凶也。然未濟,有可濟之道;險,終有出險之理。上有剛陽之應,若能涉險而往從之,則濟矣,故利涉大川也。然三之陰柔,豈能出險而往?非時不可,才不能也。

象曰:未濟征凶,位不當也。

三征則凶者,以位不當也;謂陰柔不中正,无濟險之才也。若能涉險 [註 185] 以從應,則利矣。

九四:貞吉,悔亡。震用伐鬼方,三年有賞于大國。

九四陽剛,居大臣之位。上有虛中明順之主,又已出於險,未濟已過中矣,有可濟之道也。濟天下之艱難,非剛健之才不能也。九雖陽而居四,故戒以貞固則吉而悔亡。不貞則不能濟,有悔者(註186)也。

震,動之極也。占之人,用力之甚者,伐鬼方也,故以爲義。力勤而遠伐,至于三年,然後成功,而行大國之賞。必如是,乃能濟也。濟天下之道,當貞固如是。四居柔,故設此戒。

象曰:貞吉悔亡,志行也。

如四之才,與時合而加以貞固,則能行其志,吉而悔亡。鬼方之伐,貞之至也。

六五: 貞吉, 无悔。君子之光, 有孚, 吉。

<sup>[</sup>註184] 一无「上」字。

<sup>[</sup>註185] 一无「險」字。

<sup>[</sup>註186] 一无「者」字。

五,文明之主,居剛而應剛。其處得中,虛其心,而陽爲之輔;雖以柔居尊,處之 至正至善,无不足也。既得貞正,故吉而无悔。貞其固有,非戒也。以此而濟,无 不濟也。

五,文明之主,故稱其光。君子德輝之盛,而功實稱之,有孚也。上云「吉」,以貞也,柔而能貞,德之吉也。下云「吉」,以功也;既光而有孚,時可濟也。

#### 象曰:君子之光,其暉吉也。

光盛則有暉;暉,光之散也。君子積充而光盛,至於有暉,善之至也,故重云「占」。 暉 (註 187),許歸反。

#### 上九:有孚于飲酒,无咎。濡其首,有孚失是。

九以剛在上,剛之極也;居明之上,明之極也。剛極而能明,則不爲躁而爲決。明 能燭理,剛能斷義。

居未濟之極,非得濟之位,无可濟之理,則當樂天順命而已。若否終則有傾,時之變也。未濟則无極而自濟之理,故止爲未濟之極。至誠安於義命而自樂,則可无咎。 飲酒,自樂也。不樂其處,則忿躁隕穫,入于凶咎矣。若從樂而耽肆過禮,至濡其 首,亦非能安其處也。

有孚,自信于中也。失是,失其宜也。如是,則於有孚爲失也。人之處患難,知其 无可奈何,而放意不反者,豈安於義命者哉?

### 象曰:飲酒濡首,亦不知節也。

飲酒至於濡首,不知節之甚也。所以至如是,不能安義命也;能安,則不失其常矣。

### 《周易》下經 卷第六終

<sup>[</sup>註187] 底本作「揮」,形譌,據《象》文更正。

## 附録一《宋史・程頤傳》

程頤,字正叔。年十八,上書闕下,欲天子黜世俗之論,以王道爲心。游太學, 見胡瑗問諸生以顏子所好何學,頤因答曰:

學以至聖人之道也。聖人可學而至歟?曰:然。學之道如何?曰:天地儲精,得五行之秀者爲人,其本也眞而靜;其未發也,五性具焉,曰仁、義、禮、智、信。形既生矣,外物觸其形而動其中矣。其中動而七情出焉,曰喜、怒、哀、樂、愛、惡、欲。情既熾而益蕩,其性鑿矣。是故覺者約其情,使合於中;正其心,養其性。愚者則不知制之,縱其情而至於邪僻,梏其性而亡之。

然學之道,必先明諸心,知所養,然後力行以求至,所謂「自明而誠」也。誠 之之道,在乎信道篤。信道篤,則行之果;行之果,則守之固。仁義忠信不離乎心, 造次必於是,顚沛必於是,出處語默必於是。久而弗失,則居之安,動容周旋中禮, 而邪僻之心無自生矣。

故顏子所事,則曰:「非禮勿視,非禮勿聽,非禮勿言,非禮勿動。」仲尼稱之,則曰:「得一善,則拳拳服膺而弗失之矣。」又曰:「不遷怒,不貳過。」有不善,未嘗不知,知之未嘗復行。此其好之篤,學之得其道也。然聖人則不思而得,不勉而中;顏子則必思而後得,必勉而後中。其與聖人相去一息,所未至者守之也,非化之也。以其好學之心,假之以年,則不日而化矣。

後人不達,以謂聖本生知,非學可至,而爲學之道遂失。不求諸己,而求諸外, 以博聞強記、巧文麗辭爲 [,榮華其言,鮮有至於道者。則今之學,與顏子所好異 矣。

瑗得其文,大驚異之,即延見,處以學職。呂希哲首以師禮事頤。

治平、元豐間,大臣屢薦,皆不起。哲宗初,司馬光、呂公著共疏其行義曰:「伏 見河南府處士程頤,力學好占,安貧守節,言必忠信,動遵禮法。年逾五十,不求 仕進,真儒者之高蹈,聖世之逸民。望擢以不次,使士類有所矜式。」詔以爲西京 國子監教授,力辭。

尋召爲秘書省校書郎。既入見,擢崇政殿說書。即上疏言:「習與智長,化與心成。今夫人民善教其子弟者,亦必延名德之上,使與之處,以薰陶成性。況陛下春秋之富,雖睿聖得於天資,而輔養之道不可不至。大率一日之中,接賢士大夫之時多,親寺人宮女之時少,則氣質變化,自然而成。願選名儒入侍勸講,講罷留之分直,以備訪問。或有小失,隨事獻規,歲月積久,必能養成聖德。」頤每進講,色甚莊,繼以諷諫。聞帝在宮中盥而避蟻,問:「有是乎?」曰:「然,誠恐傷之爾。」頤曰:「推此心以及四海,帝王之要道也。」

神宗喪未除,多至,百官表賀,頤言:「節序變遷,時思方切,乞改賀爲慰。」 既除喪,有司請開樂置宴,頤又言:「除喪而用吉禮,尚當因事張樂,今特設宴,是 喜之也。」皆從之。帝嘗以瘡疹不御邇英累日,頤詣宰相問安否,且曰:「上不御殿, 太后不當獨坐。且人主有疾,大臣可不知乎?」翌日,宰相以下始奏請問疾。

蘇軾不悅於頤,頤門人賈易、朱光庭不能平,合攻軾。胡宗愈、顧臨詆頤不宜 用,孔文仲極論之,遂出管勾西京國子監。久之,加直秘閣,再上表辭。董敦逸復 摭其有怨望語,去官。紹聖中,削籍竄涪州。李清臣、尹洛,即日迫遣之,欲入別 叔母,亦不許。明日,贐以銀百兩,頤不受。徽宗即位,徙峽州,俄復其官,又奪 王崇寧。卒年七十五。

頤於書無所不讀。其學本於誠,以《大學》、《語》、《品》、《中庸》爲標指,而達於《六經》。動止語默,一以聖人爲師,其不至乎聖人不止也。張載稱,其兄弟從十四五時,便脫然欲學聖人,故卒得孔、孟不傳之學,以爲諸儒倡。其言之旨,若布帛菽粟然,知徳者尤尊崇之。嘗言:「今農夫祁寒暑雨,深耕易耨,播種五穀,吾得而食之;百 [技藝,作爲器物,吾得而用之;介冑之上,被堅執銳,以守土字,吾得而安之。無功澤及人,而浪度歲月,晏然爲天地間一蠹,唯綴緝聖人遺書,庶幾有補爾。」於是著《易》、《春秋傳》以傳於世。

平生誨人不倦,故學者出其門最多,淵源所漸,皆爲名上。涪人祠頤於北巖, 世稱爲伊川先生。嘉定十三年,賜諡曰正公。淳祐元年,封伊陽伯,從祀孔子廟庭。

## 附録二 馬端臨《文獻通考・伊川易傳》 卷一百七十六・經籍考三

### 《伊川易傳》十卷

程子序:「至微者,理也;至著者,象也。體用一源,顯微无間。觀會通以行其 典禮,則辭無所不備。故善學者,求言必自近;易於近者,非知言者也。予所傳者, 辭也;由辭以得意,則在乎人焉。」

《遺書》張閎中以書問《易》之義,本起於數。程子答曰:「謂義起數則非也。有理而後有象,有象而後有數。《易》,因象以知數,得其義,則象在其中矣。必欲窮象之隱微,盡數之毫忽,乃尋流逐末,術家所尚,非儒者之務也。管輅、郭璞之學是已。」又曰:「理,無形也,故因象以明理。理見乎辭者也,則可由辭以觀象。故曰:『得其義,則象數在其中矣。』」門弟子請問《易傳》事,雖有一字之疑,伊川必再三喻之。蓋其潛心甚久,未嘗容易下一字也。

伊川以《易傳》示門人曰:「亦只說得七分,後人更需自體究。」

朱子曰:「自秦、漢以來,考《象辭》者,泥於術數,而不得其弘通簡易之法; 談義理者,淪於空寂,而不適乎仁義中正之歸。求其因時立教,以承三聖不同於法 而同於道者,則惟伊川先生程氏之書而已。後之君子,誠能日取其一卦若一爻者, 熟復而深玩之,如己有疑,將決於筮而得之者,虛心端意推之於事,而反之於身, 以求其所以處此之實,則於占凶消長之理,進退存亡之道,將無所求而不得。邇之 事父,遠之事君,亦無處而不當矣。」

程子高弟尹公嘗謂:「《易傳》乃夫子自著,欲知道者,求於此足矣,不必旁觀他書。蓋語錄或有他人所記,未必盡得先生意。」又言:「先生踐履,盡一部《易》。 其作《傳》,只是因而寫成。」此言尤有味。

又曰:「《易傳》不看本文,亦自成一書。」

又曰:「《易傳》明白,無難看處。但此是先生以天下許多道理,散入六十四卦 三百八十四爻之中。將作《易》看,卻無意味。須將來作事看,即句句字字有用處 耳。程先生《易傳》義理精,字數足,無一毫欠缺,只是於本義不相合。《易》本是 卜筮之書,程先生只說得一理。」

《程易》言理甚備,象數卻欠在。

按:「伊川之《易》,精於義理,而略於卜筮象數,此固先儒之說;然愚嘗以爲,《易》之象數卜筮,豈出於義理之外?蓋有此理則有此象、有此數,而卜筮之說,其所謂『趨吉避凶、惠迪從逆』云者,又未嘗不一出於義理。平時本諸踐履,則觀象玩辭,此義理也;一旦謀及卜筮,則觀變玩占,亦此義理也。初不必岐而二之。然言出聖賢之口,則單辭片語,皆有妙理;假借旁通,悉爲至教。往往多借《易》以明理,初不拘於說《易》也。自夫子而然矣,何也?『君子學以聚之,問以辨之,寬以居之,仁以行之。』爲乾九二而言也,而乾之九二,豈有學問寬仁之義乎?『日往則月來,月往則日來,日月相推而明生焉。寒往則暑來,暑往則寒來,寒暑相推而歲成焉。』爲咸之九四而言也,而咸之九四,豈有歲時代謝之義乎?蓋其初因講《易》,遂借《易》以言理;言理雖精,而於《易》此卦此爻之旨則遠矣。如程子因『君子豹變』而發爲自暴自棄之論,因『君子得輿』而發爲《匪風・下泉》之論,亦是意也。晦庵所謂『不看本文,自成一書』者是已。」

電氏曰:「朱震言頤之學出於周敦頤。敦頤得之穆修,亦本於陳摶與邵雍之學。 然考正叔之解,不及象數,頗與胡翼之相類。景迂云:『胡武平、周茂叔,同師潤州 鶴林寺僧壽涯。其後武平傳其學於家,茂叔則授二程。』與震之說不同。」

按:伊川之學,出自濂溪,此先儒通論也;而鼂、朱之說,以爲濂溪所師,本 於希夷及一僧,則固老釋之宗旨矣。此論未之前聞。

陳氏曰:「伊川止解六十四卦,不解《大傳》,而以《序卦》分置諸卦之首。唐李鼎祚《集解》亦然。」

## 附錄三 朱彝尊《經義考·程氏頤易傳考》 卷二十·易十九

### 程氏頤《易傳》、《通考》十卷(《宋志・傳》九卷、《繋辭解》一卷)

《東都事略》:「頤,字正叔,以經術爲諸儒倡。哲宗即位,司馬光、呂公著上 其行事於朝,授汝州團練推官、西京國子監教授。頤力辭。又以爲祕書郎,召至京師,除崇政殿說書。罷職,監西京國子監。父喪服除,尋以直祕閣判西京國子監, 主管崇福宮。紹聖中,黨論興,頤坐貶官涪州安置,元符末放還。崇寧初,復判西 京國子監。屛居伊闕山數年,卒年七十五。學者尊之,稱爲伊川先生。有《易傳》 六卷。諸經解說未成,編者附於《集》。」

程子《自序》曰:(見《易傳序》全文)

尹焞曰:「先生平生用意,惟在《易傳》;求先生之學,觀此足矣。」

楊時《跋》曰:「伊川先生著《易傳》, 方草具, 未及成書, 而先生得疾。將啓 手足,以其書授門人張繹。未幾, 繹卒, 故其書散亡,學者所傳無善本。政和之初, 予友謝顯道得其書於京師, 示予,錯亂重複,幾不可讀。東歸, 待次毘陵, 乃始校 定, 去其重複, 踰年而始完。先生道學足爲世師, 而於《易》尤盡心焉。其微辭妙 旨,蓋有書不能傳者,恨得其書晚, 不及親受旨訓。其謬誤有疑而未達者, 站存之 以俟知者, 不敢輒加損也。然學者得其書, 得其意, 忘言可爾。」

晁公武曰:「朱震言,頤之學出於周惇頤。惇頤得之穆修,亦本於陳摶,與邵雍之學本同。然考正叔之解,不及象數,頗與胡翼之相類。景迂云:『胡武平、周茂叔,同師潤州鶴林寺僧壽涯。其後武平傳其學於家,茂叔則授二程。』與震之言不同。」

陳造曰:「程氏之學,與蘇氏角立,通儒碩士,不可偏廢,多所發明。」

呂祖謙《跋》曰:「伊川先生遺言見於世者,獨《易傳》爲成書。傳摹浸舛,失

其本真,學者病之。某舊所藏本,出尹和靖先生家,標注皆和靖親筆。近復得新安朱元晦所訂,讎校精甚;遂合尹氏、朱氏書,與一、二同志,手自參定,其同異兩存之,以待知者。既又從小學家是正其文字,雖未敢謂無遺恨,視諸本亦或庶幾焉。會稽周汝能堯夫、鄮山樓鍔景山,方職教東陽,迺取刊諸學宮。」又曰:「《程氏易傳》理到語精,平易的當,立言無毫髮遺憾。」

馮當可曰:「王輔嗣蔽於虛無,而易與人事疏。伊川專於治亂,而《易》與天道遠。」又曰:「近有伊川,然後《易》與世故通,而王氏之說爲可廢。然伊川往往舍畫求《易》,故時有不合;又不會通一卦之體,以觀其全,每求之爻辭離散之間,故其誤上猶五六。」

陳振孫曰:「伊川止解六十四卦,不解《大傳》,而以《序卦》分置諸卦之首。 唐李鼎祚《集解》亦然。」

朱子《跋》曰:「《易》之爲書,更三聖而制作不同。若包羲氏之象,文 E之辭,皆依卜筮以爲教,而其法則異。至於孔子之贊,則又一以義理爲教,而不專於卜筮也。是豈其故相反哉?俗之淳漓既異,故其所以爲教爲法,不得不異,而道則未嘗不同也。然自秦、漢以來,考《象辭》者,泥於術數,而不得其弘通簡易之法;論義理者,淪於空寂,而不適乎仁義中正之歸。求其因時立教,以承三聖,不同於法同於道者,則惟伊川先生程氏之書而已。」

陳淳曰:「自秦以來,《易》幸全於遺燼,道則晦而不章。卑者,泥於窮象數,而穿鑿附會,爲災異之流;高者,溺於談性命,而支離放蕩,爲虛無之歸。程子蓋深病焉,於是作《傳》以明之,一掃諸儒之陋見,而傳即日用事物之著,發明人心天理之實。學者於是始知《易》爲人事切近之書。」

魏了翁曰:「《程易》明白正大,切於治身,切於用世,未易輕議,故無智愚皆 知好之。」

馬端臨曰:「伊川之《易》,精於義理,而略於卜筮象數,此固先儒之說;然愚嘗以爲《易》之象數卜筮,豈出於義理之外?蓋有此理則有此象、有此數,而卜筮之說,其所謂『趨吉避凶、惠迪從逆』云者,又未嘗不一出於義理。平時本諸踐履,則觀象玩辭,此義理也;一旦謀及卜筮,則觀變玩占,亦此義理也。初不必岐而二之。然言出聖人之口,則單辭片語,皆有妙理;假借旁通,悉爲至教。往往多借《易》以明理,初不拘於說《易》也。自夫子而然矣,何也?『君子學以聚之,問以辨之,寬以居之,仁以行之。』爲乾九二而言也,而乾之九二,豈有學問寬仁之義乎?『日往則月來,月往則日來,日月相推而明生焉。寒來則暑往,暑往則寒來,寒暑相推而歲成焉。』爲咸之九四而言也,而咸之九四,豈有歲時代謝之義乎?蓋其初因講

《易》,遂借《易》以言理;言理雖精,而於《易》此卦此爻之旨則遠矣。如程子因 『君子豹變』而發爲自暴自棄之論,因『君子得輿』而發爲《匪風·下泉》之論, 亦是意也,晦庵所謂『不看本文,自成一書』者是已。」

董真卿曰:「《程傳》正文,只據王弼本,亦只有六十四卦。《繫》、《序》《傳》 有及爻卦者,掇入《傳》中,故無《繫辭》以後。至東萊呂氏始集周子、二程子、 張子諸家經說、語錄及程子門人共十四家之說,爲《精義》以補之。」

朱升曰:「京房吹律,其爲數也,徒煩於推衍。王弼亡象,其爲理也,遂荒於高 虚。程子發明《易》之理,而加一倍法之言,則知數者,莫程子若也。」

上韓曰:「邵子之《易》本於數,程子之《易》本於理,爲得先天後天之祕;而理數二者,未始相離也。」

何喬新曰:「自漢以來,考象占者,泥於術數,而不得其弘通簡易之法;談義理者,淪於空寂,而不適乎仁義中正之歸。迨程子作《易傳》,《易》之義理始大明; 朱子作《本義》,《易》之象占始益著。蓋程子之《易》,發揮孔子之《上翼》者也; 朱子之《易》,則推三聖教人卜筮之旨者也。後世有功於《易》道,非程子而何哉?」

李瓚曰:「伊川之《易》,有用之學也,自是程氏之《易》與孔子《十翼》同功, 非特解經而已。或者例以注疏觀之,非真知程子者矣。」

楊時喬曰:「《程傳》說理精到,而於卜筮未合。」又曰:「程伯子論《易》理, 叔子著《易傳》,惟舉所聞於周子太極之說,與自家體貼發明,無遺理。」

郝敬曰:「程正叔《易傳》,大抵因王輔嗣之舊廓而充之,於象數闊略,徒執君 子小人治亂生解。其於三極之道,殊覺偏枯。」

## 附錄四 《四庫全書・伊川易傳提要》

### 《伊川易傳》四卷

宋程子撰。程子事蹟具《宋史·道學傳》。卷首有元符二年自序。考程子以紹聖四年編管涪州,元符三年遷峽州,則當成於編管涪州之後。王偁《東都事略》載是書作六卷,《宋史·藝文志》作九卷,《二程全書》通作四卷。考楊時《跋語》稱:「伊川先生著《易傳》,未及成書,將啓手足,以其書授門人張繹。未幾繹卒,故其書散亡,學者所傳無善本。謝顯道得其書於京師,以示余,錯亂重複,幾不可讀。東歸,待次毘陵,乃始校正,去其重複,踰年而始完」云云。則當時本無定本,故所傳各異耳。

其書但解上下《經》,及《彖》、《象》、《文言》。用王弼注本,以《序卦》分置諸卦之首。用李鼎祚《周易集解》例,惟《繫辭傳》、《說卦傳》、《雜卦傳》無注。董眞卿謂亦從王弼。今考程子《與金堂謝湜書》謂:「《易》當先讀王弼、胡瑗、王安石三家。」謂程子有取於弼,不爲無據。謂不注《繫辭》、《說卦》、《雜卦》以擬王弼,則似未盡然。當以楊時「草具未成」之說爲是也。

程子不信邵子之數,故邵子以數言《易》,而程子此《傳》則言理;一闡天道, 一切人事。蓋古人著書,務抒所見而止,不妨各明一義。守門戶之見者,必堅護師 說,尺寸不容踰越,亦異乎先儒之本旨矣。乾隆四十六年十月恭校。

•			

## 附錄五 丁晏《周易述傳・書後》

蒙少而讀《易》,自漢、唐迄宋、元、明之注解,汎濫旁求,無慮百數十家, 然而無所得。迨年逾六旬,篤嗜程子之傳,朱墨點勘,日翫一卦,兩閱月而卒業, 爲之歎絕,以爲孔子之後,一人而已。

夫程子之《傳》,憂患之書也。自序稱元符二年己卯正月,已在紹聖中坐黨論削籍之後,正竄逐涪州之時也。《傳》言未濟三陽失位,聞之成都隱者,足見《易傳》作於在蜀之時。呂堅中記伊川自涪歸,《易傳》已成。未出示人,門弟子請業,方取書篋,身自發之。呂氏謂其潛心甚久,未嘗輕易下一字。馮忠恕記伊川歸自涪,氣貌容色髭髮,皆勝平昔。門人問何以得此,曰:「學之力也。素患難,行乎患難,其得力在於學《易》。古人所謂『蒙難艱貞也』。」竊謂,非程子明理之學,不能爲此《傳》;非程子進講之忠,不能爲此《傳》;非程子身罹憂患,遠竄流離,亦不能爲此《傳》。惟其閱歷既深,造詣益進,洞然於陰陽消長之數,吉凶悔吝之機。其見幾也微,其取旨也遠;言之者無罪,聞之者足以戒。可以立身,可以處事。舉而措之,可以治天下國家。此聖人之學也,第視爲解經,抑末矣!

夫聖人《十翼》之傳,明白顯易,不煩注言,而後儒之說《易》者,解愈繁而義愈晦,理愈鑿而道愈歧。即使探賾索隱,抉幽洞微,非聖人易知簡能之學,支離曼衍,庸有當於《易》乎?程子之學,明於政治得失之原,切於身心日用之要,欲學聖人之《易》,舍程子無由入也。《繫辭》之傳,所指者不過十數卦,而大義揭明。聖人之言,引而不發,至程子暢發無遺,啓天人之奧秘,所謂「體用一源,顯微無間」。其說《易》一依聖人之傳,不取周子太極、無極之說,亦不取邵子河洛先天之說,使學者曉然於平易之旨、中正之歸,而不流於術數。得聖人之正傳者,程子也。朱子《本義》每云《程傳》備矣,不讀《程傳》,則《本義》仍不能明。由朱子而上契程子,由程子而上契孔子,斯聖人之立教,《易傳》所以昭示來茲也。

然使程子經筵侍講得志於朝,而其《傳》之立言或不能如是之痛切。不幸有孔文仲輩忮害而摧抑之,至於阻漢江之渡,觸灩澦之舟,亦云危矣,而其學卒以不朽,又安知天之所以阨之者,非即所以成之也與?《易》之終也,不曰「小人道消」,而曰「小人道憂」,蒙於程子《易傳》,而知其憂之深也。清咸豐乙卯七月。

## 附錄六 〈楊守敬記〉

右元至正己丑積德書堂刊本,中缺宋諱,當爲重翻宋本。唯首載朱子九圖,又 《精義》題晦菴先生校正,恐皆是坊賈所爲。其東萊一跋,此本亦遺之。據董鼎《周 易會通》補入。按《東都事略》、《書錄題解》、並云《易傳》六卷。而《文獻通考》 及《宋志》均作十卷(《宋志》:《傳》九卷,《繋辭解》一卷)。《二程遺書》則併爲 四卷。惟錢遵王《敏求記》載有六卷本。其參差之故,或謂當時本無定本,故所傳 各異;而其實非也。余謂《遺書》之四卷,爲明人所併。端臨之十卷,蓋據時坊刻 《程朱傳義合刊》云然;而《宋志》因之,非別有所據傳鈔本也。日本昌平學藏有 《程朱傳義》上卷, 元延祐甲寅孟冬, 翌巖精舍刊本(余亦得殘本二冊), 亦缺宋諱, 則其根源於宋本無疑。蓋自宋董楷有《周易傳義附錄十四卷》,坊賈遂以朱子所定之 古文從《程傳》,而以《程傳》之卷第從《本義》,又刪其所載異同(唯明廣東崇德 堂刊本載異同,而音義亦刪除),而二書皆失本眞。後來各析爲書,而二書又各相攘 奪。近世《本義》有重刊吳革本,始復朱子之舊,而《程傳》原本終不可見。此本 乃爲六卷,又異同兩存,其爲東萊定本無疑。至《繫辭精義》,《書錄解題》稱館閣 書目,以爲託祖謙之名。今按所載諸家之說,翦截失常,謂爲僞託,似不誣然。此 書流傳尤少,其中所載《龜山易說》,久已失傳,存之亦未必不無考證焉。光緒癸未 嘉平月宜都楊守敬記。



## 後記

點校《易程傳》,從斷句始,然後電腦打字,至一校再校,卒之定稿,歷時年餘。付梓之前,又修正閱月。點校過程可謂誠惶誠恐,彷彿萬一之漏,即不足以告慰伊川先生在天之靈也。

在此之前,坊間已見《易程傳》之點校成果,唯余不敏,只道所持之六卷刻本,頗多桀誤,難以卒讀,遂立志點校。先取《文淵閣四庫全書》之《伊川易傳》參校,別其異同。後陸續發現,黃忠天《周易程傳註評》、蘇俊源《白話易程傳》、梁書弦《程氏易傳導讀》及王孝魚《二程集》等,已在坊間流通。《二程集》刊行於 1981年,距今27年,余從未涉獵,聞之不禁赧顏。

於是,爲彌補疏漏,先後羅致。每得一本,即與手稿並肩校讎,即使標點符號 亦不輕放。每遇斷句不同處,更反覆誦讀,比較文意異同,方下定奪。如是者,《程 傳》讀之再三,不知凡幾。

余之點校原則,大體而言,於斷句部分,俾使現代人閱讀方便,句逗宜多不宜 少;即文句可斷可不斷者,斷之,以求其文意清晰。於標點部分,或因讀者理解意 見不一,又或對標點使用之觀念亦異,固難一概而論也;要之,務求體例一貫,不 致前後雜亂而已。略舉其例言之。

一、文句可斷可不斷者,斷之,以求其文意清晰。

如乾卦:

乾:元、亨、利、貞。

《二程集》:

重乾爲乾。乾,天也。天者天之形體,乾者天之性情。

本書點校:

重乾爲乾。乾,天也。天者,天之形體;乾者,天之性情。

又《二程集》:

元亨利貞謂之四德。元者萬物之始,亨者萬物之長,利者萬物之遂,貞者萬物 之成。

#### 本書點校:

元、亨、利、貞,謂之四德。元者,萬物之始:亨者,萬物之長:利者,萬物 之遂:貞者,萬物之成。

#### 二、標點務求體例一貫,不致前後雜亂。

如小畜卦上九:

象曰:既與既處,德積載也;君子征凶,有所疑也。

「德積載也」後,有作句號者,有作分號者。《象》所論,皆由卦爻辭來,言二事,間之句號,或作分號,皆可也。《象》凡言二事,二事之間本書皆作分號,所謂體例一貫也。如於此爲句號,於彼爲分號,則亂無制度矣。

或曰:「前賢點校《程傳》之功已著,踵其事,尚可增其華乎?」曰:「余點校《程傳》,志在進德修業耳,豈敢望與前賢爭勝。然在參校過程中,心領神會處,或有愚者之一得也。」舉二例言之:

如師卦六三:師或輿尸,凶。象曰:師或輿尸,大无功也。《程傳》:

倚付二三安能成功岂唯无功所以致凶也。

《二程集》點校爲:

倚付二三,安能成功?宣唯无功,所以致凶也。(《註評》本、《導讀》本 同。)

#### 本書點校則爲:

倚付二,三安能成功?豈唯无功,所以致凶也。(《白話》本同)

推敲之,《白話》本與本書點校更符《程傳》原意。理由厥有二端:

- 1. 倚者, 靠也, 有所靠必有所偏, 非二即三也。如**囊**括二、三, 則不能稱「倚」 矣。
  - 2. 《程傳》於「師卦六三爻辭」云:

「師旅之事,任當專一。二既以剛中之才,爲上信倚,必專其事,乃 有成功。若或更使眾人主之,凶之道也。輿尸,眾主也,蓋指三也。」

味其言,謂倚於二則可,乃有成功;若倚三,不但无功,尚且致凶也。「輿尸, 眾主也,蓋指三也。」據此,故知「倚付二三」之斷句爲非是。

又如大畜卦,彖曰:……。剛上而尚賢,能止健,大正也。

#### 《二程集》:

剛上,陽居上也。陽剛居尊位之上爲尚賢之義。止居健上,爲能止健

之義。止乎健者,非大正則安能以剛陽在上與尊尚賢德?能止至健,皆大正之道也。(《導讀》本與之相同,不另列。)

#### 《註評》本:

剛上,陽居上也,陽剛居尊位之上,爲尚賢之義。止居健上,爲能止 健之義,止乎健者,非大正則安能?以剛陽在上,與尊尚賢德,能止至健, 皆大正之道也。

#### 《白話》本:

剛上,陽居上也。陽剛居尊位之上,爲尚賢之義。止居健上,爲能止 健之義。止乎健者,非大正則安能以剛陽在上與尊尚賢德?能止至健,皆 大正之道也。

#### 本書點校:

剛上,陽居上也。陽剛居尊位之上,爲尚賢之義。止居健上,爲能止 健之義。止乎健者,非大正,則安能以剛陽在上與尊尚賢德?能止至健, 皆大正之道也。

《二程集》之疏略,在「陽剛居尊位之上爲尙賢之義」與「非大正則安能以剛陽在上與尊尙賢德」二句,宜斷而未斷。《註評》本斷句無誤,唯宜用句號處卻作逗號。《白話》本病在「非大正則安能以剛陽在上與尊尙賢德」一句,亦宜斷而未斷也。

分析之:「剛上,陽居上也。」此釋「剛上」之義,義理完備,宜斷爲一句,加句號。「陽剛居尊位之上,爲尚賢之義。」此釋「尚賢」,義理完備,亦宜爲一句,加句號。惟《二程集》不斷句,讀來語氣冗長,美中不足。「止居健上,爲能止健之義。」此釋「能止健」,義理完備,亦宜爲一句,加句號。唯《註評》本加逗號,連下讀,致義理不明矣。

「止乎健者,非大正,則安能以剛陽在上與尊尚賢德?」此句標點,《二程集》、《白話》本「非大正」不斷句,共十六字,冗長難讀,理解頗費時。《註評》本於「安能」後斷句,加問號,語氣突兀,文義亦異矣,不得不辨。依《註評》本之斷句,則大正之道有三:剛陽在上,尊尚賢德,能止至健。如依本書之斷句,則凡能「止乎健者,皆大正之道也」。何者較合《程傳》本意?請讀者自辨。

此節程氏釋大正之道,十分重要,乃其政治哲學之大本也;詳辨之,非欲與前賢爭勝,不得不已也。君人之道,以大正爲本;讀《易程傳》,余知治道矣。不敢以點校爲功,但「願無伐善,無施勞」,聖訓言猶在耳。余五十始學《易》,兢兢於是,但求無愧於古人。

本書承蒙何教授廣棪推薦付梓,謹識於文末,以表謝意。

2008/3/31